


Ph. Pr.

989²

Professor



SAMUELIS L.B. de PUFENDORF
De

OFFICIO HOMINIS ET CIVIS

juxta Legem Naturalem

LIBRI DUO.

OBSERVATIONIBUS

ANTEA SEPARATIM

EDITIS,

Quibus pleraque certius de-
finiuntur, ac Supplementa, quâ ad
Solida Juris Naturalis fundamenta jacienda maxi-
me necessaria videbantur, præmissis etiam de
Habitū hujus Disciplinæ Prolego-
meris, exhibentur,

LOCUPLETATI

Autore

D. Gottlieb Gerhard Titio.

LIPSIÆ,

Sumptibus HERED. LANCISH. 1709.

**Bayerische
Staatsbibliothek
München**


Illustrissimo atque Celsissimo
Heroi

DOMINO
GUSTAVO OT-
TONI STEENBOCK,

Comiti in Bogesund, Libero Baroni in Chro-
nebeck & Oebresteen &c.

Regni Sveciæ Archithalasso & Acade-
miæ Gothorum Carolinæ Can-
cellario &c.

Domino Meo Gratio-
sissimo.



ILLUSTRISSE ATQVE
CELSISSE COMES,
DOMINE GRATIOSIS-
SIME,



*Aut levis in diversa ani-
mum meum distrabebat
dubitatio, num satis ex
decoro foret, tantillum
opus tam illustri sibi No-
minis auspicia adscitum ire. Nam ex
una parte ruborem incutiebat libelli te-
nuitas, qui nullius ingenii aut splendo-
ris capax erat; quippe prima dunta-
xat rudimenta moralis philosophiæ, ex
diffusiore nostro opere fere excerpta,
complectens. Qui uti fortasse aliquem
præbere usum potest primum eam ad di-
sciplinam gradum molientibus: ita si
et fastigii Tui, et meæ obligationis hec
habenda erat ratio, ad neutram satis
ad-*

adparebat attemperatus. Ex altera parte devotissimum ILLUSTRISSIMÆ TUÆ EXCELLENTIÆ animum stimulabant privata non minus, quam publica Tua merita, ut ingrati notam sibi vehementer pertimescendam duceret, si qualemcunque occasionem negligeret saltem contestandi, quantopere, Eidem foret devinctus. Neque de illis jam meritis loquor, queis per res domi forisque egregie gestas patriam Tibi maximopere obstrictam reddidisti, simulque Nomen Tuum immortali gloria dudum dedicasti. Ista pro dignitate recensere, historia labor est, quæ dum circa gloriosissima Nationis Tuæ facinora, & felicissime per tot regiones circumlata arma desudat, magnam Te semper tantarum rerum partem deprehendit; Eundemque, ubi à bellis cessatum est, primum amplissima provincia gubernanda, post totius regni tutorio moderamini admotum non minus pacis artibus

)(3

efflo-

Dedicatio.

*efflorescentem admiratur. Ista potius
hoc loco attingere fas fuerit, quæ in re-
centem hanc Academiam, in qua invi-
tante Optimo Maximo REGE fortu-
narum sedem figere mihi datum fuit,
ab ILLUSTRISSIMA TUA EXCEL-
LENTIA profecta sunt. Quæ Te sa-
pientissimum juxta ac benignissimum
defensorem, ac summum moderatorem
nunquam pro meritis satis deprædi-
care potest, dum suis commodis ac or-
namentis inter tantam publicorum ne-
gotiorum molem citra tædium velifi-
cantem quotidie deprehendit. Enim-
vero quæ peculiariter ILLUSTRISSI-
MA TUA EXCELLENTIA in me
contulit, qua cum veneratione à
me aestimanda sunt? Aliis summa voto-
rum est, id fastigii Viris innotescere, &
probari. Ast mihi ita effusa Tua gra-
tia allubuit, ut eandem & in commodis
meis promovendis, & in assultibus ma-
levolorum abs me averruncandis non
semel*

Semel benignissimam expertus sim. Quibus ut aliquid reponatur, cum longe supra mensuram fortunæ meæ sit; necessarium tamen utique fuerit, saltem submisso animi cultu, & ingenua tot beneficiorum professione defungi; postquam id quoque summorum Virorum benignitas habet, ut grati contestatione animilibenter sibi satisfieri patiatur. Et quia generosis mortalium solenne est, etiam tenui sibi exhibito cultui interpretatione pietatis dignationem ultro addere; id quoque ILLUSTRISSIMÆ TUÆ EXCELLENTIÆ bonitas sperare me jubet, ut in magnitudinem Tuam deliquisse non videar; si tam exiguo opusculo utar in occasionem publice exprimendi erga Eandem devotissimi mei animi. Nam splendidius aliquod, & quod ævum ferre queat opus, abs me expectare longum fuerit: præsertim cum immane quantum refrigerentur ingenia, si deprehendant, dum vulgo sese laborant

Dedicatio.

*borant eripere, livorem & inscitiam
impune in se dentem exercere, otii ratio-
nem non reddi. Novo tamen vigore
efflorescet animus, & oborta tædia eji-
ciet, si huncce cultum ab ILLUSTRIS-
SIMA TUA EXCELLENTIA placida
fronte admissum intellexero: simulque
imposterum de gratia, & patrocinio Tuo
securum me esse jasseris. Ita DEUS
O.M. ILLUSTRISSIMAM TUAM
EXCELLENTIAM, in Patria, Splendi-
dissimæ Tuæ Familiae, ac nostræ novellæ
reip. decus ac emolumentum plurimos
per annos florentem vigentemque con-
servet!*

**ILLUSTRISSIMÆ TUÆ
EXCELLENTIÆ**

devotissimus

*Londini Scanorum
X. Kal. Febr. A.M. DC. LXXIII.*

Samuel PUFENDORF.

ELEN.

⚙ (○) ⚙

ELENCHUS CAPITUM LIBRI PRIMI.

Cap. I. DE ACTIONE HUMANA.

Cap. II. DE NORMA ACTIONUM HUMANARUM, SEU DE LEGE IN GENERE.

Cap. III. DE LEGE NATURALI.

Cap. IV. DE OFFICIO HOMINIS ERGA DEUM, SEU DE RELIGIONE NATURALI.

Cap. V. DE OFFICIO HOMINIS ERGA SEIPSUM.

Cap. VI. DE OFFICIO QUORUMLIBET
ERGA QUOSLIBET; ET PRIMO,
DE NON LÆDENDIS ALIIS.

Cap. VII. DE AGNOSCENDA NATURALI HOMINUM ÆQUALITATE.

Cap. VIII. DE PROMISCUIS OFFICIIS
HUMANITATIS.

Cap. IX. DE OFFICIO PACISCENTIUM
IN GENERE.

Cap. X. DE OFFICIO SERMOCINANTIUM.



Cap. XI. DE OFFICIO JURANTIUM.

Cap. XII. DE OFFICIO CIRCA ADQVI-
RENDUM RERUM DOMINIUM.

Cap. XIII. DE OFFICIIS, QUÆ EX DO-
MINIO RERUM PER SE RESUL-
TANT.

Cap. XIV. DE PRETIO.

Cap. XV. DE CONTRACTIBUS, QUI
PRETIA RERUM PRÆSUPPO-
NUNT, ET FLUENTIBUS INDE
OFFICIIS.

Cap. XVI. QUIBUS MODIS SOLVAN-
TUR OBLIGATIONES, QUÆ EX
PACTIS ORIUNTUR.

Cap. XVII. DE INTERPRETATIONE.

LIBRI SECUNDI.

Caput I. DE STATU HOMINUM NATU-
RALI.

Cap. II. DE OFFICIIS CONJUGALIBUS.

CAP. III. DE OFFICIIS PARENTUM ET LI-
BERORUM.

Cap. IV. DE OFFICIIS DOMINORUM ET
SERVORUM.

Cap. V. DE CAUSA IMPULSIVA CON-
STITUENDÆ CIVITATIS.

Cap.



Cap. VI. DE INTERNA CIVITATUM
STRUCTURA.

Cap. VII. DE PARTIBUS SUMMI IMPE-
RII.

Cap. VIII. DE FORMIS RERUMPUBL.

Cap. IX. DE AFFECTIONIBUS IMPERII
CIVILIS.

Cap. X. DE MODIS ADQVIRENDI IM-
PERIUM, INPRIMIS MONARCHI-
CUM.

Cap. XI. DE OFFICIO SUMMORUM IM-
PERANTIUM.

Cap. XII. DE LEGIBUS CIVILIBUS IN SPE-
CIE.

Cap. XIII. DE JURE VITÆ ET NECIS.

Cap. XIV. DE EXISTIMATIONE.

Cap. XV. DE POTESTATE SUMMI IMPE-
RII IN BONA CIVITATE CON-
TENTA.

Cap. XVI. DE BELLO ET PACE.


Cap. XVII. DE FOEDERIBUS.

Cap. XVIII. DE OFFICIIS CIVIUM.



Leffori

PRÆFATIO



Lectori Salutem!



X quo tempore literæ in Germania tractari cœperunt, ex eo etiam studium Juris Naturalis, non plane incultum jacuisse, recte dicitur, sed non minus verum est, quod, ex principiis parum solidis ac perspicuis, idem deductum, & per tempus satis longum, frigide nimis ac insufficienter traditum sit, donec nostrâ Patrumque memoria, illud erectiora quædam Ingenia, habitu cultiori magisque nativo, exhibuerint, ex quo nomen Juris naturalis, majori celebritate, innotuit, imo à multis, nova disciplina, fuit existimatum. Sane si statum Academia-
rum,

OBSERVATIONUM.

rum ante annos non ita multos consideremus, nomen Jurisprudentiæ Naturalis in iis vix est auditum, certè à Scholis Juridicis illa penitus exulavit, ac omnia pulpita, Papiniani Ulpianique decretis, unice resonuerunt, àst hodie toties forte Juris naturalis compendia, quoties Juris Romani Institutiones, explicantur, nec amplius piaculum esse creditur, congenita Rationis dictamina excutere, ac liberiori philosophià, Jus Romanum ad illa exigere. Doceat illud vel solus Pufendorffii de *Officio Hominis & Civis juxta legem naturalem*, libellus, qui septima vice recusus, ac in alias etiam linguas translatus, crescentem studii hujus venerationem, satis ostendit, ut lætos ejus progressus, & sortem magis magisque serenatam, inde augurari, omninò par sit, imo non dubitem fore, ut, si dies nonnullorum, qui Legum per-

PRÆFATIO

peregrinarum centonibus immori
cupiunt, suaque Autoritate, Juris
naturalis Disciplinam, adhuc pre-
munt, præjudicia sustulerit, magno
velut cum impetu, Hæc animis
Docentium pariter ac Discientium,
se se sit insinuatura, suasque divitias,
in signi Reipublicæ bono, expositu-
ra, admiratione forsitan cordatæ
Posteritatis animos subeunte, qua-
re, frugibus repertis, glande tamen
tamdiu vesci maluerit Antiquitas.
Licet vero Juri naturali hodiè Cul-
tores non desint, attamen illud pe-
nitus excultum, aut ad eum perfe-
ctionis gradum, quem excedere
non liceat, deductum, existimari
non debet. Nondum consentiunt in
Disciplinæ hujus habitu determi-
nando, dum alii eam novam doctri-
nam, ab Ethica & Politica distin-
ctam, credunt, alii cum his, illam co-
incidere arbitrantur, quidā a Theo-
logia

logia morali, nec non Prudentiâ, eam discernunt, alii vero illa omnia solerter confundunt, cujus quidem dissensûs, vel fluctuantis doctrinæ, non alia causa est, quam quod diversa nomina hominibus imponere soleant, ac errorum, vel immaturarum steriliûmq; cogitationum systemata, peculiare disciplinæ esse credantur, nam alioquin, si disciplinarum objecta & fines serio expendantur, ac inde, non ex Hujus vel Illius angustâ confusaque elaboratione, Earum indoles æstimetur, certam reperire sententiam, non adeo difficile fuerit, qua de re quid mihi videatur, in *Prolegomenis* plenig paululum exposui. Porro quoad ipsa Moralitatis principia aut fundamenta, tantum abest, ut res confecta sit, ut potius quot capita, tot fere sententias heic deprehendere liceat, unoquoq; id, quod semel

X

pla-

PRÆFATIO

placuit, mordicus defendente, ac explicatione benigniori, ruituram opinionem, quantum fieri potest, fulcien^{te}; Etsi verò negari nequit, diversas sententias hic non improbabiliter defendi posse, attamen illam cæteris præferri debere, quæ rationibus maximè directis, evidentibus & nativis utitur, illi facile concesserint, quibus veritatem aliis respectibus præferre placet. Deniq; Juris naturalis placita, juxta statum Generis humani nondum adæquate & accurato satis ordine, esse hactenus repræsentata, non immeritò quoque asseritur, cujus ratio uti à rei tractandæ difficultate primario dependet, ita nonnullos forte, ab hoc conatu, angustæ vulgaris doctrinæ moralis hypotheses, etiā retrahunt, dum verentur, ne, si largius juris naturalis doctrinam instruant, eamq; ad specialia instituta humana exten-

OBSERVATIONUM.

tendant, limites generalis Disciplinæ longe transiliantur, ac jus naturale, cum Jurisprudencia Particulari, aut speciatim, cum jure Romano, confundatur, quæ tamen persuasio nullo fundamento nititur. Imò sicut crescentibus Disciplinis alias Pedantismus velut insidiari, earumque cursum impedire solet, ita dubitandum non videtur, quin eadem fata, Juris naturalis studio sint metuenda, de quo tamen uti certi quid asserere non licet, ita in summa sic censeo: Eos, qui mente pollent, ac quibus status Generis humani, variaque hominum instituta, ex Disciplinis specialibus, vel aliis mediis, innotuerunt, qui à Sectis alieni, principia diversa rite distinguunt, ac nō nisi solida ac perspicua sectantur, qui non ex aliorū verbis, concepti, sed ex propria cognitione verba formāt, ac qui nullis methodi cujusdā chimæris occupati,

PRÆFATIO

cupati, prout objecti indoles exigit, cogitata sua, modo aliquo perspicuo & grato proponunt, eos, inquā, ad instruendam exornandamque Juris naturalis disciplinam, aliquid conferre posse; Ab iis vero, qui intra Sectæ cujusdam angustias constituti, ejus hypothefibus, tam doctrinam, quam ordinem attemperant, aut qui purgatos moralitatis fontes, ex Scholasticæ, aliusve parum defæcatæ Philosophiæ, lacunis turbant, qui principia Justi & Utilis confundunt, Naturam & Revelationem, seu ea, quæ omnibus hominibus communia, & Christianis propria sunt, commiscent, vel, iis plane neglectis, ex his abruptè nimis & imperiosè philosophantur, ab iis, dico, nil, nisi Studii hujus corruptionem, expectandum esse. In specie eorū vel Consilium vel conatum, quo methodus mathematica
vel

vel Geometrica, quam vocant, ad Juris naturalis doctrinam extendi suadetur, inconsultū arbitror, eaq; ratione illam vel corrumpi, vel saltem ejus splendorē imminui, plane existimo. Licet enim soliditas doctrinae utiq; exigat, ut sententiā perspicue proponas, si quid dubii circa eam occurrit, illud amplius explices, singulaq; ubi opus, ex principiis rite firmatis, demonstres, denique cætera, quæ inde fluunt, vel decidi possunt, recte proponas, attamen non opus est, ut omnia membratim discerpamus, ac exiguae cuivis cogitationū portioni, peculiare elogium: *Definitionis, Scholii, Demonstrationis, propositionis, axiomatis, theorematidis, resolutionis, problematis, observationis, corollarii*, aut simile præponamus, atque ita omnia, stilo hiulco, arido ac exsangui persequamur, nam dictio aptè cohærens, rationum ponderi

nihil detrahit, multum autē gratiæ
 iis addit, cum ē contrario, & ina-
 mœnum & confusum sit, quicquid
 in pulverem dissectum est. In primis
 verò vulgaris illa totiesque repetita
 paroemia: *id quod erat demonstrandū*,
 non poterit non auribus, præjudi-
 cio vacuis, esse molestissima, cum
 illæ toties inani sonitu percellantur,
 nam si rationes allatæ id, quod pro-
 bari debebat, demonstrant, hoc pe-
 riti etiam, sine illa clausula, intelli-
 gent, si vero nulla demonstrandi vis
 in iis occurrit, dictæ illud, licet
 centies ingeminatum, defectui non
 medebitur, aut omninò id, clausu-
 lis, quibus imperiti Advocati actio-
 num libellos exornare solent, com-
 parandum videatur. Quæ cum sa-
 tis certa sint, concluderem, conser-
 vando juris naturalis nitori, non
 minus stribiginē mathematicam,
 quam metaphysicam, cavendam
 esse

esse. Sed quicquid sit de habitu Juris-
 prudentiæ naturalis in genere, vel
 fati, quibus Illa utitur, aut quæ Ei
 impofterum speranda vel metuen-
 da sunt, id utique afferendum est,
 Pufendorfium in eà excolenda or-
 nandaque multum præstitisse. Non
 excurrã ego in Ejus laudes, est enim
 Viri Perillustris Nomen celebratiq,
 quam ut Illius scripta, aliqua com-
 mendatione egeant, verendum
 potius mihi foret, ne laudare, sit de-
 trahere, cum exigua mea scriptio,
 præstantiam meritorum non faci-
 le sit assecutura, ac, prout par est,
 elocutura. Pufendorfium rerum
 memorabilium apparatu abunda-
 re, in decidendo esse gravem & ac-
 curatum, si ingenium intendere ve-
 lit, eloquio elegantem, facundum
 & propemodũ incomparabilem,
 quicquid; forte Grammaticorum
 nonnullorum morositas ogganiat,

apud plerosque, puto, qui Eius scripta legunt, in confesso est. Quod igitur Kulpisius in *præfatione Collegii Grotiani* de se fatetur: *felicem se prædicare diem, quo Grotianum opus primum in manus sumserit, feliciorem eum, qui Scholas Illustris Argentoratensium J.Cti, Ulrici Obrechtii, ipsi aperuerit, quibus in recessus tam nobilis thesauri propius intrare, præsentisque ejus usus passim comprehendere licuisset, id, si modo in literis aliquam felicitatem ponere, ac Virorum Celebrium verba, obscuri nominis hominibus usurpare fas est, ad me, quoad lectionem Scriptorum Pufendorfianum, applicarem.* Legere illa cœpi animo rudi, consilio incerto ac sine ullo ductore, sed impensæ operæ nunquam me poenituit, nam sine genuinis juris naturalis principiis, in nulla Jurisprudentiæ Particularis parte, recte quem

versari posse, deprehendi, imo, sibi
 bere sententiam dicere licet, doctrinæ
 illius beneficio, Pedantismum
 & Imposturam, quæ Jurispruden-
 tiæ & Justitiæ nomine, non raro te-
 guntur, penitus cognosci, intellexi.
 Postquam inter Doctores aliquem
 obtinui locum, reliquis Jurispru-
 dentiæ partibus, naturalem esse
 jungendam, aut potius illis, velut
 fundamentum, præmittendam,
 semper etiam censui, hinc plus vice
 simplici, Ejus principia, juxta du-
 ctum antea laudati libelli Pufen-
 dorfiani, de *Officio hominis & Civis*,
 scholis privatis exposui, applausu
 non quidem magno, attamen non
 plane nullo & tali, qualem sibi pol-
 liceri potest, qui soli rei intentus,
 Circumforaneorum aliorumque
 Præstigiatorum artes, alliciendæ &
 emungendæ incautæ Juventuti, ad-
 hiberi solitas, odit ac detestatur.

PRÆFATIO

Cum autem nonnulla in libello illo generalius, quam ut Tirones certam inde sententiam formare queant, scripta deprehenderim, quædam etiam deficere, aut cum veritate non satis convenire mihi visa sint (id quod, salvâ Scriptorum Pufendorfianorum præstantiâ, asseri potest, nihil enim in hac infirmitate perfectum est, ac felicia etiam Ingenia non ubique pari vigore, alacritate ac attentione sese exserunt] ideo non tantum illa discursib9 extemporalibus, prout visum fuit, emendavi, sed & nonnulla in schedas conjeci, mihi & Auditoribus usui futura. Ex iis tamen nihil unquam publici juris facere, sed illa omnia proprio operi reservare, plane hætenus decreveram; Uti vero posterius propositum nondum abjeci, ita priori mutato, Hæc *Observationes*, in memoratum Pufendorffii
Li-

OBSERVATIONUM.

Librū confectas, velut Prodrumum
Tractatus, Deo volente, aliquando
secuturi, nunc in publicum emitto,
cuj9 cōsiliū hāc prācipua fuit ratio.
Versantur in plurium manibus ea,
quæ hinc inde observaveram, dum
Nonnullis schedas meas describen-
das dedi, alii veloci calamo discurs9
exceperunt. Ista vero multis in par-
tib9 esse vitiosa ac à mente mea pe-
nit9 abire, facile cōcesserit, qui scri-
ptionis, ab animo manuq; tituban-
te factæ, errores intelligit. Præterea
quosdam, in Scriptis suis, illa suble-
gisse deprehendi, in primis ante de-
cem, & quod excurrit, annos, meæ
de lege naturali, ac ejus præcipuè
fundamento, hypotheses, Disserta-
tioni cuidā prolixè satis sunt inser-
tæ, non alio addito indicio, quam
quod Autor fateatur: *se Virum do-*
ctum sibi que amicum pro parte secutum
esse, quod ad me pertinere, Ipse mihi
affirmabat, verum uti indicium
illud

illud obscurius erat, nec mihi satis conveniebat, ita, cum post aliquot annos Dissertatio illa recuderetur, plane omissum fuit; Interim non omnia mihi exinde tribuo, imò ea, quæ tum mea erant, variis in partibus postea mutavi, ac curis secundis ad liquidum magis deducere sustinui. His ita se habentibus, meæ estimationis interesse existimavi, ne olim à me scripta, alieno arbitrio corrumpenda, interpolanda aut exscribenda amplius relinquerem; hinc eadem denuo diligenter expensa, varieque mutata & aucta, nec non textui Pufendorfiano propius aptata, sub *Observationum* nomine, Censuræ Publicæ exponere decrevi. Scopus autem Scriptionis est, ut literarum harum Cultores, in formandis conceptibus, ac acquirendis genuinis rerum moralium principiis, adjuvarem, hinc non tantum

ab

OBSERVATIONUM.

ab Autore generalius dicta magis determinavi, sed & ab Ejus sententia sæpius discessi, præterea verò supplementa, qua parte maximè necessaria videbantur, exhibui, me tamen hoc labore, libellum Pufendorfianum, in aliquod juris naturalis Compendium, quale esse debeat, aut quale ipse saltem instructum velim, rede gisse, haut assero, nam, ut alia taceam, vel sola præsentis Scriptionis indoles, id non admittit. Ut nonnulla ex iis, quæ hic præstitisse me existimo, specialius tangam, doctrinam de *Lege naturali*, quæ ad difficiliores hujus studii materias non immerito refertur, perspicue proposui, ac quomodo illa ex nativo & proprio fundamento suo, legitime deduci debeat, ostēdi, quam doctrinā meam dicere possum, non quod primus id fundamentum viderim (qvis enim paulo peritior, in
decla-

PRÆFATIO

declarando Jure naturali, ad *naturā* non provocavit?) sed quod id peculiari, & ut spero, rei præsentī maxime conveniente, ratione tradiderim. Ut plurimum fane Scriptores hic deficiunt, dum vel inania verba decantant, vel in circulum aguntur, vel præposterās adhibent demonstrationes, aut fundamentum legitimū, ad æquate satis non exhibent, nec decreta naturalia, idonea deductione inde eliciunt, vel denique à Scopo plane aberrant, ut, si contendas: *voluntatem Dei esse juris naturalis Principium*. Qvis enim ignorat, Deum esse juris naturalis Autorem, ac adeo voluntatem divinam, laudatæ legis causam seu principium? at de principio *cognoscendi* jam est quæstio, ex quo non tantum juris naturalis Autor, sed & reliq; Ejus capita cognosci queant! hinc licet voluntas Dei, certo modo
sup.

OBSERVATIONUM.

supposita, sit juris naturalis principium, attamen doctrina, quæ hoc asserit, neque est principium essendi, quod vocant, neque cognoscendi, sed assertio particularis, passim ob via, ac ad cognoscenda juris naturalis dictamina, nihil penitus conferens. *Jura Necessitatis* intricatiora ad certa fundamenta, ab aliis ista ratione haut proposita, redegei. Circa *sermonem, jusjurandum, dominium, pretium, matrimonium, Rempublicam, imperium civile, pœnam ac existimationem humanam*, multa fortassis observavi, quæ ad penitiorẽ illorum cognitionem deducere queant, quæque alibi non facile reperias. Sed his immorari nolo, ne me jactare videat, cum forte jamjam plus dixerim, quàm delicatæ Censorum aures ferre queant. Id admonendum, me in adornandis hisce Observationibus, non ultimam, sed priores Libri Pufendorfiani editiones, secutum

tum esse, nam consilium Ejus, qui ultimam illam Editionem curavit, quoque hinc inde paucula verba inferlit, aut ordinem nonnullorum paragraphorum mutavit, deniq; in Capite, de *Officio hominis erga seipsum*, pluscula de Cultura animi & Corporis ex Opere Autoris majori retulit, mihi plane inconveniens & improbandum videtur, nec adeo ejus, observationes meas isti editioni attemperando, me facere volui participem. Sane si Editor ista fecit sine Autoris consensu, manifestæ in Eum injuriæ reus est, nam hoc quidem Libertas academica indulget, ut circa aliorum Scripta, sententiã tuam exponas, ast textus ipsius Autoris semper invariatus manere debet, ut ex ipsa lectione intelligatur, quid ex calamo Autoris fluxerit, & quid aliorum manus adjecerit, sicut enim, aliena pro suis vëditare, bonæ fidei re-

repugnat, ita nec nostra aliis invitis obtrudere debemus. Licet etiã sint, quæ in libello illo desideres (de quo quid mihi videatur, ex Observationibus hisce intelligendum est) attamen jejuna illa mutatio, defectibus istis non medetur, nam uti transpositio nonnullorum paragraphorum, vel aliquot vocabulorum inspersio, plane otiosa est, ita quæ circa culturam animi & corporis necessaria videntur, industria Docentis, ex Opere Majori, vel aliunde, facile suppleverit ac Auditoribus inculcaverit, aut si omnino addendum quid esse existimetur, illibatâ tamen Autoris sententia, ut modo diximus, id fieri debebat. Non dubitem igitur, quin B. Autor, mutationi illi, suo modo prælaturus sit illud Conringii

PRÆFATIO

*in Præf. secund. ad Taciti libellum de
Moribus Germanorum : Ipsemet
ego nonnulla quidem paulo aliter scripta
malim, sed fortassis haut fas est juveni-
lem laborem omnem exactionis ætatis
trutina expendere, & singulis tempori-
bus suus aliquis nævus relinquendus est,
modo non nimium dedecoret. Quod-
si autem Pufendorffii consensu in-
terpolatio illa facta est, prout
ultimæ editionis præfatio, dudum
â B. Autore, eo nomine admonitum
esse Editorem, jactat (licet non im-
merito de hoc quis dubitet, cum
Vir Illustris, diu ante ultimam il-
lam editionem, in fata concesserit)
tum injuria quidem erga Auto-
rem cessat, ast Eorum tamen,
qui Scriptis Ejus utuntur, ha-
benda erat ratio, nec, muta-
tione*

tione tam macilentâ , iis velut
 illudendum , cum Pufendorffii
 defiderio, si aliquod subfuit, com-
 modiori ratione potuerit satis-
 fieri : Nunc quando Nonnulli
 in Collegio , quod vocant, assi-
 dent (qui præcipuus libri Pufen-
 dorfiani est usus) dum in re se
 convenire intelligunt, incommodo
 aliquot vocabulorum interjectu,
 se disparari, sibi que molestias cre-
 ari indignantur. Fatetur Editor:
se notulas adjicere potuisse, sed quia
ineptum pariter & nefas putaverit,
circulos Autoris, qui Compendio bre-
vitati studere voluerit, nova proluxi-
tate turbare, ideo se ab hisce curis ab-
stinuisse. Judicent Cordati, an non
 id, quod fecit, longe sit inconcin-
 nius: si religioni sibi duxit, notulis
)()(2 tur-

turbare circulos Autoris, qua fronte ergo tot aliorum, in quorum manibus libellus iste versatur, circulos, conatu minime necessario omnisque utilitatis experte, turbavit? Notulas, mea quidem sententia, sine omni ineptitudine adjicere potuisset, cum, qui legere nolit, præterire illas queat, sed an textus mutationem perinde ab ineptitudine Ille apud æquos rerum aestimatores, sit liberaturus, valde dubito. Sane si Bibliopola, cujus impensis liber iste hætenus prodiit, a quovis illum interpolari, aut stamini Pufendorfiano, vilem quamvis tramam, intexi patietur, alii vitio vertere, ac privilegium sibi concessum, violatum queri non poterit, si librum, a se velut


velut derelictum, occupet, eundemque, suæ integritati restitutum, inprimi curet. Quod superest, nemini, spero immodestum videbitur, quod in hisce Observationibus non rarò ab Autore dissenserim, multo minus, aliquem istâ libertate ostensum iri, arbitror, nam Pufendorfium, etiam cum dissentio, magnifacio, cum solo hoc muto Doctore in adyta juris naturalis penetrare mihi licuerit: Interim amicus Grotius, amicus Pufendorfius, sed magis amica veritas, hinc etiam ea, quæ jam exhibeo, vivo Autore, scribere nullus dubitasset maximè cum in universum existimem, dissensum ratione subnixum, Cordatis acceptiorem esse, quam adulatori-

PRAEFATIO OBSERVATIONUM.


um, ac absurda submissione, ubique adrepentem assensum.

Vale. Scrib. Lips. mens.

Febr. 1703.



PRO-



PROLEGOMENA

De Habitu & Contextu Disciplinarum Moralium.

§. 1.



Illud ex conditione Generis Humani facile liquet, homines non pro libitu suo, actiones suas institueri posse, sed debere utique præcepta quædam vel regulas, tanquam agendi normam, observare, siquidem vitam feliciter, commode & ornate velint exigere.

§. 2. Uti autem regularum istarum magna est varietas, nec curata singularum explicatio suâ destituitur difficultate, ita omnes illas apte in Disciplinas digerere, hasque constitutis certis limitibus, accuratè inter se distinguere, satis arduum videtur, maximè postquam Scriptores, pro suo singuli captu, variis nominibus illas involverunt.

§. 3. Utile tamen videtur, de hoc etiam fatagere, nam sine accurata Disciplinarum cognitione

gnitione, rei, quæ in ipsis continetur, notitia ubique non est solidâ.

§. 4. Videntur igitur omnes Disciplinæ, quæ circa leges, virtutes ac mores hominum versantur, ambitu *Doctrinæ moralis* comprehendi posse, hanc vero, intuitu *vite futuræ & præsentis*, in *Theologiam & doctrinam civilem* dispescere licebit, divisione non Christianorum tantum, sed & Gentilium captui conveniente.

§. 5. *Theologia* est, quæ religionem ex principiis partim communibus, partim propriis, homines docet, ac obsequium non externis tantum actionibus, sed & puro præcipue corde præstandum, intuitu vitæ futuræ, ab iis exigit.

§. 6. Esse ejus diversum habitum & partes, pro diversitate principiorum, facile liquet. Apud Christianos S. Scripturâ illa nititur, ac in *Theologiam moralem*, quæ facienda & fugienda continet, ac partim naturalis, partim positiva est, & *Christianam in specie*, quæ credenda tradit, ac tota positiva est, discernitur.

§. 7. Ejus excolendæ Cura ad Theologos pertinet, religionem tamen naturalem, in doctrina juris naturalis quoque proponere fas est, quemadmodum etiam omnis religionis habitudo, in ordine ad civilem societatem, politicæ & juridicæ est considerationis,

§. 8. *Doctrina civilis* hominem, ad vitam præsentē, tranquille & commode exigendam, instruit. Cum autem in universum vel *decreta Imperantis*, vel, his cessantibus, *utilitatis innoxie regulæ* observandæ sint, hinc doctrinæ laudatæ species duæ sunt, *Jurisprudentia*, quæ, leges & *Prudentia presse dicta*, quæ utilitatis dictamina inculcat.

§. 9. *Jurisprudentia* ambitu suo omnes disciplinas, quæ intuitu vitæ præsentis, de virtutibus, moribus ac honestate, sub *Ethices* & *Politices* vel quocunque alio nomine, aliquid tradunt, complectitur. Nec displiceat hic terminus delicatis auribus, quasi vulgatiores sit, quam ut res, quas sub nomine *Philosophiæ Practicæ* similive proponunt, capere queat, cum enim sine legibus vel jure, nulla sit moralitas, ab illis rectissime disciplina, quæ moralia tractat, denominatur.

§. 10. Quo indoles *Jurisprudentiæ* distinctius appareat, per species eundem erit. Est illa vel *universalis*, quæ leges divinas universales, sine respectu ad certam Rempublicam, & *particularis*, quæ leges divinas & humanas, intuitu certæ civitatis, tradit. Prior etiam *Divina* & *Naturalis*, posterior *Humana* & *Positiva* dici potest, modo terminos recte intelligas.

§. II. De utraque paulo distinctius agendum, Universalis tripliciter supponi potest, vel (1) pro *legum divinarum cognitione* vel (2) pro *habitu leges intelligendi* vel (3) pro *complexu legum divinarum scripto comprehensarum*.

§. 12. Primo sensu est *legum divinarum, ad decorem & tranquillitatem generis humani pertinentium. genuina cognitio*. Quo sensu, *Notitia, Scientia* vel *Ars*, dici potest.

§. 13. Dicitur *cognitio*; quo nomine adeo quicquid scitu est necessarium comprehenditur, de cætero cognitio illa vel in *possessione* vel *usu* spectatur, hæc illius est *finis & effectus*, nam ideo leges divinas cognoscimus, quo cognitione illa uti queamus.

§. 14. Ad acquirendam illam notitiam requiritur *nativa mentis humana bonitas*, deinde *diligens legum divinarum tractatio*, quæ *theoria & praxi*, seu *meditatione latius supposita & usu* absolvitur.

§. 15. Cognitionem igitur impediunt (1) *naturalis stupor* (2) *negligentia* (3) *vana doctrina* (4) *perversa docendi discendique ratio* (5) *defectus solida praxeos*, hinc, sicut alias, ita etiam in cognitione legum divinarum, dari gradus, eosque satis notabiles, facile liquet.

§. 16. Inhæret illa notitia *menti humane*, & consequenter hominibus. Et unusquisque qui-

quidem eatenus leges divinas callere debet, quatenus regendis actionibus propriis illæ requiruntur. Quibus vero earum publice docendarum jus in vitâ civili competere debeat, illud ex voluntate Imperantis repetendum est.

§. 17. Materia sunt leges divinæ, *naturales*, etiam religiosæ, *vid. §. 7.* & *positivæ universales politice*, quamvis de harum existentia adhuc disputari queat, ut suo loco videbimus. Illud interim certum, quod, his licet admittis, illæ tamen maneant objectum principale.

§. 18. Dum autem leges nominamus, ideo homines, negotia humana aliasque res, ad quas leges respiciunt, non excludimus, quin potius hæc omnia eatenus etiam objectum Jurisprudentiæ constituiamus, quatenus leges divinæ de iis aliquid disponunt.

§. 19. Acquirimus legum divinarum notitiam per *Rationem*, commune omnium disciplinarum humanarum principium & subiectum. Hauritur autem illa ex *natura* & apud christianos suo modo ex *Sacra Scriptura*. A genuino hoc principio dicitur *Ratio recta*.

§. 20. Eorum consilium, qui veritatem legum naturalium ex S. literis unice repeti jubent, *vid. Bœcler. ad Grot. præfat. & in Oeconomia p. m. 4.* inconsultum censi debet, naturam enim negligere, est, ingratitude erga

Creatorem committere, commercium cum aliis Gentibus abrumperere, ac naturalia & positiva confundere.

§. 21. Finis Jurisprudentiæ divinæ est triplex (1) ut cognitione legum divinarum, ostendendæ actionum moralitati, utamur *vid.* §. 13. (2) cognitis legibus actiones nostras attemperemus atque ita virtuosius evadamus, ac (3) hac ratione tranquillitas & beatitudo civilis inter homines conservetur ac promoveatur.

§. 22. Intendit autem Jurisprudentia divina, virtutis exercitium in *gradu* quidem *sublimi*, juxta scopum Legislatoris divini, sed saltem *suadendo*, cum propter imbecillitatem humanam ulterius ascendere non liceat. Ast in *gradu remisso* & quoad actiones externas, *precipiendo* ac *poenas minando*.

§. 23. Neque etiam Jurisprudentia divina in explicatione virtutum sublimium subsistere debet, quem scopum, nisi fallor, præ se fert vulgaris Ethica, sed ad remissiora etiam minusque perfecta hominum officia descendere, ac media, quib9 ad ea contumaces compelli queant, explicare tenetur, sic enim doctrina usui humano accommodata demum evadet, cum si in prima tractatione subsistat, magis sit speculativa quam practica.

§. 24. Ordo notitiæ legum divinarum, ex
ob-

objecto oritur. Hoc itaque si recte consideres, videntur duæ partes generales esse constituendæ. *Preliminaris*, quæ naturam rerum moralium explicet, & *Principalis*, quæ argumentum legum divinarum tradat.

§. 25. In illa occurrunt (1) *actio humana* cum suis principiis & speciebus (2) ejus norma seu *lex* in genere, (3) Legis effectus, i. e. *entia moralia* seu *jura* & *obligationes* (4) *Legum varietas*, nec non (5) norma secundaria seu *conscientia* (6) *actionum humanarum* cum sua norma collatio, in quem locum *virtutum* & *vitiorum* rerumque connexarum consideratio incidit (7) *interpretatio* & *applicatio*.

§. 26. Quando harum rerum cognitione animus est imbutus, tum recte ad cognoscendum legum divinarum argumentum pergit, hinc pars principalis existit. Summatim autem leges divinæ vel *varia jura* & *obligationes hominibus tribuunt*, vel *modum jura contra invicem sibi asserendi ostendunt*.

§. 27. Primum caput generale latè patet, in eoque aptè digerendo non levis occurrit difficultas. Fundamenti tamen loco supponendæ leges naturales, quæ vel *Deum*, vel *homines* respiciunt, quæ omnia juxta varios Hominum status accuratè repræsentari debent, de quo nunc specialius agere non libet. In altero ca-

pute generali *processu*, qui stylo forensi dicitur juxta leges naturales, & diversum Hominum statum exhibendus est.

§. 28. Datur in cognitione juris divini *Certitudo* i. e. vel veritas indemonstrabilis & immediata perceptione apprehensa, vel demonstrabilis, quæ ex certo aliquo principio ostendiqueat. Occurrit autem illa certitudo in parte præliminari, de qua §. 25. ut & principali, de qua §. 26. 27. quoad *jus natura* maximam partem, circa *facta* tamen, quæ jus hoc nonnunquam præsupponit, ut & *leges positivas*, si quæ asseruntur, sæpe saltem *probabilitas* adest.

§. 29. Secundo sensu *vid.* §. 11. Jurisprudentia divina, est *habitus mentis leges divinas, resque iis connexas ritè intelligendi*, quo respectu *Prudentia* rectè dicitur. Mens humana leges nativæ quidem vi intelligit, sed habitus ei superinductus efficit, ut eo promptius & certius illas intelligere valeat.

§. 30. Quæ de *ratione acquirendi* notitiam legum divinarum, de *subjecto* ejus, de *materia principio demonstrandi* & *sine* diximus §. 14 *seqq. usque ad 24.* illa etiam ad Jurisprudentiam habitualiter acceptam quadrant. De cætero habitus cum notitia legum simul acquiritur, semel autem acquisitus, notitiam amissam facile restituit, aut acquisitam auget.

§. 31. Notitia & habitu acquisito variè utimur, dum ea ad dirigendas actiones proprias adhibemus, vel alios docemus, vel casus evenientes ex illis decidimus, vel scripto leges comprehendimus.

§. 32. Exinde oritur Jurisprudentia systematicè accepta, *vid. §. 11. quæ est complexus legum divinarum, naturalium & (si has hypotheses sequaris) positivarum universalium, à Deo eo fine hominibus datarum, ut juxta eas vivendo, virtuosè evadant, atque hanc vitam tranquille & commode exigant.* Hoc sensu nomen *Doctrinæ*, vel *Disciplinæ* ei optimè convenit.

§. 33. Materia igitur Jurisprudentiæ systematicè acceptæ, sunt leges divinæ, de quibus §. 17. 18. diximus, circa quas etiam hic supponendam, quæ de earum principio §. 19. 20. ordine §. 24. 25. 26. 27. & certitudine §. 28. annotavimus. Finis autem ejus proximus est, *Jurisprudentia pro notitia & habitu supposita*, quem deinceps cæteri, §. 21. 22. 23. notati, sequuntur.

§. 34. Licet autem *Jurisprudentiæ systematicæ* finis sit, ut modo diximus, *Jurisprudentia mentalis*, attamen, pro diversitate respectuum, hujus illa quoque potest finis esse, nam aliquando ex notitia oritur scriptum, & hoc notitiæ

conservandæ & acquirendæ causa conficitur, hinc unum intendit alterum, & utrumque diverso respectu, causa & effectus est. De cætero Jurisprudentia mentalis, naturâ sua prior est systematicâ & scripta.

§. 35. Solet autem Jurisprudentia divina, in scripturam redacta, diverso habitu comparere, pro diverso scilicet scriptorum captu & notitia. Veteres eam *gnomologicè*, *paradigmaticè*, *mythicè*, vel *dogmaticè* tradidisse, observavit Krebs in *introd. ad scient. moral.*

§. 35. Ultima docendi ratio optima est ac ad solidam cognitionem pertinet, licet, dum ea utimur, sententias, exempla aut fabulas inspergere nihil vetet. Illud autem tutò asseri potest, hætenus hanc disciplinam ex genuinis principiis, juxta statum generis humani, nondum satis esse excultum, licet *Grotium* & *Pufendorfium* multa hic præstitisse negandum non sit. Forte etiam nemo eam ita ad perfectionem deduxerit, ut non aliorum industriæ semper aliquid supersit.

§. 37. Quibus autem in vita civili ejusmodi Scripta conficere liceat, aut quanam confectis uti possint vel debeant, illud ex §. 16. judicari potest. Illud rationi convenientissimum arbitramur, ut hac in re magis *Humanitatis*, quam *muneris cujusdam* rationem habeamus.

§. 38. De eo autem dubitandum non videtur, quin Jurisprudentiæ divinæ magna sit utilitas, cum enim legibus divinis obsequium debeant homines, quo colore earum notitiam vel systema sine usu esse dicemus?

§. 39. In specie quoad expedienda negotia humana, ac Jurisprudentiam particularem, usus ejus conspicitur, quod (1) explicet res jurídicas, de quibus §. 25. dictum, quarum cognitio in quavis jurisprudentiæ particularis parte est necessaria & præsupponitur (2) ex ea controversiæ illustres sint decidendæ (3) quod materiam jurisprudentiæ particulari præparet, ex qua hæc conclusiones speciales elicere queat (4) juri publico particulari genuina principia suggerat (5) usum Jurisprudentiæ particularis doceat (6) prudentiam Legislatoriam ac consultatoriam instruat.

§. 40. Merito igitur Jurisprudentia divina pro fundamento cujusvis Jurisprudentiæ particularis habetur & illis, qui de studio legum divinarum abjecte sentiunt aut loquuntur, proprium ingenium sat gravis pœna esse censetur, judice Kulpisio *in præfat. colleg. Grot. conf. Bœcler. ad Grot. in præfat. p. m. 31. seqq.*

§. 41. Interim à plerisque studium legum divinarum contemnitur, aut saltem ad curas secundarias ablegatur, cujus ratio fortassis est,
 (b) quod

quod observantia illarum legum inter homines ferè exulet, ac disciplina illa lites forenses non instruat, ac artes nocendi earumque præcautiones haut doceat. Quamvis illa ratio parum valida sit, sed corruptissimum potius iudicium redoleat.

§. 42. Est tamen laudati studii aliquis etiam abusus, si quis scilicet in generalibus illis semper subsistere, nec ad specialia legum humanarum decreta quoque descendere velit, aut in explicatione thematum Jurisprudentiæ particularis specialium, ad ultima æquitatis fundamenta (quæ præsupponenda & intacta relinquenda erant) recurrat, eademque prolixè recenseat. Interim abusus ille non disciplinæ ipsi, sed abutentium imperitiæ imputandus est.

§. 43. Ad scopum Jurisprudentiæ divinæ, collimat *Vulgaris Ethica & Politica* seu *Philosophia Practica*, sed eum non assequitur, nec laudatæ disciplinæ latitudinem exhaurit, nam uti pluribus illa laborat defectibus, quos multis persequi jam non attinet, ita parum abest, quin ipsa *Ethica & Politica* distinctio, defectibus illis annummeranda sit.

§. 44. Nam Jurisprudentia divina, quanta quanta est, Ethica est etiam eà parte, qua de Civitatibus agit, sed distinctio memorata contra-

traſium innuere videtur, adeò ut nonnulli Ethicam & Politicam diverſis principiis niti exiſtiment, ac illi jus naturæ, huic vero jus Gentium, doctrinà ineptiſſimà aſſignent.

§. 45. Deinde diſtinctio illa, quæ Ethica & Politica vel ſeparatæ Diſciplinæ, vel ſaltem uni-
us Diſciplinæ diſtinctæ partes aut ſpecies, ad-
eoque ſeparatim tractandæ, eſſe exiſtimantur,
impedit, ne leges divinæ juxta ſtatum Generis
humani adæquate & nativo ordine exhibean-
tur.

§. 46. Dum autem recentiores Scriptores
Jurisprudentiam naturalem aliò plane habitu
exhibuerunt, quam quo vulgaris Philoſophia
Practica comparet, hoc in diverſas ſententi-
as acceptum eſt. Qui enim vulgaribus illis hy-
potheſibus aſſueri ſunt, confuſum aliquod, ac
ex principiis ethicis politicisque & jure Roma-
no concinnatum, Chaos exhiberi exiſtimant,
quod judicium perinde abſurdū eſt, ac ſi quis
ex abortu, eoque mutilo, requiſita hominis
integri æſtimare velit.

§. 47. Alii eam ab Ethica & Politica diſtin-
ctam diſciplinam putant, quam ſententiam
omiſſa à Scriptoribus recentioribus nonnulla
capita v. gr. de affectibus & ſummo bono, ali-
quo modo confirmare potuerunt, nam hæc
cum aliis nonnullis, alibi vel propoſitis, vel

proponendis, in peculiarem Ethicam & Politicam, Juris naturalis Disciplinæ adjungendam, compingenda esse existimantur.

§. 48. Debebant potius hæc ita componere: Ethicam & Politicam à Recentiorum Doctrinâ juris naturalis, non differre quoad *scopum* & *rem tractandam*, sed saltem quoad *tractandi modum* seu *elaborationem*, Scriptoresque recentiores sterilem Peripateticorum Philosophiam emendare, habituque pleniori, doctrinam Virtutum exhibere voluisse.

§. 49. Poterit Jurisprudentia divina distinguì ab *objecto* (1) *in naturalem*, quæ leges naturales, & *positivam*, quæ positivas exhibet, si has admittas (2) *in privatam*, quæ quid cuivis homini, pro ratione sui status privati, juxta leges divinas, faciendum sit, ostendit, & *publicam*, quæ Civitatem ac eò pertinentia hominum officia tradit.

§. 50. Non autem pertinent eo divisiones, quasi juxta eas; disciplina juris divini partienda sit, *vid.* §. 43. 44. 45. sed ut saltem varietas objecti per eas insinuetur. De cætero leges divinæ, naturales & positivæ, privatæ & publicæ, juxta statum generis humani, promiscue repræsentari debent.

§. 51. Jurisprudentia Particularis seu humana, de qua deinceps videndum *vid.* §. 10. 11.

etiam tripliciter supponi potest vel (1) pro *legum civilium notitia* vel (2) *habitu eas intelligendi* vel (3) *legum scriptarum systemate*.

§. 52. Juxta primum respectum est *legum ad felicitatem temporalem certa alicujus Reipublicæ pertinentium genuina cognitio*. Quo respectu titulum *Notitiæ, Scientiæ vel Artis* meretur.

§. 53. Quæ de indole *cognitionis* §. 13. de *eius acquisitione & subiecto* §. 14. 15. diximus, illa etiam huc pertinent. *Materia* autem sunt leges in certa Republica occurrentes, divinæ & humanæ cum suis objectis, quæ tamen omnes, *humane vel civiles* dici possunt, quatenus auctoritatem ab imperio civili sortiuntur.

§. 54. Circa leges divinas porro ita versatur Jurisprudentia Particularis, ut generalibus præsuppositis, speciales conclusiones, negotiis civilibus applicandas, sistat, ex quo in specie liquet, quod Jurisprudentia divina, velut disciplina generalior semper præsupponenda sit, quodque, ordine hoc neglecto, per versa docendi discendique ratio, in particulari Jurisprudentia occurrat.

§. 55. Uti autem leges in Republica valentes, per *Rationem* quoque cognoscimus, ita earum Principium demonstrandi est *Promul-*

gatio, hac enim, etiam quoad leges divinas, niti possumus, si subditis earum veritas saltem sit demonstranda, si verò cum imperantibus res sit, tum ad primum Principium, §. 19. 20. indicatum, in asserendis legibus divinis recurrendum est.

§. 56. Quæ de *sine* diximus §. 21. 22. 23. illa etiam de Jurisprudencia particulari vera sunt, modo juxta hujus mensuram intelligantur. Nimirum cognitionis legum civilium finis est (1) ut illa cognitione utamur (2) actiones nostras ei attemperemus atque ita (3) tranquillitatem certæ Reipublicæ promoveamus.

§. 57. *Ordinem* Jurisprudenciæ particularis quod attinet, ejus etiam duæ partes, *Preliminaris* & *Principalis* ex monito §. 24. constitui possunt. In illa tamen omnes illæ res, quas §. 25. memoravimus, prolixè proponi non debent, sed potius generalibus præsuppositis, specialia, si quæ, quoad illas, in certa aliqua civitate occurrant, adducenda sunt, hinc in primis legum, in civitate valentium, indolem ac externum habitum persequi par est.

§. 58. In principali verò parte argumentum legum civilium exhiberi debet, & eo quidem ordine, quem §. 26. 27. indicavimus, nam quantum fieri potest, idem ordo in Jurisprudencia universali & particulari observandus

us est, ordinis enim paritas cognitionem & facilem & solidam reddit.

§. 59. Propter prolixitatem tamen Jurisprudentiæ particularis, *Publica & Privata* separari, imo & hæc in *partes* vel *species* amplius distinguui solet, cum universalem una serie proponere liceat.

§. 60. Datur etiam in cognitione juris civilis aliqua *certitudo*, secundum ea, quæ §. 28. proposuimus, Circa leges humanas sæpe *probabilitas* saltem adest. Præterea observandum, quod, si in aliqua civitate plures leges, antiquæ & novæ, domesticæ & extraneæ reperiantur, nonnunquam dubia critica & historica occurrant, quæ ad ipsam legum disciplinam non adeo pertinent; vel etiam circa leges ipsas dubia existant, quæ à legislatore tolli queant.

§. 61. Secundo sensu *vid.* §. 51. accepta Jurisprudentia particularis, est *habitus mentis*, *leges in certa aliqua civitate occurrentes, resque iis connexas, rite intelligendi*, quo sensu titulus *Prudentia*, ei recte tribuitur. Quæ de cætero de ejus *effectu* §. 29. 30. diximus, ea etiam huc pertinent. Non minus quæ, quoad cognitionem, de ejus *acquisitione*, *subjecto*, *materia*, *principio demonstrandi* & *sine* proxime

§. 53. 54. 55. 56. annotavimus, illa etiam huc transferenda sunt.

§. 62. Cognitione & habitu acquisito etiam hic varie utimur, secundum ea, quæ §. 31. observata sunt. Si cognitionem scripto committamus, oritur Jurisprudentia particularis, systematice accepta *vid. §. 51.* quæ est *complexus legum in certa aliqua Republica observandarum, quo Imperantes & Subditi virtuosius evadant, ac Reipublicæ tranquillitas & beatitudo civilis conservetur & vigeat.* Hoc sensu nomen *Disciplina* vel *Doctrina* gerit.

§. 63. Materia itaque sunt leges civiles, hinc quæ §. 53. 54. 55. 56. 57. 58. 59. 60. diximus, illa ex alio etiam huc quadrant. Quoad *finem* tamen adjicienda sunt ea, quæ §. 33. 34. intuitu Jurisprudentiæ universalis scripsimus, nam Particulari etiam suo modo conveniunt.

§. 64. Cura horum scriptorum conficiendorum & tractandorum, in vita civili ad eos, qui *Jcti* dici solent, spectat, quamvis quoad *Jus publicum* res non omni careat controversia, circa quam repetenda sententia §. 37. proposita.

§. 65. De *usu* Jurisprudentiæ Particularis forte nihil admonendum, cum à nemine, nisi qui omnes leges explodere velit, in dubium is vocetur. Est tamen ejus etiam *abusus*, ne-
glé-

glectus & morbus, quæ tamen non ipsi Disciplinæ, sed hominibus imputanda esse, facile liquet.

§. 66. Scilicet raro Jurisprudentia Particularis in usum Reipublicæ, rite solet esse *constituta*, parum congrue in Scholis *docetur*, dum solida Jurisprudentiæ divinæ fundamenta, ei non substernuntur, in vita civili passim ejus decreta *negliguntur*, ac in foro, sine pravis affectibus, raro *applicantur*.

§. 67. Potest etiam Jurisprudentia particularis distinguere (1) in *Naturalem & Positivam* (2) in *Privatam & Publicam*, juxta indicium §. 49. quæ posterior distinctio eo magis hic necessaria est, quo magis prolixitas, §. 59. notata, requirit, ut juxta eam Jurisprudentia particularis tradatur.

§. 68. Licet autem distinctio illa tritissima sit, attamen satis expedita non est, cum utriusque studii limites à Scriptoribus vel non satis designentur, vel certe ipsa tractatione turbentur, mihi sic breviter videtur.

§. 69. Jurisprudentia *Privata* est, quæ hominum privatorum, nec non Imperantium, juxta respectum privatum spectatorum, officia explicat, *Publica* vero, quæ structuram Civitatis adeoque subditos ac Imperantes constitu-

tales, seu cum imperio & libertate civili consideratos, expendit.

§. 70. De cætero totuplex est Jurisprudencia particularis, quot sui juris Respublicæ occurrunt, hinc hætenus in genere, de ea dicta, ad quamvis Jurisprudenciam particularem, mutatis mutandis, applicari, ac, pro ratione Reipublicæ, amplius distingui ac diduci possunt & debent, quod exemplo Jurisprudenciæ Germanicæ in *meis* Juris Publici, Feudalis & Ecclesiastici *Speciminibus* ostendi.

§. 71. Altera Doctrinæ civilis species est Prudentia præse dicta vid. §. 8. quæ etiam vel (1) pro *cognitione innoxie utilitatis*, vel (2) pro *habitu eam intelligendi*, vel (3) pro *complexu doctrinæ, in scripturam redactæ*, accipi potest, quæ distincte persequi jam non libet.

§. 72. Materia Prudentiæ est *utilitas actionibus licitis procuranda*, nimirum possunt bona deesse, mala verò immeritò urgere, vel imminere, quomodo igitur, salvis legibus & justitiâ, illa consequi; hæc depellere vel declinare queamus, Prudentia præcipit. Ex quo liquet, talia bona & mala intelligi, quæ directioni humanæ quodammodo subsunt, ac extra legum obligantium sanctiones, vel etiam sub iis constituta reperiuntur.

§. 73. Acquiritur Prudentia (1) *nativa ingenii*

genii bonitate (2) lectione Scriptorum, ejus regulas continentium (3) conversatione cum viris prudentibus & expertis, ac (4) propria experientia, quæ cum bonitate judicii utramque facit paginam.

§. 74. Late autem patet Prudentia, nam nullum fere est institutum humanum, circa quod eadem sese non exserere queat. Imperantes & subditi, pro suo quique statu, ejus regulis indigent.

§. 75. Ex quo liquet, quod pro ratione variorum objectorum, infinitæ propemodum sint Prudentiæ Species, videntur tamen ad duo summa genera revocari posse, *Privatam* & *Publicam*.

§. 76. Privata prudentia est, qua quis utilitatem innoxiam, pro ratione status sui, procurare novit. Publica vero, qua quis, quid Reipublicæ expediat, probe intelligit, quæ proprie *Politica* dicitur, *vid. Grot. de J. B. P. in prolegom. §. 57.*

§. 77. Ad illius species pertinet *Oeconomica*, *Prudentia decori, docendi ut & conjectandi affectus*, sic modo hæc revera datur. Illa vero poterit esse *Civilis & Militaris*, *Transiens*, quæ exteros, & *Immanens*, quæ civitatem ipsam respicit, sub qua, *Prudentia Legislatoria, Consultatoria & Oeconomica*, in specie continetur.

§. 78.

§. 78. De cætero regulæ utilitatis non adeo certæ sunt, respiciunt enim plerumque eventus futuros, ac à fortunâ aliorumque arbitrio ex parte dependentes, hinc nonnunquam media incongrua adhibentur, vel recte electorum vim, casus improvisus elidit.

§. 79. Dantur tamen hac in re gradus, & aliquando Prudentiæ decreta, satis sunt certa, si scilicet à nostro tantum arbitrio, utilitatis directio dependeat. Sic dictamina Prudentiæ, quæ Reipublicæ fines probe muniri, validum exercitatumque militem, defendendæ civitati, ali jubeant, & ejus generis alia, certa sunt, iis enim observatis, utilitas aliqua certo sequitur.

§. 80. Quia autem tam late patet Prudentia, ac ejus decreta plerumque incertitudo comitatur, hinc vix in formam artis illa redigi potest, aut, tale quid moliri, operæ est pretium, nam generales utilitatis regulæ, uti à quovis facile confici possunt, ita parum profunt, speciales vero, intuitu infinitorum objectorum, in vita civili occurrentium, tradere, unius aut nonnullorum hominum, captum ac experientiam excedit.

§. 81. Est igitur hæc res cujusvis judicio & experientiæ potius relinquenda, ut pro ratione status sui, regulas procurandæ utilitatis, sibi

sibi formet, qualia dictamina quoque literis consignare, atque ita per partes, Prudentiam excolere licet, possunt etiam ejusmodi decreta, Jurisprudentiæ hinc inde inferi.

§. 82. Prudentiæ opponitur *Imprudentia*, qua quis veras utilitatis regulas ignorat, ac insuper falsis quandoque est imbutus. Eam naturalis stupor ac ignavia ingenium excolendi, plerumque simul gignunt.

§. 83. Deinde Prudentiæ opponitur *Versutia*, seu falsa Prudentia, quæ omnia utilitate propria metitur, adeoque non actionibus licitis utilitatem innoxiam, sed per nefas ac cum læsione aliorum, commodum proprium quærit. Versutis non deest ingenium, quod optimum in iis sæpe deprehenditur, sed virtus & leges observandi studium.

§. 84. Si calculum recte subducas, ut plurimum inter homines, maxime potentes, Prudentiæ titulo, Versutia superbit, & potest illa autoribus suis insigniter blandiri, si læsi, dolo elusi, vel vi injusta oppressi, nihil contra Versutum moliri queant, tum enim ille malitiæ suæ fructum impune sentit, sed si læsi justa ultione accensi, viribusque sufficientibus instructi, injurias illatas vindicent, tum versutum, non prudentem, sed insigniter stultum fuisse, exitus sæpe ostendit.

§. 85. Ad prudentiam etiam pertinet tritum *Rationis status* nomen, nam eodem vel *ipsa utilitas*, vel *prudentia eam procurandi*, innuitur. In significato etiam latiori vel utilitatem & Prudentiam *innoxiam* ac *licitam* vel *noxiam* & *illicitam detestandamq;* notat, de quo in *Specim. Jur. publ. l. 6. c. 9.* nonnulla consignavi.

§. 86. Ex haftenus dictis disciplinarum moralium differentiae, nempe *Theologia & Doctrina civilis in genere*, vel *Theologia & Jurisprudentia naturalis*, aut *Jurisprudentia & Prudentia*, vel *Jurisprudentia universalis & particularis*, haut difficulter colligi & intelligi possunt. Nobis breviter Theologiam & Jurisprudentiam divinam ut & Hanc, ac Jurisprudentiam particularem comparare placet.


§. 87. Theologia igitur & Jurisprudentia divina differunt (1) *sine*, illa felicitatem futuram, haec praesentem respicit (2) *applicatione*, illa exactissimam legum observantiam exigit, haec externo obsequio etiam contenta est (3) *Principio demonstrandi*, illa speciali revelatione, apud Christianos S. Scriptura, nititur, haec ex natura potissimum sua derivat, ac nonnunquam ad revelationem recurrit (4) *subjecto*, illa requirit hominem, divina gratia specialiter instructum, haec viribus naturalibus praeditum

sup.

supponit (5) *objecto* , illa leges divinas, ut religiosas, hæc, ut politicas, considerat.

§. 88. Jurisprudencia universalis & Particularis, seu Divina & Humana differunt (1) *sine*, illa felicitatem generis humani, hæc certæ alicujus Reipublicæ intendit (2) *principio demonstrandi*, illa ad naturam, hæc ad promulgationem recurrit (3) *objecto*, illa leges divinas in terminis generalioribus, & sine respectu ad certam Rempublicam, expendit. Hæc conclusiones legum divinarum speciales cum legibus humanis, certæ Reipublicæ applicat.

§. 89. Atque has, quas hæctenus exhibui, Disciplinarum moralium partitiones, & necessarias & ædæquatas arbitror. Ut quis aliis terminis utatur, aut species propositas amplius distinguat, non repugno, sed ex aliis fundamentis partitiones posse aut debere repeti, vel allatas, salva solida cognitione, negligi, id vero haut concesserim.



LECTORI BENEVOLO SALUTEM.

NI receptus plerisque eruditis mos legis propemodum vim induisset, supervacuum videri poterat, circa rationem hujus scripti aliquid præfari, cum res ipsa satis loquatur, me nihil aliud egisse, quam ut tironibus præcipua Juris Naturalis capita, breviter & ut arbitrator, perspicuo compendio exponerem: ne, si citra cognitionem velut elementarem in diffusa ejus disciplinæ spacia sese immiserint, copia & difficultate rerum ab initio protelentur. Simul & illud publico expedire visum est, ejusmodi doctrina morali studiosæ juventutis animos imbui, cujus usus manifestus in vita civili spectaretur. Et licet alias semper in glorium Judicaverim, aliorum diffusiora scripta & multo magis propria, in compendium redigere: tamen, cum superiorum autoritas accederet, a cordatis vitio mihi verum iri non arbitror, quod isthoc laboris unice Juventutis utilitati dare voluerim; cujus merito tantus esse favor debet, ut in ejusdem gratiam suscepta

pta

pta opera, etiam ingenii & splendoris non capax, nemine indigna sit judicanda. Cæterum quin ejusmodi principia ad universam Juris Disciplinam magis idonea sint, quam cujusvis Juris Civilis elementa, nemo, cui sanum sinciput, abnuet.

Observ. 1.

Ni receptus) Libet etiam breviter percurrere Præfationem, cum nonnulla in ea occurrant, quæ ad doctrinam juris naturalis pertinent. Poterit eadem in quinque partes distingui. *Prima* docet scopum libri, ac (1) solenni exordio verb. *ni receptus* (2) rationibus Scribendi, ab utilitate discentium & publica desumptis, verb: *ne si citra cognitionem* (3) objectione, verb: *& licet alias semper* (4) responsione triplici, ab autoritate superiorum, favore juventutis & præstantiâ Disciplinæ, desumpta, verb: *tamen cum superiorum*, absolvitur, circa quæ aliqua commentari opus non est.

Atque hæc in præsens sufficere poterant, ni quidam monuissent, non abs re fore, aliqua præmittere, quæ ad indolem Juris Naturalis in universum intelligendam, ejusdemque limites accuratius designandos, facerent. Quod eo libentius suscepi, quia hoc modo prætextus adimitur hominibus importunè curiosis febriculosam suam censuram extendendi ad hancce disciplinam, quæ sæpe
(c) velus

velut interjecta ab ipsorum provincia disjungitur. Manifestum igitur est, ex *tribus* velut *fontibus* homines cognitionem officii sui, & quid in hac vita sibi tanquam honestum sit agendum, tanquam turpe omitterendum, haurire; ex *Lumine Rationis*, ex *Legibus Civilibus*, & ex peculiari *Revelatione* divini *Numinis*. Ex *primo* fluunt officia hominis communissima, præcipuè quæ ipsum cum aliis hominibus sociabilem reddunt: ex *altero* officia hominis, quatenus peculiari & definitæ civitati subiectus degit: ex *tertio* officia hominis Christiani. Inde & *tres* separatæ *disciplinae* proveniunt; quarum prima est *Juris Naturalis*, omnibus gentibus communis altera *Juris Civilis* singularum civitatum, quæ tam multiplex est, aut esse potest, quot numero sunt civitates, in quas genus humanum discessit: tertia *Theologia moralis* habetur, illi parti Theologiæ contra distincta, qua credenda exponuntur. Singulæ harum disciplinarum *modum suæ dogmata probandi* adhibent suo principio respondentem. In *Jure Naturali* aliquid faciendum asseritur, *quia per rectam rationem idem* ad socialitatem inter homines *necessarium* colligitur: Præceptorum *Juris Civilis* *ultima ratio* est, *quia legislator ita constituit:*

Theo-

Theologus Moralis in eo ultimo adquiescit, quia DEUS in Scripturis sacris ita jussit.

Observ. 2.

Atque hac in præsens sufficere poterant) Pars secunda, præmissis ulterioris scriptionis causis, à monitò amicorum & Censurum importunitate, petitis verb: *ni quidam*, fontes disciplinarum moralium indicat verb. *manifestum igitur est*, modumque probandi in singulis usitatum, amplius edocet verb. *singula harum*. Quæ quidem non male dicuntur, attamen Disciplinas morales adæquate satis, & juxta debitas subordinationes, non repræsentant, ceu colligi potest ex iis, quæ in Prolegom: §.4. seqq. dixi.

Quemadmodum autem disciplina Juris Civilis Jus Naturale, tanquam generalem magis disciplinam, præsupponit: ita si quid Jure Civili continetur, de quo Jus Nuturale silet, non ideo hoc illi repugnare censendum est. Simili modo si in Theologia Morali aliqua tradantur, ex revelatione divina profluentia, ad qua ratio nostra jam non pertingit, quæque adeo & Jus Naturale ignorat imperitum valde foret, ideo illam cum hac committere, aut repugnantiam aliquam istarum disciplinarum somniare. Vice versa, si quæ in disciplina Juris Naturalis præsupponantur ex eo, quod per rationem investigari potest; illa propter-

ea iis, quæ Sacræ Literæ super eadem re liquidius tradunt, nequaquam opponuntur, sed tantum abstrahendo concipiuntur.

Observ. 3.

Quemadmodum autem Disciplina) Occasione præcedentis doctrinæ, tria admonet Autor (1) disciplinam juris civilis seu Jurisprudentiam particularem, præsupponere jus naturale, tanquam disciplinam magis generalem, id quod verissimum (2) jus civile naturali non repugnare, si præter hujus decreta aliquid peculiare contineat verb. *ita si quid*: de quo etiam dubitari non debet (3) nec inter disciplinam juris naturalis, & Theologiam moralem asserendam esse pugnantiam, si altera, præter alterius decreta quid exhibeat verb. *simili modo*, quæ itidem admitti possunt.

Sic v. g. in disciplina Juris Naturalis abstrahendo ab illa cognitione, quæ ex Sacra Scriptura hauritur, formatur conditio primi hominis utcunque in mundum projecti, quatenus sola ratiocinatio assequi potest; ista opponere iis, quæ super eadem conditione divinæ literæ tradunt, hic verò est succus nigræ loliginis, hæc est ærugo mera.

Observ. 4.

Sic v. gr. in disciplina juris naturalis) Ultimam assertionem declaraturus Autor, affert exemplum fctiones suæ, quæ homo utcunque in mundum projectus fingitur, quæque amplius

in Oper. Major. l. 2. c. 2. §. 2. exponitur hanc-
que minime doctrinæ S. literarum opponen-
dam esse contendit. Displicuit illa fictio B. D.
Alberti in *Compend. Jur. nat. Orthodox. p. 1. c. 1.*
§. 28. qui eam illicitam & homini Christiano pa-
rum convenientem, quodammodo censuit de
quo deinceps in scriptis eristicis amplius di-
sputatam est.

2. Mihi fictio illa omnino licita videtur, cum
nulla in narte, autoritati S. literarum dero-
get, inte tio quoque Pufendorffii, istam ex-
cogitantis, bene se habeat. Nimirum solici-
tus ille de fundamento juris naturalis, so-
cialitatem laudavit, quo igitur hominis
naturam socialem esse probaret, proba-
tionem tum rationibus positivis, tum fi-
ctione contrarii peragendam esse putavit;
Age inquit velut convincendo, si non cre-
dis ob rationes positivas, te ad socialitatem
destinari, fingamus contrarium, te esse in mun-
dum undecumque projectum, & ab omni au-
xilio humano in solitudine destitutum, & jam
propriæ miseriæ sensu fateberis, hominis na-
turam formatam esse socialem!
3. Cæterum sicut ipsa positiva socialitatis pro-
batio, quam Autor molitus est, non adeo con-
cludit, ceu ad *Libr. 1. Cap. 3.* ostendemus,
ita fictionis assumptæ intentio, scopo suo et-
iam excidisse videtur, nam si miseriæ, ex
solitudine resultantis, argumento socia-
litas probetur, tum à convincendo hoc
facile in eam partem accipi potest, quasi

hominis natura , non absolute socialis , sed saltemquatenus id propria utilitas exigit , formata sit , quo ipso adeo utilitas cujusvis privata , juris naturalis fundamentum constituitur , ex quo sane dictamina , generi humano parum proficua , deduxeris. Sed de hoc alibi amplius dispiciendum erit !

Enim verò uti Juri quidem Civili & Naturali, facile inter se conveniet : ita inter idem Jus naturale & Theologiam Moralem fines regere , ac , quibus potissimum partibus illa differant , definire , paulo operosius videtur. Qua super re paucis sententiam meam exponam , non quidem pro autoritate Papali , ac si ab omni errore privilegio aliquo mihi cautum foret , neque qui ex somniis divinitus immixtis , aut irrationabili aliquo instinctu , singularis cujusdam illuminationis fiducia animetur ; sed tanquam talis , cui spartam sibi commissam pro modulo ingenii exornare cordi sit. Ita tamen ut , quemadmodum cordatos & eruditos viros meliora suggerentes lubenter audire , & citra pertinaciam prius placita emendare sum paratus : sic floccifaciam Midæ æmulos censores , rerum ad se nihil spectantium arbitria proterve involantes , totamq; ardelionum nationem , cujus characterem lepidissime *Phædrus* repræsentat : *Trepide inquit,*

quit , *concurſans , occupata in otio , Gra-
tis anbelans , multa agendo nihil agens , Sibi
moleſta & aliis odioſiſſima.*

Primum igitur diſcrimen, quo iſtæ diſcipli-
næ invicem ſeparantur, reſultat ex diverſo
fronte, unde ſua dogmata utraque derivat; de
quo jamjam tetigimus. Ex quo conſequitur;
ſi aliqua ſint, quæ divinis literis agere aut
omittere jubeamur, quorum neceſſitatem
tamen ratio ſibi relicta perſpicere nequit, illa
extra Jus Naturale eſſe , & ad Theologiam
Moralem propriè ſpectare. Præterea in
Theologia lex conſideratur, prout innexam
habet divinam promiſſionem, & quandam
rationem fœderis inter DEUM & homines:
abs qua conſideratione Jus Naturale abſtra-
hit; quippe cum iſta à peculiari DEI revela-
tione proficiſcatur, quam ſola ratio invenire
nequit. Illud porro diſcrimen longe maxi-
mum eſt, quod finis diſciplinæ Juris Naturalis
tantum ambitu hujus vitæ includatur, adeo-
que ea hominem formet , prout hanc vitam
cum aliis ſociabilem exigere debeat : aſt
Theologia Moralis hominem Chriſtianum in-
format, cui propoſitum eſſe debet, non hanc
ſolùm vitam honeſte tranſigere, ſed qui fru-
ctum pietatis poſt hancce vitam maxime ex-
pectat, quique adeo πολίτευμα ſuum in cæ-

lis habet, heic autem viatoris duntaxat aut peregrini instar gerit. Quanquam enim animus hominis non solum ardenti cum affectu immortalitati velut immineat sui que destructionem vehementer aversetur; atque inde apud plerosque gentilium inoleverit persuasio de animæ à corpore separatae duratione, & quod tunc bonis benè, malis male sit futurum: ejusmodi tamen circa hæc persuasio, in qua animus hominis plane & firmiter adquiescere possit, ex solo DEI verbo hauritur. Inde & Juris Naturalis scita & ad forum duntaxat humanum adaptantur, quod ultra hancce vitam sese non extendit; quæ ipsa multis in partibus prave ad forum divinum adplicantur, circa quod Theologiæ maxime curæ est. Ex quo & illud fluit, ut, quia forum humanum circa externas tantum hominis actiones occupatur, ad ea autem, quæ intra pectus latitant, nec aliquem effectum aut signum foras produnt, non penetret, adeoque nec circa eadem sit sollicitum; Jus quoque Naturale magnam partem circa formandas hominis exteriores actiones versetur. Ast Theologiæ Morali non sufficit, exteriores hominis mores utcunque ad decus composuisse; sed in eo maxime laborat, ut animus, ejusque motus interni, ad placitum

Numi-

Numinis fingantur: & illas ipsas actiones improbat, quæ extrinsecus quidem recte se videntur habere, ab animo tamen impuro promanant. Quæ ratio etiam videtur, quare in divinis libris haut ita frequenter agatur de illis actionibus, quæ poënis fori humani sunt sancitæ, aut circa quas ibidem jus dicitur; quam de illis, quæ, uti *Seneca* loquitur, sunt extra publicas tabulas. Uti manifeste adparet iis, qui præcepta & virtutes ibidem inculcatas accurate inspexerint.

Observ. 5.

Enim vero uti juri quidem civili) Pars *tertia* dicentis intentione præmissa verb. *enim vero*, proponit differentias doctrinæ juris naturalis & Theologiæ moralis. Quarum prima est desumpta à *principio demonstrandi* verb. *primum igitur*, secunda à *peculiari legum adjuncto* verb. *præterea*, quæ ex præcedente fuit, tertia, à *sine* verb. *illud porro*, quarta ab *applicationis diversitate* verb. *ex quo & illud*, quæ ex tertia dependet. De cætero omnes illæ differentia, modo recte intelligantur, admitti possunt.

Etsi, cum & illæ ipsæ virtutes Christianæ animos hominum ad socialitatem quam maxime disponant, Theologia quoque Moralis honestatem vitæ civilis efficacissime promoveat, Uti & vice versa, si aliquem videas,

qui turbulentum & importunum vitæ civilis membrum se gerat, tuto judices licet, Religionem Christianam intra labre tantum ipsi hæ-
rere, cor nondum penetrasse. Atque ex hi-
sce non solum genuini limites, qui Jus Natu-
rale, prout à nobis illud traditur, à Theolo-
gia Morali separant, manifeste puto adparent:
sed etiam quod Jus Naturale nequaquam
dogmatibus, veræ Theologiæ repugnet, sed
tantum à quibusdam ejus dogmatibus, quæ
per solam rationem investigari nequeunt,
abstrahat.

Observ. 6.

Etsi cum & illa ipsa virtutes) Occasione doctrinæ
præcedentis, Autor tria affert (1) Theolo-
giam per consequentiam, vitæ civilis tran-
quillitatem promovere, cum bonus cultor
Dei sit etiam bonus civis verb. *etsi cum* (2)
malum civem nunquam esse bonum Dei cul-
torem verb. *uti & viceversa*, quæ certissima
sunt, quamvis multi, circa applicationem,
ea non satis capiant (3) secundæ & tertiæ
partis epilogum verb. *atque ex hisce.*

Unde & illud patet, necessarium esse, *ut
in disciplina Juris Naturalis homo nunc consi-
deretur, prout ipsius natura est corrupta,
adeoque prout est animal multis pravis cupi-
dinibus scatens.* Nam etsi nemo tam stupi-
dus sit, quin in seipso inordinatos ac in de-
via tendentes affectus deprehendat: tamen,
nisi divinæ literæ prælucere, nemini jam

con-

constare posset, illam affectuum rebellio-
nem per culpam primi hominis provenisse.
Et consequenter, cum Jus Naturale ad ea
non abeat, quo ratio pertingere nequit, incon-
gruum foret, idem ex natura hominis integra
velle deducere. Præsertim cum & pleraque
præcepta ipsius Decalogi, prout verbis negati-
vis concepta sunt, naturam hominis corru-
ptam manifeste præsupponant. Sic v. g. pri-
mum præceptum utique præsupponere vide-
tur, hominem ad idolatriam & πολυθεότητα
credendam proclivem. Si enim ponas homi-
nem integra adhuc natura præditum, in quo
liquida DEI erat cognitio, & qui subinde ve-
lut familiari ejus revelatione fruebatur: non
video, quomodo tali in mentem venire potu-
erit, aliquid sibi fingere, quod loco veri DEI,
aut cum eo, colete vellet; aut credere in eo
Numen inesse, quod ipse finxerat. Igitur huic
opus non erat verbis negativis injungi, ne
deos alienos coleret; sed sufficebat eidem sim-
plex & affirmativum præceptum: diliges ho-
norabis, & coles Deum, quem universi hujus,
& tuum quoque creatorem nosti. Idem circa
secundum præceptum obtinet. Nam quare
negativo præcepto vetaretur Deum blasphe-
mare, qui liquido ipsius majestatem & benefi-
cia intelligebat, & quem nullæ pravae cupidi-
nes

nes agitabant, cujusque animus statu sibi à Deo assignato placide acquiescebat? Quomodo hunc tanta insania subire poterat? Quin hic affirmativo tantum præcepto monendus erat, ut nomen Dei glorificaret. Aliter tamen dicendum videtur de tertio, ut & quarto præcepto; quæ cum affirmativa sint, neque necessario corruptam naturam præsupponant, in utroque statu locum invenire possunt. Sed circa reliqua præcepta, proximum spectantia, res æque est manifestissima. Homini enim, qualis initio à DEO conditus erat, sufficebat simpliciter injunxisse, ut proximum suum diligeret; ad quod & natura proclivis erat: at quomodo eidem poterat præcipi, ne occideret, quando nondum mors cadebat in hominem, quæ per peccatum in mundum introivit? Verum nunc negativo præcepto quam maxime opus est, ubi pro dilectione tanta odia inter homines grassantur, ut etiam magna eorum seges detur, qui ex mera invidia, aut libidine alterius fortunam invadendi, alios non innocentes solum, sed & amicos & de ipsis benemeritos, subversum ire non dubitent; & quidem ut horridum & inconsultum turbulenti animi impetum sub conscientia vocabulo, si diis placet, venditare non erubescant. Sic quid opus erat expresse adulteria vetare inter
COS

eos conjuges, qui tam ardenti & sincero amore sese amplecterentur? aut quid furta vetare intere: at, cum nulla adhuc avaritia, nulla penuria foret, & nemo quid sibi proprium putaret, quo alteri prodesse posset? Aut quid necessum erat, falsa testimonia interdicere, cum nondum existerent, qui exinde famam sibi atque gloriam aucuparentur, si alrerum foeda atque inficeta calumnia adspargere possent? Sic ut non inepte huc adplicaveris illud *Taciti: Vetustissimi mortalium, nulla adhuc mala libidine, sine probro, scelere, eoque sine poena aut coërcitionibus agebant & ubi nihil contra morem cuperent, nihil per metum vetabantur.*

Observ. 7.

Unde & illud patet) Pars quarta expendit eorum sententiam, qui in tradendo jure naturali, ad statum integritatis, quam Christiani ex S. Scriptura credunt, respiciunt, quorum Antesignanus est B. D. Alberti in *Compend. Jur. naturi, orthodox.* Quoad statum controversiæ præmonendum, non disputari de *fundamento, ex quo juris naturalis veritas demonstratur*, quod multis & nescio, an ipsis controversiæ Autoribus, persuasum est: Nam in utroque stato integro & corrupto, idem est juris naturalis fundamentum, *natura scilicet humana*. quatenus à Deo *religiosa, sui amans & socialis formata est*, ex quo tam in statu integro, quam-

cor-

corrupto, legis naturalis veritas repetenda est. Et licet in illo homo integer exactè potuerit legem naturalem implere, quæ perfectio, per lapsum amissa, in hoc cessat, attamen illa *subjecti mutatio*, non mutavit Dei intentionem, fundamentum juris naturalis, aut ipsum jus naturale, sed illa omnia, etiam post lapsum, adhuc inconcussa perstant. Ex quo manifestissimum est, quod status integer, intuitu juris naturalis, non habeat rationem Principii vel fundamenti.

2. Eò igitur potius redit controversia, *an juris naturalis, ex suo fundamento demonstrati, præcepta, juxta statum integritatis representanda, ac deinceps statui corrupto applicanda sint?* Hoc asserunt status integri Patroni sed Auctor negat *b. verb. unde & illud*, qui status integer & lapsis Protoplastorum, rationi sibi relictae, sit incognitus *verb. nam etsi nemo*, præterea multa præcepta naturalia hodie occurrant, quæ in statu integro locum non habuissent, adeoque inde repeti nequeant *verb. præsertim cum*, quæ posterior ratio priori præstat.

Atque hæc ipsa probè intellecta viam pandere possunt ad amovendam eam dubitationem: *num igitur lex diversa fuerit in statu naturæ integræ, an vero eadem?*

Observ. 8.

Atque hæc ipsa probe intellecta) Quæstio præcedens ferè etiam hoc modo proponi potest,

an jus naturæ in statu integro & corrupto idem sit, seu an uterque status quoad jus naturæ conveniant? imo, adhibita limitatione hæ quæstiones cum præcedente plane coincidunt.

Ubi paucis responderi potest: summa legis capita in utroque statu esse eadem sed multa præcepta particularia propter diversitatem conditionis humanæ variare; seu potius eandem summam legis per diversa (non tamen contraria) præcepta sese explicare: prout diverso sese modo habuit homo; cui illa lex observanda. Summam legis Salvator noster ad duo capita redegit: *Dilige Deum & Dilige proximum*. Ad hæc capita referri potest universa Lex Naturalis, tam in integro, quam in corrupto statu hominum; (nisi quod in statu integro nullum aut modicum videatur discrimen fuisse inter Jus Naturale, & Theologiam Moralem.) Nam & Socialitas, quam nos profundamento Juri Naturali subtravimus, commodè in dilectionem proximi resolvi potest. Sed quando ad præcepta particularia descenditur, sane discrimen non leve emergit, tam circa præcepta affirmativa quàm negativa. Et quidem ad affirmativa præcepta quod attinet, eorum non pauca jam in isthoc statu dantur, quibus in primævo statu locus non fuisse videtur: idque partim, quia illa præsupponunt tale institutum, quod, an in felicicissimam homi-

hominum conditionem cadat, non constat; partim quia sine miseria & morte, quæ ab illo statu exulabat, non intelliguntur. V.gr. Jam inter præcepta Legis Naturalis est, ne quis alterum in emtione venditione decipiat, ne falsa ulna, mensura, aut pondere utatur, ut pecuniam creditam convento tempore restituat; at illud nondum ad liquidum est perductum, an, si peccati expers genus humanum perstitisset, ejusmodi commercia, qualia nunc agitantur, exercenda fuerint, & an aliquis usus pecuniæ tunc futurus fuerit. Sic si tales civitates, quales nunc sunt, in statu innocentiae locum non habuerunt; locus quoque ibidem non fuit præceptis, quæ id genus civitatum, iisque contentum imperium, præsupponunt. Jam quoque Jure Naturali jubemur succurrere egenis, subvenire iniqua calamitate oppressis, curam habere viduarum, orphanorumque: atqui hæc frustra præcipiuntur iis, qui miseriæ, egestati, mortique non sunt obnoxii. Ad condonandas injurias, pacemque conciliandam, pronos esse nos jam jubet Lex Naturalis: quæ frustranea est inter eos, qui in Leges Socialitatis non peccant.

Atque id ipsum manifestè quoque perspicitur in præceptis negativis, ad Jus jam Naturale (non Positivum) spectantibus. Etsi enim

nim

nim quodvis præceptum affirmativum virtualiter contineat interdictum omnis oppositi; (v. gr. qui jubetur diligere proximum, eo ipso vetatur inferre illi omnia, quæ dilectioni repugnant :) tamen ut expressis præceptis illa sanciantur, superfluum videtur, ubi nullæ pravæ cupidines ad talia patranda propellunt. Ad quod illustrandum accommodari potest, quod Solon patricidarum pœnam lege publica sancire noluit, quod tantum scelus in aliquem filium cadere non arbitraretur. Cui simile est quod *Franc. Lopez de Gomara, Hist. Gen. ind. Occident. cap. 207.* refert de populis Nicaraguæ, apud illos nullam fuisse statutam pœnam in eum, qui Regulum (*Cacique* ipsi vocant) occidisset; quod nullus, aiebant sit subditus, qui excogitare aut patrare tam dirum facinus velit. Vereor, ne putidum videatur, isthæc tam aperta pluribus inculcare. Ad tironum tamen captum hoc exempli addam. Sunt aliquis informationi commissi duo pueri, sed dispari plane indole. Unus modestus est, verecundusque, & magno literarum amore flagrans: alter dissolutus, petulans, fœdus, potius libidines, quam libros, amat. Summa officii utrique eadem: literas addiscere, sed peculiaris præcepta disparia. Priori enim

(d) suffi-

sufficit injunxisse, quæ studia, quo tempore quave ratione tractare debeat: alteri præter hæc acerrima sub comminatione vetandum, ne circumcurset, ne alea ludat, ne libros vendat, ne in exercitiis componendis aliena vitula aret, ne pergræcetur, ne scorta confectetur. Eadem si quis prioris indolis puero operose declamare instituat, hic *αὐτοῦ* ipsum jubebit, & cuivis potius, quam sibi, ista canere, qui talium nulla cupidine tangatur. Ex quo manifestum arbitror esse, longe aliam fore Juris Naturalis faciem, si quis statum hominis integrum velit præsupponere:

Observ. 9.

Ubi paucis responderi potest) Autor distinguit inter *legis naturalis summam* & *præcepta particularia*. Illa in utroque statu est eadem, hæc vero differunt. Prius probat in verb. *summam legis salvator*, posterius vero exemplo præceptorum affirmativorum, certum aliquod institutum vel miseriam præsupponentium, verb. *sed quando* & negativorum, verb. *atque id ipsum*, ostendit, eamque sententiam aliquo exemplo, verb. *ad quod illustrandum*, & simili, verb. *vereor, ne putidum*, amplius illustrat.

2. Sed status integri defensores contendunt, etiam quoad præcepta particularia utrumque statum convenire, seu eadem præcepta in

in utroque statu occurrere, hinc quoad affirmativa præcepta, certum aliquod institutum aut miseriam præsupponentia, quæ Pufendorfius à statu integro abfuisse censet, distinguunt inter *principium* & *objectum*, seu *existentiam normalem* & *formalem*, contendentes, quod omnia præcepta particularia, quoad principium, atque ita normaliter, in statu integritatis fuerint, utut speciale objectum, ac adeo existentia formalis non semper adfuerit *vid.* D. Albert, *Compend. jur. natur. c. 1. §. 33.* Verum illa responsio saltem ostendit, quod status integer & corruptus convenient quoad *summam legis naturalis*, de quo nulla est quaestio, non verò quoad *præcepta particularia*, de quibus tamen unice controvertitur,

3. Porro præcepta negativa, quæ itidem à statu integro abfuisse existimabat Pufendorfius, in eodem locum habuisse censent statûs integri defensores (1) *quia homo integer etiam habuerit libertatem contradictionis, ac potuerit peccare & non peccare, adeoque indiguerit præcepto negativo vid.* Albert. *d. c. 1. §. 45.* sed à libertate contradictionis ad necessitatem præceptorum specialiter exprimendorum non valet, consequentia, sed ad illam insuper insignis in malum proclivitas requiritur, quod ex communi sensu facile patet (2) *quia præceptum negativum: ne comedas de ligno, in statu integritatis exstiterit, Albert. d. c. 1. §. 46.* verum à præcepto positivo, cujus sententia,

ex nullo alio præcepto, intelligi potest, ad præceptum naturale negativum, cujus sensus sub affirmativo generali comprehenditur, iterum non valet consequentia, illius enim expressio nullam arguit in subditis malitiam, hinc potest imò debet exprimi, cum alias de voluntate Imperantis non constet, hujus vero expressio malitiam præsupponit insignem, quæ tamen ab homine integro abfuisset.

4. Videtur sane magna temeritas, idenditatem præceptorum naturalium, quoad diversos status, velle asserere, cum enim non semper eadem objecta inter homines occurant, præcepta particularia non possunt non variare. Sic in ipso statu corrupto, conclusiones naturales in diversis civitatibus, non semper sunt eadem; Apud Romanos mancipia erant in usu, quorum intuitu multa constituit jus naturale, sed hæ conclusiones omnes ignorantur in iis civitatibus, in quibus mancipia non occurrunt, atque hujus generis sexcenta alia exempla dari possunt.
5. Denique id vel maximè nota, totius illius sollicitudinis, quæ status integer & corruptus comparantur, ac utriusque respectu eadem præcepta particularia asseruntur, vel ex statu integro præcepta repetuntur ac corrupto applicantur (illa omnia enim coincidunt) nullum penitus esse usum, nam & juris naturalis veritas & sensus, & obligandi rigor, ex natura hum'anâ ejusque autore satis intelligitur.


tur, ut circuitus illi, quibus præceptum aliquod primo quoad statum integrum expenditur, deinde ad corruptum applicatur sint plane otiosi, ac ita Philosophari, sit otio & ingenio abuti, vel etiam hujus imbecillitatem ostendere.


Simulque cum tam liquido limites hujus disciplinæ, quibus à Theologia Morali jungitur, designati sint, non deteriore hancce disciplinam conditione futuram, quam Jurisprudentiam Civilem, Medicinam, Scientiam naturalem, aut Mathesin; in quas si aliquis ἀνύστησιν irrumpere audeat, sine populi suffragiis censuram sibi vindicans, non dubitant ipsi occinere, quod quondam Apelles Megabyzo, de arte pictoria nescio, quid disserere aggredienti: quæso agebat, tace, ne pueri, qui melidem terunt, te irrideant loqui orsum de rebus, quas non didicisti. Sed cum bonis quidem cordatisque viris facile nobis conveniet: malevolos autem ineruditosque obtrectatores satius fuerit invidiæ suæ excruciantos commendare, siquidem utique constat, æterna positumque lege est; ut Æthiops cutem non mutet.

Observ. 10.

Simulque cum tam liquido) Pars quinta epilogum, censoribus importunis oppositum, continet, circa quam aliqua notare opus non est. De

scriptoribus rerum moralium, aliqua hoc loco dici possent, sed id jam non agimus. Est de cætero Scriptorum notitia utilis, non tamen illa pro studio principali, sed saltem aliquo adminiculo haberi debet, verum abusus tam in hac parte, quam alibi, notus est.





SAMUELIS L. B. DE PU-
FENDORF

DE

OFFICIO HOMINIS

ET

CIVIS

LIBER PRIMUS.

CAPUT I.

DE

ACTIONE HU-
MANA.

§. I.



Efficiū nobis heic vocatur a-
ctio hominis, pro ratione obli-
gationis ad præscriptum le-
gum recte attemperata. Ad
quod intelligendum necessari-
um est præmittere tum de natura actionis hu-
manæ, tum de legibus in universum.

A

Observ.

Observ. II.

Officium) In parte præliminari Jurisprudentiæ divinæ, quænam tractanda sint, in *Prolegom.* § 15. ostendimus, quæ Autor ex parte observavit, ex parte neglexit. Id recte factum arbitramur, quod à tractatione *actionis humanæ* sit auspicatus, præmissa tamen ob Libelli Titulum, officii definitione, ac inde sumtâ, de actione humanâ & lege agendi, occasione.

2. Ut penitus hæc res intelligatur, observandum, quod officium vel sumatur pro actione *bonâ* quo pertinet definitio Autoris, vel *moraliter, necessariâ*, quo sensu est *actio vel actionis omissio, sub legis obligatione constituta*. Utroque sensu sumitur vel *generaliter*, pro quavis actione bonâ & moraliter necessariâ, quem sensum supponunt Disciplinæ morales, de Officiis hominum agentes, vel *specialiter*, dum scilicet certa aliqua actio, circa quam, præter agendi necessitatem, jus fruendi nonnullis commodis, ut salario & quadam dignitate, occurrit, nomine Officii venit, qui significatus in vitâ civili non infrequens est, & poterit officium, specialiter acceptum, *Muneris* titulo exprimi. *vid. Observ.* 724.

§. 2. Per *humanam actionem* intelligimus non quemvis motum à facultatibus hominis procedentem; Sed illum duntaxat, qui provenit ac dirigitur ab iis facultatibus, quas humano generi præ brutis Creator. O. M. attri-

attribuit, nempe qui velut prælucente *intelle-
ctu* ac decernente *voluntate* suscipitur.

Observ. 12.

Per humanam actionem) Actiones hominis sunt vel *naturales*, quæ à facultate brutis communi procedunt, & quæ tales, ad doctrinam moralem non pertinent, vel *Humane* seu *voluntarie*, quas ratio producit aut dirigit, quæ hujus loci sunt. *Formale* igitur actionis humanæ, in *dependentia* à *Ratione* consistit, *materiale* verò, est *motus* vel *ipsius mentis*, ut cogitare, velle, vel *alius facultatis* vel *rei cujusdam tertiæ* vid: oper: Major. l. i. c. 5. §. 1. seqq. sunt igitur actiones voluntariæ, *elicitæ*, quas ratio sola producit, & *imperatæ*, quas dirigit. De cætero uti manifestum est, quod actiones aliorum hominum aut brutorum, vel etiam operationes rerum vegetabilium, nostræ directioni non semper subsint, ita quædam facultates naturales, ut sensus externi, visus, odoratus, auditus, ut & facultas vegetativa, imperium Rationis non admittunt, per indirectum tamen Hæc illas dirigere quodammodo potest, dum nempe objectum, in quod agant, illis vel supponere, vel subtrahere, ei licet.

§. 3. Datum quippe est homini, ut non solum varias res, quæ in hoc universo occurrunt, possit cognoscere, eas inter se conferre & harum occasione novas sibi notiones formare: sed ut etiam

possit prospicere, quid acturus sit, ac ad id exequendum sese movere, idemque, ad certam normam, certumque finem conformare & quid inde proventurum sit, colligere, quin & quæ peracta jam sunt, an ad regulam congruant, judicare. Sed nec omnes hominis facultates sese perpetuo, aut modo uniformi movent: verum aliquæ istarum intrinseco hominis impulsu excitantur, excitatæque temperantur & diriguntur. Denique nec in omnia objecta promiscue homo fertur, sed quædam appetit, quædam averfatur. Sæpe quoque licet objectum agendi adsit, motum suspendit; & pluribus objectis præsentibus unum eligit, cætera respuit.

Observ. 13.

Datum quippe est homini) Principium igitur actionum humanarum est *Mens* sive *Ratio*. Hæc verò uti seipsam ab operationibus tantum cognoscit, ita inde vulgò in *Intellectum* verb: *datum quippe*, & *Voluntatem* verb: *sed nec omnes*, discernitur.

2. Quo autem vitilitigia, quæ circa hanc distinctionem, ac utriusque facultatis operationes, occurrere solent, evitentur, duo præcipuè notanda (1) istis nominibus non indicari duas distinctas facultates, sed potius eandem facultatem, pro diversitate operationis, novam sortiri appellationem, sic eadem *Mens*, si speculetur, *Intellectus*, si appetat vel averfetur,

Voluntas dicitur (2) denominationes illas fieri à potiori, nam impossibile est operationes mentis ita fecernere, ut sola cognitio sine appetitu aut averfatione, aut voluntas sine cognitione adsit, sed illa omnia sunt intime ac inseparabiliter connexa, hæc autem illa operatio saltem magis aliquando eminet, à quâ adeò *Mens*, *intellectus* aut *Voluntatis* titulum fortitur.

3. In universum nulla prægnans ratio apparet, quare *Mens*, in *Intellectum* & *Voluntatem* fuerit distinguenda. Poterant simpliciter menti omnes operationes tribui, ut mens speculetur, cognoscat, appetat & aversetur; Et si *intellectus* & *Voluntatis* nomina insuper necessaria fuerint existimata, poterant pro synonymis haberi, ut indistinctè *Menti*, *Intellectui* aut *Voluntati* operationes rationales adscribendæ sint, quemadmodum ferè in concreto, actiones mentales, intellectuales & voluntariæ promiscue accipiuntur. Neque etiam distinctio habituum *intellectualium* & *moralium*, tanti momenti est, ut ideò *Mentis* in *intellectum* & *voluntatem*, distinctio conservanda sit, nam etiam illi omnes habitus simpliciter menti possunt adscribi. Interim, si terminos rectè intelligas juxta ea, quæ n. 2. diximus, poterit etiam vulgaris illa *Mentis* divisio admitti.

§. 4. Circa facultatem ergo comprehendendi & dijudicandi res, quæ *intellectus* vocabu-

cabulo venit, id ante omnia pro certo habendum est: cuilibet homini matura ætate & mente integra tantum superesse naturalis velut luminis, ut adhibita cultura ac debita meditatione possit recte comprehendere saltem generalia illa præcepta & principia, quæ ad vitam hancce honeste & tranquille exigendam faciunt; simulque judicare, ista utique indoli humanæ congruere. Hoc enim nisi saltem intra sphæram fori humani admittatur, quibusvis suis delictis homines ignorantiam invincibilem obtendere possent: cum nemo in foro humano argui possit violasse regulam, quam capere supra ipsius vires est.

Observ. 14.

Circa facultatem ergo) Mens itaque speculationi præcipuè dedita, seu Intellectus, est *facultas cognoscendi rem in natura sua, seu prout illa est, non prout apparet.* Quo ipso tamen non asseritur, quasi mens humana omnes res exacte intelligere queat, quemadmodum etiam à cognitione, voluntas non separatur. Divisio intellectus in *Theoreticum & Practicum*, similesvè, ad otiosa scholasticæ Philosophiæ inventa merito referuntur, *Tres tamen mentis operationes*, recte asseri videntur, de quo dixi in *Art. cogit. c. 5.*

Observ. 15.

Observ. 15.

Id ante omnia pro certo habendum est (Menti eam vim tribuendam esse censet Autor, ut leges, in foro humano observandas, intelligere posse censenda sit, de quo dubitari non potest. An vero, juxta rigorem fori divini, eadem leges quoque intelligat, alia est quæstio, quæ tamen maximam partem etiam affirmari potest, nam quoad moralia, mens humana non tam quoad cognitionem, quam executionem, corrupta est.

§. 5. Intellectus hominis, quando de eo, quod agendum vel omittendum est, recte informatus fuerit, & quidem ita, ut sententiæ suæ certas & indubias rationes norit reddere, solet vocari *conscientia recta*. Sed ubi quis veram quidē sententiam circa agenda vel fovet, quam tamen ipse per rationes omitenda demonstrare nequeat, sed eandem ex vitæ civilis tenore, ex assuetudine, aut superiorum auctoritate hauserit, neque tamen ipsi suppetat ratio, que contrarium magis persvadeat, solet vocari *conscientia probabilis*. Quæ maxima pars mortalium regitur, quippe cum paucis rerum cognoscere causas concessum sit.

Observ. 16.

Intellectus hominis quando de eo) Ad Conscientiæ considerationem nunc delabitur Autor, sed uti, vulgari Philosophiâ, ut videtur, seductus, in ordine impingit ita, nec rem ipsam debitè satis præsen-

præsentat, dum nec conscientiæ conceptum, nec ejus divisiones, aliaque huc pertinentia recte & adæquate exhibet. Nobis illum mutare non licet, sed quæ quoad hanc desunt, breviter supplebimus.

2. Conscientia est *intellectus cognitione legis imbutus, ac de actionibus hominis propriis judicans*. Perinde ergo, ut lex, est illa actionum humanarum, tam externarum quam internarum, norma, aliquando tamen ad has solas refertur, hinc *forum conscientia* & *Externum seu humanum* opponuntur. Alii dicunt: *est judicium hominis de seipso*. vid: Becm. lin: *doctr. moral.* c. 5. §. 2 sed addendum; *juxta leges institutum*.

Observ. 17.

Solet vocari conscientia recta) Potius certa, nam ad hanc pertinet definitio præmissa, & hæc *conscientia probabili*, quæ alioquin recta etiam est, ut ipse Autor statim fatetur, recte opponitur. Plenius magisque accurate Conscientiæ species sic exprimi possunt: Conscientia est vel *Consequens*, quæ de actionibus præteritis judicat, vel *Antecedens*, quæ circa moralitatem actionum suscipiendarum fatagit. *Illæ* vel adprobat facta, propitiumque Legislatorem promittit, hinc oritur conscientia *tranquilla*, vel facta damnat, iramque Imperantis & poenas minatur, hinc *Inquietæ* existit. *Hæc* autem, nempe *Antecedens*, est vel *decidens*, vel *dubia*.

2. Decidens est, quæ tam quoad actionis suscipiendæ moralitatem, quam executionem, plenè pronunciat. De cætero vel in decidendo errat, hinc est *erronea*, vel rectè versatur, inde *recta* existit, quæ iterum *certa* aut *probabilis* est, prout decisionis suæ certas, vel probabiles saltem novit reddere rationes.
3. Dubia autem est vel *talis in specie*, quando intellectus simpliciter fluctuat, aut moralitate actionis in medio relictâ, executionem tamen decernit, vel *Scrupulosa*, quæ & de moralitate & executione actionis statuit, sed timide & cum formidine oppositi *add. Becman. lin. doctr. moral. c. 5. §. 8.*

§. 6. Solet tamen quibusdam non raro evenire circa casus potissimum singulares, ut ex utraque parte sese offerant rationes; nec illi ita polleant iudicio, ut, utræ præponderent, liquido discernere queant. Id quod vocari sivevit *conscientia dubia*. De qua hæc est regula: *Quamdiu in ancipiti hæret iudicium bonum quid sit, an malum, actio erit suspendenda*. Nam nondum discussa dubitatione ad agendum sese determinare, propositum peccandi, aut saltem neglectum legis involvit.

Observ. 18.

Id quod vocari sivevit conscientia dubia) Hanc suo ordine modò retulimus. Interim alii eam plane rejiciunt, cum iudicium hic suspendatur, suspensio

pensio autem iudicii non sit iudicium, adeoque nec conscientia *vid. Dn. Thomas. Inst. Jurispr. divin. l. i. c. i. §. 59.* sed nihil mutandum censeo, nam cogitatio fluctuans, tamen cogitatio est, nec ad iudicium requiritur, ut præcisè decidat, sed sufficit, si deliberet, utique is iudicat etiam, qui quæstionem propositam se decidere non posse, agnoscit & fatetur. In primis autem illa conscientia dubia admittenda est, quæ non simpliciter fluctuat, sed, moralitate licet nondum intellecta, actionis executionem decernit.

Observ. 19.

De qua hæc est regula) Sed non tantum quoad conscientiam dubiam regula proponenda erat, verum etiam quoad cæteras species, hinc hic defectus breviter supplendus quoque erit: Videntur regulæ, circa conscientiam occurrentes, triplicis generis esse, vel enim respiciunt (1) ejus *vim*, vel (2) actionum *moralitatem*, vel (3) conscientiæ *emendationem*.

2. Primi generis regulæ possunt esse hæ (1) Conscientia consequens accusat, testatur, absolvit & condemnat (2) antecedens recta ad susceptionem vel omissionem actionis obligat, sed (3) erronea ista efficaciam destituitur.
3. Secundi generis hæ ferè sunt (1) quoad conscientiam rectam: *omnis actio vel actionis omis- sio spontanea, quæ conscientie rectæ contrariatur, est peccatum vid. op. Maj. Lib. i. C. 5. §. 5. 6.* (2) quoad erroneam: *si conscientia versetur in erro-*

re vincibili circa rem malam (rem vetitam credendo præceptam, vel contra) peccat homo, tam si secundum, quam si contra eam agat, d. l. i. c. 3. §. 13. quod si autem, ut hoc addamus, erret circa rem indifferentem, peccat saltem, si agat contra conscientiam (3) quoad dubiam: qui agit conscientiam adhuc dubia, peccat, §. 6. b. d. c. 3. §. 8. sed hæc non simpliciter vera videtur, dubitans enim habet intentionem & bene & male agendi, hinc tum demum peccati arguendus est, si actio suscepta legi etiam revera repugnet (4) quoad Scrupulosam peculiaris regula non occurrat, cum enim sit suo modo decidens, ideo prima & secunda, quam modo retulimus, ad eam quoque applicanda erit.

4. Tertiæ generis regulæ concernunt vel conscientiam *consequentem*, quæ emendari debet, si ex errore sit tranquilla aut inquieta, vel *antecedentem*, quæ remedium postulat, si sit probabilis, erronea, dubia aut scrupulosa, non verò si certa, hæc enim sana est. Semper autem ex solidâ doctrinâ emendatio fieri, non autem per anodynum malè temperatum animo stupor induci debet, vid. d. l. i. c. 3. §. 9.

5. Quos vel nunquam aliquis honesti sensus subiit, vel penes quos vitio consuetudinis animus iterum occalluit, illi dicuntur *conscientiam cauteriatam* habere, vid. Becman. lin. doctr. moral. c. 5. §. 8. in quo statu maxima mortalium pars, minimum ad aliquod tempus deprehenditur.

§. 7. Sæpe etiam intellectus hominis pro vero falsum adprehendit; & tunc in *errore* versari dicitur. Qui error *vincibilis* solet appellari, quando quis adhibita attentione & diligentia debita cavere poterat, ne in eum incideret: *invincibilis* autem, quando quis etiam adhibita omni diligentia, quam vitæ communis ratio fert, istum evitare non poterat. Qualis error tamen saltem inter eos, quæ rationis lumen excolere, & vitam ad honestum componere, cordi est, non circa communia vivendi præcepta, sed duntaxat circa singularia negotia incidere suevit. Nam & naturalis juris præcepta generalia plana sunt: & qui leges positivas fert: id ante omnia agere solet & debet, ut illæ subjectis innotescant. Unde citra supinam negligentiam heic error non nascitur. Sed in singularibus negotiis facile est, ut error invito & præter culpam obrepat circa objectum, aliasque actionis circumstantias.

Observ. 20.

Et tunc in errore versari dicitur) Error est *difformitas conceptus & rei conceptæ*, de quo dixi uberius in *Art. cogit. c. 4.* nam eo res hæc pertinet. In disciplinis moralibus, error saltem quoad actiones humanas, ad effectum temperandæ aut impediendæ imputationis, expenditur.

Observ.

Observ. 21.

Qui error vincibilis solet appellari) Eo pertinent divisiones erroris (1) in *vincibilem* & *invincibilem* (2) *juris* & *facti*, quam Autor implicite proponit, nam ex his ferè circumstantiis, erroris, quoad imputationem, effectus æstimandus est.

Observ. 22.

Qualis error tamen) Errorem juris, Autor putat esse *vincibilem*, sed *facti*, *invincibilem*, quæ doctrina regulariter admittenda est, nam aliquando error juris, poterit esse *invincibilis* (si scilicet jus singulare & obscurum, aut persona ejus conditionis sit, ut ab ea scientiam juris rigide exigere, non conveniat) quemadmodum error *facti*, potissimum proprii, *vincibilis*.

§. 8. Ubi verò simpliciter cognitio abest, vocatur *ignorantia*. Quæ duplici modo consideratur; uno, prout ad actionem aliquid confert; altero, prout invito, aut non citra culpam oborta fuit. Priori respectu ignorantia solet dividi in *efficacem* & *concomitantem*. Illa est, quæ, si abfuisset, præsens actio non fuisset suscepta. Hæc est, quæ, licet abfuisset, nihilominus actio suscepta fuisset. Posteriori respectu ignorantia est *voluntaria*, vel *involuntaria*. Illa est, quam quis vel ultro affectavit, rejectis veri cognoscendi mediis, ut debita diligentia non adhibita obrepere sibi passus est. Hæc est, quando quis ignorat, quæ nec scire poterat, nec tenebatur. Et hæc

iterum *duplex* est. Velenim quis in præsens quidem ignorantiam exuere non potuit, ut tamen in culpa sit, quare in tali statu versetur. Vel non solum in præsens ignorantiam vincere nequit, sed & in culpa non est, quare ad talem conditionem sit devolutus.

Observ. 23.

Vocatur ignorantia) Causa erroris est ignorantia, hæc enim *simplex cognitionis veræ est absentia*, at si *falsa cognitio sequatur*, tum existit error. Cæterum cum in rebus agendis, semper positiva persuasio præsupponenda sit, nec possit actionis susceptio aut omisio ex nuda privatione, seu cognitionis absentia procedere, hinc liquet, quod in disciplinis moralibus, ignorantia cum errore coincadat, id quod etiam communis docendi ratio satis confirmat.

Observ. 24.

Quæ duplici modo consideratur) Hæc doctrina nec adæquata, nec perspicua satis est, quare ita potius dicendum: Ignorantia vel error tripliciter consideratur (1) *ratione objecti ad negotium suum relati*, hinc est error *efficax & concomitans* (2) *objecti in se spectati*, unde ignorantia *juris & facti* (3) *consensus*, ex quo error *voluntarius & involuntarius* est.

Observ. 25.

Illæst, quæ, si abfuisset, præsens actio non fuisset suscepta) Hæc erroris efficacis & concomitantis definitio, cum doctrina Peripateticorum, erroris

roris discrimen ex eo, si agentis dolor & poenitentia actionem susceptam sequatur, nec ne, æstimantium, coincidit. *vid.* Jacob. Thomas. *Philos. Pract. Tab. II.* De cætero illa doctrina, & inadæquata, cum saltem ad actiones illicitas quadret, & in se falsa est, nam si â secuta agentis declaratione erroris efficaciam suspendere velimus, tum ille simulato dolore & poenitentia, cujusvis actionis, sibi molestæ imputationem facile eluserit.

2. Potius igitur sic dicendum: Error *efficax* est, qui in re *necessariâ* committitur, ac (si sit involuntarius) *consensum* excludit, atque adeo *imputationem* impedit. Illa verò res est necessaria, quam vel *natura negotii*, vel *tempestitiva agentium destinatio*, *indicio habili declarata*, requirit, id quod per inductionem actuum illicitorum, & licitorum liquido intelligi potest. *Concomitans* verò est, qui in re, *extra negotium gerendum constitutâ*, committitur, adeoque *consensum* necessarium non excludit, nec *imputationem* impedit. Voluntarius ille sit, an involuntarius, hætenus requirendum non est, cum satis sit, quod negotium non attingat, adeoque in eodem alterando nullas partes habere queat.

Observ. 26.

Est voluntaria vel involuntaria) Hæc divisio, nisi fallor, coincidit cum divisione in errorem vincibilem & invincibilem, nam utraque consensûs præsentiam vel defectum innuit.

Obsequ. 27.

Et hæc iterum duplex est) Hoc discrimen etiam sic exprimitur: Ignorantia involuntaria, est vel *talis in se, sed non in sua causa*, vel *in se & in sua causa*. Cæterum facile liquet, divisionem illam non adeo necessariam esse, nam ultima saltem est involuntaria aut invincibilis, prima vero revera voluntaria & vincibilis est, non tantum enim id voluntarium est, quod voluntas comitatur, sed etiam quod hæc antecedit.

§. 9. Altera facultas, quæ in homine præ brutis peculiariter cernitur, *voluntas* vocatur; per quam velut intrinseco impulsu ad agendum sese homo movet, & eligit, quod sibi maxime arridet; averfatur, quod sibi non convenire videtur. Habet igitur homo à voluntate, tum quod *spon*te agat, i. e. ut non per intrinsecam aliquam necessitatem ad agendum determinetur, sed actionis suæ ipse autor sit; tum ut *li*bere agat, i. e. ut uno objecto proposito possit agere vel non agere, idemque eligere vel respuere; aut pluribus objectis propositis unum eligere, cætera respuere. Porro cum actionum humanarum quædam propter se suscipiantur, quædam quatenus ad aliud consequendum inserviunt, i. e. quædam rationem *finis*, quædam *mediorum* habeant: circa finem

Qui-

quidem ita voluntas versatur; ut cum cognitum primo adprobet, dein ad eundem consequendum efficaciter sese moveat, & velut ad eum tendat, vehementius aut remissius; eo-que obtento adquiescat placideque fruatur. Media autem primo probantur, tum quæ maxime idonea fuerint visa, eliguntur, ac demum usui adplicantur.

Observ. 28.

Altera facultas) Mens appetitui vel averfationi præcipuè dedita, seu Voluntas, est *facultas appetendi vel fugiendi rem, prout illa bona aut mala judicatur*. Quod iudicium non tantum antecedit, sed & comitatur volendi actum.

Observ. 29.

Habet igitur homo à voluntate) Affectiones voluntatis, ex doctrina Autoris, duæ sunt, *Spontaneitas*, & *libertas*, quæ iterum est vel *contradictionis*, quâ possumus agere vel non agere, vel *contrarietatis*, quâ contraria vel diversa volumus *add. l. I. c. 4. §. 2.* Cæterum cum Spontaneitas & libertas contradictionis coincidunt, ceu definitionum collatio ostendit, ideo entia præter necessitatem non videntur multiplicanda esse, sed sola libertas sufficiet, quam sensu generaliori, etiam spontaneitatem dicere licebit.

Observ. 30.

Porro cum actionum humanarum) Specialius volendi actum, ab objecto Autor hic declarat, nimirum circa finem occurrit *Volitio*, *Intentio* & *Fruitio*,

tio, circa media vero, Consensus, Electio & Usus add. l. l. c. 4. §. 1. Fruitio in actu volendi, ultimum sortitur locum. Posse operationem Voluntatis specialius ita distingui, concedo, sed in istâ minutiarum confectatione, eruditionem aliquam consistere, non arbitror, sufficit hic popularis philosophia, quâ generaliter aliquid appetere vel averfari dicimur, cætera otiosas Scholasticorum speculationes redolent.

2. Alii omnes illos actus voluntati adscribi posse negant, cum multi iudicium præsupponant vel involvant, voluntas autem sit potentia cæca & iudicii expers, hinc concedunt quidem, quod in actu volendi, generalius supposito, operationes illæ occurrant, at eos non voluntati sed intellectui alicui pratico, maximam partem tribuendos esse censent. *vid. Becman. lin. doctrin. moral. c. 6. §. 2. 12.* sed cum his tritis facile transegeris, si ea, quæ *Observ. 13.* diximus, probe intelligas, illud autem plane falsum est, quod voluntas sit potentia cæca; In Ratione seu facultate rationali, quomodo potentiam cæcam, i. e. irrationalem & brutam concipies? fluunt illa omnia ex falsa Voluntatis suppositione.

§. 10. Quemadmodum autem hoc maxime nomine homo actionum suarum autor habetur, quia ipse voluntario eas suscepit: ita circa voluntatem id cum primis observandum,

dum, ejus spontaneitatem utique asserendam esse saltem circa illas actiones, de quibus ab homine in foro humano ratio solet exigi. Ubi autem homini nihil plane spontaneitatis relinquitur, ibi non ipse homo, sed qui eidem necessitatem adfert, autor habebitur actionis, ad quam homo invitus membra viresque suas accommodat.

Observ. 31.

Ejus spontaneitatem utique asserendam esse) Magis serio libertatem Voluntati asserit Autor, nam eâ negatâ, omnis actionum moralitas in foro humano tollitur, nec obest *Præscientia divina*, hæc enim actus humanos consequitur, hinc illi non eveniunt, quia Deus præscit, sed quia illi ex libera humanæ voluntatis determinatione sunt eventuri, ideo eos Deus præscit, *add. l. 1. c. 4. §. 3.*

§. II. Porro quanquam voluntas bonum in genere semper adpetat; & malum in genere aversetur: magna tamen inter singulos homines tum adpetituum tum actionum cernitur varietas. Idque inde provenit, quod non omnia bona & mala homini velut pura appareant, sed invicem mixta, bona malis, mala bonis: & quia diversa objecta diversas velut partes in homine peculiariter afficiunt, v. g. quædam æstimationem illam, quam homo de se ipso habet, quædam sensus ejus exte-

riores, quædam amorem sui, quo se ipsum conservare studet. Ex quo est, quod illa quidem homo adprehendat tanquam *decora*, ista tanquam *jucunda*, hæc tanquam *utilia*. Et prout quodque horum validum motum homini impressit, ita eundem quoque versus se peculiariter propendere facit. Cui accedit in plerisque hominibus ad certa quædam peculiaris inclinatio, aut à certis averfatio. Hinc fit, ut circa quamlibet fere actionem sese simul offerant species bonorum & malorum, verorum aut adparentium, ad quas solide discernendas aliis major, aliis minor, est perspicacia. Indemirum non est, unum in id ferri, abs quo alter maxime abhorret.

Observ. 32.

Porro quanquam voluntas) Nec necessarius boni appetitus & mali averfatio, cui voluntas semper indulget, ejus libertatem destruit, nam dantur plura bona & mala, vera & apparentia, ac multiplex hominum de iis omnibus judicium, hinc quoties ad applicationem ventum est, liberæ electioni semper locus est, quod latius hic deducitur.

Observ. 33.

Species bonorum & malorum) Liceat hac occasione pauca adjicere de *Bono & Malo*. Sunt nomina relativa respiciuntque hominem, hinc bonum est, quod homini existentiam, conservationem
vel

vel perfectionem aliquam largitur, Malum vero, *quod illa destruit vel imminuit*. Omne bonum prodest & delectat, seu *utile & secundum* est, sicut vice versa, malum nocet & contristat, seu *inutile & molestum* est. Sunt tamen illa non præcise de veritate, sed etiam opinione hominum quandoque accipienda, præterea utile & jucundum, pro ratione objectorum, aliquando etiam certo sensu, sibi invicem opponi potest, prout Autor §. II. h. facit.

2. Dividitur bonum & malum (1) *ratione objecti*, in bonum ac malum *corporis & animi* (2) *originis in naturale*, quod per naturam homini adest, & *adventitium*, quod ei supervenit, hoc iterum est *voluntarium, fortuitum & mixtum*.
3. Voluntarium est, *honestum, & in honestum* seu *bonum & malum morale*, quod arbitrio Imperantis definitur, porro *Decorum & indecorum*, quod consuetudine hominum prudentum determinatur. Denique *privatum*, quod quis proprio judicio, pro bono & malo habet. De cætero omnia vel pleræque bona & mala, vel recte vel perperam concipiuntur, hinc bonum & malum, *verum vel apparens* dicitur.

§. 12. Sed nec semper voluntas hominis circa quamlibet actionem velut in æquilibrio posita deprehenditur, sic ut inclinatio in hanc aut illam partem unice ab impulsu ejusdem intrinseco post mature perpenſa omnia proveniat : sed frequentissimè per extrinseca vel-

velut momenta versus unam magis quam alteram partem homo propellitur. Ut enim prætereamus communem illam mortalium in prava proclivitatem, cujus originem atque indolem laterius fori est excutere: primo voluntati singularem quandam vergentiam conciliat *peculiaris ingenii dispositio*, qua ad certum genus actionis aliqui valde proclives redduntur. Quæ non in singulis tantum hominibus, sed & integris in nationibus deprehenditur. Eam autem producere videtur cœli nos ambientis, solique genius, humorum in corporibus temperatura ex ipso semine, ætate, victu, valetudine, studiorum ratione, similibusque causis proveniens; item conformatio organorum, queis animus ad functiones suas obeundas utitur, & similia. Ubi notandum, (præterquam quod homo adhibitâ curâ temperamentum suum non parum retundere & alterare possit) quantacunque etiam vis eidem tribuatur, non tamen eousque illa valere judicanda est, ut hominem necessario in violationem legis naturalis rapiat, quousque hæc in foro humano exercetur; ubi prævæ cupidines, intra actum exteriorem subsistentes, non attenduntur. Adeoque si vel maxime natura recurrat, furcâ licet expulsa, id tamen prohiberi potest, ne exteriores actiones vitiosas producat. Et quæ in
supe-

superanda ejusmodi inclinatione occurrit difficultas, illam splendor laudis pensat, quæ heic victorem manet. Quod si autem ejusmodi stimuli animum concutiant, quos nulla ratio, quo minus erumpant, reprimere potest; via tamen est, ut citra peccatum velut depleri queant.

Observ. 34.

Sed nec semper voluntas) Licet vero voluntas sit libera, attamen in æquilibrio illa non semper consistit, sed dantur quædam *momenta*, quæ ejus libertati obstant, eique peculiarem vergentiam seu proclivitatem versus alteram partem concilient. Eo pertinet (I.) *pravitas ex lapsu orta* (II.) *peculiaris corporis ingenique dispositio*, quam Physici pluribus exponere debent. Auctor eam attingit *b.* eamque voluntatis libertatem non plane destruere, recte censet. *add.* Oper. Maj. l. i. c. 4. §. 5.

§. 13. Valde quoque in certas actiones voluntatem inclinat frequens ejusdem generis actionum repetitio, ex qua enata proclivitas *consuetudo* vocatur. Per hanc quippe efficitur, ut libenter & expedite actio aliqua suscipiatur, sic ut objecto præsentem in id velut trahi animus videatur, aut idem absens vehementissimè desideret. De qua id observandum; uti nulla videtur esse adsuetudo, quin eam adhibita diligentia iterum exuere possit homo; ita
nulla

nulla quoque animum eousque detorquere valet, ut non exterioribus saltem actibus, in quos illa rapitur, heic & nunc cohibendis par homo sit. Et quia penes hominem fuit, ejusmodi adfuetudinem contrahere: inde ut ut hac actiones faciliat, tamen neque bonarum actionum pretio aliquid decedit; neque pravarum malitia redditur levior. Quin uti bona adfuerudo hominis laudem, ita prava ejusdem turpitudinem intendit.

Observ. 35.

Valde quoque in certas actiones) Amplius (III.) *Habitus seu consuetudo* voluntati proclivitatem conciliat. Sed tantum abest, ut actionem faciat involuntariam, ut potius actio ex habitu præcedens, simplici actione liberâ, sit magis voluntaria, ut hic docetur, nam habitus ultro fuit assumptus, ultro retinetur, & eo stante, voluntas quam maximè in actionem influit. *add. l. l. c. 4. §. 6.*

§. 14. Plurimum quoque interest, an placida tranquillitas animo constet; an vero idem peculiaribus motibus, quos *affectus* vocant, concuciat. Circa quos illud tenendum: quantumcunque vehementes isti sint, tamen debito rationis usu hominem iisdem superiorem esse posse, ipsorumque impetum saltem intra ultimum actum sistere. Cum autem affectuum alii excitentur specie boni, alii specie

cie mali, & stimulent, vel ad acquirendum aliquod gratum, vel declinandum molestum: naturæ humanæ congruens est, ut hos, quam illos plus favoris aut veniæ mortales inter comitetur, eoque magis, quo infestius & intolerabilius fuit malum, quod eos excitavit. Longe quippe tolerabilius habetur, carere bono ad naturæ conservationem non adeo necessario, quam excipere malum ad naturæ destructionem tendens.

Observ. 36.

Quos affectus vocant) De his merito seorsim & prolixius agendum fuisset, nam vel maxime ad affectus ritè dirigendos pertinet disciplina juris naturalis. Nobis interim tractationem istam ingredi, ac variorum sententias referre, excutere, refellere aut componere, jam neque libet, neque licet, paucissima saltem pro explicando Autore adjiciemus. Quantum igitur nobis judicare licet, affectus quadrupliciter supponi videntur (1) pro actione intensiori (2) habitu ita agendi (3) pro passione mentis, dum externum aliquod objectum, vel temperamentum corporeum, in eam velut irruit eamque protrudit (4) pro motibus temperamenti corporei. Hoc sensu Autor affectus sumit, eoque respectu (IV.) *Affectus* ad momenta instigantia referuntur *add. d. l. 1. c. 4. §. 7.*

§. 15. Denique uti dantur certi *morbi*, qui usum rationis in perpetuum, aut ad tempus, plane

plane tollunt, ita multas apud nationes frequens est, homines sibi ultro arcessere morbi quoddam genus brevi transiens, ulum rationis non parum perturbans. Quo innuimus *ebrietatem* ex certis potulentorum generibus, ac quibusdam fumis, provenientem; quæ violento motu sanguinem ac spiritus impellit & turbat, ac ad libidinem imprimis, iram, temeritatem, & enormem lætitiā homines proclives reddit; sic ut multi velut extra se per ebrietatem rapti videantur, & diversum plane genium induisse, quam quo sobrii conspiciebantur. Hæc tamen uti non semper omnem ulum rationis sequestrat, ita, quatenus ultro arcessita est, odium potius quàm favorem actionibus per eandem susceptis conciliare apta est.

Observ. 37.

Denique uti dantur certi morbi) Ad momenta voluntatem moventia, refertur (V) *furor* & (VI) *Ebrietas*, sed hæc voluntati non tam aliquam proclivitatem conciliant, quam potius, totum actionum humanarum principium, destruunt, quamvis de Ebrietate aliquando etiam prius dicendum veniat. Posses his adjungere (VII) *obligationem*, quæ repræsentatione poenæ, voluntatem inclinatur, & (IX) *Coactionem*, quæ, malo aliquo cominus exhibito, eam impellit *add. d. c. 4. §. 8.*

Observ. 38.

Observ. 38.

Hæc tamen uti non semper) Quoad effectum Ebrietatis, circa imputationem, ita distinguendum videtur: Ebrietas vel est *modica*, hæc actionem voluntariam relinquit, vel *summa*, quæ omnem usum rationis sequestrat, hæc si fuerit, quoad originem, *involuntaria*, actionem invitam producit, adeoque agentem excusat, si verò *voluntaria*, tum actus *indifferentes*, ut contractus, adhuc imputari non posse videntur, quia hi liquidam cognitionem requirunt, nec, iis animandis culpa præcedens sufficit, sed actus *illiciti*, seu delicta, ut culposi, imputabuntur, nisi quis directe, ob eorum executionem, ebrietatem contraxerit, nam tum gravior imputatio obtinet.

§. 16. Porro actiones humanæ uti *voluntaria* solent vocari, quatenus à voluntate proficiscuntur & diriguntur: ita si quæ reluctante voluntate scienter suscipiuntur, *invita*, appellantur, pressius sumto hocce vocabulo. Nam latius id acceptum etiam illas comprehendit, quæ per *ignorantiam* patrantur. Invitum autem nobis hoc loco idem notat, quod *coactum*; quando nempe quis ab extrinseco principio validiore adigitur membra sua adplicare, ita ut aversionem & dissensum suum signis ac præcique renitentia corporis significet. Minus autem propriè invita & illa dicuntur, quando incumbente graviore necessitate ali-

C

quid

quid tanquam minus malum eligitur, & suscipitur, abs quo alias homo extra necessitatem constitutus vehementer abhorrebat. Quales actiones vulgo *mixtas* vocant. Hæ cum spontaneis illud habent commune, quod voluntas pro præsentī statu eas utique eligat tanquam minus malum. Cum invitis autem aliquatenus quoad effectum conveniunt, quod vel plane non, vel non ita graviter, uti spontaneæ, soleant agenti imputari.

Observ. 39.

Porro actiones humane) Si principium actionis humanæ adsit, tum actio dicitur *Voluntaria*, si desit, *Invita*, quæ talis est vel *per ignorantiam*, si ex errore invincibili & efficaci actio suscipiatur, vel *violentiam*, quam solam pro invita Autor hic habet, sed sine ratione. Quod si voluntas partim desit, partim adsit, tum existit actio *Mixta* add. l. i. c. 4. § 9. 10.

Observ. 40.

Hæc cum spontaneis) Quoad imputationem actionum mixtarum, clarius ita dici potest: *Actio mixta eatenus imputari potest, quatenus est voluntaria, nisi probetur exceptio.* Juxta hæc igitur arbitror, quod (1) *actio mala*, altero cogente, suscepta imputari queat, quia voluntaria est, nec ratio exceptionis occurrit, vis tamen adhibita imputationem temperat, ac agentem quodammodo excusat. Sed (2) *actio bona coacta* non imputatur, quia ad laudem boni viri obtinen-

nendam, non sufficit quævis voluntas, sed summa animi promptitudine, actio suscepta esse debuit. Idem (3) dicendum de *actione indifferente* v.g. contractu, nam nec hæc imputatur, licet enim qualis qualis voluntas hic adsit, attamen illa, ad producendam & imputandam obligationem, non sufficit, cum delictum cogentis, eum faciat inhabilem, quo minus jus aliquod ex actu coacto acquirat, negato autem jure, cessat quoque obligatio.

§. 17. Cæterum actionum humanarum, quæ ab intellectu & voluntate proficiscuntur & diriguntur, hæc est præcipua affectio, quod illæ homini possint *imputari*, seu, quod homo pro earum autore recte possit haberi, ac ad reddendam de iisdem rationem adstringi, quodque in ipsum redudent effectus, qui ex istis proveniunt. Nulla enim propior ratio est, quare alicui actio quæpiam imputari possit, quam quia ab isto sciente & volente, mediate aut immediate, profecta est; seu, quia penes ipsum fuit, ut fieret vel non fieret. Hinc axiomatis primarii loco in disciplinis moralibus ad forum humanum spectantibus habetur; quod de illis actionibus rationem posei queat homo, quæ ut fiant vel non fiant penes ipsum est: seu, quod eodem recidit, quod *qualibet actio directionis humane capax, quam penes aliquem est fieri vel non fieri, ipsi queat im-*

C 2 puta-

putari. Sic & contra nemo pro autore ejus actionis haberi potest, quæ penes ipsum neque in se, neque in sua causa fuit.

Observ. 41.

Quod illa homina possint imputari) Actionum voluntariarum affectio est *Imputativitas* seu *Aptitudo ad imputandum*, ut nempe non tantum ipsæ actiones, sed & potissimum earum effectus morales, agenti adscribi queant, hinc etiam de iis actionibus, quæ talem effectum post se relinquunt, saltem in vita civili quaritur *add.* Op. Maj. l. 1. c. 5.

Observ. 42.

Nulla enim propior) Quare actio alicui imputetur, ejus rei ratio recte redditur, *quia est voluntaria*, at si amplius instes, cur actio voluntaria imputetur, tum nulla ulterius ratio reddi potest, sed illa veritas inde monstrabilis est, & immediata perceptione apprehenditur.

Observ. 43.

Hinc axiomatis primarii) A voluntate igitur ad imputationem, affirmative & negative valet argumentum, sed in foro humano, ac præsupposito genuino voluntatis gradu, juxta ea, quæ *Observ. 40.* diximus.

§. 18. Ex hisce præmissis aliquot particulares formabimus propositiones, unde constet, quid cuique imputari, seu, cujus actionis eventusque, autor quisque possit haberi.

I. Actiones ab alio patrata, ut & operationes quarumvis aliarum rerum, nec non quivis even-

tus,

tus, non possunt alteri imputari, nisi quatenus ille potest & tenetur istas moderari. Nihil quippe est frequentius inter homines, quam ut uni commissum sit, alterius actiones dirigere. Heic igitur si actio aliqua ab altero sit patrata, circa quam iste omisit, quod penes se erat, actio illa imputabitur non solum ei, qui immediate ipsam patravit, sed etiam isti, qui ex debita & possibili directione aliquid omisit. Habet tamen ea res fere suum modum finemque, sic ut illud *possibile* cum aliquo velut temperamento & inoraliter sit intelligendum. Cum per quamcunque subjectionem unius sub altero subjecti tamen libertas non extinguatur, quin alterius directioni reniti, & in diversa tendere, possit; nec vitæ humanæ indoles ferat, ut quis uni perpetuo velut affixus omnes istius motus observare queat. Igitur si quis omnia fecit, quæ directionis sibi injectæ natura ferebat, ubi nihilominus quid ab altero patratum fuit, patranti soli imputabitur. Sic postquam in animalia homines dominium exercent, quæ per illa in alterius detrimentum facta sunt, domino imputabuntur, siquidem is ex debita custodia & circumspectione aliquid neglexit. Sic & quævis mala, quæ alteri obtingunt, imputari isti possunt, qui eorum causam & occasionem,

cum posset & deberet, non subtrahit. Sic cum multarum rerum naturalium operationes promovere aut suspendere sit penes homines, quod ab hisce commodi vel damni datum sit, istis imputabitur, quantum eorundem opera vel neglectus ad id momenti attulit. Aliquando etiam præter ordinem imputantur alicui eventus tales, qui alias supra humanam directionem sunt, quatenus intuitu certi hominis istos divinum Numen peculiariter procuravit. Extra hosce & similes casus sufficit, si de propriis actionibus rationem quis possit reddere.

Observ. 44.

Ex hisce præmissis) Specialis hæc imputationis doctrina, quam hic Autor proponit, ac pluribus in Op. Maj. l. 1. c. 5. illustrat, parum difficultatis habet, cum omnia ex generali fundamento fluant, ac posita voluntate in gradu habili, imputatio obtineat, deficiente verò cesset, ad singulos §. § igitur aliquid notare opus non est, hinc inde tamen quædam adjiciemus.

§. 19. II. *Quæcunque in quolibet homine sunt vel non sunt, quæ penes ipsum non fuit, ut adessent, vel non adessent, non possunt ipsi imputari, nisi quatenus per industriam naturalem defectum non supplevit, aut nativas vires non adjuvit.* Sic cum perspicaciam ingenii viresque corporis nemo sibi præstare possit, nemi-

nemini quoque eo nomine imputari quid poterit, nisi quantum culturam adhibuit, aut adhibere neglexit. Sic non rustico, sed urbano atque aulico horridi mores vitio vertuntur. Unde & valde absurdæ sunt iudicandæ exprobrationes ejusmodi qualitatum, quarum causa penes nos non fuit; v. gr. brevis staturæ, formæ parum felicitis, & similia.

§. 20. III. *Quæ per ignorantiam invincibilem patrantur, imputari non possunt.* Quia neque dirigere actionem possumus, ubi intellectus lumen non prælucet; & præsupponitur, tale lumen sibi hominem non potuisse comparare, neque quo minus posset in culpa fuisse. Quin & in vita communi *τὸ ποσὲ* moraliter accipitur pro illa facultate, solertia & circumspeditione, quæ vulgo sufficere judicatur, & quæ probabilibus rationibus subnixa fuit.

§. 21. IV. *Ignorantia, ut & error, circa leges, & officium cuique injunctum, ab imputatione non liberat.* Nam qui leges & officium alicui injungit, efficere solet & dedet, ut in notitiam subjecti illæ perveniant. Et ad subjecti captum leges ac regulæ officii attemperari solent & debent, circa quas cognoscendas & retinendas quemlibet sollicitum esse oportet. Unde qui est causa ignorantia, respondere

C 4

etiam

etiam tenebitur de iis actionibus, quæ ex illa ignorantia promanant.

Observ. 45.

Quæ per ignorantiam invincibilem patrantur, imputari non possunt) Hæc non simpliciter admitenda sunt, sed, ad intelligendum erroris effectum, distinguendum potius inter errorem *concomitantem*, hic imputationem non impedit, nec refert, vincibilis fuerit an invincibilis, nam sufficit, quod extra negotium versetur, adeoque consensum necessarium non attingat ac excludat *vid. Observ. 25. n. 2.* ut hactenus Autoris doctrina non procedat. Usum observationis infra *l. 1. c. 9. §. 12. n. 2.* amplius ostendemus: & *efficacem*, hic impedit imputationem, si sit *invincibilis*, quod tamen moraliter æstimandum §. 20. *b.* si vero *vincibilis*, qualis regulariter est error juris §. 21. *b.* tum ob antecedentem vel concurrentem consensum, imputationem non excludit.

§. 22. *V. Cui occasio agendi citra suam culpam deest, illi non imputatur, quod non egerit.* Videtur autem occasio quatuor hæcce complecti; ut *objectum* actionis sit in promptu; ut adsit commodus *locus*, ubi non possimus ab aliis impediri, aut malo aliquo multari; ut adsit opportunum *tempus*, quo non sint ob-eunda negotia magis necessaria, quodque item aliis, qui ad actionem concurrunt, sit op-
por-

portunum, ut denique naturales agendi vires suppetant. Citra isthæc enim cum actio fieri nequeant, etiam absurdum fuerit, si alicui imputetur, ad quod agendum occasio defuit. Sic medicus segnitix non potest argui, si nemo ægrotet. Sic liberali esse non conceditur, qui ipse indiget. Sic talentum suum defodisse argui nequit, cui rite ambienti statio denegata fuit. Et cui multum datum fuit, ab eo multum repetetur. Sic non possumus simul sorbere & flare.

Observ. 46.

Illi non imputatur, quod non egerit) De imputatione actionis omissæ, non aliter quæritur in vita civili, quam quatenus actio sub legis præcepto est, hoc vero non præcise obligare, sed commodam occasionem prærequirere solet. Quod si igitur quis, deficiente occasione, actionem omittat, illa omissio legi non repugnat, nec aliquem effectum moralem post se relinquit, hinc de omissione illâ, vel omnino non quæritur, vel illa, ut peccatum, non imputatur §. 22. *b.* quod si vero quis, posita occasione, actionem omittat, omissio illa legi contraria est, ac velut peccatum imputatur.

§. 23. *VI. Non potest quoque alicui imputari, quod non præstiterit ea, quæ vires ipsius excedunt, neque per eas prohiberi aut effici possunt.*

Inde vulgo, impossibile nulla est obligatio, dicitur. Addendum tamen: modo quis sua culpa vires præstandi non detriverit, aut perdidit. Hic enim eodem modo tractari potest, atque si vires adhuc obtineret; cum alias facilis esset via, quamvis obligationem paulo laboriosiore eludendi, ultro corruptis præstandi viribus.

Observ. 47.

Quæ vires ipsius excedunt) Sic Reges Mexicani, sub initium regni, subditis promittebant, se effecturos, ut Sol justo tempore oriatur & occidat, ut pluvix, quando opus est, cadant, ut terra fruges proferat. Quod institutum stultitiæ damnat Autor Op. Maj. l. i. c. 5. §. 6. Aliter videtur Krebsio in tract. de Ligno & Lapide p. 1. Class. 2. sect. 2. §. 1. multæ & mirandæ sapientiæ id esse censenti, cum promissionis sensus sit; Principem bonis legibus rectoque & pio imperio, vel ipsa astra & meteora, valere in suam operam pro felicissima Subditorum & Reipublicæ beatitudine, cogere.

§. 24. VII. *Imputari quoque non possunt, quæ quis coacte patitur, aut agit.* Talia enim amoliri aut defugere supra ipsius vires positum intelligitur. Cogi autem dicimur duplici modo; uno, quando alius valentior per violentiam nostra membra ad aliquid agendum aut patiendum adplicat, altero, si po-
ten-

tentior grave aliquod malum cominus intenter, (idque statim repræsentandi facultatem habeat,) nisi ultro nos ad aliquid faciendum moveamus, aut à faciendo abstineamus. Tunc enim, nisi expresse obligemur, id, quod alteri est inferendum, nostro malo redimere, is, qui eam nobis necessitatem adfert, pro autore facinoris habebitur; nobis autem non magis factum istud imputari poterit, quam gladio aut securi cædes.

Observ. 48.

Altero, si potentior grave aliquod malum) Hoc casu imputatio actionis malæ non plane cessat, licet Autor ita putet, nam in coacto est aliqua voluntas, & nulla apparet ratio, cur hic à regula de actionibus voluntariis imputandis, sit facienda exceptio *vid. Observ. 40. n. 1.* hinc etiam comparatio gladii aut securis, & Coacti, quam Autor hic facit, non procedit, illa enim merè passivè se habent, sed hic sua voluntate ad actum concurrunt.

§. 25. *VIII. Eorum, qui rationis usu destituuntur, actiones non imputantur.* Quia, quid agatur, liquido dignoscere & ad normam comparare nequeunt. Et huc spectant actiones infantum, antequam usus rationis paulo distinctius sese incipiat exferere. Quod enim isti propter quasdam actiones increpantur aut verberantur, id non ideo fit, quasi in foro


ro humano poenam propriè dictam meriti sint, sed per modum nudæ emendationis & disciplinæ; ne per talia molestiam aliis facessant, aut, ne pravam adsvetudinem contrahant. Sic & furiosorum, mente motorum, & delirorum actiones pro humanis non habentur, quibusquidem citra suam culpam iste morbus provenit.

§. 26. IX. Denique *imputari non possunt*, quæ quis in somniis agere sibi videtur; nisi quatenus talibus interdium cogitandis cum delectatione immoratus, eorum imagines animo alte impressit, etsi & hæc rarissimè in foro humano attenduntur. Alias enim phantasia in somno est veluti cymba sine rectore fluitans, sic ut penes hominem non sit præstare, qualia visa isthæc effingat.

§. 27. Circa imputationem autem actionum alterius paulo distinctius observandum, quod aliquando quidem contingat, ut actio ei, qui immediatè eam patravit, plane non imputetur, sed alteri, qui hoc tantum velut instrumento usus est. Sed frequentius est, ut & ei, qui actionem patravit, & alteri, qui ad eandem agendo quid vel omittendo concurrat, illa simul imputetur. Id quod fit triplici potissimum modo; vel ut alter principalis causa actionis, patrator minus principalis habeatur;

beatur; vel ut uterque pari velut passu ambulet, vel ut alter minus principalis, patrator principalis causa sit. Ad primam classem pertinent, qui alterum autoritate sua ad quid permoverunt: qui consensum requisitum adhibuerunt, citra quem alter agere non poterat; qui poterant & debebant prohibere, & non fecerunt. Ad secundam classem pertinent, qui mandant, aut ad facinus patrandum conducunt; qui adjuvant; qui receptum & defensionem præstant; qui, cum opem ferre injuriam patienti possent & deberent, non fecerunt. Ad tertiam classem referuntur, qui consilium speciale dant; qui laudant & assentantur ante patratum facinus; qui exemplo suo ad peccandum accendunt, & similes.





CAPUT II.

DE

NORMA ACTIO- NUM HUMANARUM, SEU DE LEGE IN GENERE.

§. I.

Quia actiones humanæ à voluntate dependent, voluntates autem singulorum non semper sibi similes & diversorum in diversa fere tendere solent, igitur ad ordinem & decorem in genere humano constituendum necessarium fuit, normam aliquam existere, ad quam istæ componerentur. Alias enim, si in tanta voluntatis libertate, tantaque inclinationum & studiorum diversitate quisque citra reflexionem ad certam normam ageret, quod ipsi in mentem veniret, non poterat non maxima confusio in genere humano existere.

Observ. 49.

Quia actiones humanæ) Post actiones humanas, naturali ordine, earum norma, seu lex, expenditur.

tur. Ejus necessitatem Autor attingit *b.* prolixius autem, quatuor rationibus, ab hominis dignitate pravitate, ingeniorum varietate & imbecillitate desumptis, ostendit in Op. Maj. l. 2. c. 1.

§. 2. Norma illa vocatur *Lex*, quæ est decretum, quo superior sibi subiectum obligat, ut ad istius præscriptum actiones suas componat.

Observ. 50.

Norma illa vocatur *lex*) Quæ necessario in obligantem & Permittentem distinguenda est, licet Grotius de J. B. P. l. 1. c. 1. §. 9. & Pufendorf in Op. Maj. l. 1. c. 6. §. 16. ac plerique alii, posteriorem negent, qui rerum moralium indolem & latitudinem, serio non expendisse, mihi videntur, nam *jura* non aliunde dependent, quam ex lege permittente, hinc effectus, veritatem causæ suæ, satis insinuat, quod nec ipse Grotius d. c. 1. §. 17. n. 2. diffiteri potuit, & cum *jura* & obligationes, pari passu ferè ambulent, mirum est, cur legem permittentem non æque necessariam existiment, quam obligantem? sane sicut hæc requiritur, ut agere debeas, ita illa necessaria est, quo secure agere possis. Nec obstat (2) *permissionem non actionem, sed actionis negationem esse*, nam aliquando hoc verum est, sed non semper, Concessio juris, ac præcipue singularis, permissionis positivitatem satis ostendit (2) *de legis essentia esse obligationem*, nam, ex nimis stricto legis conceptu supponitur id, de quo controversia est.

Observ.

Observ. 51.

Quæ est decretum.) Pertinet hæc definitio ad legem obligantem tantum, hinc addere liceat definitionem legis permittentis, nimirum hæc est *decretum quo Imperans sibi subiectis jus dat, aliquid, si velint, licite & tuto habendi, agendi vel ab aliis postulandi.*

§. 3. Hæc definitio ut eo melius intelligatur, evolvendum est, quid sit obligatio; unde ea oriatur; quis obligationem recipere, & quis eandem alteri injungere queat. Vulgo igitur *obligatio dicitur vinculum juris, quo necessitate adstringimur alicujus rei præstandæ.* Scilicet injicitur per eam quasi frænum aliquod nostræ libertati, ut quanquam de facto voluntas in diversum tendere queat, intrinseco tamen per eandem velut sensu imbutam se deprehendat, ut ni præscriptæ normæ conformis sit actio edita, non recte se egisse cogatur agnoscere. Adeoque si quid mali eo nomine homini eveniat, non immerito id sibi accidere judicet; cum normam, prout par erat, sequenti istud evitasse licuerit.

Observ. 52.

Hæc definitio) Partitur hic Autor ea, quæ ad explicationem definitionis suæ necessaria existimat. Sed mihi, pro explicandâ utraque definitione, considerata videntur (1) legis utriusque *effectus* (2) *subiectum* (3) *Autor* (4) *finis* & (5) *materia.*

Observ. 53.

Vulgo igitur obligatio) Legis obligantis effectus, est obligatio, quam Autor expendit, *conf. l. 1. c. 6. §. 5.* Potest etiam dici, quod sit *vinculum legis seu morale, homines ad agendum & patiendum obstringens.* Permittentis vero, est *Jus*, i. e., *facultas moralis licite & secure aliquid habendi* (hoc pertinet ad res) *agendi* (ad actiones proprias) *vel ab aliis postulandi* (ad actiones aliorum). De cætero pro ratione objecti, diversas sortitur denominationes, ut libertas, imperium, dominium, usufructus, & ita porro, audiat. *vid. l. 1. c. 1. §. 19. 20.*

2. Obligatio & jus regulariter sunt correlata, hinc eadem ratione distinguuntur. Nimirum (1) ab *existentia*, jus & obligatio sunt vel *Connata* vel *Adventitia*, *vid. Op. Maj. l. 3. c. 4. §. 3. 4.* (2) ab *efficacia* vel *Perfecta*, ad quorum impletionem vis adhiberi potest, vel *Imperfecta*, quorum executio solo pudore & conscientia stat (3) à *duratione*, vel *perpetua* vel *temporaria* *d. e. 4. §. 7.*
3. De cætero in jus & obligationem omnes res seu entia moralia, quæ a legibus dependent, resolvuntur, utut Autor in Op. Maj, *l. 1. c. 1.* plura adstruere videatur. Debebant illa peculiari capite exponi, non tamen sub initium Disciplinæ juris naturalis, ceu Autori *d. l. 1. c. 1.* persuasum fuit, qui ordo illiquidam cognitionem arguit.

S. 4. Quod autem *homo aptus sit ad recipiendam obligationem*, duplex causa est: una quidem, quia is voluntatem habet, quæ sese in diversas partes flectere, adeoque & ad normam componere potest: altera, quia homo à potestate superioris non est immunis. Nam ubi alicujus agendi vires per naturam ad uniformem agendi modum sunt alligatæ, ibi libera actio frustra expectatur: istique incassum præscribitur aliqua norma, qui eam neque intelligere, neque ad eandem sese componere potest. Si quis autem non agnoscat superiorem, eo ipso nemo existit, qui necessitatem eidem jure queat injicere. Et si maximè is in agendo certam rationem observet & à quibusdam actionibus constanter absteat; id tamen non ex obligatione aliqua sed ex proprio beneplacito facere intelligitur. Sequitur ergo, ut ille obligationis sit capax, qui & superiorem habet, & normam præscriptam potest cognoscere, & voluntatem habet in diversa flexilem; quæ tamen, ubi norma per superiorem fuerit præscripta, sentiat, se ab ipsa non recte discedere. Quali natura hominem præditum adparet.

Observ. 54.

Quod autem homo aptus sit) Datur utraque lex hominibus sub imperio constitutis, in quibus adeò aptitudo legem admittendi requiritur. Eam

Au-

Autor, ex usurationis & subjectione oriri putat *h. add. l. i. c. 6. §. 6. 7. 8.* sed prior causa tantum, aptitudinem conciliat, posterior vero ad actualem legis existentiam pertinet, quæ duo hic sunt confusa.

§. 5. *Introducitur obligatio* in animum hominis *proprie à superiore i. e.* tali, cui non solum vires sunt malum aliquod repræsentandi contranitentibus; sed & cui *juste sunt cause*, quare postulare queat, ex suo arbitrio voluntatis nostræ libertatem circumscribi. Talia enim ubi in aliquo fuerint, postquam quid velit, significavit, necessum est, in animo hominis oriri metum reverentia temperatum: illum quidem ex potentia, hanc autem ex consideratione causarum, quæ etiam remoto metu allicere aliquem debebant ad istius voluntatem amplectendam. Qui enim nullam rationem allegare novit, quare mihi invito obligationem velit impingere, præter solas vires, is terrere quidem me potest, ut effugiendo majori malo ipsi tantisper parere satius ducam: sed eo metu remoto nihil amplius obstat, quo minus meo potius, quam illius arbitrio agam. Contra qui rationes quidem habet, quare ego ipsi parere debeam, à viribus tamen malum aliquod mihi imponendi destituitur, ejus jussa impune à me possunt negligi; ni potentior aliquis hu-

Ius auctoritatem proculcatam adfertum eat. Rationes autem, quare quis recte postulare queat, ut ab altero sibi obtemperetur, sunt: si ab isto in hunc insignia quædam bona sint profecta; si constituerit, istum & bene huic velle, & rectius, quam ipse valet, eidem prospicere posse, simulque si actu iste hujus directionem sibi vindicet; & denique si quis ultro alteri sese subjecerit, & in ipsius directionem consenserit.

Observ. 55.

Introducitur obligatio) Utriusque legis Autor est, *superior*, scilicet ratione imperii, seu *imperans*, ad quem *prudencia* & *probitas* requiritur, si finem imperii consideres, *vid. l. 1. c. 6. §. 11.* sed in hac mortalium pravitate, requisita illa considerari non solent, sæpe etiam non possunt. Actu autem quis est Imperans, si habet (1) *justas imperandi causas* & (2) *vires sufficientes jussa tuendi*, quarum causarum necessarium concursum Autor hic amplius ostendit. *add. d. c. 6. §. 9. 12.*

Observ. 56.

Rationes autem quare quis) Sed quæ justæ imperandi causæ sint, exponi debet. Autoris Philosophia ambigua est, ac vix subsistit, si ultimam assertionem excipias. Breviter sic dici potest: Justæ imperandi causæ duæ sunt (1) *dependentia* subjecti ab Imperante, quæ quoad imperium divinum (2) *voluntaria subjectio*, quæ quoad humanum allegari debet.

2. Vires sufficientes iussa tuendi, Deo sunt essentialia, sed in Imperante humano, oriuntur à consociatione multorum, vires suas ei offerentium, quo loco observandum non requiri præcise, ut actu, vires illas habeat, sed sufficere si jure sibi eas asserere possit, hinc à subditis perfidè destitutus, tamen pro legitimo Imperante haberi debet,

§. 6. Cæterum ut lex vim suam in animis eorum, quibus fertur, exferere possit, requiritur *cognitio cum legislatoris, tum ipsius legis*. Nemo enim obedientiam præstare valebit, si neque cui parere debeat, neque ad quid teneatur, noverit. Et legislatoris quidem cognitio est facillima. Legum quippe naturalium eundem esse auctorem, qui universi, ex lumine rationis constat. Nec civis ignorare potest, quis in ipsum imperium obtineat. Leges porro naturales quomodo innotescant, paulo post exponetur. Civiles autem leges per *promulgationem* publice & perspicue factam in subjectorum notitiam perveniunt. In quâ de duobus constare debet; tum quod lex eum habeat auctorem, penes quem summum in civitate est imperium; tum quæ sit legis sententia. Prius cognoscitur, si vel ipse legem sua voce promulget, vel autographo consignet, vel si id fiat per ipsius delegatos: quorum auctoritas frustra in dubium vocatur, si constet,

hoc cum munere, quod in civitate gerunt, esse conjunctum, & ipsos regulariter ad idem adhiberi; si istæ leges in usum judiciorum deducantur; si nihil contineant, quod summo imperio deroget. Ut autem sententia legis recte percipiatur, promulgantibus incumbit, quanta fieri potest perspicuitate uti. Si quid in legibus obscurum occurrat, ejus declaratio petenda abs legislatore, aut illis, qui ad jus secundum leges dicendum publice sunt constituti.

Observ. 57.

Ceterum ut lex vim suam) Legis permittendis finis est, ut subditi, si velint, licite & secure aliquid agere queant, quare iis concedit jus, cui in aliis respondet obligatio, lege obligante constituta. Possunt igitur subditi suo jure uti & non uti, unde tritum illud: *quilibet juri pro se introducto renunciare potest.* Legis vero obligantis *Scopus* est, ut juxta ejus præscriptum subditi actiones componant, qui ut obtineatur, lex subditis (i) *innotescere debet*, quod fit per *promulgationem & interpretationem* §. 6. *h. add. l. 1. c. 6. §. 4. 13.*

§. 7, *Cujuslibet legis perfectæ duæ partes sunt*: una, per quam definitur, quid sit faciendum, quidve omittendum: altera, per quam indicatur, quodnam malum sit propositum ei, qui præceptum intermittit, & interdictum

dictum facit. Nam uti propter pravitatem ingenii humani, in vetita tendere amanti, supervacuum est dicere *hoc fac*, si non facientem nil mali sit mansurum: ita absurdum est dicere, *pœnas dabis*, ni causa, quæ poenam mereatur, præcesserit. Sic igitur omnis vis legis consistit in significando eo, quid superior à nobis fieri velit, vel non velit, & quæ poena violatoribus legis sit constituta. Vis autem obligandi, i. e. intrinsecam necessitatem adferendi, & vis cogendi, seu, per pœnas ad observationem legum adigendi, proprie est in legislatore, & cui legum custodia atque executio est commissa.

Observ. 58.

Cujuslibet legis perfectæ duæ partes sunt) Ad obtinendum scopum modo memoratum, requiritur (2) ut *lex sit perfectæ* i. e. parte *definitiva* & *vindicativa* constet §. 7. *h. add. c. 6. §. 14.* hæc tamen non in omnibus legibus eadem evidentiâ occurrit. Ut autem (3) in *legem latam subditi consentiant*, id necessarium non est, *vid. d. c. 6. §. 13 in fin.* solet quidem *observantiæ defectus*, à subditis nonnunquam allegari, sed non quasi consensus aut obsequium, ad auctoritatem legi conciliandam, necessaria sint, verum ut, ex neglectu palam admissio, intelligatur, propositum dandæ legis, in Legislatore non fuisse serium.

§. 8. Illud, quod per leges alicui injungitur, debet non solum intra vires esse illius, cui leges feruntur, sed & utilitatem aliquam adferre sive illi ipsi, sive aliis. Nam uti sub comminatione poenæ aliquid exigere velle ab aliquo, quod est & semper fuit supra ipsius vires positum, absurdum & crudele fuerit: ita supervacuum est, naturalem voluntatis libertatem constringere, si nulla in quemquam utilitas inde proveniat.

Observ. 59.

Illud, quod per leges) Legum materia, sunt actiones subditorum, quatenus earum directio iis est *possibilis*, juxta judicium Imperantis, *utilis* § 8. *h. ac frequentius accidit vid. l. 3. 4. ff. de leg.* Dum autem actiones nominamus, personas & res, ad quas illæ respiciunt, non excludimus. Specialius dici potest, quod *jus natura obligans*, versetur circa *actiones*, cum *natura humana necessariam convenientiam vel pugnantiam habentes*. Reliquas, quæ *indifferentes* dici possunt, *lex natura permittens*, proprio beneplacito exerceri sinat, earum vero exercitium *lex positiva* divina & humana, nonnunquam, prout visum est, distinctius, circumscribat.

§. 9. Quanquam autem regulariter lex omnes legislatoris subditos complectatur, in quos materia legis quadrat. & quos legislator ab initio exemptos non voluit: interdum tamen
contin-

contingit, ut ab obligatione legis aliquis peculiariter solvatur. Id quod *dispensare* vocant. Uti tamen dispensare ille tantum potest, cui legem ferendi & abrogandi potestas competit: ita cavendum, ne promiscua & citra gravissimas causas facta dispensatione autoritas legum convellatur, & invidiæ atque indignationi inter subjectos ansa præbeatur.

Observ. 60.

Quaquam autem) Leges arbitrariæ, aliquando ab Imperante mutantur, & quidem varia ratione, dum vel penitus & simpliciter tolluntur, vel iis lex contraria opponitur, vel aliqua pars aufertur, vel aliquid adjicitur, vel quidam ab earum obligatione eximuntur, seu de iis dispensatur, quam ultimam mutationem Autor refert.

Observ. 61.

Uti tamen dispensare ille tantum potest) Dispensandi jus ei competit, qui legem tulit, vel in hujus locum successit, non tamen promiscuè, hoc enim & lex naturalis & regulæ prudentiæ vetant.

§. 10. A dispensatione tamen multum differt *equitas*, quæ est correctio ejus, in quo lex deficit ob universalitatem; seu dextra legis interpretatio, qua ex naturali ratione ostenditur, casum aliquem peculiarem sub lege universalis non comprehendi, eo quod alias ab-

furdi quid inde foret secuturum. Nam quia ob infinitam varietatem omnes casus neque prævideri, neque exprimi possunt; ideo iudices, quorum est generalia legum decreta ad speciales casus adplicare, debent à lege excipere ejusmodi casus, quos excepturus fuerat ipse legislator, si præsens adesset, aut tales casus prævidisset.

Observ. 62.

A dispensatione tamen multum differt æquitas) Accuratè loquendo, æquitas & interpretatio restrictiva differunt, illa enim est dictamen juris naturalis, quod leges positivas aut promulgatas rectè explicari præcipit, ne quis præter meritum, incommodum sentiat, hæc vero est actus mentis, legem rite interpretantis & restringentis, qui æquitate dirigitur. Interim invaluit, ut æquitas & interpretatio restrictiva promiscue accipiantur, seu Autor hic facit, ac infra c. 17. §. 12. repetit. De cætero certum est, quod interpretatio ista, & dispensatio plane differant; illa ostendit, quod quis sub lege nunquam fuerit comprehensus, hæc ab obligatione legis quem eximit, illa fit ab interprete & iudice, hæc à summo Imperante, illa fieri debet, hæc potest *vid. l. 1. c. 6. §. 17. Grot. de J. B. P. l. 2, c. 20. n. 25. 26. 27.* Verbo etiam id adjiciendum, quod leges positivæ cum *pactis* & *Consiliis* aliquam habeant convenientiam *vid. d. c. 6. §. 2. 3,*

§. II. Porro à relatione & congruentia ad normam moralem actiones humanæ certas fortiuntur qualitates & denominationes. Et illæ quidem actiones, de quibus in neutram partem quid disponit lex, vocantur *licite* sive *permissæ*. Et si quandoque in vita civili, ubi non omnia ad vivum possunt refecari, illa etiam licita dicantur, in quæ pœna fori humani non est constituta, et si in se honestati naturali repugnent. Quæ porro actiones cum lege congruunt, *bonæ*, quæ discrepant, *malæ* vocantur. Sed ut aliqua actio bona sit, necessum est, ut ex omni parte cum lege congruat; ut mala sit, sufficit, si in una duntaxat parte deficiat.

Observ. 63.

Porro à relatione) A lege, actiones humanæ dicuntur *morales*; Est adeò moralitas, *affectio*, quæ ex relatione ad legem, actionibus inest. Eam Autor hic inseruit, sed seorsim & peculiari capite exponi illa merebatur.

Observ. 64.

Et illæ quidem actiones) Dupliciter moralitas spectari potest (1) ratione *modi*, quo lex de iis disponit, hoc sensu in *licentiam* & *necessitatem* distinguitur, unde actiones dicuntur *licite* & *necessariæ*. Illæ sunt, quarum suscipiendarum jus lex actu positivo concedit, non (ut malè Autor ex falsa hypothese vid. Observ. 50. n. 1.) de quibus in neutram partem lex quid disponit, nam hæc descriptio saltem quadrat ad
actio

actiones imperfecte licitas, quarum mox Auctor mentionem injicit verb. *et si quandoque*. Hæ vero sunt, quas lex jubet vel prohibet, quæque adeo in *præceptas* & *prohibitæ* amplius distingui possunt.

Observ. 65.

Quæ porro actiones) Deinde moralitas spectatur (2) ratione *actionum cum lege convenientiæ* vel *pugnantia*, quo respectu in *bonitatem*, *malitiam* & quam addendam censeo, *indifferentiam* dispescitur, unde actiones dicuntur *bonæ*, i. e. actiones voluntariæ, cum lege obligante ritè convenientes; *Malæ* i. e. actiones voluntariæ cum lege obligante pugnantes, & *moraliter indifferentes*, quæ ex vera legis permissione suscipiuntur, adeoque cum lege permittente conveniunt.

2. Sed ut penitus actionum indifferentium natura intelligatur, observandum, quod illæ triplici modo supponi possint, vel enim (1) actio dicitur *indifferens* ideo, quod *indifferenter quamvis legis dispositionem recipere queat*, hoc sensu non omnes actiones humanæ sunt indifferentes, sic v. gr. homicidium non potest permitti aut præcipi, quia cum natura humana necessariam habet pugnantiam. Doctrina, quæ contrarium asserit, *Indifferentissimus moralis* audit, ac in effectu legem naturalem omnemque honestatem ante legem civilem negat, eoque nomine absurda censi debet; Vel (2) quod *physice, citra respectum ad normam*

mora-

moralem, consideretur, hoc sensu omnes actiones quamdiu illæ à lege abstrahuntur, recte Indifferentes dixeris; Vel (3) quod *à lege verè permittatur*, hæc ad differentiam cæterarum, *moraliter indifferens* dicitur de eaque paulo ante egimus. Potest illa etiam *negative bona*, seu *non mala* dici.

3. Id vero inter scholasticos disputatur, *an etiam actio moraliter indifferens quoad individua detur*: seu an *ulla actio indifferens occurrat, si cum omnibus circumstantiis illa spectetur*? Vulgo cum Thomà hoc negant, & tamen in vita civili, actiones indifferentes se asserere posse sibi persuadent, quod satis ridiculum censeri debet, quid enim proficis, si v. gr. saltationem dicas actum indifferentem, sed in abstracto, i. e. si eam abstrahas ab omnibus circumstantiis, à personis inquam, loco, tempore, fine, quid, hoc factò, in saltatione remanet? Actio igitur simpliciter à circumstantiis abstracta, est nonens, & qui adeo hoc saltem sensu actiones indifferentes asserunt, illi revera omnes negant, satius igitur fuerat, hoc aperte profiteri, quam verbis inanibus fucum facere, ac sibi aliisque illudere.

4. Dubio procul igitur quæstio est affirmanda, vel enim plane non dantur actiones indifferentes, vel in individuo asseri debent. Nec obest ratio dissentientium: *omnem actionem individualement habere vel malum, vel bonum finem adeoque vel malam, vel bonam esse*, nam prius qui-

quidem verum est, sed non simpliciter posterius, actio, quæ bonum finem habet, est *bona sensu negante*, i. e. *non mala seu indifferens* quamdiu scilicet præceptum legis non adest, quod certè quoad omnes actiones, bonum finem habentes probari nequit. Liquet igitur, quod & sententia contraria, & obiectio hæc, ex falsis hypothesebus, juxta quas actionum moralitas, non ex lege, sed circumstantiis repetitur, descendat.

Observ. 66.

Sed ut aliqua actio bona sit) Ut nliqua actio *positive bona* dici queat, utique ex omni parte, seu quoad omnes circumstantias, cum lege congruere debet, sed si in una parte deficiat, non statim est *positive*, sed saltem *negative mala*, i. e. *non bona seu præcepta*.

§. 12. Justitia autem quandoque est attributum *actionum*, quandoque *personarum*. Quando *justitia persona* tribuitur, solet vulgo definiri, quod sit *constans & perpetua voluntas suum cuique tribuendi*. Justus quippe vir dicitur, qui justa faciendo delectatur, qui justitiæ studet, seu in omni re conatur facere id quod justum est. Injustus contra, qui negligit cuique suum tribuere, vel id non debito suo, sed præsentè commodo, mensurandum existimat. Sic ut justì hominis non paucæ possint esse actiones injustæ, & vice versa. Justus

stus quippe justa facit propter præceptum legis, injusta non nisi per infirmitatem: injustus autem justa facit propter pœnam legi adjunctam, injusta per animi malitiam.

Observ. 67.

Justitia autem quandoque est attributum actionum quandoque personarum) Hoc non tantum de justitia, sed in genere, de omni moralitate, bonitate scilicet & malitia, dicendum est. Nimirum moralitas, seu vitium (hæc enim coincidunt) tam in actionibus quam personis reperitur, nam exquenti illarum exercitio, hæc habitum virtutis & vitii acquirunt, quo loco de natura virtutis aliqua dicenda veniant.

2. Virtus est *Habitus mentis*, seu stylo vulgari, *voluntatis, vivendi juxta leges*. Consistit adeo essentia virtutis in *proclivitate servandi legem*. Peripatetici sub involucro *mediocritatis* reverâ laudatum virtutis formale, indicant *vid. Jacob. Thomaf. dissert. de mediocritat, Lips. 1683. hab. §. 5. 18. 20. 24.* sed cum ejus neque nomen neque conceptus, rei significandæ conveniat, ista docendi ratio confusam ac immaturam rei præsentis cognitionem redolens, nemini præjudiciis vacuo, temere probabitur, de quo plura dici possent, si institutum pateretur.

Observ. 68.

Quando justitia personæ tribuitur) Virtus moralis generaliter supposita, distinguitur in *Pietatem*,
quæ

quæ observat leges ad cultum divinum directò spectantes, & *Justitiam*, quæ officia hominibus debita rite explet, quo etiam collimat definitio juris Romani, Autori probata.

Observ. 69.

Justus quippe vir dicitur) Hæc doctrina ostendit, quod ad *Justitiam* *Habitus animi* requiratur, id quod in genere de virtute morali dicendum. De cætero raro ejusmodi habitus in hominibus occurrit, ac in vitâ civili nihil ferè, nisi qualem qualem virtutem in actionibus, requirimus, *vid. Prolegom. §. 22. 23.*

§. 13. Quando vero *justitia actionibus* tribuitur, tunc nihil aliud est, quam *recta applicatio earundem ad personam*. Et justa actio, quæ ex præfati, seu, à sciente & volente, applicatur ad personam, cui illa debetur. Sicut *justitia actionum* à bonitate in hoc potissimum differat, quod hæc simpliciter notet convenientiam cum lege; *justitia* autem præterea involvat respectum ad eos, in quos actio exercetur. Quo nomine etiam *justitia* virtus adversus alium dicitur.

Observ. 70.

Quando vero justitia actionibus tribuitur) Redit Autor ad moralitatem actionum, hinc pertexenda tractatio *Observ. 65.* Nobis ita videtur: Actio bona & justa coincidunt, frustra dissentiente Autore *h.* qui se ipsum in *Op. Maj. l. i. c. 7. §. 4.* refel-

refellere videtur. Uno nomine potest etiam dici *Officium*, quamvis hoc alterum moralitatis respectum, de quo *Observ. 64.* quoque includat *vid. Observ. II.* Distinguitur ad exemplum Virtutis Personæ in *Piam*, quæ Deum, & *Justam in specis*, quæ homines respicit.

§. 14. *Justitiæ divisionem non omnes eodem modo instituunt.* Receptissima est divisio in *universalem & particularem*. Illa dicitur, quando quodcunque officium exercetur erga alios, etiam quod per vim, aut intentata in foro actione, exigere non poterat. Hæc autem est, quando alicui potissimum exhibentur, quæ ille suo jure postulare poterat; & hæc iterum solet dividi in *distributivam & commutativam*. Illa nititur pacto inter societatem & membra inito, circa participandum pro rata damnum & lucrum. Hæc autem nititur contractu bilatere potissimum circa res & actiones in commercium venientes.

Observ. 71.

Justitiæ divisionem non omnes eodem modo instituunt)
Justitia, sive pro attributo personæ sive actionis supposita, commodissime a legum diversitate distinguitur in *Eminentem*, quæ observat leges imperfectas, & *Vulgarem*, quæ perfectas, illa, stylo Grotii de J. B. P. l. 1. c. 1. §. 8. dicitur *Attributrix*, hæc *Expletrix*.

Observ. 72.

Receptissima est divisio in universalem & particularem)

Justitia universalis, vel solo nomine submo-
nente, non est aliqua Justitiæ species, sed
potius tota Justitia, quæ ratione specierum
subjectarum, *Universalis* dici potest. Interim
invaluit, ut illo nomine certa aliqua species
significetur, quæ inconcinna docendi & ap-
pellandi ratio Scholasticis originem debet *vid.*
Jacob. Thomas. *Philosoph. Pract. annot. 109. ad.*
Tab. 24. n. 1.

Observ. 73.

Ille dicitur) In explicatione etiam illius divisio-
nis non adeo consentiunt. Autor in Op. Maj.
l. 1. c. 7. §. 8. ita eam explicat, ut Justitia Uni-
versalis cum Eminente, Particularis cum Vul-
gari coincidat, quæ explicatio etiam optima vi-
detur, licet terminus *Universalis*, semper ma-
neat inconcinuus, cum manifestum sit, quod
utraq; illa species, sit particularis, Sed §. 14.
b. Particularem quidem pro Vulgari habet, sed
universalem ita describit, ut non species, sed
tota potius justitia sit. Dubio procul etiam
Peripatetici Justitiam particularem strictius
sumunt, quam ut Vulgari aut explettrici pos-
sit æquiparari. Ego in hac varietate, sequen-
dam arbitror primam explicationem, ut Ju-
stitia *Eminens, Attributrix, Universalis, ac Vul-*
garis, Explettrix & Particularis sint synonyma.
Alias nihil sani ex vulgari illâ divisione facile
exsculperis.

Observ. 74.

Et huc iterum solet dividi in distributivam & commutativam) Hæc divisio Autoribus suis est explicatu difficilis, vid. Jacob. Thomas. *Ph. Pr. Tab.* 23. Felden. ad Grot. *l. l. c. 1. §. 8.* Pufendorf. *§. 14. b. & in Op. Maj. l. l. c. 7. §. 9. 10.* Id tamen facile liquet, eam ab essentiâ Justitiæ esse plane alienam, ac meris niti accidentibus adeoque ex ignorantia veræ Virtutum normæ exortam videri, ut mirum sit, quare in ineptiis illis enucleandis, otio & ingenio Scriptores abutantur. Id sane fieri potest, ut ferente occasione, indeclamationibus præcipuè Scholasticis, Justitiæ aliquod addamus prædicatum, eamque dicamus *distributivam, commutativam, rectoricem, Administrantem, correctoriam* aut simili elogio mactemus, sed inde exsculpere divisiones necessarias, iisque aliquam tribuere eruditionem, id verò insanum videtur.

2. Nobis igitur sufficiunt divisiones antea memoratæ, ad quas omnium virtutum exempla, quorum, pro ratione objectorum, numerus vel infinitus, vel certè indefinitus est, referri possunt. Undenarius Aristoteles numerus, quoad singulas virtutes insufficiens est, si autem summas earum species continere dicatur, virtutes intellectuales seu perfectiones Mentis à lege abstractas, & virtutes morales confundit, quoad has subordinationem necessariam negligit, ac tanta membrorum multitudine, parum artis ostendit, de quibus

bus omnibus plura dici possent, nisi instituti angustia id prohiberet.

3. Materia virtutis (ut post ejus divisionem adhuc quædam generalia addamus) triplex videtur, *lex*, *affectus* & *actio*, in hac enim & isto, illi attemperandis, illa occupatur. Virtutem consequitur *Animi tranquillitas*, atque hæc *virtutem*, scilicet, *actionem ex ea susceptam*, & *secutam animi tranquillitatem*, simul sumpta, *summum hominis bonum*, de quo tot Philosophorum sunt sententiæ vid. Jacob. Thomæ *Ph. Pr. Tab. 5. Becman. lin. doctr. moral. c. 18. §. 1.* constituere arbitramur, circa quod, id etiam admonemus, male illud, Disciplinarum moralium Centrum constitui, ex quo præjudicio, inepta Earum distractio, ac inadæquata & contorta representatio exorta est.

§. 15. Cognito quid justitia sit, facile etiam, quid *injustitia* sit, colligitur. Ubi observandum, quod actio injusta, quæ destinato ex consilio suscipitur, & per quam violatur; quod alteri perfecto jure debebatur, aut quod tali jure undecunque partum is possidebat, proprie *injuria* vocetur. Quæ triplici modo fit: vel si alicui denegetur, quod suo jure postulare poterat, (non si quid duntaxat ex humanitate aut simili virtute debebatur,) vel si auferatur, quod suo jure, adversus auferentem valente, tenebat; vel si malum aliquod alteri inferatur, quod inferendi potestatem non habebat.

bamus. Ad injuriam præterea requiritur destinatum consilium & malitia ejus, qui facit. Quæ ubi adfuerit, læsio alterius *infortunium* aut *culpa* vocatur, gravior aut levior, prout gravis aut levis fuerit socordia & negligentia, ex qua quis in alterum velut incurrit.

Observ. 75.

Cognito quid justitia sit, facile) Non de injustitia saltem, sed generalius de Vicio, quatenus illud actionibus vel hominibus inest, agendum erat, hinc breviter illud supplebimus: Scilicet actio *mala*, de qua *Observ. 65.* diximus, etiam dicitur *injusta*, uno nomine *Peccatum*, *delictum* vel *injuria*, quamvis hunc terminum ex libertate academica, Autor §. 15. b. strictius supponat. Distinguitur in *impiam*, quæ Deum, & *injustam in specie*, quæ homines respicit *add. Observ. 70.*

2. Ex frequenti actionum malarum exercitio in hominibus oritur *Vitium morale*, quod est *habitus mentis, vivendi contra leges*. Consistit adeo ejus essentia in *proclivitate agendi contra leges*, in *defectu mediocritatis* perinde ineptè ejus formale constituitur, ac in mediocritate, formale Virtutis, *vid. Observ. 67. n. 2.* Distinguitur in *Impietatem*, quæ cultum divinum & *Injustitiam*, quæ officia hominibus debita negligit, *conf. Observ. 68.* Utriusque habitus sæpe inter homines est satis perfectus secus ac circa Virtutem contingere diximus *Observ. 69.* Injustitia amplius distingui potest in *Eminen-*

tem, quæ leges perfectas spernit, ac Justitiæ vulgari opponitur, & *Vulgarem*: quæ leges imperfectas violat ac justitiæ eminenti contraria est *add. Observ. 71. 72. 73.* De cætero vitiorum numerus, pro ratione objectorum, indefinitus est, nec calculus Aristotelicus aliquis usus est *add. Observ. 74.*

3. Materia Vitii quoque sunt *lex, affectus & actio*, nam per hæc illam violare, vitii opus est. Ex *vitio* susceptam *actionem malam*, consequitur *conscientia inquieta*, quæ tria simul sumpta, *summum hominis malum* efficiunt, quia iram Dei illi conciliant, ac miserandum istum statum, tristi applicatione ob oculos ponunt *add. Observ. 74. n. 3.* Vitium derelinquimus per *Resipiscentiam* i. e. recessum à vitio, cum proposito abstinendi *vid. Becman. lin. doctr. moral. c. 12. §. 10.* in cuius requisitis quousque ratio & religio Christiana consentiant, Theologorum est inquirere.

4. Illud tandem notandum, quod in actionibus bonis & malis, præter *qualitatem moralem*, de qua hætenus, etiam detur *quantitas moralis*, juxta illam, actiones sunt æquales, secundum hanc, sæpe inæquales, & una alterâ melior & pejor. Est autem quantitas illa, *Affectio*, juxta quam actiones bonæ & malæ inter se conferri ac una alteri æqualis, vel ea melior aut pejor censerî potest. Oritur eadem summam, vel à diverso voluntatis influxu, vel à legum, quæ observantur, aut violantur *diversitate*. Vulgo

ex circumstantiis quantitatem repetunt, sed circumstantiæ, fundamenta modo nominata, saltem innuunt, hinc etiam non omnes in augenda vel minuenda actionum quantitate, alicujus sunt efficacix, sed prout fundamenta laudata præsupponunt, vel non *add.* Op. Maj. l. 1. c. 8. In ipsis etiam habitibus Virtutis & Vitii, dari diversam quantitatem, ex præmissis intelligitur, nam & illa ex diversitate *agendi consuetudinis & legis* resultat *add.* Thomas. *Ph. Pr. tab. 27.*

§. 16. Lex respectu auctoris dividitur in *divinam & humanam*; illa abs DEO, hæc ab hominibus lata est. Sed si lex consideretur, prout necessariam & universalem congruentiam cum hominibus, vel minus, habet, dividitur in *naturalem & positivam*. Illa est, quæ cum rationali ac sociali natura hominis ita congruit; ut humano generi honesta & pacifica societas citra eandem constare nequeat. Unde & illa per rationis homini congenitæ lumen, & ex consideratione humanæ naturæ in universum investigari & cognosci potest. Hæc est, quæ ex communi conditione humanæ naturæ haut quicquam fluit, sed *abs solo legislatoris placito proficiscitur*: etsi nec ipsa sua ratione ac usu, quem certis hominibus aut peculiari societati generat, carere debeat. Est autem *lex divina, alia naturalis, alia positiva*. Humana autem omnis, presse accepta, *positiva* est.

Lex respectu Autoris dividitur) Poterit lex vel ratione *Autoris* vel *objecti* discerni, & altera divisio alteri adjungi. Sed commodissimum est, primum respectum sectari, ac ita species parti-ri: Lex est *divina* vel *humana*. Illa est *naturalis* & *positiva*, Hæc tantum *positiva*, ac vulgo in *universalem*, seu *Gentium*, & *Particularem*, seu *civilem* amplius discernitur. Singularum vel veritatem vel indolem deinceps spectabimus. A naturali autem incipiendum, quia positivis prior est, & sine ejus cognitione, positivæ solidè satis non possunt intelligi.

CAPUT III.

DE

LEGE NATU- RALI.

Quamnam legis naturalis sit indoles, quæ necessitas, & quibus eadem præceptis in isthac mortalium conditione constet, planissime perspicitur, si quis naturam & ingenium hominis penitus perscrutatus fuerit. Sicuti enim ad accuratam legum civilium cognitionem plurimum facit, statum civita-
tis;

tis, moresque & studia civium probe intellexisse: ita perspecto communi mortalium ingenio, statuque facile patebit, quibus legibus eorundem incolumitas contineatur.

Observ. 77.

Quenam legis naturalis sit indoles) Juris naturalis indolem explicare, satis difficile est, cum res illa in sensus externos haut incurrat ac variis adeo scriptorum sententiis subiecta sit vid. Op. Maj. l.2. c.3. Kulpis Colleg. Grot, dissert.1. Ex naturâ humanâ legem illam esse repetendam, parum quidem dubii habet, quo collimat §.1. b. sed illud fundamentum rite excussisse, id verò non usque adeo est expeditum. Nobis tria spectare placet (1) *an detur lex naturalis* (2) *quid sit* & (3) *quodnam sit ejus argumentum.*

2. Datur (1) lex naturæ, quia Deus est, idem etiam genus humanum creavit, ejusque conservationem vult, (quod etiam affectus cuiusvis insitus, satis singulis insinuat) Porro homines providentia sua complectitur, in eos habet imperium, illosque ad legem recipiendam & observandam, aptos fecit. Ex his præsuppositis utique consequitur, Deum dedisse hominibus legem, quam velut normam conservandi generis humani, in agendo respicerent, quæ termino, uti recepto, ita satis congruo, dicitur *Lex naturæ*, prout ejus veritas & indoles ex tractatu sequenti amplius apparebit.

3. Est eadem (II,) vel *Constitutiva* vel *Permissiva*. Illa est *decretum voluntatis Divinae*, per *rationem promulgatum*, omnes homines *exactissime* & *immu- tabiliter obligans*, ut *actiones voluntarias*, cum *naturâ humanâ*, ad *certum finem à Deo formatâ*, & *liberâ hominum voluntate*, *licité amplius disposita*, *necessario convenientes suscipiant*, non convenientes *omittant*. Pro cuius definitionis explicatione sex notanda (1) *Legis naturalis fundamentum* (2) *Autor* (3) *modus promulgandi* (4) *subiectum* (5) *objectum* (6) *effectus*, sic enim hæ partes, ob ordinem Autoris, erunt locandæ,

§. 2. Id igitur homo habet commune cum omnibus animantibus, queis sensus sui inest, ut se ipso nihil habeat carius, seipsum studeat omnibus modis conservare; ut quæ bona sibi videntur acquirere, mala repellere nitatur. Qui quidem affectus regulariter tantus est, ut reliqui omnes eidem cedant. Et quicumque hominis salutem impugnatum sit, eum non potest non iste averfari eousque, ut etiam depulso malo intentato plerumque odium, & cupiditas vindictæ adhuc remaneat.

§. 3. Ast in eo præ brutis homo deteriore jam conditione videtur, quod vix ullum aliud animal tanta à nativitate imbecillitas prosequatur; sic ut miraculi sit instar futurum, si quis ad maturam ætatem pervenerit, nisi aliorum hominum auxilium accedat. Cum nunc
inter

inter tot inventa humanæ necessitatis adminicula, plurium annorum sollicita informatio requiratur, ut proprio quis Marte victum & amictum sibi parare queat. Fingamus hominem, citra omnem ab aliis hominibus accedentem curam & culturam, ad robustam ætatem provectum, cui nihil sit scientiæ, nisi quod ex proprio ingenio velut ultro pullulavit, eundemque ab omni aliorum hominum ope atque consortio in solitudine destitutum: sane vix miserabilius animal deprehendetur; elingue nimirum ac nudum, cui nihil aliud relictum, quam herbas radicesque vellere, aut sponte natos fructus legere, sitim fonte, flumine aut lacuna obvia levare, repellendis aëris injuriis antra subire, aut musco gramineve corpus utcunque tegere, tempus tædiosissimum per otium exigere, ad quemvis strepitum aut alterius animantis occursum exhorrescere, denique fame, frigore, aut per feram bestiam demum perire. Contra quidquid jam commoditatum vitam humanam comitatur, id omne ex mutua hominum ope redundavit. Sic ut post Deum O. M. nihil in hoc orbe sit, ex quo major utilitas homini provenire queat, quam ex ipso homine.

§. 4. - Ist hoc tamen tam utile invicem animal non paucis laborat vitiis, & non minore nocen-

nocendi facultate præditum est; quæ conjunctionem cum ipso reddunt satis ancipitem, magnamque requirunt cautionem, ne pro bono malum quis ab illo sortiatur. Jam primum major fere ad nocendum proclivitas in homine, quam in quovis brutorum deprehenditur. Nam bruta fere cibi desiderio & veneris efferantur, quorum utrique tamen facili negotio ipsa satisfacere possunt. Et eo desiderio sopito non temere in iras aut ad lædendum alios concitantur, nisi quis irritaverit. Ast homo animal est nullo non tempore in libidinem paratum, cujus stimulis longe frequentius vellicatur, quam conservandæ speciei necessarium videbatur. Ejusdem quoque venter non satiari duntaxat, sed & titillari vult; & sæpe plura adpetit, quam natura digerere valet. Vestibus ne indigerent bruta, natura prospexit: ast homo non ad necessitatem tantum, sed & ad ostentationem vestiri gaudet. Multi præterea affectus atque cupidines brutis ignoti, in mortalium genere deprehenduntur: superflua habendi libido, avaritia gloriæ & alios eminendi cupiditas, invidia, æmulatio, ingeniorumque contentio. Indicio est, quod pleraque bella, quibus genus mortalium colliditur, ob causas gerantur brutis ignotas. Atque ista omnia stimulare homines possunt & solent,

ut

ut sibi mutuo nocere velint. Accedit in multis eximia quædam petulantia, & aliis insultandi libido; quibus cæteri, etiam modesto ingenio præditi, studio se ac suam libertatem conservandi ac tuendi, non possunt non offendi, ac ad resistendum accingi. Quandoque etiam homines ad mutuas læsiones incitat inopia & quod præsens rerum copia cupiditatibus aut indigentia eorum non sufficiat.

§. 5. Sed & maxima vis inest hominibus ad noxas mutuo inferendas. Nam etsi neque dentibus, neque unguibus aut cornibus sint formidabiles, ut multa brutorum: tamen habilitas manus in efficacissimum nocendi instrumentum evalescere potest; & solertia ingenii astu & per insidias grassandi facultatem dat, quâ aperta vi pertingere non licet. Sic ut facillimum sit, hominem homini gravissimum malorum naturalium, nempe mortem, inferre.

§. 6. Denique & in genere humano considerata est insignis illa ingeniorum varietas, qualis in singulis brutorum speciebus non cernitur; quippe quæ consimiles fere inclinationes habent; parique affectu & adpetitu ducuntur. Ast inter homines quot capita, tot sensus, & suum cuique pulchrum. Nec simplici aut uniformi cupidine, omnes agitantur, sed multiplici & varie inter se mixto. Imò unus & idem

idem homo sæpe sibi dissimilis cernitur, & quod uno tempore concupivit, ab eodem alio tempore valde abhorret. Nec minor in studiis, institutis, & ad exserendum animi vigorem inclinationibus varietas, quæ jam in infinitis fere vitæ generibus conspici-
tur. Per quæ ne mutuo collidantur homines sollicita temperatura & moderatione opus est.

§. 7. Sic igitur homo jam est animal sui conservandi studiosissimum, per se egenum, sine auxilio sui similium servari impotens; ad mutua commoda promovenda maxime idoneum; idem tamen juxta malitiosum, petulans, & facile irritabile ac ad noxam alteri inferendam pronum non minus quam validum. Unde colligitur, eidem, ut sit salvus, necessum esse, ut sit sociabilis, i. e. ut cum sui similibus jungatur, & adversus illos ita se gerat, ut ne isto probabilem causam accipiant eum lædendi, sed potius ejusdem commoda servare & promovere velint.

Observ. 178.

Ad igitur homo.) Juris naturalis fundamentum jam in sensu strictiori, quatenus dictamina ejus inde saltem eruuntur, spectatur. Est autem, ut definitio innuit, *natura humana à Deo ad certum finem formata, ac libera hominum voluntate, licite amplius disposita.* Spectanda igitur est natura (1) quatenus Deus eam formavit, (2) quatenus homi-

homines ipsi liberâ voluntate eandem amplius variè alterant,

2. Prius intelligi potest, si ad *finem* creationis respiciamus, hic autem vel in ordine ad *Deum*, vel *Homines* spectatur. Priori respectu, nisi fallor, ratio liquido intelligit, Deum intendisse sui *cultum* ac adeò hominis naturam formasse *religiosam*, ob hanc igitur voluntatem creantem, sequitur necessario dirigens seu lex naturalis, quæ homines, naturæ suæ convenienter, ad cultus divini exercitium, i. e. actiones, honorem, amorem & timorem Dei continentem, obligat, ut adeo ex natura hoc sensu spectata, aliqua juris naturalis pars: *Deum esse colendum*, certo satis colligatur, & verum sit hoc paradoxon: *Ob cultum homines obligari per legem naturalem ad cultum.*

3. Posteriori respectu, seu quoad homines, Deus in creatione, dubio procul, intendit *Eorum conservationem*, hinc formavit humanam naturam, *sua conservationis studiosam* ac consequenter *sui amantem ac socialem*, ex qua dispositione, novam juris naturalis partem, *conservationi incumbendum*, ac in specie *exercendam esse Philautiam & socialitatem*, ratio colligit, de qua mox paulo explicatius agemus.

4. Sumitur igitur Philautia vel (1) pro fine à Deo intento, vel (2) aptitudine, seipsum amandi, vel (3) actuali sui ipsius amore, quemadmodum socialitas itidem significat (1) finem Dei (2) aptitudinem alios amandi & (3) actuali-

lem

lem aliorum amorem. Juxta duplicem priorem sensum, philautia & socialitas, est juris natural. fundamentum illudque antecedit, juxta tertium vero, est ejus objectum, illudque sequitur, ut iterum verissimum sit hoc paradoxon: *Ob philautiam & socialitatem, homines per legem naturalem obligari ad philautiam & socialitatem.*

5. Sed operæ pretium est, adhuc philautias & socialitatis considerationi insistere, nimirum quod Deus homines formaverit sui amantes & sociales, id brevissime & solidissime probatur argumento *intente conservationis*, utique enim, si Deus voluit generis humani conservationem, non potuit non humanam naturam sui amantem & socialem formare. Ex qua ratione simul patet, nec philautiam socialitati, nec hanc illi esse subordinandam, sed utramque in æquilibrio consistere ac propter generis humani conservationem requiri, *add. L. 2. c. 3. §. 16.*

6. Ad Autorem ut veniamus, ille Philautiam nulli explicavit, quia eam ad fundamentum juris naturalis non pertinere censuit, quod tamen mihi haut probatur. Socialitatem verò, quam unice laudato juri substernendam esse existimavit, tetigit in Op. Maj. L. 2. c. 3. §. 15. sed non satis exposuit, cum tamen vel maximè hoc fieri debuisset, nisi enim diversam ejus suppositionem accurate distinguas, juxta indicium n. 4. omnis, quæ inde suscipitur, demonstratio invalida est ac in perpetu.

petuum circulum agi, aut in infinitum exagitari potest.

7. Hominis autem naturam esse socialem, ita probat: Homo (1) seipsum amat §. 2. *b.* (2) citra aliorum auxilium est miser (3) ad inutua comoda promovenda aptus §. 3. (4) ad nocendum proclivis §. 4. & idoneus, §. 5. (5) varius & mutabilis §. 6. ergo socialis §. 7.
8. Cæterum in hac demonstratione id quidem verissimum, & in *d.* §§. satis probatum est, quod memoratæ affectiones, naturæ humanæ insint, sed quod ab iis ad socialitatem inferri queat, id non perinde liquidum. Videamus specialius: *amor proprius*, amorem aliorum non statim continet, cum potius hunc sæpe expungat, Dicis, *amor proprius me impellit, quo sim socialis, ac ab aliis bona consequar!* Verum ita subordinatur socialitas Philautiæ, ac utilitas propria, ultimum juris naturalis fundamentum constituitur, quod tamen minime admitendum.
9. Sentit hoc incommodum Autor in Op. Maj. l. 2. c. 3. §. 14. in fin. dum inquit: *illud monendum, nos in eruenda hominis conditione, amoris proprio priorem locum assignasse, non quod quilibet seipsum reliquis omnibus præferre debeat, aut omnia propria utilitate metiri, sed quia amorem proprium naturaliter homo prius sentit, quam aliorum curam.* Verū non removet; non enim quaeritur, an amorem proprium prius sentiat homo, quam aliorū curam, quod facilè concedi-

tur, sed an non, probata per amorem proprium socialitate, utilitas privata ultimum juris naturalis fundamentum constituatur, quod hactenus nondum est remotum.

10. Eo infirmior autem ab amore proprio desumpta probatio videri potest, si expendas, quod viceversa Autor philautiam per socialitatem probare soleat, id quod satis liquet ex §. 13. *b.* & cap. 5. §. 1. *b.* nam ita perpetuus committitur circulus, & subordinatio illa, intento à Creatore amoris proprii & alieni æquilibrio, repugnat.

11. Idem dicendum de *miseria*, quæ socialitatem non infert, nisi per vitiosam subordinatorem, hinc fictio §. 3. *b.* proposita, latiusque explicata l. 2. c. 2. §. 2. etiam ad demonstrandam socialitatem nihil confert, cum totum argumentum in utilitatem propriam resolvatur, ceu *Observ. 4.* jam ostendimus.

12. *Aptitudo aliorum commoda promovendi*, quæ tertio loco laudabatur, socialitatem per se etiam non probat, nam non sequitur: *aptus sum ad alios amandos*, ergo à Deo & natura ad hoc sum destinatus, nam aptus quis etiam est ad nocendum, nec tamen ideo hominis naturam, hostilem formatam dicere licet, ut adeò à sola aptitudine, seposito principio sublimiori, ad habitum naturæ humanæ moralem, inferre non liceat.

13. Denique tantum abest, ut à *malitia & ingeniorum varietate*, quæ ultimo loco adducebantur,

tur, ad socialitatem inferre possis, ut potius illæ hanc manifestè destruant. Si de legis necessitate quærat, ad illas affectiones recte provocatur, quod fecit Autor *l. 2. cap. 1. §. 6.* ast in probanda socialitate, nullas illæ habent partes.

14. Summa eò redit: demonstrationis allatæ vel hic est sensus: *memoratas affectiones efficere hominis naturam socialem, vel, eas impellere, qua homo erga alios socialitatem exercent, juxta priorem, doctrina videtur falsa, juxta posteriorem, ultimum fundamentum juris naturalis, constituit utilitatem privatam.*

15. Quod si tamen quis paulò mitius cum doctrina illa agere velit, dicere poterit, ex affectionibus memoratis, à posteriori hominem colligere posse, quod sibi solitudo aut illimitata philautia non conveniat, sed potius in amore proprio, socialitate temperato, ejus salus & incolumitas consistat, hoc cognico, ipsum, socialitatis veritatem, à priore, ex fine Creatoris, amplius inquirere & cognoscere debere, quæ mitior sententia ratione non caret.

§. 8. Hujus ergo socialitatis leges, seu, quæ docent, quomodo quis sese debeat gerere, ut commodum societatis humanæ membrum existat, vocantur *leges naturales.*

§. 9. His positis adparet, *fundamentalem legem naturalem esse hanc: Cuilibet homini quantum in se, colendam & servandam esse socialitatem.* Ex

quo consequitur, quia qui vult finem, vult etiam media, sine quibus finis obtineri nequit: omnia, quæ ad istam socialitatem necessario & in universum faciunt, jure naturali præcepta; quæ eandem turbant aut ab-rumpunt, vetita intelligi. Reliqua autem præcepta sunt tantum velut subsumptiones sub hacce generali lege, quorum evidentiam lumen illud naturale hominibus insitum insinuat.

Observ. 79.

Hujus ergo socialitatis leges) Hactenus habitum naturæ humanæ, intuitu hominum ipforum, declaravimus, exinde Ratio aliquam juris naturalis partem iterum colligit. Autor quidem ex naturæ sociali totam legem naturalem dependere censet §. 8. adeoque pro ratione hujus hypotheseos, eam quoque repræsentat. §. 9. Sed nobis & naturæ humanæ dispositio & lex naturalis, illi innexa, latius patere videtur, hinc ex hactenus declarato naturæ habitu, hanc legis partem; *incumbendum esse conservationi, adeoque philantiam & socialitatem exercendam.* saltem repetimus, ceu *Observ. præc. n. 3.* jam indicavimus.

2. Quo autem sensus memoratæ partis distinctius appareat, oportet eam expendere (1) ratione hominum viventium & inter se conversantium (2) vivorum erga mortuos (3) propagantium & propagandorum.

3. Pri-

3. Primo respectu exigit præceptum, ut *homines amorem proprium & alienum, in equali gradu & reciprocè regulariter exercent, quod si autem certæ circumstantiæ eveniant, æquilibrium illud nonnunquam cessat, sicut etiam socialitas non est exercenda erga illum, qui delictis se eà indignum reddidit.*
4. Secundo respectu probabile videtur, quod *homines vivi, mortuis quoque adhuc socialitatem seu amorem debeant, in quantum scilicet hic in illos cadit, ob memoriam nempe pristinæ humanitatis ac spem resurrectionis, quam, ex scitis religionis revelatæ, supponere, nihil impedit. Juxta hæc igitur sepultura, velut medium exercendi amoris, jure naturali præcepta, devoratio verò mortuorum, aut abjectio, vel aliæ injuriæ prohibitæ nobis videntur, aliis tamen dissentientibus vid. Dn. Thom. 7. 7. D. l. 3. c. 10. §. 7.*
5. Tertio respectu, præceptum exigit, ut *homines genus suum propagent, de quo dubitari nequit, cum intenta conservatio propagationem evidenter postulet, & quidem eo modo, qui & naturæ propagantium sociali conveniat, & homines natos ad religiositatem, philantiam temperatam, & socialitatem optimè disponat, quod quid specialius requiratur infra ad l. 2. c. 2. ostendere conabimur.*
6. Hactenus exposuimus *habitus naturæ humanæ naturalem*, ac inde dictamina legis naturalis eruimus, Postea etiam ejus *habitus ad-*

ventitius considerandus, quem innui *Observ.* 78. Nimirum salva intentione Dei, cui contravenire non debent, homines sæpe liberâ voluntate, seu pacto, & lege positiva, habitum illum, quem vel in ordine ad Deum vel seipsos habent, augent, quo facto, præcepta legis naturalis etiam extenduntur, actionesque, dispositioni illi convenientes, exigunt.

7. Quodsi adeo hæc jungamus, summa juris naturalis, ex naturæ humanæ habitu, naturali & adventitio fluens, hæcerit: *Cole Deum, exerce philantiam & socialitatem erga vivos & mortuos, nec non propagationi, naturæ humanæ attemperatæ, stude, conditioni tuæ vel naturali ael adventitiæ convenienter.* Ut adeo omnes homines, fini a Deo intento, actiones suas attemperare debeant, sed modo nonnunquam diverso, pro ratione scilicet diversæ conditionis, perinde sicut in automato, omnes quidem partes, juxta finem artificis operantur, sed singulæ eo modo, qui earum dispositioni convenit.

8. Quemadmodum autem homo, cum habitu physico spectatus, in certo aliquo spatio existit, ita etiam ex habitu morali, quem hucusque declaravimus, oritur aliquod spatium morale, seu *status*, qui adeo perinde, ac ipsa dispositio, vel *naturalis*, in quo homines per naturam existunt, vel *adventitius*, in quo propria voluntate constituuntur, est. Quo loco id etiam notandum, *finem à Deo intentum,*

ac hinc *ortam humana naturæ dispositionem & statum* cohærere, ac sibi invicem subordinari, hinc res eodem recidit, sive illam, sive istam, sive hunc, pro fundamento juris naturalis habeas, quod vel ideò admonendum, ne quis, promiscuo illarum assertionum usu turbetur, vel iis, qui ita philosophantur, aliquam contradictionem vel variationem imputet.

9. Quod si præceptis naturalibus simul satisfacere nequeat, tum ex fundamento hætenus tradito, etiam eorum *Prærogativa* dijudicari debet, quæ res his fere regulis nititur, (1) leges Deum respicientes, præferuntur iis, quæ ad hominum officia pertinent (2) de prærogativa præceptorum Socialitatis & philautias, ex utriusque gradibus judicandum, sive ejusdem, sive utriusque generis præcepta inter se committantur (3) si philautia & socialitas æqualis, facto alterius collidatur, illius causa est potior (4) idem est, si sine facto fiat collisio (5) quod si Philautia & socialitas inæqualis committantur, habenda ratio, quæ potior. De cætero neutiquam existimandum, quasi vera hic sit præceptorum pugna, apparens saltem est, nam concursus & prærogativa alterius præcepti efficit, ne aliud, extra concursum utique alias obligaturum, hac vice obliget.

10. Hæ sunt partes juris naturalis *directivæ*, quod attinet *Sanctionem*, certum est, quod eadem fiat *pœnis & premiis naturalibus*, sed per *arbitraria premia* lex naturæ non sancitur, bene ta-

men per *pœnas arbitrarias*, quia Deus utique serio voluit, ut dictamina legis naturalis serventur, hinc clausulam pœnalem præceptis naturalibus cohærere, ac Imperantes ad pœnas imponendas obligare, Ratio satis videtur insinuaré, non tamen præcise pœnæ sunt imponendæ, multo minus earum determinatio ex ratione patet, quare & facultas definiendi pœnas, & jus aggratiandi Imperantibus prout Reipublicæ utilitas hoc exigit, competit, nec cum obligatione memorata pugnat.

II. Haëtenus de fundamento juris naturalis, quod maximè *nativum, verum, certum, adequatum ac evidens* esse, & in utroque statu, *integro & corrupto* locum habere, ex dictis constat, quid enim magis naturale, certum aut perspicuum esse potest, quam jus naturale ex *naturâ rectè explicata* eruere? De aliorum sententiis fatagit Autor in Op. Maj. l. 2. c. 3. quamvis omnes ad fundamentum præcise non pertineant. *Socialitatem* quod attinet, manifestum est, quod, qui ex eâ jus naturale repetunt, idem ex natura derivent, hinc etiam in explicatione fundamenti, à nobis socialitati aliquis locus relictus est. Interim philosophia, quæ eâdem, in demonstrando jure naturali, unice nititur, non placet, nam inadæquatè naturam humanam expendit, ipsam, etiam socialitatem non satis explicat ac probat, & vel inadæquate vel contorte, inde præcepta naturalia demonstrat. Quia tamen inter variam naturæ humanæ dis-

spo-

spositionem, quâ religiosa, sui amans ac socialis est, eique innexa præcepta naturalia, arcta est connexio mutuusque respectus, hinc iis, qui socialitatem velut jurarunt, nunquam deerit color, quo principii sui sufficientiam se persuadere posse, sibi videri queant

§. 10. Ist hæc porro præcepta etsi manifestam habeant utilitatem, tamen ut eandem vim legis obtineant, necessum est præsupponi, DEUM esse, & sua providentia omnia regere; eundemque mortalium generi injunxisse, ut ista rationis dictamina tanquam leges, ab ipso vi congeniti luminis promulgatas, observent. Alias enim possent ea quidem fortasse observari intuitu utilitatis, sicut quæ à medicis regendæ valetudini præscribuntur, non autem tanquam leges; quippe quæ necessario ponunt superiorem, & quidem talem, qui alterius gubernationem actu suscepit.

Observ. 80.

Ist hæc porro præcepta) Legis naturalis *Autor* est Deus, quod definitio nostra innuit. Ejus igitur existentia, imperium illudque actualiter exercendi voluntas, debet præsupponi, quæ omnia ab iis, qui contra atheos disputant, demonstrari solent, qua de re aliqua etiam ad *cap. seq.* dicenda erunt.

Observ. 81.

Alias enim possent) Si ab existentia Dei abstrahamus, certum est, quod dictamina antea rela-

ta, rationem legis non habeant, ea tamen, quæ homines ipsos respiciunt, non plane cessarent, utpote cum generis humani status & incolumitas, illa necessario exoptulet, & hoc forte tantum voluit Grotius *de J. B. P. in prolegom. §. II.* quamvis ille plerumque hoc nomine reprehendatur *vid. Ziegl. in not. ad d. §. II. Albert. Comp. Jur. natur. p. I. c. 3. §. 21.* Ex eo autem liquet, quod Atheus etiam suo modo jus naturæ asserere vel agnoscere queat.

§. II. Esse autem Deum legis naturalis auctorem, ex ratione naturali ita demonstratur, si præcise præsentī mortalium conditioni inhæreamus; non attendendo, an primæva conditio diversa ab hac fuerit, & unde ista mutatio provenerit. Cum natura hominis ita sit constituta, ut citra sociabilem vitam humanum genus incolume esse nequeat, hominisque animus notionum huc inservientium capax deprehendatur, & vero pateat, non solum genus humanum, uti aliæ creaturæ, originem suam DEO debere, sed & eundem istud utcunque jam constitutum providentiæ suæ moderamine complecti: inde consequitur, DEum velle, ut homo iis viribus, quas sibi præ brutis peculiare inesse sentit, ad naturæ suæ incolumitatem utatur, utque adeo à brutorum ex lege vita, humana vita sit distincta. Id quod cum aliter, quam servata

vata lege naturali , obtineri nequeat ; intelligitur quoque, à DEO obligatum hominem ad isthanc servandam, tanquam medium non ex arbitrio hominum inventum, ac ex eorum libidine mutabile, sed expresse ab ipso DEO huic fini procurando constitutum. Qui enim obligat ad finem, censetur quoque eundem obligasse ad usurpanda media fini necessaria. Sed & socialem vitam à DEO hominibus pro imperio injunctam esse, indicio est, quod in nullo præterea animante sensus religionis, aut metus Numinis deprehendatur, qui in animali ex lege intelligi non posse videtur. Abs quo generatur tener admodum sensus in animis hominum non plane corruptorum, quo convincuntur, in legem naturalem peccando offendi illum, cui in animos hominum imperium est, & qui metuendus sit, etiam ubi ab hominibus metus non impendet.

Observ. 82.

Esse autem Deum) Suppositâ Dei existentia, demonstratu non est difficile, quod Idem juris naturalis sit auctor, cum enim Ille non aliter quam ex naturâ, & in specie, ut generis humani Creator, cognoscatur, ac genus humanum, sine lege naturali, incolume esse nequeat, hinc facile colligitur, quod Idem, qui homines creavit, iis etiam legem naturalem observandam præscripserit, *vid. Observ. 77. n. 2.* Autoris demon-

monstratio primo quidem supponit, *ad naturam integram hic præcise non esse respiciendum*, quod verissimum, nam status integer & corruptus saltem differunt, quoad *perfectionem subiecti*, sed quoad *Autorem, juris naturalis constitutionem, fundamentum & principia cognoscendi*, nulla inter utrumque statum est differentia, hinc divina legis naturalis origo ostendi potest, si-
ve integram siue corruptam naturam suppo-
nas, aut abstrahendo ab hoc discrimine natu-
ram simpliciter intuearis.

Observ. 83.

Cum natura hominis ita sit constituta) Deinde de-
monstratio his partibus constat (1) genus hu-
manum sine legibus naturalibus, ac præcipuè
socialitatis, saluum esse nequit, (2) hominis
animus notionum huc inservientium capax
deprehenditur (3) genus humanum à Deo ha-
bet originem (4) Hic quoque illud providen-
tiæ suæ complectitur, (5) ejus conservationem
intendit, (6) in homine datur sensus religio-
nis aut metus Numinis divini. Ex quibus se-
quitur (8) Deum generi humano legem na-
turalem dedisse. Quæ omnia satis certa sunt,
quod si tamen propositionem tertiam, quar-
tam & quintam, primo loco colloques, deinde
primam iis addas, denique secundam sextæ
conjungas, tum demonstratio ordine planio-
ri magisque naturali, decurret, propositio-
nemque septimam liquidius exhibebit.

§. 12. Quod vulgo dicitur, isthanc legem natura notam esse, id non ita capiendum videtur, quasi in animis hominum jam nascentium inhæreant actuales & distinctæ propositiones circa agenda & fugienda: Sed partim quod illa per lumen rationis investigari possit, partim, quod saltem communia & præcipua capita legis naturalis ita plana & liquida sint, ut statim assensum inveniant, & ita animis inoleant, ut nunquam inde iterum deleri queant, utut forte homo impius ad sopiendas conscientia vellicationes eorundem sensum plane studeat extinguere. Quo nomine etiam in Sacris Literis cordibus hominum inscripta dicitur. Inde & cum à puero ex vitæ civilis disciplina eorundem sensu imbuiamur; & vero recordari non possimus id tempus, quando primum eadem hauserimus, non aliter de ea cognitione cogitamus, ac si illa nobis nascentibus jam adfuisset. Id quod cuilibet etiam circa linguam ipsi vernaculam contingit.

Observ. 84.

Quod vulgo dicitur) Tertio circa definitionem nostram spectandus est *modus promulgandi*, nimirum per *Rationem* lex naturalis promulgatur, quod non ita accipiendum, quasi notitia laudatæ legis sit *connata*, sed quod per rationem humanam, ex diligenti naturæ humanæ contem-

templatione, *acquiri* eadem possit, prout fundamentum illud *Observ. 78. 79.* pluribus exposuimus, nam mens humana naturâ rudis, ac notitia connata, non naturalis sed miraculosa est, sed miraculi asserendi heic nulla suppetit ratio, eo autem sine sufficiente causâ admissio, hominibus malè feriat aut fanaticis occasio præberetur, ægræ mentis deliria, notitiæ cujusdam connatæ prætextu, pro dictaminibus naturalibus venditandi *add. Op. Maj. l. 2. c. 3. §. 13. Cumberland disquis. de leg. natur. prolegom. §. 5. Thomas. J. J. D. l. 1. c. 2. §. 67.*

Observ. 85.

Quo nomine etiam in sacris literis) Vulgo tamen connata illa juris naturalis notitia, pietatis cujusdam specie blandiri, ac ideo probari solet, in ejusque confirmationem etiam adducitur *Rom. II. 15.* in quo Apostoli dicto urgent (1) vocem *Φύσις*, quæ externa principia excludat, i. *Cor. II. 14. Gal. II. 15. Eph. II. 3. Jud. v. 10.* (2) inscriptionis, quæ habitui acquisito opponatur *Jer. XXIV. 7. XXXI. 33. vid. Schertzer. System. Theol. Loc. 9. §. 12.* sed illa satis diluit Autor in *Op. Maj. d. l. 2. c. 3. §. 13. verb. quæ à plerisque*, ostendens, quod per inscriptionem, saltem indicetur, *certa ac liquida cognitio*, non autem *modus eam obtinendi.*

Observ. 86.

Inde & cum à puero) Originem contrariæ sententiæ hic non malè explicat Autor, nimirum *cognitio in primâ pueritiâ hausta*, apud incautos
noti-

notitiam connatam facile mentiri potest, id quod exemplo linguæ vernaculæ amplius intelligitur.

2. Hic definit philosophia Autoris, hinc cætera capita paucis addenda erunt. Quarto igitur ex nostra Partitione, spectandum est *subjectum legis naturalis*, sunt scilicet *omnes homines*, ceu definitio docuit. Ad bruta jus naturale non pertinet, vel enim penitus Ratione destituuntur, vel illâ saltem in eo gradu non gaudent, qui ad legis receptionem & admissionem requiritur, præterea hominum & brutorum aliquam esse quoad jura communionem, naturâ ipsa sancitam, illud quidem nullo idoneo indicio ostendi potest *add. l. 2. c. 3. §. 2. 3.*

3. Quinto *Objectum* quoque spectandum est. Constituunt illud, docente definitione, *actiones voluntaria, cum natura humanâ, à Deo & homine ad certum finem formatâ, necessario convenientes vel pugnantes*, vel prout alii ex sua hypothese loquuntur, *actiones, quæ cum natura sociali conveniunt aut pugnant*. Circa eas autem de principio moralitatis, controvertitur, sintne scilicet *ille actiones moraliter bonæ & malæ, quia lex naturalis eas præcepit & prohibuit, an quia jam per se, & sua natura, bonæ aut malæ sint, lex illas præceperit aut prohibuerit?* Posterius, adeoque moralitatem antecedentem, defendunt Scholastici eorumque affectæ, sed prius, atque ita moralitatem consequentem, præcipue asseruit Pufendorf *l. 1. c. 2. §. 6. l. 2. c. 3. §. 4.* eamque senten-

tentiam, in scriptis Eristicis, amplius defendit.

4. Verissima est posterior sententia, quia omnis moralitatis causa est lex, adeoque ante eam, moralitatem propriè dictam asserere haut licet, dissentientes sane nunquam aliam moralitatis causam probabunt, nam seposita lege, utilitatis quidem respectus, aliquid fieri vel omitti nonnunquam jubet, sed exinde moralis honestas aut turpitudine non resultat. Non obstat (1) *ex moralitate illa consequente sequi, quod Deus legem naturalem mutare, & contraria officia, v. gr. homicidium dolosum aut pactorum violationem, hominibus injungere queat*, nam id non sequitur, postquam enim Deo placuit formare hominem religiosum & socialem, non potuit aut potest sibi ipsi repugnare, eidemque officia naturæ contraria, injungere, sed hominem naturæ suæ convenienter obligare debet; Procedit igitur objectio in determinatione moralitatis mere liberâ, non vero hypotheticè necessariâ, *vid. Observ. 65. n. 2. 1.* (2) *esse igitur homicidium dolosum, adulterium, pactorum violationem, blasphemiam, actus indifferentes, si legem removeas, ita sane, sine ulla hæsitazione, dicendum, & id quidem, non tantum quoad actionis materiale (nam hoc etiam post legis prohibitionem, adeoque semper, indifferens manet) sed & formale vid. d. Observ. 65. n. 2. 2.* interim legis prohibitio hic nunquam cessat aut cessare potest, hinc actus illi, ob perpetuam
legis

legis prohibitionem, semper sunt illiciti. Quodsi autem supponas profanam hypothesin: *Deum non esse*, tum homicidium, adulterium, pactorum violatio similesve actus, non tantum per speculationem, sed & revera erunt indifferentia, de blasphemiâ autem, nulla tum poterit esse quæstio, quia negato Deo, illa est non ens, quamvis Zentgravius in *disquis. de jur. natur. art. 8. §. 11. p. 241.* contendat: *malum esse, Deum convitiis proscindere, si ne Deum quidem dari, vel maxime fingas*, Pufendorfio in *Vindic. Zentgrav. §. 13. p. 59.* adducto, eo nomine merito irrisus.

5. Sicut autem controversia illa in foro civili, aut circa determinandam actionum specialium moralitatem, nullum habet usum, sed ad prima moralitatis principia, rite cognoscenda, pertinet, ita facile etiam componi potest, si per moralitatem *antecedentem* intelligas actionum cum naturâ humana convenientiam vel pugnantiam, per *consequentem* vero, moralitatem proprie sic dictam, quæ ex legis, convenientiam vel pugnantiam illam secutæ, dispositione resultet.

6. Tandem sexto juris naturalis *effectus* etiam considerandus. Est scilicet *Obligatio*, & quidem (1) *universalis*, omnes homines obstringens (2) *exactissima*, internam etiam animi puritatem exigens (3) *immutabilis*, quia naturam humanam, haut mutatam, vel mutandam, tanquam fundamentum, præsupponit, non-

nunquam tamen homo ipse, cujus gratiâ obligatio introducta, fundamentum illud alterare valet, quo facta, obligatio cessat, quia extra illas circumstantias nunquam obtinuit (4) *Illustra sphaeram hujus vite duratura*, eo scilicet sensu, quod ejus neglectæ, post hanc vitam sit reddenda ratio, hoc uti religio christiana aperte docet, ita idem, sicut etiam primum & secundum, quod modo memoravimus, ex diligenti Legislatoris contemplatione, Ratio etiam sibi relicta, colligere valet *add. Observ. 5.*

7. Ex his adeò Definitio legis naturalis constitutivæ satis intelligi potest. Permissiva, *vid. Observ. 77. n. 3.* est *Decretum voluntatis divinæ, per rationem promulgatum, quo hominibus facultas moralis, actus cum natura humana necessario non convenientes vel pugnantes, suscipiendi, conceditur.* Quod si præcedentia capita, breviter etiam huc applicanda sint, occurrit (1) *fundamentum*, est itidem *natura humana*, dum enim ratio inquirat & eruit, quid cum illa necessariam habeat convenientiam vel pugnantiam, adeoque faciendum aut omittendum sit, eo ipso etiam cognoscit, quid naturæ indifferens, adeoque licitum existimari debeat (2) *Autor*, pro quo *Deus* itidem agnoscendus est (3) *promulgatio*, per *Rationem* lex permissiva quoque innotescit, juxta ea, quæ proximè *n. 1.* diximus (4) *subiectum*, ad omnes homines illa pertinet (5) *objectum*, sunt actiones indifferentes i. e. necessariæ, cum naturâ humanâ connexionem vel pugnantiam destitutæ,

tutæ, adeoque quamvis legis dispositionem recipere aptæ *vid. Observ. §. n. 2. 1.* denique (6) *Effectus*, sunt omnis generis *jura*, connata & adventitia, ut libertas, inviolabilitas, dominium, imperium aliaque, quæ ut plurimum arbitrio hominis mutari, ac actiones, quæ hæcenus legi permittenti suberant, obliganti subijci possunt.

§. 13. *Divisio officiorum*, quæ ex lege naturali homini incumbunt, commodissime videtur institui *secundum objecta*, erga quæ ista sunt exercenda. Quo intuitu illa in tres principales partes dispescuntur; quarum prima tradit, quomodo ex solo rectæ rationis dictamine quis sese debeat gerere *adversus DEUM*; altera, quomodo *adversus seipsum*, tertia, quomodo *adversus alios homines*. Quamquam autem primario & directe ea præcepta legis naturalis, quæ ad alios homines spectant, ex socialitate, quam fundamenti loco substravimus, deriventur: tamen etiam indirecte officia hominis erga DEUM, tanquam Creatorem, inde deduci possunt, quatenus ultimum firmamentum officiis erga alios homines, à religione & metu Numinis accedit, sic ut socialis quoque non esset homo, ni religione foret imbutus. Et quia sola ratio in religione ulterius progredi nequit, quam quousque illa inservit promovendæ tranquillitati & social-

G 2

cialitati hujus vitæ : nam prout religio salutem animarum procurat, ex peculiari revelatione divina provenit. Officia autem hominis erga seipsum ex religione & socialitate conjunctim promanant. Ideo enim quædam non pro absoluto suo lubitu homo circa seipsum disponere potest, partim ut cultor idoneus divini Numinis, partim ut commodum & utile membrum societatis humanæ esse queat.

Observ. 87.

Divisio officiorum) Tandem (III.) spectandum quoque est legis naturalis Argumentum *vid. Observ. 77. n. 1.* Autor illud recenset §. 13. b, plenius summam legis obligantis, occasione fundamenti declarandi, exhibuimus *Observ. 79.* cui inprimis ex *d. Observ. n. 10.* addenda clausula poenalis indefinita. Summa autem legis permissivæ hæc est : *jure tuo, si vis, utere.*

2. Generalia illa dictamina plures propositiones speciales comprehendunt, quæ dici solent *Conclusiones* ; de cætero distinguuntur (1) in præcepta *absoluta*, quæ ante factum, & *hypothetica*, quæ post illud obligant (2) in *affirmativa* seu *præcepta in specie*, quæ actiones voluntati imperantis convenientes jubent, & *negativa* seu *prohibitiones*, quæ repugnantes prohibent.

Observ. 88.

Quamquam autem primario) Censet autor etiam officia erga Deum, ex socialitate posse deduci,

ci, sed *indirecte*. Verum vel ex hac confessione patet, deductionem illam recte se non habere, demonstratio indirecta, nulla est demonstratio, vel saltem vitiosa & parum naturalis.

Observ. 89.

Quatenus ultimum firmamentum) Sed hæc demonstratio religionem subordinat socialitati, præterea illius usum secundarium saltem ostendit, hinc minus bona censi debet.

Observ. 90.

Et quia sola ratio in religione) Posito quod Ratio, in cognoscenda religione, intra sphæram hujus vitæ præcise subsistat, nec vitam futuram & salutem animarum intelligat, attamen illud falsum est, quod eam non aliter, quam ut vinculum vitæ socialis & civilis, cognoscat, nam hoc sane Ratio sibi relicta certissime intelligit, quod religio primario sit propter Deum, secundario vero vitæ socialis coagulum, cum igitur ex socialitate religio, quoad primarium usum, demonstrari nequeat, vitiosa censi debet demonstratio.

Observ. 91.

Officia autem hominis erga se ipsum) Si hæc officia ex religione & socialitate conjunctim promanant, ut hic dicitur, socialitatis insufficientia, vel proprio testimonio agnoscitur. Deinde verum quidem est, quod officia hominis erga seipsum, tam ex religiositate quam socialitate repeti queant, est enim inter fundamenta, & iis innexa juris naturalis præcepta arcta connexio, ut dictum

Obs. 79. n. n. attamen nulla apparet ratio, cur naturæ dispositio, quâ sui amans illa formata est, negligi, nec exinde laudata officia, demonstratione planissimâ & maximè naturali, repeti debeant;

2. Hæc intelligendæ legi naturali sufficere possunt, quo vero generalia moralitatis principia adæquate cognoscantur, etiam de *Lege positiva* agendum erit, secus ac Autori visum, qui de ea plane siluit. *vid. Observ. 76.* In genere est *lex, jure naturali præcepta ac prohibita confirmans, & permissa determinans.* Est eadem *divina & humana*, circa illam tria summatim considerata (1) *an* (2) *quid sit* (3) *quæ ejus præcepta*, de cætero legis illius consideratio ad Jurisprudentiam quoque pertinet, ne quicquam dissentiente Feldeno *in not. ad Grot. de I.B.P. l. 1. c. 1. §. 15 p. 34.*
3. Datur (I) Lex divina positiva, quia Deus in homines habet imperium, & in S. literis actum multa promulgavit, quæ ratio sibi relicta ignorat quæque adeo non possunt non esse arbitraria aut positiva. De veritate igitur legis hujus generaliter suppositæ dubitari nequit ab iis, qui auctoritatem S. literarum admittunt, quamvis una vel altera species ab hoc aut illo asserta ab alio in dubium vocari, salva illa auctoritate queat.
4. Quo autem (II) ejus indoles recte appareat, species primo investigandæ videntur. Solet lex divina positiva varie distingui, plerumque
divisio

divisio Grotii, qua in *universalem* & *particularem*, hæcque in *ceremonialem* & *forensem* dispescitur, probatur, sed illa insufficiens videtur. Potius igitur sic dicendum: lex divina positiva est vel *religiosa*, quæ cultum divinum directo respicit, vel *Politica*, quæ ad homines, in societate civili spectatos, pertinet.

5 Religiosa (1) à *materia* discernitur in *ceremonialem*, quæ modum colendi determinat, & *moralem*, quæ cultum ipsum dirigit (2) à *duratione*, in *temporalem*, qualis est ceremonialis *vid. Grot: de J. B. P. l. 1. c. 1 §. 16. n. 7. ibique Ziegler in not. & perpetuam*, qualis est moralis (3) à *subjecto*, in *particularem*, quæ Judæis, & *Universalem*, quæ omnib9 hominib9 data est, illius exemplum iterum est, Ceremonialis, licet alii id negent *vid. Thomas. J. J. D. l. 1. c. 2. §. 128.* hujus vero, *Moralis*.

6. Politica discernitur in *Universalem*, quæ omnibus hominibus data censetur, & *Particularem*, quæ in usum Reipublicæ Judaicæ, quamdiu illa cum peculiari suo habitu subsistere debuit, lata est. Prior à *duratione*, etiam *Perpetua*, posterior *temporalis* dici potest.

7. De legibus religiosis, nihil ulterius addimus, spectant enim ad Theologiam, dum ipsam religionem continent & dirigunt, Politicas vero juxta species modo relatas, distinctius paululum considerabimus. *Universalis est decretum voluntatis divina, expresse promulgatum, quo Deus*

omnes homines intuitu actionum indifferentium, exactissime obligat, vel iis licite quid agendi, jus concedit. Ejus Autor est Deus: Promulgatio, sub initium generis humani, Adamo & Noacho facta censetur, minimè vero tertia vice per Christum, ceu contendit Grotius de J. B. P. l. 2. c. 1. §. 15. Illius subjectum sunt omnes homines. Fundamentum est liberrimum Dei beneplacitum, hinc etiam voluntaria vel arbitraria dicitur: Materia sunt actiones indifferentes. Effectus jus & obligatio, quæ universalis, exactissima, ultra sphæram hujus duratura, sed non immutabilis, hinc Deus de lege universali, quoad Judæos dispensasse censetur.

8. *Particularis est decretum voluntatis divinæ expresse promulgatum, quo Deus solos Judæos, intuitu actionum indifferentium exactissimè obligavit, vel iis jus aliquod concessit. Quæ de Autore, Fundamento & Materia proxime diximus, illa huc etiam pertinent. Promulgatio vero per Moysen facta est: subjectum sunt soli Judæi, ac Effectus, Jus & obligatio particularis. Dicitur alias, prout hic supponitur, lex forensis; Quoad Judæos, adventu Messiae, illa desit, alias vero Gentes nunquam obligavit, hinc hodie idem ejus usus est, qui cujusvis rei historicæ, ut pro lubitu scilicet aliquid inde in utilitatem propriam vertere queamus add. Grot. d. c. 1. §. 16. 17.*
9. *Posthæc dispiciendum (III) de argumento legis divinæ positivæ, in qua tractatione. hoc agendum, quo juxta certa quædam indicia, legis*

gis universalis & Particularis dictamina distinguantur. Quæ vulgo dari soleant *κρίτηρια*, refert Ziegl: *ad Grot. l. 1. c. 2. §. 6.* sed iis non valde profeceris, nobis sic breviter videtur: Primo dispiciendum, an præceptum aliquod in S. Codice occurrens, sit *naturale* an *positivum*, quæ quidem dijudicatio non aliunde, quam ex solidâ legum naturalium cognitione, dependet. Si constet, positivum esse, tum inquirendum, an *universale* an *particulare* sit, cui dijudicando has regulas inservire arbitramur (1) *regulariter omnes leges à Mose propositæ, censendæ sunt particulares*, quia Populus judaicus peculiarem constituit civitatem, cui adeo soli de legibus Deus prospicere voluit (2) *tum vero universales erunt, si vel ante rempublicam judaicam datas esse appareat, vel Deus Gentiles, ob earum transgressiones, se punivisse profiteatur.* Universalitas igitur semper est probanda, pro particularitate vero præsumitur.

10. Juxta hæc igitur præcepta universalia politica sunt (1) *lex poenalis de homicida capitaliter puniendo Gen. IX. 6.* (2) *dispositio, qua marito imperium in uxorem conceditur Gen. III. 16. I. Cor. XI. 3.* (3) *leges connubiales Lev. XVIII.* (4) *Prohibitio Polygamix Gen. II. 22. 23. I. Cor. VII. 2. seqq. I. Timoth. III. 2.* (5) *Prohibitio divortiorum Gen. II. 23.* Plures leges universales asseri, cum aliqua veri specie, non posse videntur, hinc reliquas omnes, quæ in S. Codice occurrunt, si naturales non sint, pro particularibus habemus,

mus, quas adeo prolixè commemorare opus non est.

11. Sunt, qui lege positiva universali divina (1) consensum parentum, ad nuptias liberorum, sub pœna nullitatis requiri, (2) eadem etiam hierologiam in nuptiis exigi censeant, quemadmodum (3) solutionem decimarum illâ præcipi, ac (4) esum sanguinis vetari, denique (5) delicta carnis, ut adulterium, incestum & sodomiam eâdem puniri arbitrantur, sed illa sine rationibus verisimilibus asseri puto.

12. Quod si diversas illas legum divinarum species inter se compares; tum facile liquet, quousque illæ vel convenient, vel differant. Nimirum lex naturalis & positiva universalis conveniunt (1) quoad Autorem (2) subjectum (3) rigorem obligandi. Differunt (1) quoad promulgationem (2) objectum & (3) obligationis immutabilitatem. Positiva particularis autem, saltem convenit cum naturali, quoad (1) Autorem & (2) obligandi rigorem, in cæteris ab eâ differt. Denique in quibus lex positiva universalis & Particularis convenient aut differant, ex n. 8. apparet.

13. Hæc receptior hodie, de lege divina positiva, est sententia; Et in primis Grotius primus fere, legem divinam positivam universalem asseruit, cum antea, sub nomine legis moralis, cum jure naturali, fuerit illa confusa. Ejus veritatem professo studio se esse demonstraturum

rum promisit Kulpis *Colleg. Grot. exerc. 4. §. 6. lit. R.* sed non præstitit. Dn. Thomafius autem ejus dictamina copiosius *Institutionibus suis Jurisprudentiæ divinæ* inseruit. Cæterum sicut legis particularis, nulla est hodie autoritas, ita universalem negavit iterum Brücknerus in *Cons. matrim. in procem. n. 26. seqq.* nec videtur plane improbabile, si dictamina, quæ hoc nomine laudantur, vel omnino negemus, vel ad jus naturale referamus.

14. Postea etiam de *lege Humana* quædam dicenda erunt. Solet illa à nonnullis distingui in *Universalem* seu *Gentium* & *Particularem* seu *Civilem*. Verum si, prout par est, per illam intelligas *legem humanam positivam universalem vel omnes, vel saltem* (largiamur enim hoc legis hujus Patronis) *moratiores gentes obligantem, ac à lege naturali & civili distinctam*, tum eadem rectius negatur, quia non occurrit Legislatores, hinc negata causa meritò negatur effectus, nunquam enim vel omnes vel moratiores Gentes, conditâ civitate, alicui Imperanti se submiserunt, à quo lex aliqua universalis, diversa Gentes propriâ vi obligatura, proficisci potuerit.

15. Interim multi cum Grotio jus Gentium asserunt, quo fine urgentur (1) *definitio vid. Grot. l. 1. c. 1. §. 14.* verum illa nihil probat, cum etiam non entia fingi & definiri queant, hinc non sufficit dixisse, *jus Gentium voluntate multarum Gentium, vim obligandi accepisse*, sed ostendendum

dum est, quomodo negato Legislatore, & stante Gentium æqualitate, id fieri queat, quod sane nunquam ostendetur (2) *exempla variorum preceptorum*, quæ ad illud jus referri debeant.

16. Verum terminorum ambiguitate luditur, nam aliquando per jus Gentium intelligitur (1) *facultas moralis* ex lege naturali resultans (2) *ipsa lex naturalis*, aut in specie (3) *lex naturalis hypothetica*, quæ pacta Gentium expressa vel tacita similiaque facta dirigit, aliquando (4) *lex civilis nonnullarum Gentium*, quæ saltem subditos ex voluntate Imperantis obligat, in diversis tamen civitatibus obtinet, ipsas vero Gentes nequaquam obstringit, eo pertinet servitus Romanorum, nam hanc revera ex lege civili, sed nonnullarum Gentium esse, recte attendentibus facile intelligitur (5) *consuetudo Gentium illicita*, quo spectat immanitas bellica, quæ limites humanitatis excedit ac ultra modum grassatur, ea Grotio *jus Gentium externum* dicitur, qui summus hujus nominis est abusus, facta enim, quæ legibus divinis contraria sunt, jus seu legem efficere non possunt, utut feroces & ambitiosæ Gentes, jure se ita agere, videri velint (6) *consuetudo licita*, quo referenda solennes bellorum indictiones, missiones Legatorum, quatenus jure naturali non præcipiuntur, usus certorum armorum & similia, atque hæc consuetudo in terminis nudi moris semper subsistit, nec unquam, propter defectum communis Imperantis, in legem pro-

propriè dictam, evalescere potest. Denique (7) *pactum tacitum* vel etiam *expressum*, sed hoc ex lege naturali vim suam sortitur, proprie autem lex non est, multo minus in genere & propria virtute obligat. Licet igitur jus Gentium juxta sensus memoratos admittamus, eo tamen, de quo unicè quæritur, illud non occurrere manifestum est *conf.* Pufendorf, l. 2. c. 3. §. 23.

17. Juxta hæc igitur lex humana tantum *particularis* seu *civilis* est, nam de hujus (I) *Veritate* dubitari nequit, cum, constitutis civitatibus, detur Imperans, à cujus imperio eadem proficisci queat. Est igitur (II) *Decretum voluntatis, signis arbitrariis declaratum, quo Imperans suæ civitatis subditos obligat, vel iis jus, aliquid licite agendi, concedit.*

18. Ejus *Autor* est Imperans, cui ob pactum fundamentale, imperium per legem naturalem legitimè est quæsitum. *Promulgatio* fit per signa arbitraria, facta scilicet & præcipue, verba. *Fundamentum* est utilitas Civitatis, legibus divinis consentanea. *Subjectum* sunt subditi, non ipse Imperans, quamvis ultro legibus propriis uti queat, imo nonnunquam ex regulis prudentiæ aut præscripto juris naturalis, eas observare teneatur. *Materia* sunt actiones possibiles & licitæ, si presse lex civilis accipiatur, nam aliàs illa etiam confirmat, quæ jure divino jam sunt constituta, id quod distinctius l. 2. c. 12. exponendum erit. *Effectus* est
jus

jus & obligatio, illud ex lege permittente, hæc obligante descendit, de cætero nec universalis, nec exactissima, nec immutabilis est, nec ultra sphæram hujus vitæ, propriâ virtute durat. An autem leges injustæ vim obligandi habeant, vel saltem executores à peccato absolvant, peculiaris quæstio est, quam l. 2, c. 12. §. 9. excutiemus.

19. Divisio legis humanæ varia est, nam præter communem illam, qua in *permittentem* & *obligantem* discernitur, poterit (1) à *diversa promulgatione* distingui, in *Expressam* & *Tacitam*, illa pro diversitate status publici, varias potest habere species, *constitutionem Principis*, *SCtum* vel *Plebiscitum*, Hæc *consuetudo* dicitur, quo nomine tamen etiam alia significantur & rarò, si calculus recte subducatur, consuetudo seu lex tacita revera adest (2) à *subjecto*, in *Generalem* & *specialem* 3) à *fundamento*, in *justam* & *injustam*, ut & *prudentem* & *imprudentem*, equidem injusta & imprudens lex, nomen legis proprie non meretur, quia tamen in vita civili, earum conditio sæpe dubia est, ideo hætenus inter species legum, locus aliquis iis relinqui potest (4) à *materia* in *humanam ratione autoritatis tantum*, quæ leges divinas obligantes confirmat, & *originis ac autoritatis simul*, quæ permissa, pro Reipublicæ utilitate, determinat, hæc, exquisitè loquendo, humana est, illa vero divina, humanâ saltem autoritate confirmata.

20. Quod si leges humanas in sensu latiori, pro complexu scilicet legum in civitate valentium, cujuscunque demum sint originis, supponas, tum in *Publicas*, quæ statum reipublicæ, & *privatas*, quæ res privatas concernunt, distinguuntur, utræque à specialibus objectis, novas sortiuntur denominationes, ut *civiles*, *feudales* aut *Ecclesiasticæ* audiant. Omnia illa ex habitu Rerum publicarum & imperii civilis resultant, ac adeo omnibus Gentibus sunt communia, nisi quod nonnunquam speciale objectum & hinc orta peculiaris legum denominatio in aliqua civitate occurrat, quæ alibi non reperiat. Quod si adeò memoratæ divisiones in certa aliqua Jurisprudencia particulari, v. gr. Romana, proponantur, non ideo existimandum est, quasi isti Genti & Civitati sint propriæ, earumque cognitio unice inde dependeat, quæ Legulejorum solet esse sententia.
21. Quod attinet (III) *argumentum legum humanarum, latius suppositarum*, occurrunt in civitatibus partim (1) *leges pure divinæ*, auctoritate saltem humanâ confirmatæ, quod in primis quoad leges publicas & fundamentales deprehenditur, partim (2) *leges merè humanæ*, quæ tam quoad partem definitivam quam vindictivam, unice ab imperio civili dependent, partim (3) *leges mixtæ*, ubi pars definitiva est à voluntate divina, sed sanctio poenalis ab imperio humano, quæ omnia, intuitu certæ alicujus Reipu.

Reipublicæ, specialius persequitur Jurisprudentia particularis.

22. Sic igitur hætenus Autor de *actiōe humana, lege, rebus moralibus conscientia, virtutibus ac Vitiis* egit, licet non satis adæquate, quo fine supplementa aliqua exhibuimus, nec ordine satis naturali, quem tamen hætenus mutare non licuit. Explicanda nunc esset in parte præliminari, *interpretatio & applicatio vid. prolegom. §. 25.* sed uti hanc nullibi attigit Autor, ita illam ad *cap. ult. l. 1.* rejecit, quare nobis etiam utriusque explicatio ad illum locum differenda erit, hoc tamen hic paucis monendum, aliam esse interpretationem *legum naturalium*, aliam *positivarum similiumque actuum signis arbitrariis declaratorum*, illa nihil aliud est, quam actus mentis humanæ, quo veritatem & præcepta legis naturalis, ex diligenti naturæ humanæ contemplatione eruit, secundum ea, quæ hoc capite circa legem illam diximus, de qua adeo nihil amplius dicendum, cum ex consuetis ratiocinandi principiis profluat. Hæc vero etiam quidem ratiocinationis species est, sed cum voluntatem ex signis externis aliisque circumstantiis colligere debeat, hætenus seorsim expendi debet, quo circumstantiis, voluntatem significantibus, animus affuescat, easque observare discat.

23. Transeundum itaque est ad partem principalem, quæ argumentum legum divinarum
exhi-

bet *vid.* Prolegom. §. 26. Hanc Autor ita instruxit, ut ordo quidem non plane improbandus sit, sed tamen ille in multis deficiat, qua in re nihil nobis jam mutare licet.

CAPUT IV.

DE

OFFICIO HOMINIS ERGA DEUM, SEU, DE RELIGIONE NATURALI.

§. I.

Officium hominis erga *DEUM*, quantum quidem ex naturali ratione investigari potest, *duabus partibus* absolvi-
tur: tum ut de *DEO* recte sentiamus, tum ut actiones nostras ad ipsius voluntatem componamus. Inde religio naturalis constat propositionibus tum *theoreticis*, tum *practicis*.

Observ. 92.

Officium hominis erga Deum) Primo loco distinctius expendendum venit *præceptum de Deo colendo*, quod commodissime fiet, si ipsum cultum in se spectemus, nam tum etiam præcepta specialia, pro ratione actuum variorum, formari possunt. In genere cultus notat *complexum actionum Deo debitarum*, & dicitur alias *Religio*; quæ

H

quæ intuitu obligationis , à qua dependet & dirigitur , est vel *revelata*, vel *naturalis* , quæ hujus loci est, & summatim constat (1) *notitia Dei* (2) *cultu strictè dicto* §. 1. *h. vid.* Hobbes. *de civ. c. 15.* Thomas. *7. 7. D. l. 1. c. 5. §. 30.*

§. 2. Inter ea, quæ de *DEO* cuivis homini sentienda sunt, primum omnium est, ut certo persuasus sit, *DEUM* *existere*, i. e. *revera* dari summum aliquod & primum Ens, abs quo hoc universum dependeat. Id quod sapientes ex subordinatione causarum, quæ demum in primo aliquo sisti volunt, ex motu, & ex contemplatione machinæ hujus universi, & similibus argumentis, liquidissimo demonstrarunt. Quæ si quis neget abs se capi posse, non ideo atheismi sui excusationem invenit. Cum enim universum genus humanum in perpetua velut possessione istius persuasionis fuerit; necessum erat, si quis eandem oppugnare velit, ut non solum omnia argumenta, quibus *DEUS* esse probatur, solide destruat, sed & plausibiliores rationes pro assertionem sua proferat. Simulque cum generis humani salutem ea persuasionem contineri hætenus creditum sit, ostendendum ipsi præterea fuerit, generi humano per atheismum melius consuli, quam retento sano cultu Numinis. Quod cum fieri nullo modo queat, omnium eorum, qui ist-

hanc

hanc convellere quocunque modo aggrediuntur, impietas maxime est detestanda, & gravissimis poënis coërcenda.

Observ. 93.

Inter ea, quæ de Deo) Naturalis notitiæ de Deo hæc fere sunt capita (1) *Deum existere.* Existentiam vulgo probant, per principia tum *interna*, provocantes ad conceptum de Deo, quem unicuique insitum dicunt, quem tamen alii negant, tum *externa*, quæ desumuntur (1) à creatione & conservatione, vel creaturarum in genere, vel in specie humani generis §. 2. *b.* (2) omnium gentium consensu *vid.* Albert: *Comp. Jur. nat. p. 2. c. 1. §. 2.* Grot. *de V. R. C. l. 1. per tot.* quæ demonstratio, Scholasticorum stilo, *via causalitatis* dicitur ac priori præstat, de cætero una saltem est, nam consensus Gentium, non tam nova probatio est, quam potius demonstrationis, ex natura desumptæ, agnitio. Licet vero universa mundi machina, Autorem aliquem liquido satis arguat, adeoque ratio humana de Ejus *existentiâ* satis persuasa sit, attamen *modum existendi & creaturæ productionem*, sibi relicta non intelligit.

Observ. 94.

Quæ si quis neget abs se capi posse) Qui notitiam illam negat, Atheus dicitur, qui atheismum & *veriolem*, & generi humano *utiliorem* probare debet; si quidem non tantum excusationem

invenire, quod Autor dicit, sed & atheismum religioni præferri, velit.

Observ. 95.

Quodcum fieri nullo modo queat) Hæc ex præcedentibus non penitus sequuntur, detestabilem esse atheismum concedi debet, sed ideo gravissimis poenis eum coërcendum esse, non sequitur, vi & poenis notitia Dei nemini invito ingeri potest: Errantis poena est doceri, exitus Deo est commendandus.

§. 3. Alterum est, *DEUM esse universi boni conditorem*. Cum enim ex ratione manifestum sit, isthæc omnia non extitisse à se-ipsis, oportet ut eadem summam aliquam causam habeant. Quæ ipsa est id, quod *DEUM* appellamus. Ex quo consequitur, falli eos, qui subinde *Naturam*, tanquam ultimam omnium rerum & effectuum causam, crepant. Nam si per id vocabulum intelligitur efficacia illa & vis agendi, quæ in rebus conspicitur, illa ipsa utique autorem sui, i. e. *DEUM* arguit: tantum abest, ut ejus vis ad negandum *DEUM* quid valere possit. Sin autem per *Naturam* intelligatur summa rerum omnium causa, ex profano quodam fastidio defugitur plana & recepta DEI adpellatio. Errant quoque illi, qui credunt *DEUM* esse aliquid eorum, quæ in sensus incurrant, & præcipue *sidera*. Nam hæc

hæc omnia substantia ipforum arguit, non esse primum aliquod, sed ab alio ortum. Nec minus indigne de DEO sentiunt, qui eum *mundi animam* dicunt. Anima enim mundi, qualiscunque illa demum sit, partem mundi notat: pars autem rei quomodo ejusdem causa, i. e. prius aliquid esse potuit? Quod si autem per animam mundi intelligatur primum illud & invisibile, à quo omnium rerum vis & motus dependet, pro plano vocabulo, obscurum & figuratum nomen substituitur. Ex hoc ipso quoque adparet, *mundum non esse æternum*. Id enim abhorret a natura ejus, quod causam habet. Et qui mundum æternum asserit, aliquam ejus causam negat, & sic ipsum DEUM negat.

Observ. 96.

Alterum est) Ad notitiam naturalem pertinet (II) *Deum hujus universi esse conditorem* §. 3. *h.* quod quidem eadem, qua caput præcedens, demonstratione nititur, cum enim Deum non aliter, quam ex naturâ, cognoscamus, hinc eodem argumento edocemur, & Deum existere, & hoc universum condidisse.

Observ. 97.

Ex quo consequitur, falli eos) Qui naturam omnium rerum ultimam causam crepant, eos vel in terminis ludere, vel Deum negare, Autor ostendit. De cætero cum tanta sit Rationis

humanæ imbecillitas , ut universum Naturæ ambitum emetiri illa non valeat , hinc iis , qui bona fide , sine malitiâ , dubitant , proterve insultandum non erit , illud certum videtur , quod ingenua imbecillitatis humanæ agnitio , heic præstet tumidâ Scholasticorum sapientia , qui , licet nihil intelligant , sed ut plurimum inania verba fundant , tamen res , divinas , ad minutissimos usque apices se intelligere , videri volunt.

Observ. 98.

Errant quoque illi) Deum non esse aliquid eorum , quæ in sensus incurrunt , Ratio hominis satis intelligere videtur , nam si certam aliquam rem , in sensus incurrentem , pro Deo habere velit , nullam inveniet causam , quare non eodem jure , alii , Deitatem tribuere possit , quo ipso sententiæ falsitas patet. De cætero qui Deum sensualem asserunt , illi quidem seriam , de Dei existentia , persuasionem habere possunt , quia tamen talis reverâ non occurrit , ideo & ista doctrina in atheismum desinere videtur , nisi malis dicere , sub falso saltem conceptu , ens aliquod incomprehensibile , reverâ asseri.

Observ. 99.

Nec minus indigne de Deo sentiunt) Circa hanc & sequentem sententiam , repetenda , ea quæ *Observ. 97.* dixi. Peculiaris etiam quæstio est , *an mundus sit infinitus ?* quæ licet forte non rectè asse-

asseratur, attamen Ratio hominis, terminos vel fines ei assignare nequit.

§. 4. Tertium est, *DEUM tum in universum mundum, tum in genus humanum regimen exercere.* Id quod ex admirabili & constanti ordine, qui in hoc universo cernitur, liquido adparer. Quoad effectum autem moralem perinde est, utrum quis neget, DEUM existere, an ab eodem humana curari; cum utrumque omnem religionem plane tollat. Frustra enim metuitur aut colitur, ut ut in se sit præstantissimus, qui nulla plane nostri cura tangitur, & nihil boni malique in nos vult, aut potest conferre.

Observ. 100.

Tertium est) Ulterius ad notitiam naturalem spectat (III) *Deum in hoc universum regimen exercere* §. 4. b. quod itidem eadem, quæ præcedentia capita, probatione ostenditur, nam cum Deum non aliter, quam ex natura intelligamus, hinc & Deum existere, & esse universi hujus Autorem & Governatorem, eadem ratione cognoscimus.

Observ. 101.

Quoad effectum autem moralem) Sicut ineptum est, Deum asserere, & tamen ejus providentiam negare, cum hac ratione, juxta conceptus pueriles, vel ludibundi pictoris, Numen repræsentetur, ita ista doctrina, quoad effe-

Etum, cum Dei negatione coincidit, quod quoad alias sententias falsas, providentiam divinam tamen non negantes, secus est.

§. 5. Quartum est, *nullum attributum in DEUM cadere, quod aliquam imperfectionem involvat.* Cum enim ille omnium rerum causa sit & origo, absurdum foret, creaturam ipsius aliquam sibi posse perfectionem animo concipere, quæ abs DEO abesset. Imo cum istius perfectio infinitis modis exsuperet caput tantillæ creaturæ, eandem terminis potius negativis, quam positivis, exprimere par erit. Inde DEO haut quaquam sunt tribuenda, quæ *finitum aut determinatum*, quid notant: quia finito majus semper attribui potest. Et omnis determinatio ac figura terminos ac circumscriptionem involvit. Quin nec dicendus est distincte & plene comprehendere aut *concipi nostra imaginatione*, vel quacunque facultate animæ nostræ; quia quicquid animo distincte & plene concipere valemus, id finitum est. Neque vero ideo, quia DEUM infinitum dicimus, ejus conceptum plenum animo tenemus: cum infinitum proprie non notet aliquid in ipsa re, sed impotentiam in animo nostro: ac si diceremus, non capere nos magnitudinem ejus essentiae. Inde nec recte dicitur, quod *partes habeat*, aut sit *totum* aliquid;

quod ; quia hæc attributa finitorum sunt: neque quod *in loco* aliquo contineatur ; quia hoc innuit fines & terminos magnitudinis : neque quod *moveatur* aut *quiescat* ; utrumq; enim supponit esse in loco. Sic nec Deo proprie attribui possunt, quæ *dolorem* aliquem aut *passionem* notant, (*proprie* dico ; nam ubi talia Deo attributa leguntur, id fit *ἀνθρώπων ἰσχύος* pro effectû, non affectu) ut est ira, poenitentia, misericordia. Item, quæ *egestatem* & *absentiam* alicujus boni notant, ut est adpetitus, spes, concupiscentia, amor cupidinis. Nam hæc involvunt indigentiam adeoque & imperfectionem : cum intelligi non possit, ut quis adpetat, speret, cupiatve, nisi quibus indiget, carereve. Sic & quando Deo tribuitur *intellectus* ; *voluntas*, *scientia*, & *actus sensuum* visio, auditio, illa longe sublimiori modo sunt capienda, quàm quo nobis insunt. Nam voluntas est adpetitus rationalis : appetitus autem præsupponit absentiam & indigentiam rei congruentis. Et intellectio ac sensus in hominibus involvit passionem, per objecta in organa corporis & potentias animæ impressam ; quod est indicium potentiae ab illo dependentis & consequenter non perfectissimæ. Denique & illud à perfectione divina abhorret, si dicantur *plures uno Dii*. Nam præterquam quod admiranda mun-

di harmonia unum duntaxat ejus moderato-
rem arguit, etiam finitus tunc foret Deus, si
plures essent paris potestatis ab ipso non de-
pendentes. Sic ut contradictionem involvat,
plura dari infinita. Quæ cum ita sint, maxi-
me rationi congruum est, circa attributa DEI
utcunque exprimenda uti nominibus vel *ne-*
gativis, ut infinitus, incomprehensibilis, im-
mensus, æternus, i. e. principio & fine carens:
vel *superlativis*, ut optimus, maximus, poten-
tissimus, sapientissimus, &c. vel *indefinitis*, ut
bonus, justus, creator, rex, dominus, &c. eo
sensu, ut non tam velimus, quid sit, distinctè
dicere, quam nostram admirationem & obe-
dientiam qualicunque expressione profiteri;
quod est signum animi humilis, & animi ho-
norantis quantum potest.

Observ. 102.

Quartum est) Denique notitiæ naturalis caput
est (IV) *Deum esse aliquod ens plane diversum ab*
ais quæ sensibus & intellectu nostro comprehendi pos-
sunt §. 4. n. Pertinet hoc ad Dei *essentiam*, sicut
autem mens humana, circa *modum existentia*
divina coëcutit, ita circa *essentiam Dei* nihil et-
iam illa positive intelligit, hoc quidem recte
asserit, Deum esse aliquod *Ens rationale*, sed de
substantia rationali aut cogitante, nullum
conceptum positivum habet. Scholastici a-
liàs *Essentiam divinam* duplici via, *negationis*
scili-

scilicet & *eminentia* (nam via *causalitatis*, quæ insuper laudari solet, ad existentiam Dei pertinet) repræsentare solent, quam methodum exagitat *Dn. Thomas. 7. 7. D. l. i. c. 3. §. 54. seqq.* Interim Autor in effectu duplicem illam viam hic quoque agnoscit, nec improbari illa potest, si eò saltem referatur, ut per eam, non quid Deus sit, sed quid non sit, cognoscere nos posse dicamus.

Observ. 103.

Deniq; & illud) Plures Deos ratio asserero nequit, hæc enim assertio liquidã Dei cognitionẽ præsupponit, qualis in mête humana nõ occurrit. An vero Gentiles prudentiores plures Deos revera asseruerint, ac vulgari superstitioni sese hac in parte attemperaverint, an vero ejusdem Numinis diversas virtutes & operationes, diversis saltem nominib9 insigniverint, illud aliis indagandum & expediendum relinquimus.

Observ. 104.

Quæ cum ita sint) Egregium est hoc monitum, omnem scilicet de Deo Philosophiam, ita esse adornandam, ut illa non tumidam aliquam sapientiam præ se ferat, sed imbecillitatem mentis humanæ ingenue agnoscat ac divinitatis incomprehensibilitatem admiretur, contra quod philosophia Scholasticorum valde impingit.

2. Notitiæ de Deo opponitur (1) *falsa de Deo sententia*, quæ seriò quidem Deum agnoscit, sed con.

conceptus falsus, ac ex ratione refutandos, de eodem fovet (2) *atheismus theoreticus*, qui Dei existentiam negat, ac in *apertum*, qui diserte Deum inficiatur, & *obliquum*, qui implicite & oblique Deum removet, distinguitur, cujus exempla Autor in §. §. *preced.* adduxit; Eo scilicet pertinet doctrina, quæ (1) naturam ultimam rerum causam dicit, (2) Deum mundi animam (3) mundum æternum asserit (4) providentiam divinam negat *add.* Hobbes. *de civ. c. 15. §. 14.* (5) fatum Stoicum comminiscitur *vid.* Thomas. *7. 7. D. l. 1. c. 3. §. 87.* & si quæ alia ejus generis dogmata occurrunt. De cætero impossibile est, ut atheismus ita existat, ut quis liquido persuasus sit, Deum non existere, ut vero mens humana, rerum harum difficultate velut oppressa & desperabunda, rem in medio relinquat, id possibile est.

3. Quando igitur Homo, ex natura, istam de Deo notitiam est consecutus, tum facile quoque intelligit, se per legem naturalem obligari ad illam conservandam, ac ei oppositum atheismum vitandum, ex quo liquet, hunc non tantum esse peccatum imprudentiæ ceu contendit Hobbes. *de civ. c. 14. §. 19.* sed & injustitiæ, repugnat enim idem obligationi naturali.

§. 6. Propositiones *practica* religionis naturalis versantur partim *circa internum*, partim *circa externum cultum Dei. Internus cultus Dei*

Dei consistit in ejus *honore*. Honor autem est opinio alienæ potentiae conjunctæ cum bonitate. Debet scilicet animus hominis ex consideratione potentiae & bonitatis Dei quantum potest animo venerationem adversus ipsum concipere. Ex quo fluit, ut eundem debeat *amare*, tanquam omnis boni autorem & datorem; in eum *sperare*, tanquam abs quo in futurum quoque omnis nostra felicitas dependeat; ejus voluntate *adquiescere*, tanquam qui pro sua bonitate omnia optime faciat, nobisque det, quæ maxime expediunt; eum *timere*, tanquam potentissimum, & cujus offensa maximum sit malum conciliare apta; ei denique in omnibus humillime *obsequi* tanquam creatori, domino ac rectori optimo maximo.

Observ. 105.

Propositiones practicæ) Sub religione naturali deinde continetur Cultus strictè dictus *vid. Obs. 92.* quem Autor §. 6. 7. tam quoad actus internos, quàm externos declarat, *add. infra l. 2. c. 14. §. 11. Op. Maj. l. 8. c. 4. §. 13. Hobbes. de civ. c. 15. §. 9.* hinc summatim ita dicendum: Cultus est vel *internus* vel *externus*, hic vel *indirectus*, qui legum; homines respicientium, observantia, Deo exhibetur, vel *directus*, qui Deum directo respicit, ac iterum vel *omissione contemptus externi*, vel *susceptione actuum honorificorum* constat.

2, Qvoul.

2. Quousque autem lex naturalis cultum memoratum jubeat, deinceps videndum, breviter: jubet cultum internum, nec non externum indirectum, porro directum, quatenus omissione contentus externi absolvitur, non vero quatenus susceptione actuum honorificorum constat, sed hic cultus saltem jure naturali licitus censi debet *vid. Thomas. 7. 7. D. l. i. c. 5. §. II.* licet Autor contrarium velut de plano supponat.

§. 7. *Externus Dei cultus* in hisce potissimum consistit, ut homo Deo *gratias agat* pro tot bonis ab eo acceptis. Ut ipsius voluntatem per actiones suas, quantum fieri potest, exprimat, seu ei *obtemperet*. Ut ejus magnitudinem *admiretur & celebret*. Ut *preces* ad ipsum *fundat* pro obtinendis bonis & averruncandis malis; preces enim sunt signa spei, spes vero bonitatis & potentiae divinae agnitio est. Ut si res tulerit per solum Deum *juret & juramentum religiosissime observet*, hoc enim postulat omniscientia & potentia Dei. Ut de Deo *considerate loquatur*: id enim est signum timoris; timor autem potentiae confessio est. Ex quo consequitur, *non esse utendum Dei nomine temere & frustra*; utrumque enim inconsideratum. *Non esse jurandum, ubi non est opus*; est enim frustra. *Non esse curiose & petulanter disputandum circa naturam*
& gu.

& gubernationem Dei : ex hoc enim nihil aliud sequitur, quam ut Deum exigere velimus ad modulum nostræ rationis. Item ut *quicquid Deo præstandum est, in suo genere sit eximium, & honorem exprimere aptum*. Item, ut *homo Deum non solum secreto, sed & palam & publice in conspectu hominum colat*. Occultare enim aliquid est, quasi quis eo exercendo erubesceret. Contra publicus cultus non solum de nostra devotione testatur, sed & alios exemplo incitat. Denique ut *summo conatu leges naturales observet*. Nam uti imperium Dei parvipendere superat omnes contumelias; ita è contrario omnibus sacrificiis est acceptior obedientia.

§ 8. Enimvero id certum est, effectum hujus religionis naturalis, præcise & pro præsentis hominum conditione consideratæ, intra sphæram hujus vitæ terminari: ad æternum autem salutem nanciscendam nequaquam valere. Ratio quippe humana sibi relicta jam ignorat, pravitatem, quæ in facultatibus & inclinationibus hominis cernitur per culpam humanam provenisse, Deique offensam & æternum exitium mereri: eoque & necessitas Salvatoris, ejusque officium & meritum, nec non promissa Dei humano generi facta, & quæ alia inde dependent, eandem latent: per quæ

quæ sola salutem æternam hominibus provenire, ex divinis literis constat.

Observ. 106.

Enim vero id certum est) Usus religionis naturalis duplex supponi potest, *Principalis & secundarius*. Ille respicit Deum, dum per religionem, illum nobis reddimus propitium, imò vitam æternam consequimur, si scilicet de hac, ex naturâ aliquid novimus, nec Deus peculiarem religionem revelavit. Videtur quidem dissentire Autor §. 8. *b.* sed revera non dissentit, nam negat posteriorem effectum, ex hypothesis religionis revelatæ, ac rationi incognitæ, qua posita, utique religio naturalis effectum laudatum non habet.

§. 9. Operæ pretium porro fuerit paulo distinctius expendisse usum, quem in vita humana religio gignit; ut constet, *eam revera esse ultimum & firmissimum humane societatis vinculum*. Nam in libertate naturali, si metum divini Numinis removeas, ubi quis propriis viribus fisus fuerit, quælibet imbecillioribus pro libitu inferet, ac honestatem, pudorem, fidem inter inania vocabula reputabit, nec ad recte faciendum aliter, quam sensu propriæ imbecillitatis adigetur. Porro, religione remota, civitatum firmitas intrinseca semper in incerto foret, ac ad cives in officio continendos haut quidquam sufficeret
metus

metus temporalis poenæ, fides superioribus data, ejusque servandæ gloria, & gratitudo, quod ope summi imperii à miseriis status naturalis defendantur. Tunc enim reverà locum haberet: qui mori scit, cogi nescit; quippe cum DEum non metuentibus nihil magis quàm mors metui possit. Huic cōtemnendæ qui sufficeret, in imperantes quævis tentare posset. Ut autem id vellet, vix causa defutura foret; puta ut declinaret incommoda, quæ sibi ab alterius imperio videntur incumbere; aut ut ipse potiretur commodis, quæ imperii possessorem comitantur. Præsertim cum facile judicare possit, jure se id facere, vel quòd, qui in præsens rerum potitur, pravè remp. videatur gerere, vel quòd ipse longè melius imperaturum sese speret. Occasio autem ad tali tentanda facilè offerri posset, Rege vitam suam non satis caute circumsepiente, (& quis talia rerum statu custodes ipsos custodiet?) vel multis conspirantibus, vel bello externo ingruente adscitis in partes hostibus. Præterea ci-
ves ad injurias mutuò inferendas futuri essent pronissimi. Cum enim in foro civili pronuncietur secundùm acta & probata, omnia scelera & flagitia, ex quibus lucrum provenire aptum est, si occultè patrari & sine arbitris possent, pro dexteritate ingenii, in qua placere
I sibi

sibi quis posset, haberentur. Nemo quoque opera misericordiæ aut amicitia foret exerciturus, nisi gloria aut emolumentum explorata spe. Ex quo & illud consequeretur, ut, dum nemo in alterius fide, remotis pœnis divinis, solidam fiduciam collocare posset, singuli perpetuo metu & suspicionibus anxii viverent, ne ab aliis deciperentur, aut læderentur. Sed & tam imperantes quam subjecti parum proclives futuri essent ad præclara & gloriosa opera patranda. Nam imperantes, nullo conscientia vinculo cōstricti omnia munia, ipsamque justitiam venalia essent habituri, & in omnibus privatum commodum quæsitura cum oppressione civium, à quorum rebellione ut sibi semper metuerunt; ita suam salutem unicè in eo positam intelligerent, ut istos quàm maximè enerves redderent. Cives contra, oppressionem imperantium formidantes, nunquam non circumspecturi forent occasiones rebellandi; nec minus tamen ipsi inter se diffiduri, seque mutuò formidaturi erant. Quin & conjuges oborta vel levi querela se invicem essent suspectaturi, ne veneno, aut alio clandestino modo necarentur. Par periculum à familia immineret. Cùm enim sine religione nulla quoque futura foret conscientia, non facile esset, occulta ejusmodi scelera

de-

deprehendere ; quippe quæ plerumque per inquietudinem conscientiæ, & terrores in exteriora indicia erumpentes, prodantur. Unde adparet, quante opere intersit generis humani, atheismo omnes vias, ne invalescat, præcludere; simulque quanta vecordia eos agitet, qui ad opinionem prudentiæ politicæ conciliandam facere autumant, si in impietatem proclives videantur. *Observ. 107.*

Opere pretium porro fuerit) Secundarius religionis naturalis usus triplex præcipue est (1) debet illa homines manducere ad inquisitionem cultus à Deo vere revelati *vid. Grot. de V. R. C. l. 1. §. 25. 26.* quem usum vulgo *pedagogicum* dicunt *vid. Albert. C. J. N. p. 2. c. 1. §. 20.* sed (2) non minus debet illa impedire, ne quamvis traditionem vel fabulam, pro religione revelata amplectamur; (3) firmat illa societates humanas, quem usum late Autor §. 9. declarat, quamvis prolixitas illa principalem thesin non confirmet, sed præsupponat, hinc si eam neges, cætera omnia corruunt.

2. Quare ita potius dicendum, *religio est quidem firmissimum societatis humane vinculum*, sed (1) hunc usum religio naturalis cum revelata habet communem, si scilicet unamquamque, intra activitatis suæ sphaeram, consideres, nulla tamen (2) illum usum præstat, nisi sit sociabilis, ac adjunctam habeat persuasionem, de futura beatitudine & poena *vid. Tract. Maj. l. 2. c. 5. §. 20. verb. ex quo fonte Grot. de V. R. C. l. 1.*

§. 21. ac (3) seria sit, i. e. interno ac vero Dei amore & timore constet, vera sit in se, an falsa, hætenus nihil refert. Si ultimum requisitum desit, religio societati humanæ nihil præstat, si secundum, eam insuper enormiter turbare potest.

Observ. 108.

Unde apparet, quantopere) Atheismum theoreticum, ad continendas societates humanas, nihil conferre manifestum est, ille tamen has etiam necessario non turbat, quod ex ejus definitione liquet. Atheus cum Hypocritâ pari passu ambulat, eo verò, qui religionem inso-ciabilem & imperiosam sectatur, quantum ad societates humanas, melior est.

2. In hunc ferè modum de religione naturali philosophari licet, sepositâ religione Christiana. Ast postquam hæc invaluit, manifestum est, quod inter Christianos, religionis naturalis, solitarie spectatæ, nullus amplius sit usus; nam Deum juxta illam colere velle, non tantum inutile, sed & exitiosum fuerit, secundarius quoque usus cessabit, cum ad religionem Christianam non amplius adduci debeant, qui eam jam admiserunt, quemadmodum hæc etiam pro vinculo societatum humanarum habenda erit. Christianis igitur, ex jure naturali hæc præcepta observanda erunt: Ut (1) veritatem religionis suæ probe investigent, deprehensâ veritate (2) eam incorruptam conservent (3) juxta ejus præscriptum, Deum

colant, eamque (4) pro vinculo societatum humanarum habeant.

3. Quoad alias vero Gentes, quæ religionem Christianam nondum admiserunt, sed religione naturali, superstitione temperata (nam puram in aliqua gente reperiri, vix crediderim) vivunt, de usu modo memoratæ religionis adhuc quæri potest, *Uusus principalis*, ex scitis religionis Christianæ, negandus videtur, quamvis in specie Petrus Chauvin *in libr. de relig. natur. Roterodam. 1693. impresso, c. 8.* serio defendat, religionem naturalem, prodesse ad salutem æternam iis, qui Christum ignorent, id quod Autori defendendum, aliis vero amplius excutiendum relinquimus. *Secundarius* vero, quoad illas Gentes adhuc obtinebit,

CAPUT V.

DE

OFFICIO HOMINIS ERGA SEIPSUM.

§. I.

Quanquam hominem amor sui penitus infixus subigat, sollicitam sui curam agere, suaque commoda omnibus modis procurare, sic ut hoc intuitu a-

liquam obligationem comminisci supervacuum videatur; alio tamen respectu homo utique certa quædam circa seipsum observare tenetur. Cum enim non sibi soli sit natus homo, sed ideò tam eximiis dotibus à Creatore sit ornatus, ut & ipsius gloriam celebret, & idoneum societatis humanæ membrum existat: inde ita sese componere homo tenetur, ut ne dona Creatoris incultu perire patiatur, & ad societatem humanam aliquid pro virili conferat. Sic etsi sua cuique ruditas maximo sit probro & damno: rectè tamen à magistro vapulat discipulus, si, quarum capax erat, artes addiscere negligat.

Observ. 109.

Quaquam hominem) Homo quidem *seipsum* obligare nequit, cum nemo seipso superior, adeoque obligans & obligatus esse queat. Neque etiam *sibi ipsi* potest obligari, ut nempe obligatio ab ejus arbitrio suspensa sit, nemo enim simul Creditor & debitor esse potest, cum ita pro lubitu ab obligatione se liberare queat, ut facile liqueat, nullam obligationem efficacem hoc sensu constitui posse, adeoque frustra aliquam asseri *conf. Hobbes. de civ. c. 6. §. 14.* Attamen *erga seipsum* obligari potest, ut scilicet obligationis simpliciter constitutæ, *Autor* sit Deus, homo vero ejus *subjectum & objectum.* An vero tali obligatione opus fuerit, dubitat
Auctor

Autor, cum naturalis instinctus jam satis hominem, ad curam sui gerendam, impellat.

Observ. 110.

Sic ut hoc intuitu ; Censet Autor obligatione aliqua opus non fuisse ratione hominis ipsius, bene vero Dei & Proximi *add. l. 2. c. 4. §. 16.* verum simpliciter, adeoque etiam primo respectu, obligationis necessitas asserenda est, nam instinctus non semper validè satis impellit, ac ab homine, velut creatura rationali, actio moralis est edenda, quæ legem & obligationem præsupponit, denique cura sui ipsius, majorem, requirit circumspectionem, quam ut eandem affectus sæpe nimis vehemens recte dirigere queat, hinc normam sublimiorem & exactiorem illa prærequirit.

2. De cætero ex accurata *sui ipsius cognitione*, omnis officiorum sibi ipsi exhibendorum, cognitio resultat, nam exinde intelligitur præceptum generale : *Exercendam esse philautiam statui cuiusvis convenienter, ac sine læsione religionis & socialitatis*, nam inter hæc æquilibrium & nonnunquam prærogativa servari debent, prout illa ad *cap. 3.* deduximus.

§. 2. Porro cum homo constet duabus partibus, *anima & corpore*, quarum illa rectoris, hoc ministri aut instrumenti vicem subit, sic ut animi imperio, corporis servitio magis utamur : utriusque quidem cura, sed illius tamen præcipue agenda. Et animus quidem

ante omnia ad commode tolerandam vitam socialem est formandus officiique & honesti sensu & amore imbuendus. Tum pro cujusq; capacitate & fortuna aliquid addiscendum, ne quis inutile terræ pondus sit, sibi gravis, aliis molestus. Sed & tempestive eligendum honestum vitæ genus, prout impulsus genii, corporis atque ingenii habilitas, natalium conditio, fortunæ bona, parentum auctoritas, imperantium civilium jussa, occasio aut necessitas ferunt.

Observ. III.

Porro cum homo constet) Specialius homo intelligit, se habere *animam* & *corpus*, hinc utriusque curam se gerere debere, sed principaliter illius, amplius cognoscit, cum animus corpore præstet.

Observ. II.

Et animus quidem) Cura animi quoque gradibus discernitur. Ergo (1) Dei cultusque Divini, (2) socialitatis & amoris proprii, denique (3) aliarum rerum, priori cognitioni subordinandarum notitiâ, animus est imbuendus §. 2. b. Deinde ita adsuefaciendus, ut (4) imperium in cæteras facultates retineat (5) virtutis quoque & prudentiæ habitu indui debet, quo actiones pias, justas, prudentes & moderatas eò facilius suscipere, contrariasque omittere queat, cumque istam animi culturam, proprio

marte

Marte quis sibi semper præstare nequeat, hinc (6) eadem ab hominibus probis & cordatis est expetenda. Cæterum in hac officii parte homines plerumque deficere, experientia satis docet.

§. 3. Cum autem animus fulturis corporis sustineatur, inde vires ejus congruentibus alimentis, ac laboribus erunt firmandæ & conservandæ, nec intemperantiâ cibi potûsque, intempestivo ac non necessario labore, aliave ratione affligendæ. Quo nomine vitanda ingluvies, ebrietas, immodica Venus, & similia. Cum etiam inordinati & vehementes affectus non solum ad perturbandam societatem stimulos moveant, sed & ipsi homini plurimum noceant: inde danda opera, ut quis affectus suos, quantum fieri potest, compeſcat. Et quia multa pericula repelli possunt, ubi animosè iis obviam eatur, mollities animi ejicienda idemque contra periculorum terrores obfirmandus.

Observ. 13.

Cum autem animus fulturis corporis) Cultura corporis exigit, ut homo (1) corpus alat (2) sanitatem conservet adeoque iis, quæ ei prosunt, utatur, contraria verò fugiat §. 3. *b. add. l. 2. c. 4. §. 3. seqq.* quod officium partim ex imperitia, partim ex affectuum intemperie sæpe homines negligunt, amplius ut (3) corporis & membro-

rum integritatem custodiat, qui igitur vel sine causa, vel, religionis similive prætextu, corpus, fauciant aut aliàs manꝝ violentas sibi inferunt, vel inferri patiuntur, ut qui se ultrò castrandos præbent, illi utique in legem naturalem peccant.

§. 4. Quia autem nemo sibi ipsi vitam dedit, sed illa pro DEI beneficio est habenda, adparet quoque, homini nequidquam competere potestatem in propriam vitam hætenus, ut eandem pro lubitu possit abrumpere; sed expectandum utique esse, quoad quis evocetur ab eo: qui nos in hacce statione collocavit. Equidem id utique rectè fieri posse videtur, cum homo possit & debeat sua opera aliis inservire, & verò certum genus laborum, aut eorum intensio vires hominis ita atterat, ut senium vitæque terminus maturius ingruat, quam si quis molliter ætatem exegisset: ut quis eligat probabilem occasionem brevioris vitæ, quo talenti sui usum aliis eò largiùs dispenset. Sed & cum sæpe multorum vita servari nequeat, nisi pro iis alii probabili sese vitæ periculo exponant; per imperantem legitimum posse civi sub comminatione gravissimarum pœnarum injungi, ne ejusmodi periculum fugâ declinet. Imo & ultrò tale peri-

periculum subire licebit, modò graviores causæ non retrahant, & spes sit isthoc in aliorum salutem cessurum; & hi digni sint, qui tam carè redimantur. Nam id stolidum fuerit, alteri perituro frustra sese comitem addere, aut egregium virum pro nauci homine mortem oppetere. De cætero tamen per legem naturæ haud quidquam præcipi videtur, ut quivis cujusvis alterius vitam suæ vitæ præferat; sed cæteris paribus sibi quisq; proximus esse permittitur. Ast verò, qui vel tædio molestiarum, quæ vitam humanam communiter comitantur, vel indignatione malorum, quæ humanæ ipsos societati erubescendos non erant redditura, vel metu dolorum, queis fortiter toleratis exemplo suo prodesse aliis poterant, vel per vanam jactantiam fidei aut fortitudinis vitam ultro abrumpunt & projiciunt, utique in legem naturalem peccare sunt censendi.

Observ. 114.

Quia autem) In primis etiam (4) vita conservanda est §. 4. b. quod quidem sanitatis & integritatis curâ, modo memorata, obtinetur, sed insuper tamen à propria violentia abstinendum est. Qui hoc officium negligunt, dicuntur *Propricidae*, i. e. qui vitam contra legis prohibitionem, sibi ultro, directe vel indirecte, auferunt. Duo igitur, ut alias, ita hic etiam requiruntur, nempe

pe voluntas, quæ suos, eosq; insignes, gradus habet, & legis prohibitio, quæ, quoad factum voluntarium, tamdiu præsumitur, donec probetur exceptio. Ex quib9 etiam liquet, duplicis generis exceptiones, ubi interemptio propria, in crimen non incidat, heic occurrere posse, si scilicet vel voluntas vel legis prohibitio deficiat.

Observ. 115.

Equidem id utique recte fieri posse videtur) Ad primam classem pertinet cædes ab eo facta, qui alienatione mentis, vel perpetua vel temporaria, laborabat, hanc excusandam esse facile liquet. Secundi generis exceptiones magis dubiæ sunt. Autor §. 4. b. & l. 2. c. 4. §. 17. censet, *licere eligere probabilem vitæ brevioris occasionem, quo quis talenti sui usum aliis eo largius dispenset, quod aliis non videtur.* Interim cum æquilibrium amoris proprii & alieni, in puncto non consistat, sed insignem habeat latitudinem, præterea laboris intensioris effectus non adeo certus sit, denique socialitas nonnunquam prævaleat Philantiæ, hinc sententia Autoris omninò defendi potest.

Observ. 116.

Sed & cum saepe) Alia adducitur exceptio, quæ ob prærogativam socialitatis admittenda videtur *add. d. l. 2. 4. §. 18.* Exemplum ejus, prebent etiam illi, qui ad reprimendam calamitatem, incendio, aqua vel simili causa excitatam, accurrunt, in eaque pereunt, vel laboribus gravioribus, in plurium utilitatem, fata maturant.

Observ.

Observ. 117.

Nam id stolidum) Non stolidum tantum, sed & injustum hoc fuerit, quemadmodum etiam jus naturæ non solum *permittit*, ut cæteris paribus, quisque sibi ipsi proximus sit, ceu mox dicitur, sed id etiam *jubet*. Cum alio igitur, vel pro alio velle perire, regularite justa exceptio non est.

Observ. 118.

Ast vero qui) Nec hi prætextus ad excusationem sufficiunt, ceu recte hic dicitur, licet apud Ethnicorum nonnullos illa sententia obtinuerit *vid. l. 2. c. 4. §. 17. in fin. §. 19. in fin.* Porro nec pudicitia servandæ causâ aut si quis deinceps in probrum Dei, se victurum videat, propricidium licitum videtur, quamvis, quoad ultimum, Ebræorum nonnulli dissenserint *vid. d. l. 2. c. 4. §. 19. Grot. de J. B. P. l. 2. c. 19. §. 5.* Illi vero excusandi videntur, qui fata sibi accelerant, quod, certitudine moraliter infallibili, prævideant, mortem sibi paulo post, ab hoste injusto, cum ignominia & cruciatu, allatum iri, quemadmodum etiam certum videtur, quod delinquentes, jussu Magistratus, mortem promeritam sibi ipsis inferre queant, *vid. Op. Maj. l. 8. c. 3. §. 4. in med.*

2. Ulterius cura sui ipsius exigit, ut (5) corpus vivum, sanum & integrum ita expoliamus, quo honeste & utiliter agere queat, hæc enim cura animo & corpori communis est. Contra hoc
offici-

officium peccant, otiosi, Eremitæ, Monachi, valida mendicabula, abusum nominis divini in quæstum vertentia, Deumque sibi velut tributarium reddentia, ignavi, ut & homines sordidi, *vid. l. 2. c. 4. §. 13. 15.*

3. Præterea ex cognitione sui ipsius homo intelligit, se esse membrum societatis humanæ, quod ad sui conservationem, variis bonis externis indigeat, quodque cum aliis, hoc vitæ curriculum decurrere oporteat. Ergo (6) in appetendis bonis illis, existimatione, opibus & muneribus nimirum, ex regulis amoris proprii, recte se gerere debet. In hoc officio sibi præstando, homines plerumque excedunt, ac ex perversa philautia, socialitatem graviter lædunt *add. d. l. 2. c. 4. §. 10.* Denique (7) præcepta amoris proprii, hominem in vita civili honeste & prudenter agere jubent, quo ita sibi ipsi infortunium haut conciliet, mala imminetia depellat ac bona comparet, *conf. d. l. 2. c. 4. §. 6. 7. 8. 15. in fin.*

4. In hunc fere modum officia, quæ homo sibi ipsi debet, repræsentari breviter possunt, & quamvis illa ex aliis fontibus etiam derivari queant, hætenus tamen illa omnia, quæ memora-
vimus, ut peculiaria bona & mala spectantur, quæ ex regulis amoris proprii, appetere vel fugere deceat. Præterea id quoque admonendū, quod multa, quæ velut media, ad amorem propri-

prium pertinent, arbitrio humano subsint, adeoque non præcisè præcepta, sed licita saltem existimari queant.

§. 5. Cæterùm quia sæpenumerò conservatio sui, quam & tenerrimus affectus & ratio homini commendat, cum præcepto de socialitate collidi videtur, dum nempe salus nostra ab alio homine in periculum conjicitur, sic ut aut nobis sit pereundum, vel grave incommodum subeundum, aut alter cum læsione propulsandus: igitur quali cum *moderamine defensio nostri contra alios homines sit temperanda*, jam tradendum. Instituitur igitur defensio nostri vel *sine læsione* ejus, abs quo malum nobis imminebat, dum efficimus, ut ei anceps aut formidolosa nostri invasio videatur; vel cum *istius læsione* aut perniciæ. Prior modus quin sit licitus, omnique peccato vacet, dubium non habet.

Observ. 119.

Cæterum quia sæpenumero) Expendit Autor collisionem Philautias & socialitatis, ac præceptorum, quæ simul observari nequeunt, prærogativam, quamvis illa disquisitio nimis mature instituatur, antequam enim præcepta comparare possis, singula seorsim cognita esse debent, hinc merito præceptorum socialitatis explicatio, hanc comparisonem præcedere de-

debuisset. Interim hæcenus Autoris ordo sequendus erit.

Observ. 120.

Instituitur igitur defensio nostri) In genere Philautia & socialitas colliditur vel ratione *boni*, quod utrique non sufficit, & tum regulariter illa præferenda est, vel *mali*, quod utrique imminet, hæc collisio vel *facto ejus*, in quem alias erat exercenda socialitas, eoque vel dolo, vel non dolo. excitatur, vel *sine ejus facto* existit, qui casus altero latius patet ac ad Philautiam secum ipsa collisam, & Religionem etiam pertinet, ut deinceps apparebit.

2. Si facto dolo philautia & socialitas collidatur, tum illius primario esse habendam rationem, ex naturâ satis patet, quisque enim sibi ipsi proximior est quam aliis, hinc ratio insinuat, curam sui ipsius, ordine præcedere curam aliorum, ac adeo, si utraque locum habere nequeat, illius saltem rationem esse habendam. Accedit, quod alter dolo socialitatem abrumpat, hinc absurdum foret, si delinquentis magis, quam innocentis, sit cura gerenda, imo si Deus inter homines intendit socialitatem, quod verissimum, non potuit simul velle, ut ejus, qui illam abrumpit, malitia impune grassetur, quia, hoc posito, revera insociabilis vita futura esset. Licet vero Philautias primaria cura esse debeat, attamen si sine læsione alter repelli queat, hoc medium merito eligendum, nam etiam delinquenti, ex regulis socialitatis

tis

tis, parcendum, si sine nostro damno id fieri possit, hinc hoc obtinebit præceptum: *Ita te defende, ut alium, te licet læsurum, si fieri potest, non lædas*, quod ex philautias & socialitatis fonte conjunctim profluit. §. 5. *h.*

§. 6. Enim verò circa posteriorem modum scrupulus moveri potest; quòd parem jacturam videatur facere genus humanum occiso invasore, quàm si ipse peream; & quòd utique perdendus sit mei similis, quicum ad colendam vitam socialem adstringor; & quòd majores turbas videatur parere violenta defensio, quàm si vel fugam arripiam, vel corp⁹ patienter invasori præbeam. Verùm ista hoc defensionis genus haut quidquam faciunt illicitum. Nam ut adversus aliquem pacificè & amicè agam, requiritur, ut ipse se talem erga me præbeat, qui ejusmodi officia à me recipere idoneus sit. Et quia socialitatis lex ad salutem mortalium spectat, ideò ejusdem talis est facienda interpretatio, quæ singulorum salutem non pessumdet. Inde ubi alter exitio meo imminet, nulla est lex, quæ meam me salutem prodere jubeat, ut alterius malitia impunè grassari queat. Et qui ex tali occasione læditur, aut occiditur, habet, quod suæ pravitati imputet, quæ mihi isthanc necessitatem imposuit. Alias quippe omnia bona,
K quæ

quæ natura aut industria nobis peperit, frustra forent concessa, si alteri injuste illa invadenti vim non liceret opponere; & parata præda improbis expositi forent probi, siquidem hi istis nunquam deberent vim opponere. Sic ut violentam sui defensionem plane proscribere, exitio generi humano sit futurum.

Observ. 121.

Enimvero circa posteriorem) Quod si autem aliter fieri nequeat, tum etiam *cum alterius læsione aut internectione, violenta nostri defensio erit instituenda*, hinc non tantum *licita* sed & *præcepta* censi debet, adeo ut si quis, cum defendere se posset, maluerit occidi, contra legem naturalem peccasse censendus sit. Triatamen Autor violentæ defensionis objicit (1) jacturam, quam, occiso invasore, genus humanum patiatur (2) studium colendæ socialitatis (3) magnitudinem tumultus, quam defensio illa pariat.

Observ. 122.

Verum ista hoc defensionis genus] Ad mediam objectionem, quæ principalis est, Autor ipse hic respondet *add. l. 2. c. 5. §. 1.* summa eo redit: hoc casu Deum non intendisse socialitatem, adeoque ad ejus exercitium homines lege naturali non obligasse *conf. Observ. 120. n. 2.* Duæ reliquæ objectiones non sunt magni roboris, nam jactura invasoris arguit quidem aliquod peccatum, sed non defensoris, verum ipsius occisi, magni-

magnitudo autem tumultus vel turbarum, & in se incerta est, & ad moralitatem defensionis nihil omnino confert. Alias id quoque obijci potest (1) *quod invasor occisus exitium eternum incurrat*, sed hoc non semper fit, deinde imputet sibi, quicquid etiam malorum patitur (2) *quod conatus occidendi morte non recte puniatur*, verum à malis poenalibus ad mala bellica non recte infertur, illa puniens in sua potestate habet, adeoq; eadem delicto commissio attemperare potest & debet, sed hæc invasor ultro incurrit *add. l. 2. c. 5. §. 14. Grot. de J. B. P. l. 1. c. 3. §. 3. c. 2. §. 8.*

2. Quod si Princeps quem invadat, tum satius erit occidi, quam occidere, non quidem ob aliquod invasoris jus, sed ob Reipublicæ utilitatem, si quis tamen hujus obligationis parum memor sit, is ob summam animi consternationem, in foro divino excusatus videtur *add. Op. Maj. d. l. 2. c. 5. §. 2. Albert. Comp. Jur. nat. p. 2. c. 3. §. 13.*

§. 7. Non tamen semper, quando injuria intentatur, ad extrema licet provolare; sed *tutiora prius remedia tentanda*; puta, ut aditum invasori intercludam, ut intra munita loca me contineam, ut invasorem moneam à furore desistere. Sicut & hoc prudentis est, *levis injuriæ patientia*, si commode fieri possit, defungi, & de suo jure aliquid remittere potius, quam intempestiva violentiæ opposi-

tione majori sese periculo exponere; præsertim ubi impetatur id, quod facile reparari aut pensari queat. Verum ubi hoc aut simili modo salus mea in tuto locari nequeat, pro eadem expedienda vel extrema tentare licebit.

Observ. 123.

Non tamen semper) Quo defensio violenta liquidius intelligatur, duo distincte considerata (I) *ipsa collisio defensioni sufficiens*, hæc adesse censetur, si (1) præsens periculum (2) sine nostra culpa immineat, ac illud (3) alia ratione, quam oppositione violentiæ depelli nequeat, quorum collimant monita §. 7. h. (II) *facultas laedendi, tali in casu competens*.

§. 8. Sed ut liquido judicari possit, an quis intra *limites inculpatae defensionis* substiterit, dispiciendum prius est; utrum quis *in naturali libertate* nulli mortalium subjectus, an vero *imperio civili* obnoxius degat. Priori statu, ubi alter injuriam inferre pertendat, nec pœnitentia pravi conatus ductus ad pacem mecum colendam redire velit, hunc vel cum cædere repellere potero. Idque non solum si vitam meam impetat, sed & si vulnerare, aut lædere duntaxat, aut etiam res, salvo corpore, eripere conetur. Nam neque cautum est mihi, quod ab istis injuriis ad majores

non

non sit transiturus; & qui sese hostem profiteretur, nullo amplius jure munitur, quo minus quo vis modo à me repellatur. Ac revera tunc insociabilis esset hominum vita, si contra eum, qui modicas injurias continuare non desistit, extrema non liceret adhibere. Hoc modo enim modestissimus quisque deterrimo cuique perpetuum ludibrium deberet. In hoc porro statu non solum in præsens intentatum periculum repellere, sed & hoc depulso invasorem eo usque persequi possum, quoad ab illo in futurum satis mihi cautum sit. Super qua *cautione* ita habendum. Si quis, injuria intentata, ultro pœnitentia ductus veniam petat, & damni restitutionem offerat, in gratiam cum ipso, fide accepta, redire debeo. Nam firmum est signum animi emendati, sponte pœnitere, & veniam petere. Ast qui tunc demum pœnitentiam præ se fert, quando resistendi vires deficiunt, ejus nudo promisso fidere parum tutum videtur. Igitur tali vel vires nocendi subtrahendæ, vel aliud vinculum injiciendum, ne deinceps nobis existat formidabilis.

Observ. 124.

Sed ut liquido judicari possit) Quoad licentiam lædendi, non immerito distinguitur inter *statum naturalem & civilem*, add. l. 2. c. 5. 6. nam hi duo

status non tantum quoad *cautionem antecedentem & consequentem vindictæque exactionem*, sed & quoad *ipsam defensionem lædendique facultatem* differunt, diversoque plane jure utuntur.

Observ. 125.

Priori statu ubi alter injuriam inferre pertendat) In statu naturali læsionem in infinitum extendere licet, si in vasor à proposito non desistat, cum enim Imperans non occurrat, qui ejus conatum retundat, hinc ipsius hostilitas non momentanea aut simultanea, sed successiva & perpetua, ac, quoad lædendi propositum, illimitata est, hinc invasioni illimitatæ, ejusdem generis defensio merito opponitur.

Observ. 126.

Nam neque cautum est mihi) Ex eo, quod modo diximus, tres rationes, quæ afferuntur, majorem vel vim vel evidentiam sortiuntur. Nimirum *prima* recte urget in vasoris hostilitatem in actum jam deductam & illimitatum nocendi propositum, adeoque longe differt ab ea doctrina, quæ, sine prævia hostilitate, ob solam suspicionem, ex communi hominum malitia ortam, jus occupandi alium, asserit, cui indulget Hobbes. *de civ. c. 5. §. 1.* Porro *secunda* merito inculcat, illimitati propositi nocendi consecutarium, qui enim aliis hostem se illimitatè profitetur, ille nullo etiam socialitatis jure munitur. Denique eo etiam, licet per obliquum, collimat *tertia*, nam revera hominum

vita

vita foret insociabilis, si contra hostem, illimitatum nocendi propositum habentem, defensio certis constringenda foret limitibus. Atque ex his amplius etiam explicari & confirmari possunt tradita in Op. Maj. l. 2. c. 5. §. 3. 12. & apud Grotium de J. B. P. l. 2. c. 1. §. 11. Quod si tamen hostis in angustias ita redactus sit, ut nocere amplius non possit, sed mala infligenda arbitrio defensoris dirigi queant, tum æquitas postulat, ut eadem, fere juxta regulas poenales, imponantur.

Observ. 127.

In hoc porro statu) In statu naturali, læsus quoque suo arbitrio cautionem in futurum exigit, cujus modum æquitas & prudentia dirigit, ut hic docetur *add. l. 2. c. 5. §. 4.* sæpe etiam, non ut volumus, sed ut possumus, cautionem exigere, eademque contentos nos esse oportet.

§. 9. Qui autem imperio civili subjecti degunt, tunc demum violentam sui defensionem licite adhibent, quando tempus ac locus non fert auxilium magistratus implorari ad repellendam eam injuriam, qua vita, vitæque æquipollens, aut irreparabile bonum in præsentaneum periculum conjicitur. Et quidem ut periculum tantummodo depellatur: vindicta autem & cautio de non offendendo imposterum magistratus arbitrio relinquatur.

K 4

Observ.

Observ. 128.

Qui autem imperio civili) In statu civili facultas lædendi arctioribus circumscripta est limitibus, quia invasio momentanea & limitata est, dum hostilitas per Magistratum reprimi & tolli potest, hinc defensio offensionem est attemperanda & cautionis exactio Magistratui relinquenda §. 9. b. Ex quibus etiam liquet, rationem, qua quis distinctionem status naturalis & civilis impugnare velit, *quod scilicet non alia ratione socialitatem negligere, alique malum inferre concessum sit, quam quatenus idem socialitatem abruperit*, sine effectu esse futuram & id, quod oppugnare debebat, potius confirmaturam, cum enim diversa in utroque statu sit læsio, hinc etiam defensio diversimodè se habere debet.

§. 10. Licet autem defensionem suscipere tam adversus eum, qui dolo malo, quam qui *per errorem* exitium mihi intentat; puta, si quis insania agitato me invaserit, aut quia me alium, qui cum inimicitia ipsi intercedunt, crediderit. Nam sufficit, quod alteri non sit jus ad me invadendum, aut occidendum, neq; in me sit obligatio ad mortem frustra subeundam.

Observ. 129.

Licet autem defensionem suscipere) Defensio violenta etiam contra invasorem non dolum recte suscipitur §. 10. b. add. l. 2. c. §. 5. licet enim delictum

lictum cesser, philautias tamen causa potior est *vid. Observ. 120. n. 2.* quia tamen in eo non est consilium illimitatè lædendi, sed læsio fortuita est, ac ex momentaneo impetu æstimari debet, hinc neque in statu naturali, in infinitum hoc casu defensio extendi potest.

§. II. Circa *tempus*, intra quod defensio recte fieri potest, ita habendum est. Qui in naturali libertate utrinque degunt, et si possint ac debeant præsumere, alios adversus se officia legis naturalis observaturos: tamen propter malitiam ingenii humani nunquam ita securi esse debent, quin sibi mature innoxia munimenta circumponant; puta, aditum præstruendo hostilia molientibus, arma virosque comparando, socios adjungendo, aliorum conatus vigilanter observando, & quæ sunt similia. Verum ista suspicio, orta ex communi hominum malitia, non sufficit, ut sub obtentu defensionis meæ alterum ultro armis opprimere possim, ne quidem si potentiam ipsius nimis gliscere videam; præsertim ubi eandem innoxia industria, aut per benignitatem fati citra aliorum oppressionem adauxerit. Quin & si quis præter facultatem nocendi etiam voluntatem ostendat, non quidem adversus me, sed alium, non ideo statim meo nomine eum invadere ultro possum;

nisi ad auxilium alteri, qui injuste à potentio-
re invaditur, ex fœdere teneat. Quod eo
promptius facere expedit, si probabile sit, istum
altero oppresso in me quoq; transiturum, &
priori victoria pro instrumento sequentis u-
surum. Ast ubi liquido adparet, alterum
circa inferendam mihi vim jam occupari,
licet conatus suos nondum plene expromse-
rit, statim licebit violentam sui defensionem
auspicari, & noxam adparantem occupare;
siquidem nulla spes sit fore, ut amice admoni-
tus hostilem animum exuat, aut ejusmodi
admonitio rebus nostris noxia sit futura. Unde
hic pro aggressore erit habendus, qui prior
voluntatem nocendi alteri concepit, & ad
eandem exsequendam se comparavit; defen-
sionis autem favor illum comitabitur, qui ce-
leritate usus tardius molientem oppresserit.
Neque enim ad defensionem requiritur pri-
mum ictum excipere, aut ictus, qui intentan-
tur, eludere duntaxat & repellere.

Observ. 130.

Qui in naturali libertate) Ob solam invasionis su-
spicionem, in statu naturali, nemo est occupan-
dus, sed qui invasionem metuit, de cautione
innoxia debet esse sollicitus §. II. b. Equidem
Hobbes *de civ. c. 5. §. 1.* etiam hoc casu jus occi-
dendi concedit, ex falsa, de jure omnium in o-
mnes,

mnes, hypothesis, quâ negata, confectarium ultro corrui, nam ex veris socialitatis principis, quamdiu alter hostilitatem actu nondum exseruit, tamdiu pro amico, licet parum fido, habendus est, si autem nocendi propositum actu declaraverit, tum ei velut hosti recte occurritur.

Observ. 131.

Quin si quis præter facultatem) Defensio violenta hoc casu quidem, proprio nomine, non est suscipienda, alia vero est quæstio, annon oppresso, ex lege socialitatis succurrere teneat? quam licet Autor negat, addita duplici limitatione, rectius tamen affirmatur, juxta indolem scilicet præcepti affirmativi, quæ enim in alteram partem afferuntur *l. 2. c. 5. §. 6.* leviora sunt, quam ut attendi mereantur, quæ cum ita sint, duplex Autoris limitatio, per modum ampliationis, à nobis accipienda erit *add. Albert. Comp. Jur. natur. p. 2. c. 3. §. 31.*

Observ. 132.

Ast uti liquido apparet) Recte hic tempus suscipiendæ defensionis, quoad statum naturalem, explicatur, nimirum initium non est præcise repetendum ab *actuali invasione*, sed *à certa ad invasionem preparatione*. Porro non statim cessat tempus defensionis, si offensor semel sit repulsus, quia enim retinet lædendi propositum, non tantum, si denuo invadat, repelli, sed & in insidiis velut latitans, ultro occupari potest, quæ omnia majori cum effectu & evidentiâ, quoad

quoad gentes liberas, in civitatibus contentas, sese exerunt.

§. 12. Ast in civitatibus haut quidquam tam laxum spacium ad sui defensionem indulgetur. Nam heic licet quis intellexerit civem sese comparare ad vim ipsi inferendam, aut atroces minas spargere; nequaquam occupare istum licebit; sed ad communem imperantem erit deferendus, & ab eodem cautio petenda. Verum ubi quis ab altero jam invaditur, & in eas redigitur angustias, ut magistratus, aut aliorum civium implorandi subsidium facultas non sit, tunc demum ad repellendam vim vel extrema invasori licebit intentare; non quidem ea intentione, ut per eadem vindicta ob injuriam exigatur, sed quatenus vita citra ejusmodi eadem è præsenti periculo nequit eripi. *Initium* autem temporis illius, quo quis in sui defensionem alium impune potest occidere, inde sumitur; quando aggressor voluntatem impetendi vitam meam præ se ferens, & à viribus instrumentisque nocendi instructus, jam intra illum locum extiterit, ex quo re ipsa nocere possit, computato quoque illo spatio, quo opus est, si ego prævenire quam præveniri malim. Etsi propter perturbationem animi, quam tantum periculum excitat, modicus excessus in foro hu-

humano non curetur. *Perdurat* autem *spatium inculpatæ tutela*, quoad aggressor fuerit depulsus, aut ultro recesserit, vel pœnitentia in ipso facinoris momento tactus, vel quod conatum ejus eventus destituerit; ita ut in præsens nocere amplius nequear, nobisque sit facultas in loca tuta nos recipiendi. Nam ultio injuriæ & cautio in futurum ad imperii civilis curam & potestatem spectat.

Observ. 133.

Ast in civitatibus) In statu civili tempus expediendæ defensionis violentæ, tam laxum non est, sed incipit illud ab *actuali læsione*, & definit, *simul ac invasoris impetus depulsus est*, nam læsionem imminentem aut recursuram, Magistratus impedire potest & tenetur, hinc cautio tam antecedens, quam consequens, ejus curæ relinquenda est §. 12. *b.* quamvis cautionem, imperio civili haut contrariam, ipse lædendus vel læsus, sibi etiam comparare queat *vid. l. 2. c. 5. §. 6.* verbis: *quin & in civitatibus.* In utroque igitur statu quidem, ob imminens periculum, saltem se defendere licet, sed periculum aliter in naturali, aliter civili, ob hostilitatis intentatæ diversitatem, imperiique civilis defectum vel præsentiam, æstimatur.

§. 13. Quanquam autem dictum sit, non recte

recte ad cædem provolari, ubi commodiore via periculum depelli potest: tamen propter *perturbationem animi*, quam imminens periculum parere solet, non omnia ad vivum rescari solent; cum in tali periculo trepidanti non ita accurate omnes evadendi vias liceat circumspicere, sicut ei, qui tranquillo animo rem considerat. Inde uti ex loco tuto ad provocantem ultro descendere temerarium est; ita si in aperto me loco constitutum alter invadat, non præcise ad *fugam* obligor; nisi forte in propinquo sit tale suffugium, in quod me citra periculum possim recipere: neque semper cessim ire teneor. Nam & ibi nudum tergum ostendendum, & utrinque periculum lapsus imminet, ac ubi semel gradus depulsus, eundem iterum componere haut facile est. Uti autem aliquis favore defensionis non excluditur, quod ultro in publicum ad sua negotia obeunda prodiit, cum si domi mansisset, à periculo immunis erat futurus: ita eodem non fruitur, qui ab altero in *duellum* provocatus, ubi comparuerit, ita premitur, ut, ni illum transfodiat, ipsi sit pereundum. Nam cum leges id periculum subire vetent, ejus quoque ad excusandam cædem nulla habetur ratio.

Observ.

Quaquam autem dictum sit) Videtur hæc doctrina ad statum civilem esse referenda, cum enim in hoc, arctioribus limitibus violenta defensio sit circumscripta, hinc de nonnullis specialiter quæritur (1) an omnia ad vivum rescanda (2) an fuga præcisè suscipienda (3) an libertatis usus culpam inducat (4) an provocatus in duellum, jure defensionis fruatur? Quibus addi potest (5) an armorum imparitas, jus defensionis violentæ vitiet? *vid. l. 2. c. 5. §. 9.* quæ ex principiis antea præmissis facile solvuntur.

2. Qui juxta modum hætenus expositum, defensionem suscipit, *moderamen inculpatae tutelæ* observasse dicitur, & non tantum est impunitus, sed & impeccabilis, præterea damni restitutionem, ab occisi hæredibus recte petit, quamvis de hoc, in foro civili, vix aliquid audiatur. Quod si autem exactè omnia non observaverit, tum & impensas ferre debet, ac arbitrarie insuper punitur, ubi tamen æquum est, ut propter summam animi perturbationem, in qua defensor constitutus est, modicus excessus non attendatur, imprimis cum invasor odium, invasus vero favorem, mereatur. Modum excessus vero ex circumstantiis judex æstimabit, gravius enim excedit, qui collisioni ansam præbet, quam qui defensionis limites transilit, aut aliud medium collisionem

nem tollendi, forte prætervidet. Explorandis circumstantiis, jusjurandum frequenter adhiberi solet.

§. 14: Quod pro defensione vitæ, idem & pro *defensione membrorum* conceditur, sic ut & ille innocens habeatur, qui violentum in vallorem occidit, cui fortasse intentio fuit membrum duntaxat mutilandi, aut grave vulnus infligendi. Nam & natura à mutilatione, & gravilæsione maxime abhorremus; & mutilatio membri, præcipue nobilioris, quandoq; non multo minoris quam ipsa vita æstimatur. Quin in antecessum non constat, an non ex mutilatione ac vulnere mors sit secutura: ac talis patientia communem hominum constantiam superat, ad quam leges regulariter non solent obligare, in gratiam præsertim hominis malitiosi.

Observ. 135.

Quod pro defensione vitæ) Propter membrorum defensionem, invasorem quoque occidi posse, recte dicitur, subest enim probabile vitæ periculum, ac membra sunt bonum irreparabile, pro cuius conservatione, rectè extrema tentantur §. 14. *b. add. l. 2. c. 5. §. 10.* Distinctio, an subsit vitæ periculum, nec ne, quam nonnulli adhibendam censent *vid. Albert. C. 7. N. p. 2. c. 3. §. 15.* merè speculativa est, nec dijudicandæ defen-

defensionis moralitati, in vita civili, usum habere potest.

§. 15. Sed & quod pro vita, id & pro pudicitia licere judicatur: quippe cum nulla major contumelia honestæ fœminæ inferri queat, quam si quis invitæ eripere aggrediatur, cujus integritate ejus sexus decus maxime aestimatur; & efficiat, ut hosti ex suo sanguine prolem sulcitare cogatur.

Observ. 136.

Sed & quod pro vita Pudicitiam quoque corporis-que integritatem cum eade defendere licebit, cum & illa sit bonum irreparabile §. 15. *h. add. l. 2. c. 5. §. 11.* Alia quæstio est, an fœmina, stupri declinandi causâ, seipsam interimere queat? quæ ineganda videtur, *vid. Observ. 118. add. Becman lin. doctr. mor. c. 11. §. 4.*

§. 16. *Defensio* autem rerum inter eos quidem, qui in naturali libertate vivunt, etiam *ad eadam usque* in vaforis procedere potest; modo res non sit ejusmodi, ut contemni mereatur. Nam citra res utique vita nostra servari nequit; & æque hostilem animum declarat, qui res, quam qui vitam per injuriam impetit. Verum in civitatibus, ubi erepta subsidio magistratus recuperari possunt, id regulariter non conceditur; nisi in eo casu, ubi qui res nostras ereptum venit, in judicium adduci

L

non

non potest. Quo intuitu licitum est occidere prædones, & fures nocturnos.

Observ. 137.

Defensio autem rerum) Ad res defendendas facultas occidendi in statu naturali recte asseri videtur §. 16. b. licet enim rationes allatæ, sustinendæ assertioni, forsitan non sufficiant, attamen illimitatum nocendi propositum, quod in vasafor habet, aut saltem, ob hostilitatem semel declaratam, habere meritò præsumitur, recte allegatur.

Observ. 138.

Verum in civitatibus) In statu autem civili, in quo ex ipsa læsione defensio æstimanda est, regulariter res erepturos occidere non licet, nisi probabiliter vitæ quoque nostræ insidientur, aut metus subsit fore, ut res ablatas non facile recuperare liceat, tum enim habent rationem boni irreparabilis, pro quo conservando extrema tentare licet.

Observ. 139.

Quo intuitu licitum est) Apud Ebræos licuit occidere fures nocturnos, Grotius id, ob præsumtas vitæ insidias, admissum censet, Autor vero, ob deficientem res recuperandi spem *vid. l. 2. c. 5. §. 17. 18.* Expediant id alii, utraque interim sententia in thesi vera, ac asserendo occidendi juri, sufficiens nobis videtur *add. d. c. 5. §. 12. 15. §. 17.* Atque hæc de defensione ab iis facta, qui ultro ab aliis per injuriam invaduntur.

Qui

Qui autem prior alterum læsit, tunc demum recte se defendere, eaque defensione istum denuo lædere potest, postquam pœnitentia tactus reparationem damni dati, & cautionem de non lædendo in posterum obtulit; & læsus eandem per asperitatem animi respuit, ac manu sibi vindictam facere pertendit.

Observ. 140.

Qui autem prior) Hæc doctrina inter gentes liberas potissimum obtinet, nam si Gens læsa oblata idoneam satisfactionem respuat, tum personæ velut mutantur, ac in vasor, defensionis jure deinceps utitur. Circa applicationem tamen faciendam, circumspeditione opus erit, ne quamvis satisfactionem macilentam aut callidam, pro sufficiente statim habeamus, læsumque, istam repudiantem, defensionis favore excidisse arbitremur. In civitatibus, ubi autoritate Magistratus reparatio damni præstatur, certius est, quis pro invasore aut defensore, deinceps sit habendus.

§. 18. Denique & tanti habetur conservatio sui, ut si ea obtineri aliter nequeat, in plurimis casibus ab obligatione communium legum eximere censeatur. Quo nomine *necessitas* lege carere dicitur. Scilicet cum tanto ardore ad sui conservationem homo rapiatur, non facile præsumitur talem isti obligationem impositam, cui propria salus cedere debeat.

Quamquam enim non Deus solum, sed & ubi materiæ gravitas requirit, imperium civile tam rigidam nobis obligationem injungere queat, ut mors sit potius appetenda, quam latum unguem ab illa discedamus : tamen non semper tam rigida legum præsumitur obligatio. Has enim, qui tulerunt, aut qui instituta quædam inter homines introduxerunt, cum utique salutem aut commoditatem hominum per ea promovere voluerint, regulariter quoque ob oculos censentur habuisse conditionem naturæ humanæ, & quam non possit non homo refugere & amoliri illa, quæ ad sui destructionem tendunt. Inde regulariter leges in primis positivæ, & quævis instituta humana judicantur excipere casum necessitatis, seu non obligare, quando ipsarum observationem comitaturum esset malum, humanam naturam destruens, aut communi hominum constantia superius ; nisi expresse, aut propter negotij naturam iste quoque casus sit comprehensus. Unde necessitas non id quidem efficit, ut directe lex possit violari, & peccatum admitti : sed ex benevola legislatorum mente, simulque naturæ humanæ consideratione præsumitur, casum necessitatis sub lege generaliter concepta non contineri. Exemplo uno & altero res erit declaranda.

Observ.

Observ. 141.

Denique & tanti) Nonnunquam etiam Philautia & Socialitas colliduntur sine facto Ejus, in quem hæc exercenda *vid. Observ. 120.* Contingit illud ob *Necessitatem*, quæ tamen etiam Philautiam, cum se ipsa, aut Religione, committit. Est autem Necessitas hoc loco *periculum vitæ, membrorum aut rerum, sine nostra culpa excitatum, ex quo unica ratione evadere possumus, si scilicet actum, præceptis amoris divini, proximi aut sui ipsius, alias prohibitum, suscipiamus, vel præceptum omittamus.* In casu igitur imminentis ejusmodi periculi, quæritur, *an leges admittant exceptionem necessitatis i. e. an, ob curam sui ipsius, reliqua præcepta modo indicata, hoc casu non obligent, adeo ut impune & sine peccato, actus alias prohibiti aut præcepti suscipi vel omitti queant?* Autor quæstionem, datis rationibus, affirmat, ac sensum sententiæ affirmantis proponit §. 18. *b.*

2. Cæterum illa philosophia est nimis generalis, ac à scopo quodammodo abludit, dum magis de legibus & institutis positivis, quàm naturalibus pronunciat, idque generaliter, ut in ea animus acquiescere nequeat. Instruendæ igitur doctrinæ magis speciali, hæc prænotanda (1) quæstionem illam habere locum in dubio, ubi scilicet Legislator in neutram partem diserte quid pronunciavit (2) eam proponi intuitu legum naturalium, conjecturas tamen eruen-

dæ voluntatis, mox adducendas, legibus positivis etiam posse applicari.

3. Vulgo distinguunt inter præcepta *affirmativa* & *negativa*, in iis exceptionem necessitatis facile, in his difficulter admitti censes, quod ut distinctius ostendat *Dn. Thomas. 7. 7. D. l. 2. c. 1. §. 145. seqq.* interesse censet, utrum *necessitas habeat originem à Deo, an à malitia humana*, dein utrum *medium evadendi suppeditetur ab instinctu naturali, an à malitia hominum*, factâ postea applicatione, exceptionem necessitatis modo asserit, modo negat. Cæterum licet illæ circumstantiæ non male observentur, attamen cum rationem datæ decisionis non satis insinuent, hinc ulterius eundem videtur.

4. Mihi leges, quæ Deum respiciunt, à cæteris primo separandæ, ac quoad illas, hæ regulæ notandæ videntur (1) *Quoties susceptio vel omissio actionis, Dei contemptum aut abnegationem involvit, toties lex, quæ illa alias prohibet aut precipit, exceptionem necessitatis non admittit*, nam honori divino, vitam nostram cedere debere, ex conditione materiæ, ratio satis intelligit (2) *Quoties vero susceptio aut omissio actionis, alias prohibita vel præcepta, contemptum Dei non continet, toties lex necessitatis exceptionem admittit*, cum enim honor Dei non pericliteretur, ex benevola ejus mente obligatio suspensa præsumitur.

5. Ad exempla si applicetur regula, susceptio actionum, jure naturali vetitarum, Dei contemptum involvit, adeoque leges illæ negativæ exce-

exceptionem necessitatis non admittunt, præstatio tamen juramenti promissorii, sine intentione obligandi, in se inverecunda non est, adeoque, malo injuste illato, declinando, fieri posse videtur. Actiones autem, quas leges positivæ prohibent, in se sunt indifferentes, adeoque ex circumstantiis judicandum erit, utrum earum susceptio nonnunquam Dei contemptum involvat nec ne, nam juxta eas exceptio necessitatis neganda vel afferenda erit, exemplum est in esu carnis suillæ Judæis olim prohibito, *vid. Op. Maj. l. 2. c. 6. §. 2.*

6. Quod attinet præcepta naturalia affirmativa, illa ad cultum externum non obligare *Observ. II. §. 2.* diximus, hinc quæstio, *an in casu necessitatis cultus externus omitti queat*, cessat, quia juxta hæc principia semper omitti potest. Leges vero positivæ cultum externum requirunt, sed cum ejus omissio regulariter contemptum aut abnegationem Dei non involvat, hinc regulariter necessitatis exceptionem admittunt, aliquando tamen omissio illa pro abnegatione est, adeoque tum memorata exceptio cessat, exemplum est *Dan. VI, 10.*

7. Quoad præcepta homines concernentia, locum præcipue habet distinctio præceptorum affirmativorum & negativorum, illa admittunt exceptionem necessitatis, adeoque si vita nostra periclitetur, aut aliud incommodum immineat, actio alias præcepta licitè omittitur, Deus enim unicuique propriam curam ac

conservationem injunxit, ac præterea præcepto affirmativo voluit, ut in alios bonum conferamus, hæc igitur Dei voluntas ex priori restringitur, ut tum demum impleri debeat, si salus propria non periclitetur, imo tralatitium est, quod præcepta affirmativa non aliter obligent, quam positâ commodâ occasione, quæ vel maximè ob necessitatem deficit. *add. Observ.*

120. n. 2.

8. Circa negativa hæc regulæ notandæ (1) *Quoties susceptio actionis alias prohibita est medium certum depellendi periculum, nec majus aut æquale malum, quam imminens necessitas, toties lex exceptionem necessitatis admittit.* E contrario (2) *Quoties est medium incertum, & majus aut æquale malum, toties memoratam exceptionem lex respuit.*
9. Dicitur autem *medium certum*, quod cum celsatione periculi, physicam & necessariam connexionem habet, *incertum* vero, quod arbitrariam, à libidine ejus, qui necessitatem attulit, dependentem. *Mali* autem quantitas hic physicè æstimanda est, ad moralem enim respici nec potest nec debet, cum de eo quærat, an lex, quæ moralitatem producit, in casu necessitatis obliget nec ne, adeoque id, de quo controversitur, supponere haut liceat. De cætero circumstantiæ memoratæ satis probabiliter Dei voluntatem indicant, cum enim lex naturalis ad utilitatem generis humani pertineat, hinc si hominib9 minori malo defungi certò liceat, ejus electio meritò asseritur, alii si imminens

nens necessitas, malumque ei tollendæ suscipiendum, sint æqualia, nec hoc, medium certum amovendi periculum, tum nulla apparet ratio, cur id à prohibitione, cui alias subest, eximere debeamus.

§. 19. Quanquam alias homini non sit jus in sua membra, ut illa pro lubitu mutilet, perdatvè; licebit tamen *abscindere membrum insanabili* vitio correptum, ne totum corpus pereat, aut partes adhuc sinceræ trahantur, aut inutili appendice aliorum usus membrorum impediatur.

Observ. 142.

Quanquam alias homini) Applicatio non erit difficilis: Licebit pro conservanda vita membrum abscindere §. 19. *b.* abscissio enim membri est minus malum, quam amissio vitæ, præterea quoque medium certum, evadendi periculum. Idem erit, si pro conservando membro nobiliori, ignobilius & minus, tollendum sit. Duo autem notanda videntur (1) licentiam saltem, non præceptum afferendum videri (2) necessitatem in foro civili hic non rigidè æstimari, hinc licet à culpâ illa originem habeat, attamen actio alias prohibita, licite suscipi posse existimatur.

§. 20. Si in naufragio plures in scapham insiluerint, quam illa ferre possit, neque ad unum peculiari jure scapha pertineat: viden-

tur forte ducendi, qui projiciantur: & si quis fortis periculum subire detrectaverit, tanquam qui omnium interitum quærat, extra sortem præcipitari poterit.

Observ. 143.

Si in naufragio) Hic casus magis dubius est, videtur tamen affirmativa sententia ex regulis nostris, defendi posse. Sortis autem judicium, ob æqualitatem, est necessarium. Illi porro, qui alterius interitu servati sunt, peremti liberis aliisque, quos hic alere tenebatur, damnum resarcire suo modo debent.

Observ. 144.

Neque ad unum peculiari jure scapha pertineat) Dominus scaphæ sortis periculum ideo detrectare posse videtur, quod ex humanitate solum cæteros admiserit, hinc eos iterum expellere potest, quo facto, ipse in periculo non erit, ut morali æstimatione ad solos receptos hoc pertineat, qui adeo sorte inter se contendere debent.

2. Aliud exemplum huc quadrans de septem Britannis, exhibetur *l. 2. c. 6. §. 3.* De cætero uti nemo miserandum hoc medium præceptum dixerit, ita nec illud facile ab hominibus eadem calamitate oppressis adhibitum iri putem, licet hoc licite fieri queat, nam ut ut amor inter homines regulariter frigeat, attamen commune periculum humanitatis & commiserationis sensum satis tenerum excitare solet, ut

non

non dubitem, quin ii, quos tam dura fata premunt, simul perire, aut beneficio divino liberari, quam medio tam duro salutem non satis certam quærere malint.

§. 21. *Si duo in præsens vita periculum* incidunt, in quo utrique sit pereundum, uni quid facere licet, ex quo alteri, alias perituro, fata admoveantur, ut ipse salvus sit. v.g. Si ego natandi peritus cum altero natandi imperito in profundas aquas incidissem, & ille me circumplexus teneret, neque mihi tantæ sint vires, ut ipsum mecum aquis efferre valeam: poterò talem à me violenter amoliri, ne cum ipso simul suffocer, etsi is per exiguum tempus à me utcunque sustentari potuerit. Sic in naufragio, ubi ego tabulam occupavi duorum non capacem, si quis adnatans eidem quoque se velit injicere, me simul secum perditurus, poterò eum quavis violentia à tabula repellere. Sic quando duobus fugientibus hostis necem intentans instat, unus vel porta post se clausa, vel ponte dejecto alterum in periculo vitæ destituere potest, si uterque simul servari nequeat.

Observ. 145.

Si duo in præsens vita periculum) Hi casus minus dubii habent, quæstio enim est de præceptis affirmativis, quæ, cum, deficiente occasione, vim amittant, multo magis in casu necessitatis cessabunt.

§. 22.

§. 22. Ex necessitate potest alteri *periculum mortis aut magna læsionis intentari indirecte*, ita ut nobis non sit propositum ipsi nocere, sed duntaxat pro nostra conservatione talem actum suscipere, ex quo probabiliter noxa ipsi possit inferri; ut tamen mallemus quavis potius alia ratione necessitate nostra defungi, & ipsam læsionem, quantum in nobis temperemus. Sic si robustior mortem intentans me persequatur, ac in angusta via, qua fugiendum, forte quis occurrat; ubi admonitus non cesserit, aut id temporis locive angustia non admiserit, licebit illum prostrernere, & per eum jacentem fugam persequi, etsi probabiliter ex eo impulsu vehementer videatur affligendus. Nisi forte illi peculiari obligatione tenear, ut etiam ultro pro ipso periculum subire debeam. Quod si fugæ interpositus, admonitus licet, decedere via nequeat, puta si infans sit, aut claudus; saltem excusationem merebitur, qui super eundem saltum molitur potius, quam moras neciendo corpus hosti præbet. At vero si quis petulanter vel inhumane mihi obstiterit, & viam fugiendi concedere noluerit, etiam directe impelli ac prostrerni potest. Cæterum quibus per istos casus læsio conciliatur, eam tanquam fatalem calamitatem ferre debent.

Ex necessitate potest alteri) Necessitas etiam alium lœdere permittit, nam regulæ antea datæ hic locum inveniunt, damnum tamen, cessante periculo, est restituendum, necessitas enim damni restitutionem non excludit. In his & similibus exemplis exceptio necessitatis recte asseritur, aut si quis in sui conservationem, innocentem occidere jubeatur, exceptio cessabit, occisio enim alterius, est æquale malum & medium incertum, hinc non apparet, quare malum imminens, in alium devolvere, ac ob spem salutis incertissimam, actionem alias prohibitam, suscipere liceat. Idem est, si quis sub periculo vitæ, cum matre concumbere jubeatur, nam & hoc medium est per incertum.

§. 23. Si quis præter propriam culpam *in extrema inopia victus aut vestium* adversus frigus, necessariorum versetur, neque ab aliis locupletioribus atque abundantibus precibus, pretio, aut oblata sua opera, ut ultro sibi illas concederent, impetrare potuit; citra crimen furti aut rapinæ vi vel clanculū illas subducere poterit, præsertim si intentionem habuerit earum æstimationem præstandi, quando occasio oblata fuerit. Nam locuples in ejusmodi necessitate constituto ex officio humanitatis debebat succurrere. Quanquam autem regu-

regulariter, quæ ex humanitate debentur, hautquaquam vi possint eripi: tamen extrema necessitas efficit, ut talia non minus asseri queant, quam quæ ex obligatione perfecta debentur. Necesse tamen est, ut egenus omnes prius vias tentet, quo volente domino necessitatibus suis succurrere queat; nevé dominus pari necessitate teneatur, aut mox in eandem sit devolvendus. Et ut restitutio fiat, præsertim ubi alterius fortunæ non ferant, gratis tale quid condonare.

Observ. 147.

Si quis præter propriam culpam) In casu veræ necessitatis, res alienas auferre licet, quod dato casu, decisione, ratione decidendi, limitatione & exceptione, hic asseritur *add. l. 2. c. 6. §. 5.* Nimirum non tantum rationes generales, antea allatæ obtinent, sed & à majori ad minus argumentari licet, si enim præcepta, quæ alterius vitam & membra tuentur, in casu necessitatis cessant, multo magis ea, quæ res saltem respiciunt, vim suam amittent. Denique ablatio rei alienæ, præsupponit circumstantiam, arbitrio humano mutabilem, nam non aliter illa illicita est, quam *dissentiente domino*, hanc vero circumstantiam, positâ necessitate, non mutari, quis cum ratione dixerit?

2. Dissentiunt tamen alii ideo præcipue, quod *ablatio rei alienæ sit malum morale, amissio vero vitæ, naturale, adeoque hoc, velut minus, eligendum sit.*

fit, vid. Albert. Comp. Jur. natur. p. 2. c. 2. §. 20. 24.

Verum licet amissio vitæ, pro malo physico, hætenus haberi queat, cum casu, non nostro facto, illud immineat, attamen ablationem rei alienæ, esse malum morale tam abrupte supponi non potest, cum de hoc sit omnis quæstio, hinc utrumque malum physice spectari, ac ex hoc habitu, voluntas Legislatoris colligi debet.

§. 24. Denique videtur & necessitas, circa res nostras versans, veniam indulgere *res alienas perdendi*; ita tamen, ut citra nostram culpam id periculum rei nostræ extiterit; ut idem commodiore via dispelli nequeat; ut ne proviliori nostra re alterius pretiosiore perdamus: ut æstimationem ejusdem præstemus, si quidem ista alias peritura non fuerat, aut in partem damni veniamus, si alterius res una cum nostra alias peritura erat, quæ nunc sua jactura nostram servat. Quam æquitatem fere *leges nauticae* sequuntur. Sic & orto incendio, eoque ædibus meis imminente libet vicini ædes diruere, ita tamen, ut quorum ædes hoc modo servatæ sunt, pro rata vicini damnum sarciant.

Observ. 148.

Denique videtur & necessitas] Necessitas, quæ involvit periculum rerum, jus etiam dat, alienas

nas res perdendi, dummodo sit (1) necessitas vera (2) corruptio rei alienæ, minus malum & medium certum ac (3) periculo depulso, damnum resarciatur, hæc tamen obligatio cessat, si res nihilominus perisset §. 24. *b.* aut dominus, qui necessitatem præscivit vel præscire debuit, in ejus amissionem consenserit, vel ejus jacturâ periculum non sit depulsum.

Observ. 149.

Quam æquitatem fere leges nautica sequuntur) Ut lex Rhodia, de qua in jure Romano agitur. Cum vero hæc nihil aliud sit, quam specialis conclusio, ex generali juris naturalis æquitate, deducta, ac speciali casui, exortæ scilicet tempestatis & periculi in mari, applicata, hinc patet, quam incongruum sit, quando interpretes juris Romani, Legis Rhodiæ extensionem moliantur, ac similium casuum decisionem ex ejus æquitate, derivant, nam in aliis casibus, non ad rivulum, sed ad fontem recurrere par est, quod erratum etsi leve & vix annotatione dignum videri poterat, attamen nimia, ac in opprobrium velut juris naturalis facta legum Romanarum æstimatio, quam perversa hæc ratiocinatio innuit, censuram omnino meretur.

Observ. 150.

Sic & orto incendio) Hæc in thesi quidem recte dicuntur, sed vix in societate civili applicari possunt, nam ut plurimum non constat, quomodo incendium sit exortum, & sine hoc tamen præ-

præsupposito, de obligatione, quæ jura necessitatis comitatur, judicari nequit, aliquando etiam dolo vel culpa incendium excitatum esse liquet, quo casu memorata obligatio plane cessat, licet ille, qui damnum dedit, solvendo non sit; denique si incendium etiam casu sit exortum, tamen præcisè ostendi nequit, in quorum commodum ædes alienæ sint destructæ, & quinam in adeo ad damnum pensandum sint obligati, hinc experientia etiam testatur, quod illi, qui damnum senserunt, illud soli ferre cogantur, nisi vel conventionem vel statuto in antecessum modus resarciendi damnum, sit definitus, aut aliorum humanitas illud utcunque pensaverit.

CAPUT VI.

DE

OFFICIO QUORUMLIBET ERGA QUOSLIBET,

BET,

& primo, de non lædendis aliis.

§. I.

Sequuntur officia, quæ homini *adversus*
alios homines sunt exercenda. Eorum
aliqua proveniunt *ex communi obligatio-*
M *ne,*

ne, qua Creator omnes homines ut tales inter se devinctos voluit: aliqua autem *ex certo instituto* per homines introducto aut recepto, vel *ex certo hominum statu adventitio* promanant. Illa cuilibet erga quemlibet exercenda, hæc autem non nisi erga certos, posita certa conditione aut statu. Inde & illa possis vocare *absoluta*, hæc *hypothetica*.

Observ. 151.

Sequuntur officia) Tertium præceptum generale est; *exercendam esse socialitatem*. Videtur autem exercitium socialitatis in tribus consistere, si nemini malum positivum inferamus, imminens ab aliis avertamus, & bonum positivum in alios conferamus, hinc præceptum summum, in hæc tria specialia, in se tamen satis adhuc generalia, resolvi videtur (1) *neminem lade* (2) *malum ab aliis averte* & (3) *bonum in alios confer*, ex quibus infinita præcepta specialia, pro ratione variorum objectorum, velut conclusiones, eliciuntur.

Observ. 152.

Eorum aliqua proveniunt) Omnia autem socialitatis præcepta, vel ob *conditionem hominis naturalem* locum habent, vel *factum aliquod ac inde ortam conditionem adventitiam* præsupponunt, hinc in *absoluta* & *hypothetica* merito distinguuntur, id quod, uti Autor recte agnoscit, ita triplex officiorum præsuppositum, scilicet *communem obli-*

obligationem seu clarius, *statum naturalem*, *certum aliquod institutum*, ac *statum adventitium*, non recte constituere videtur, nam *institutum*, nempe *sermo*, *dominium* & *imperium* *vid. c. y. §. 22.* non est præceptorum naturalium *presuppositum*, sed *objectum*, circa quod præcepta naturalia, tam absoluta quam hypothetica, versantur illudque dirigunt, ceu ex infra dicendis amplius constabit.

§. 2. Inter officia absoluta seu quorumlibet erga quoslibet *primum* locum obtinet: *ne quis alterum lædat*; Est quippe hoc officium omnium latissimum, omnes homines ut tales complexum. Idemq; facillimum, utpote nuda actionis intermissione constans, nisi qua obluctantes rationi libidines quandoq; compescendæ sunt. Quin & maxime necessarium idem est, quod citra illud socialis hominum vita nullo modo consistere queat. Qui enim nihil boni in me confert, qui ne vulgaria quidem officia mecum miscet, cum eo tamen tranquille vivere possum, modo nulla ratione me lædat. Imo à maxima parte mortalium nihil amplius quam isthoc desideramus; bona fere inter paucos invicem communicantur. Ast cum eo, qui me lædit, nullo modo pacifice possum vivere; cum natura cuiq; tam tenerum amorem sui, rerumq; suarum in se verit,

ut non possit non omnibus modis repellere eum, qui istis noxam inferre aggreditur.

§. 3. Hoc ipso autem officio velut muniuntur non illa tantum, quæ per ipsam naturam alicui adfunt; uti est vita, corpus, membra, pudicitia, libertas; sed & quæcunque instituto aliquo atque conventionem humana sunt quæsitæ, sic ut quocunque legitimo titulo aliquid nostrum sit, hoc præcepto idem auferri, corrumpi, lædi, usibus nostris ex toto aut parte subtrahi veteretur. Unde hoc ipso interdicta intelliguntur quævis crimina, quibus aliis noxa infertur; uti est cædes, vulneratio, verberatio, rapina, furtum, fraus, vis, directe aut indirecte, mediate aut immediate illata, & quæ sunt similia.

Observ. 153.

Inter officia absoluta) Primum præceptum est: *Neminem læde*, cujus latitudo ratione subjecti, facilitas & necessitas §. 2. nec non amplitudo quoad objectum §. 3. ostenditur, quæ omnia satis plana & certa sunt, *add. l. 3. c. 1. §. 1.*

§. 4. Ex hoc porro consequitur: *Si cui sit ab altero læsio illata, damnum vè datum ullo modo, qui ipsi recte potest, imputari, id quantum fieri potest ab eodem esse sarcendum.* Alias enim vanum erit præceptum, ne quis lædatur, neve cui damnum detur, si ubi de
fa-

facto læsus fuerit, damnum ipsi gratis sit devorandum, & qui læsit fructu suæ injuriæ secure & citra refusionem gaudere queat. Neque etiam, citra necessitatem restitutionis, abs se invicem lædendis abstinebit unquam mortalium pravitas; nec ei, qui damnum passus est, facile fuerit, animum ad agendam cum altero pacem componere, quamdiu istius reparationem non obtinuerit.

Observ. 154.

Ex hoc porro consequitur) Ex illo fuit duplex conclusio hypothetica, latisime in vita civili patens, quarum altera, ob factum licitum existit, nempe *fidem datam serva*, de qua *c. 9.* agitur, altera ob illicitum, scilicet; *damnum tua voluntate, contra legis prohibitionem, invito datum, restitue*, quæ *§. 4. h.* refertur, ejusque firma cum principio suo connexio ostenditur, hinc ad omnes casus, quos præceptum de non lædendo complectitur, eadem quoque pertinet.

§. 5. Damnum etsi proprie ad rerum læsionem pertinere videatur; ita tamen late à nobis heic accipitur, ut notet omnem læsionem, corruptionem, diminutionem, aut sublationem ejus, quod nostrum jam est, aut interceptionem ejus, quod ex jure perfecto debebamus habere; sive id datum sit à natura, sive accedente facto humano aut lege attributum; aut denique omissionem ac denegationem

nem alicujus præstationis, quam alter nobis ex obligatione perfecta exhibere tenebatur. Ast si intercipientur, quæ ex obligatione duntaxat imperfecta debebantur, non censetur damnum datum, quod pensari debeat. Inconveniens enim fuerit damni loco ducere, talia non accepisse, aut pensationem eorum postulare, quæ ab altero non nisi in locum ultronei beneficii expectare poteram, & quæ inter mea, antequam ea accepero, censere non possum.

Observ. 155.

Damnum etsi propriè) Damnum est *rei perfectò jure ad nos pertinentis ablatio vel corruptio*, quod tum positivè tum negativè §. 5. b. declaratur *add. l. 3. c. 1. §. 3. Ziegler. in not. ad Grot. l. 2. c. 17. §. 9.* In jure Romano damnum strictius supponitur, ut notet *diminutionem rerum in patrimonio existentium, corpore nocentis directe factam.* Sed illa suppositio inusitata est, pertinetque ad legem Aquiliam Romanorum, nullumque habet alium usum, quam ut nomina actionum forensium, mutatis nonnullis circumstantiis, variarentur, hinc eadem, velut extraordinaria, ac rabulariam fori Romani quodammodo redolens, in disciplina juris naturalis merito negligitur.

§. 6. Sub damni porro nomine venit non modo res nostra, aut nobis debita, quæ læditur, perditur, aut intercipitur; sed & *fructus*, qui

qui ex ipsa re proveniunt, siue jam sint percepti, siue adhuc sperentur, si modo dominus eos percepturus fuerat: deductis tamen impensis, quæ ad fructuum perceptionem fuerunt necessarii. *Æstimatio* autem fructuum speratorum intenditur aut remittitur, prout propius aut longius à fine incerti proventus remoti fuerint. Denique & pro uno damno habetur, quicquid ex aliqua læsione velut naturali necessitate deinceps profluxit.

Observ. 156.

Sub damni porro nomine) Id facile patet, quoad obligationem nocentis, nihil interesse, siue damnum principaliter datum sit, siue postea accesserit, siue ex damno principali profluxerit, quod §. 6. *b.* admonetur *vid. l. 3. c. 1. §. 3. in fin. add. l. 22. §. 1. l. 23. pr. §. 2. l. 27. §. 8. ff. ad L. aquil.* In Jurisprudencia vero particulari, & privata illud latius exponi solet, quando effectus domini & Rei vindicationis expenditur.

Observ. 157.

Æstimatio autem fructuum spectatorum) Doctrina hæc particularis est, pertinetque ad casum, ubi res cum fructibus corrupta est, tum enim circa æstimationem fructuum, circumstantiarum hic memoratarum est habenda ratio.

§. 7. Potest autem quis alteri damnum dare non solum immediate & *per se*, sed & *per alios*. Potest & damnum immediate ab aliquo datum

datum *alteri* imputari, quia ad istud factum aliquid contulit vel faciendo, vel non faciendo, quod debebat facere. Quandoque inter plures, qui ad idem factum concurrerunt, unus *principalis* causa habetur, alter *accessorii* in loco est: quandoque omnes *pari* passu ambulant. Circa quos observandum, illos ita teneri ad reparationem damni, si revera causa damni fuerint, & momentum aliquod attulerint ad totum damnum, aut ejus partem. Ubi autem quis ad ipsum actum, quo damnum fuit datum, realis aliquid operæ non contulit, neque ut iste susciperetur, antecedenter effecit, neque in partem emolumenti venit; is licet occasione istius actus aliquo peccato obstringatur, ad restitutionem tamen damni non tenebitur; uti sunt, qui alienis malis lætantur qui patratum damnum laudant, excusant; qui, antequam fiat, optant, dum fit, favent aut assentantur.

Observ. 158.

Potest autem quis alteri] Possumus alii damnum dare (1) immediate, nostra voluntate & facto (2) mediate per alium, seu potius cum alio, quem vel nostra voluntate instruimus, vel ad cujus damnum, proprio motu datum, agendo aut patiando concurrimus, denique (3) damni ab alio perfecte dati possumus fieri participes, si in partem lucri veniamus; & his omnibus,

bus,

bus, pro diverso voluntatis influxu, ex circumstantiis colligendo, damnum diversimode imputatur, in iisque est obligatio ad damnum resarciendum, vel (4) occasione damni, proprio peccato, resarciendi obligationem tamen non operante, obstringi §. 7. b. add. l. 1. c. 5. §. 14. l. 3. c. 1. §. 4.

§. 8. Ubi *plures* ad unum actum, ex quo damnum profluxerit, concurrerunt, primo loco tenebitur, qui imperio, aut alio modo necessitatis quid habente, ad factum alios impulit. Patrator facinoris, cui ministerium detrectare non licuit, instrumenti tantum rationem habebit. Qui citra necessitatem ad facinus accessit, ipse primo loco tenebitur, tum ceteri, qui ad facinus aliquid contulerunt. Ita tamen, ut, si à prioribus reparatio damni fuerit facta, posteriores ab eadem sint immunes. (quod in poenis secus est.) Si plures per conspirationem aliquod facinus patrauerint, omnes pro singulis, & singuli pro omnibus tenentur; sic ut si omnes comprehendantur, singuli ratam partem ad damnum sarcindum conferre debeant. Ubi reliquis elapsis unus tantum deprehendatur, hic pro omnibus solvere tenebitur. Ubi autem ex deprehensis aliqui non sint solvendo, locupletes in solidum tenebuntur. Quod si plures citra con-

spirationem ad idem facinus concurrerint, ac discerni liquido possit, quantum quisque ad damnum contulerit; quisque tantum tenebitur ad id pensandum, quod ab ipso processit. Quod si unus solidum solverit, reliqui à reparatione damni liberantur.

Observ. 159.

Ubi plures ad unum actum) Pro diverso voluntatis influxu, diversa quoque ad damnum refarciendum est obligatio, aliquando causa moralis, principaliter, physica, in subsidium tenetur, aliquando inversus obligandi ordo occurrit, quia vero omnes, intuitu unius damni sunt obstricti, ideo quocunque etiam ordine teneantur, uno solvente omnium perimitur obligatio.

Observ. 160.

Quod in pœnis secus est) Disparitatis ratio est manifesta, in damno una omnium est obligatio, hinc uno æstimationem præstante, reliqui necessario quoque, ratione læsi, liberantur, sed quoad pœnam, multiplex est obligatio, & unusquisque ratione pœnæ suæ, seorsim obligatur, licet igitur unus pœnam sustinuerit, hoc ad cæteros non pertinet, nec eos ab obligatione propria liberat.

Observ. 161.

Si plures per conspirationem) Hoc casu nocentes, stilo juris Romani, ut *correi debendi*, obligantur, i. e. omnes quidem, saltem ratione unius damni,

damni, sunt obstricti, adeoque singuli ratam partem debent, si tamen læsus suum à singulis, vel omnino non, vel non satis commode, consequi queat, tum ab uno solidum exigere potest, qui adeo & pro se & pro sociis solvere cogitur, quæ durior obligandi ratio ex conspiratione non immerito deducitur. Non igitur *singuli solidum debent*, quod interpretes juris Romani vulgo asserere solent, sed *pro se & cæteris, certo casu, solvere coguntur*, quæ duo differunt.

Observ. 102.

Quod si plures citra conspirationem) Hoc casu distinguendum, ceu Autor quoque innuit, utrum damnum sit *dividuum*, & unusquisque pro rata saltem tenebitur, nec pro aliis solvere debet, an *individuum*, tum ob qualitatem damni ut correi debendi erunt obstricti, juxta ea, quæ proximè diximus, *conf. l. 3. c. 1. §. 5.*

§. 9. Ad reparationem damni tenetur non solum, qui dolo malo alteri nocuit; sed & qui præter directam intentionem per *negligentiam seu culpam*, quam evitare facile erat. Hæc enim non minima pars est socialitatis, ita circumspecte agere, ut nostra conversatio aliis non fiat formidolosa aut intolerabilis. Quin & sæpe ex peculiari obligatione quis ad accuratam diligentiam adhibendam adstringitur. Imo & levissima culpa ad reparationis necessitatem

tatem sufficere potest, si modo negotii natura exactissimam diligentiam non ultro velut adspernetur, aut ejus magis, qui damnum accipit, quam qui dat, culpa versetur: aut nisi magna perturbatio vel negotij circumstantia accuratam circumspeditionem non admittat: puta, si quis in fervore pugnae, dum arma quatit, proxime sibi adstantem lædat.

Observ. 163.

Ad reparationem damni) Ut quis ad damnum faciendum teneatur, requiritur (1) ut, *lege prohibente, damnum dederit* (2) *sua voluntate*, & quidem (3) *invito nocuerit*, nam læsi consensus, legis prohibitionem cessare facit, adeoque obligationem ad damni restitutionem impedit. Primum requisitum Autor omisit, secundum proposuit, & tertium obiter tetigit.

Observ. 164.

Tenetur non solum qui dolo) Voluntas nocendi directa, *dolus* audit, & haut dubie restituendi necessitatem operatur, indirecta vero, dum scilicet aliquid facimus vel omittimus, ex quo damnum sequi potest, *culpa* dicitur, quæ tribus gradibus, *leta, levi & levissima negligentia*, constare, in jure Romano, perhibetur, quæ doctrina bene se habet, ac ex communibus ratiocinandi principiis resultat, nam in rebus, quas accurate metiri non licet, tres gradus saltem asseri possunt, duo extremi, & tertius, qui utrumque

interjaceat, & nunc huic, nunc illi extremo proximior sit, de cætero, cum quævis culpa, etiam levissima, voluntatem nocentis in se contineat, hinc ob quamvis culpam, damnum etiam resarciendum est, nisi forte læsus in aliquem gradum consenserit, §. 9. b.;

Observ. 165.

Si modo negotii natura) Tertium requisitum in transcurso velut Autor hic attingit, nimirum si læsus in damnum consentiat, restitutio cessat. Consentit autem vel *directe & expresse*, quo casu res expedita, vel *indirecte & tacite*, dum vel ipse ea agit, ex quibus damnum incurrit, vel dum ex modo contrahendi personam, cum qua contrahitur, vel negotii naturam, consensus probabiliter colligitur.

Observ. 166.

Aut nisi magna perturbatio) Si facto quidem suo, sed sine voluntate, aliquis alterum lædat, tum damnum est fortuitum, & cessat restitutio, modo non voluntas præcesserit.

§. 10. Verum qui per *casum fortuitum* & citra suam culpam læsit, ad reparationem non tenetur. Quia cum nihil sit admissum, quod imputari ipsi queat, nulla ratio est, quare potius is, qui invitatus fecit, fatale malum luere debeat, quam alter, qui passus est.

Observ. 167.

Verum qui per casum fortuitum) Repetitur id, quod modo dictum est, vel etiam generalis doctrina,

na,

na, cujus exemplum præcessit, adducitur *add. l. 3. c. 1. §. 6.* Alias in genere casus fortuitus vel à *facto nocentis* dependet, vel *extrinsecus* advenit, ad cujus posterioris reparationem, neminem teneri facile liquet, nisi dolus, culpa, mora vel pactum præcesserit, prout sæpius in Jure Romano inculcari solet, non tamen sunt illa Romana & positiva, sed naturalia.

§. II. Illud quoque naturali æquitati congruum est, ut, si *homo noster* citra culpam nostram alteri damnum dedit, id vel ipsi pensemus, vel istum læso dedamus. Nam servus utique naturaliter reparationi damni à se dati, est obnoxius. Cum autem ipse non habeat bona, unde reparatio fieri queat, ejusque corpus domini sit; æquum sane est, ut dominus aut damnum sarciat, aut istum dedat. Alias enim servo daretur licentia omnes pro lididine lædendi, si neque ab ipso, qui nihil, ac ne seipsum quidem habet, neque à domino reparatio damni obtineri posset. Nam si vel maxime ob læsionem dominus ipsum verberibus aut carcere velit plectere, læso inde haut quidquam satisfieri potest.

Observ. 168.

Illud quoque naturali æquitati congruum est) Neque tamen hujus rei tractatio huc pertinet, hic enim agitur de obligatione, quæ ex facto nocentis oritur, qualis non est, quæ dominum, ob noxam servi vel animalis, afficit.

cit. Rem ipsam quod attinet, quatuor casus sunt distinguendi, vel enim servus damnum dat (1) *domino*, vel (2) *tertio instigante*, his casibus utrumque instigantem in solidum teneri, manifestum est, vel (3) *læso causam præbente*, hic nulla adest obligatio, ob læsi consensum, nisi servus modum defensionis excesserit, nam excessus ille pro voluntaria læsione merito habetur, adeoque ea obtinent, quæ circa casum quartum statim dicemus, vel (4) *proprio motu*, hoc casu æquitati esse consentaneum, ut dominus quoque obligetur, Autor §. II. b. ostendere nititur, sed tradita, neque obligationis *fundamentum*, neque *indolem* solide satis ostendunt, quare ita potius habendum.

2. Si servus nullius esset, & alium læderet, tum læsus, in læsionis emendationem, eum occupare potest, & reliqui homines ex jure naturali, quod læsionem vetat, hoc pati debent; Hæc obligatio naturalis ipsum etiam dominum, si casum contrarium supponas, afficit, nam dominia, in præjudicium socialitatis seu ad effectum læsionis impune committendæ, constitui nec possunt, nec debent. Debet igitur dominus pati, ut læsus servum sibi asserat, aut si hoc nolit, damnum resarcire, ex quo obligationis fundamentum, *indoles* & *ordo*, manifestissima sunt.

§. 12. Quin & idem circa *animalia nostra* æquum esse videtur, ut quando illa etiam citra nostram culpam, & contra naturam generis

ris sponte commota, alteri damnum dederint, dominus vel damnum sarciat, vel animal dedat. Nam si ab animali, quod in libertate naturali degebat, læsus fuisset, poteram utique qualitercunque damnum meum reparare illud capiendo vel occidendo: quod jus sane per alterius dominium tolli non potuisse videtur. Et cum dominus ex eo animali lucrum capiat, ego vero damnum ex eodem senserim; reparatio autem damni longe sit favorabilior, quam lucri adquisitio: adparet recte à domino animalis postulari, ut damnum datum reparet, aut si tanti non sit ipsi animal, illud noxæ dedat.

Observ. 169.

Quin & idem circa animalia nostra) Circa animalia nostra idem obtinet, nisi quod in casu tertio, quem antea retulimus, obligatio simpliciter cesset, brutum enim ratione carens, excedere nequit, ut simpliciter læsus sibi imputare debeat, si ab animali, à se instigato, damnum sentiat. Autor fundamentum obligationis, propius hic tangit, ejus tamen indolem & ordinem nondum recte exprimit. De cætero frustra contendit Grotius *de J. B. P. L. 2. c. 17. §. 21.* obligationem domini, hōc & præcedente casu esse ex solo jure civili, esto enim, quod dominus ex facto suo obligatus dici nequeat, attamen ipsum, sine facto prævio, jās naturale obstringere, satis antea ostensum est. §. 13.

§. 13. Sic igitur qui *damnum* alteri *citra dolum malum* dedit, ultro reparationem debet offerre, testarique malitiam abs se abfuisse, ne læsus ipsum pro hoste habeat, ac vicissim hostilia intentet. Qui autem *per malitiam* alterum læsit, is non solum ultro reparationem damni debet offerre, sed & pœnitentiam sui facti ostendere, veniamque petere. Vicissim læsus reparatine obtenta pœnitenti ac petenti *veniam dare*, & cum ipso in gratiam redire tenetur. Nam qui reparatione damni & pœnitentia adquiescere non vult, sed vindictam utique manu sibi quæsitum it, nihil aliud agit, quam ut acerbitati animi sui obsequatur, adeoque ex causa supervacua pacem inter homines abrumpat. Quo nomine damnatur etiam naturali lege *vindicta*, quæ nullum alium finem habet propositum, quam ægre facere illis, qui nos læserunt, eorumque dolore nostrum animum satiare. Eo proniores autem mortales ad condonandas mutuas offensas esse decet, quo frequentius ipsi supremi Numinis leges violant, eoque & ipsi venia quotidie opus habent.

Observ. 170.

Sic igitur qui) Summatim repetitur officium lædētis, illudque exemplis homicidæ, vulnerantis, adulteri & stupratoris, in quibus damni

N

æsti-

æstimatio non est adeo expedita, amplius declaratur *l. 3. c. 1. §. 7. seqq.* Sed res illa in vitâ civili non adeo magnum usum habet, cum enim æstimatio accurata in illis exemplis iniri nequeat, hinc ut plurimum eo nomine transigitur. Quæ porro de excusatione, poenitentia agenda & venia petenda, Autor hic admonet, illa præstare, generosum quidem, ast inter homines, ac in foro civili, usitatum non est.

Observ. 171.

Vicissim laesus) Humanæ indoli valde convenit, ignoscere, ac vindictam, quæ nihil aliud, quam alterius dolorem intendit, omittere §. 13. *b.* quatenus vero per vindictam intelligitur cura exigendæ cautionis, vel poenæ promeritæ imponendæ, eatenus juri naturali illa non repugnat.



CAPUT VII.

DE AGNOSCENDA
NATURALI

Hominum Æqualitate.

S. I.

Est homo animal non modo sui conser-
vandi studiosissimum, sed & cui insita
sit delicata quædam sui æstimatio, cui
si quid detrahatur, non minus sæpe
commoveri solet, quam illata corpori aut re-
bus noxa. Quin in ipso hominis vocabulo
judicatur inesse aliqua dignatio, sic ut ulti-
mum simul atque efficacissimum argumen-
tum, quo aliorum insolens insultatio retun-
ditur, isthoc habeatur: utique non canis sum,
sed æque homo atque tu. Cum igitur natura
humana omnibus æque competat, & nemo li-
benter velit aut possit illi sociari, abs quo non
saltem tanquam æque homo, & communis
naturæ particeps æstimatur: ideo *secundo lo-*
co inter officia quorumlibet in quoslibet ha-
betur: Ut quisque alterum hominem æstimet
atque tractet, tanquam naturaliter sibi æqua-
lem, seu ut æque hominem.

Est homo animal) Revertitur Autor ad præceptum de non lædendo, illudque intuitu specialis objecti considerat, nimirum prohibet lex naturalis, ne *aliis hominibus existimationem humanam negemus, sed illos potius ut naturaliter æquales, seu ut æque homines tractemus*, cujus veritatem licet quivis homo demonstrare forte nequeat, attamen omnes eam sentire, Autor admonet. Est de cætero ista juris naturalis conclusio, non tantum omnibus hominibus communis, sed & perpetua, præsupponit enim statum humanitatis immutabilem, quomodo-cunque igitur æqualitas hominum, statu advenitio mutetur, illa tamen perpetuo manet, adeoque inter omnes homines, cujuscunque demum illi sint conditionis eadem semper obtinet. Videntur autem domini ferociores & inhumani, qui homines imperio suo subiectos, immenso labore atterunt, vel ad instar brutorum, occidunt, aut vitæ periculo exponunt, hoc officium saltem violare, nam alias contemptus inter homines quidem frequens est, sed ideo aliis humanitatem non semper negamus, verum illos saltem pro hominibus vilibus, stupidis, & in genere pro talibus habemus, qui bonis illis, quibus nos excellere arbitramur, destituantur.

§. 2. consistit autem isthæc hominum æqualitas non in eo solum, quod hominum a-

dulto-

dultorum vires fere sint æquales, hæcenus, ut etiam imbecillior robustiori mortem adferre possit, per insidias, aut adjuvante dextertate, armorumque habilitate : sed & in eo, quod licet unus præ altero variis dotibus animi corporisque à natura sit dotatus, non eo minus tamen legis naturalis præcepta adversus alios ei sint exercenda, atque ipse ab aliis idem expectat; nec ideo plus licentiæ ipsi concedatur alios injuriis afficiendi. Sicuti & contra neminem parca in ipsum natura, aut tenuis fortuna per se ad id condemnat, ut deterioris conditionis circa fruitionem communis juris sit, quam alii. Sed quæ unus ab altero postulare aut expectare potest, eadem alii quoque, cæteris paribus, ab eodem debent; & quod juris quis in alios statuit, eo ipsum uti maxime convenit. *Obligatio quippe ad colendam cum aliis hominibus vitam socialem omnes homines aqualiter stringit; nec uni magis licet leges naturales in alio violare, quam alteri.* Et si nec desint populares rationes eam æqualitatem illustrantes; puta, quod ex eadem stirpe omnes descendamus, eodem modo nascamur, nutriamur, moriamur; quodque Deus nemini de stabili & inconcussa fortuna caverit. Sicut & scita religionis Christianæ parando Numinis favori non nobilitatem, potentiam, divitias.

vitiaſſe, ſed pietatis ſinceritatem commendant, quæ æque in humilem, quam illuſtri poſitum loco cadere poteſt.

Obſerv. 173.

Conſiſtit autem iſthac) Præſupponit memorata conſuſio *æqualitatem humanitatis*, quam triplici ratione, ſi mentem Ejus recte aſſequor, Autor probare nititur, ſed philoſophia hæc, ex ſcitis fere Hobbeſii *de civ. c. 1. §. 3. hic & l. 3. c. 2. §. 2.* adornata, parum ſolida eſt. Dicit (1) *hominum vires ſunt æquales*, ſed à virium æqualitate licet admiſſa, ad æqualitatem humanitatis, inferre non licet, nam etiam inter homines & bruta nonnulla, ea eſt virium æqualitas, ut ſe mutuo conficere queant, quibus tamen humanitatē æquo gradu ideo tribuere non licet.

Obſerv. 174.

Sed & in eo) Ratio (2) deſumitur ab *inequalitate bonorum nature & fortune*, verum licet hæc æqualitatem humanitatis non deſtruat, attamen eam etiam non probat, nulla enim eſt conſequentia, *homines quoad varia bona ſunt inæquales*, ergo *quoad humanitatem æquales*.

Obſerv. 175.

Sed que unus ab altero) Denique (3) urgetur obligationis naturalis æqualitas, ſed ita uſe ποῦν παρὰ τὸν κομμῖτι videtur, nam non ex æqualitate obligationis ad æqualitatem humanitatis eſt inferendum, ſed ex hac potius, illa adſtrui debet.

Obſerv.

Observ. 176.

Etsi nec desint rationes populares) Hæ præstant philosophiâ illâ eruditiori, quam Autor se dedisse existimat, nam satis vel probant vel illustrent humanitatis æqualitatem. Est etiam hæc adeo evidens, ut fere satius sit evidentiam illam simpliciter urgere, quam demonstrationem aliquam moliri.

§. 3. Ex hacce porro æqualitate consequitur: eum, qui aliorum opera ad commodum suum uti vult, vicissim quoque in eorundem usus sese dispensare debere. Nam qui postulat, ut alii quidem sibi inserviant, ipse contra semper immunis esse cupit, is alios utique sibi inæquales ducit. Inde uti ad societatem quam maxime sunt idonei, qui facile eadem omnibus permittunt, quæ sibi: ita plane insociabiles sunt, qui dum aliis superiores sese existimant, omnia licere sibi solis volunt, & ante cæteros honorem sibi arrogat, partemque præcipuam ex rebus in medio positis, ubi nullo præ reliquis eximio jure pollent. Unde & id inter communia legis naturalis officia est: *ut ne quis, cui peculiare jus non est quesitum plus sibi, quam reliquis arroget, sed alios æquo secum jure frui permittat.*

Observ. 177.

Ex hacce porro æqualitate) Hæc doctrina à scopo abludere videtur, nam præceptum allatum ge-

neralissimum est, ac inculcat etiam officia humanitatis, præterea ostendit, socialitatis officia esse reciproca & æqualia, quod ultimum tamen non simpliciter procedere, manifestum est, & hic innuitur, hinc de habitu officiorum ex diversa hominum conditione & statu, amplius judicandum est *add. Hobbes. de civ. c. 3. §. 9. Op. Maj. l. 3. c. 2. §. 4.*

§. 4. Eadem æqualitas quoque ostendit, quomodo quis sese debeat gerere, ubi *jus inter alios* ipsi sit *distribuendum*; nempe ut tanquam æquales eos tractet, & neutri præter merita causæ quid præ altero indulgeat. Secus enim si sit, is qui posthabetur contumelia simul & injuria afficitur, & dignatio à natura data eidem detrahitur. Unde consequitur, ut res communis æqualibus portionibus inter æquales jure sit dividenda. Ubi divisionem res non admittit, eadem communiter uti debent, qui æquale jus habent; idque si quantitas rei permittat, quantum quisque velit. Sin res istud non ferat, ut tunc utantur ea re præfinito modo, & proportionate ad numerum utentium. Alius enim modus excogitari non potest æqualitatem observandi. Quod si autem neque dividi res, neque communiter haberi possit, usus ejus sit vel alternus, vel sine hoc quidem succedat, aut reliquis, æquipollens præ.

præstari nequeat, per *sortem* uni res erit adjudicanda. Nam in ejusmodi casibus commodius quam fors remedium inveniri nequit; quippe quæ opinionem contemptus removet, & cui non favet, de dignatione nihil detrahit.

Observ. 178.

Eadem equalitas quoque ostendit) Hæc etiam doctrina fugitiva est, nam officium Arbitri pacto dirigitur, ut non opus sit, ultima socialitatis principia, eo nomine sollicitare, præterea in facienda distributione, ad æqualitatem humanitatis non erit respiciendum, sed alia & propiora fundamenta considerari debent *conf. l. 3. c. 2. §. 5. Hobbes. de civ. c. 3. §. 15. seq.* Incidit Auctor in confusum Hobbesium, hinc non potuit non paululum confuse philosophari!

§. 5. Contra hoc officium peccatur per *superbiam*, qua quis nulla de causa aut non sufficiente aliis se præfert, & velut inæquales eosdem præ se despicit. *Nulla de causa* dicimus. Nam ubi quis sibi rite jus quæsit, quod ipsi præ aliis prælationem dat, recte illud exercere & tueri potest, citra tamen inanem fastum, aut aliorum contemptum. Sicuti & contra quilibet alteri prælationem, honoremque, qui ipsi debetur, merito præstat. De cætero veræ generositati semper comes est

honestā quædam *humilitas*, quæ consistit in reflexione, quam facimus super infirmitate naturæ nostræ, & erroribus, quos olim potuimus commisisse, aut deinceps possimus committere, qui non minores sunt iis, qui ab aliis committi possunt. Per quam efficitur, ut nos nemini præferamus, reputantes cæteros æque bene suo libero arbitrio, ac nos, uti posse, quo æque pollent; cujus legitimus usus unicum illud est, quod homo pro suo reputare possit, & quo sese æstimare aut despicere queat. Nulla autem de causa sese efferre revera ridiculum est vitium, quia & per se stultum, propter nihil se magni facere; & quia alios omnes pro stultis habet, quasi ipsum citra rationem essent æstimaturi.

Observ. 179.

Contra hoc officium peccatur per superbiam) Sed hanc isto officio latius patere, jam innui *Observ. 172.* nam non tantum superbia se exserit, dum alii existimationem humanam negamus, sed & alio contemptu, imo etiam sine hoc. Philosophia igitur hæc, de superbia, generositate & humilitate, generalis est, nec præcise ad officium præcedens restringi, sed generalem potius de varia hominum existimatione, doctrinam referri debet.

Observ. 180.

Qua quis nulla de causa) Superbia commune quidem

dem vitium est, quod homines frequenter committunt, ac sibi mutuo imputant, id tamen recte explicare, non adeo est expeditum, nec ego ausim certi quid promittere, forte tamen ita dicendum: Est *nimia sui ipsius aestimatio*. Superbus igitur est, qui (1) nulla de causa se aliis præfert (2) qui ob nonnulla bona corporis, animi vel fortunæ, per se honorem non producentia, prærogativam sibi tribuit (3) qui nulla de causa honorem ambit & obtinet (4) artibus illicitis ad honorem grassatur (5) prærogativâ obtentâ immoderate utitur, eamque majorem censet, quam illa revera est. De cætero quævis superbia cum aliorum contemptu est conjuncta, qui tamen gradibus distinguitur, nam nonnunquam in sola honoris & benevolentiae negatione consistit, aliquando signis ad contumeliam spectantibus, positivè alios lædit. Ex quibus liquet, superbiam quoque gradibus discerni, nam si spectes *fundamentum*, est superbia vel *stulta*, de qua n. 1. vel *superbia simpliciter*, quæ in sui excusationem aliquid allegare potest, quo pertinent species re-
lata n. 2. 3. 4. 5. ac in primis tres posteriores; Porro si consideres *adjunctum*, exserit se illa vel cum *primi*, vel *secundi generis contemptu*, prior tolerabilis, posterior intolerabilis est, ac eo quidem intolerabilior, quo gravior est contemptus, & magis diluta vel nulla superbiendi causa.

Observ. 181.

Nulla de causa dicimus) A Superbia discernenda est *Generositas*, quæ est *recta sui ipsius æstimatio*. Generosus itaque est, qui (1) prærogativas suas agnoscit quidem, sed se non extollit (2) sua forte contentus est (3) actiones inhonestas & indecoras, velut sibi non convenientes, omittit, hinc (4) improborum & superbiorum gratiæ non adrepat (5) in ambiendis rebus caducis vanisque servili aliqua submissione non utitur (6) aliorum insolentem superbiam, prout circumstantiæ exigere videntur, vel generoso contemptu ulciscitur, vel mediis habilibus retundit. Vitia opposita sunt, *Timiditas*, *Adulatio* ac *servilis subiectio*, quæ hoc rerum statu, ubi scilicet superbia dominatur, evitari penitus non possunt, ut nemo hominum facile reperiat, qui non aliquando adulatus sit, imo superbia, sola illa vitia, veram humilitatem pronunciat.

Observ. 182.

De cetero vera generositati semper Comes est honesta quædam humilitas) Hæc videtur vel ad Deum, vel ad homines referri posse, illo respectu est *servia vanitatis humana agnitio*, & hinc orta *summa sui ipsius extenuatio*, hoc vero est, *superbiæ vel elationis omissio*, licet enim seipsum quidem recte æstimare, sed ne generositas limites excedat, ac in sui elationem ac proximi contemptum.

teintum degeneret, humilitas efficit. Ei ut operam demus, id leges divinæ exigunt, seria autem humanæ fortis consideratio, ad studium humilitatis impellit. Si enim perpendas, quod ea, quibus aliis præstas, tua non sint, vel si ab arbitrio tuo dependent, quod & aliis eadem efficere liceat, ac insuper in genere rerum humanarum inconstantiam, fragilitatem & vanitatem serio ad animum revoces, tum cristas superbiæ non facile eriges, quo tendit philosophia Auctoris *b.*

Observ. 183.

Nulla autem de causa sese efferre) Stulta est hæc superbia, ceu eam vocavimus *Observ. 179.* nam talis superbus prærogativam aliquam sibi persuadet ac novo simplicitatis specimine aliis stultitiam vel stuporem imputat, adeoque bis stultus est, ut hic docetur. De cætero si hæc superbia sine positivo aliorum contemptu se exferat, magis commiserationem, quam indignationem meretur, si vero cum contemptu illo conjuncta sit, tum est maximè intolerabilis.

§. 6. Magis adhuc peccatur, si quis *contemptum* adversus alios ostendat signis exterioribus, factis, verbis, vultu, risu, ac quacunque contumelia. Quod peccatum eo deteriorius est censendum, quo asperius aliorum ani-

animi in iras ac ulciscendi libidinem concitantur. Adeo ut multi deprehendantur, qui vitam malint præsentis periculo exponere, multo magis pacem adversus alios abrumperé, quam contumeliam inultam pati. Quippe cum per hanc violetur gloria & existimatio, cujus integritate & vigore omnis animi voluptas constat.

Observ. 184.

Magis adhuc peccatur) Summus hic est superbiæ gradus, si, ut jam diximus, nullus superbiendi prætextus simul subsit *add. l. 3. c. 2. §. 7. 8. Thomaf. 7. 7. D. l. 2. c. 3.* De cætero aliorum contemptus non semper ex superbia procedere videtur, cum etiam ex lasciviâ & iracundia originem habere possit.



CAPUT VIII.

DE

PROMISCUIS OFFICIIS HUMANITATIS.

§. I.

Inter officia quorumlibet erga quoslibet, & quæ propter communem socialitatem sunt exercenda, *tertio* loco id ponitur : ut quilibet alterius utilitatem, quantum commode potest, *promoveat*. Cû enim cognitionẽ quandam inter homines natura constituerit, parum fuerit alios non læsisse aut contempsisse, sed talia quoque in alios conferenda, aut invicem communicanda, ex quibus mutua inter homines benevolentia alatur. Prosumus autem aliis vel *indefinite*, vel *definite*; idque ut vel *nihil* nobis vel *aliquid* decedat.

Observ. 185.

Inter officia quorumlibet) Sequitur gradus socialitatis sublimior, quem reliqua præcepta : *Bonum in alios confer, & malum ab iis averte* vid. *Observ. 151.* dirigunt. Autor illa conjunctim proponit,

nit, eorum veritatem innuit, ac conclusiones inde eliciendas partitur §. 1. b. add. l. 3. c. 3. §. 1.

§. 2. *Indefinite* aliorum commoda promotum it, qui animam, ac corpus suum probe excolit, ut utiles abs se actiones in alios proficisci queant; ut si ingenii per solertiam talia inveniat, quibus vita humana reddatur instructior. Unde contra hoc officium peccare sunt censendi, qui nullam honestam artem addiscunt, vitæque per silentium transita animam pro sale habent, ne putrescant, numerus tantum & fruges consumere nati. Et qui opibus per majores relictis contenti, ideo impune abs sese ignaviæ litari credunt, quod aliorum industria jam sit partum, unde victitent. Et qui divitiis soli incubuere repertis, nec partem posuere suis. Item qui ad porcorum instar neminem nisi morte sua exhilarant. Et id farinæ alia otiosa terræ pondera.

Observ. 186.

Indefinite aliorum commoda) Poterunt huc referri ea, quæ de cura sui ipsius *Observ. 109. seqq.* diximus, nam illa, & ex regulis Philautias, & socialitatis repeti potest, quo enim aliis inservire queas, & animus & corpus recte præparari debent.

§. 3. Vicissim illis, qui de mortalium gerere bene mereri instituunt, cæteri hoc debent,

ut

ut ipsis ne invideant, nec præclaris eorundem conatibus remoram injiciant. Tum si alia non sit via paria cum istis faciendi, saltem celebritatem memoriæ famæque eorum, qui præcipuus laborum fructus est, promotum eant.

Observ. 187.

Vicissim illis) Ad indefinita humanitatis officia etiam pertinet, ut eorum, qui de genere humano bene mereri instituunt, conatus adjuvemus, aut saltem non impediamus, ut iis, data occasione, gratum animum testemur, aliosque ad paria facienda, hac ratione inviteamus §. 3. *b. add. l. 3. c. 3. §. 2.* Cæterum illa officia nimis laxa sunt, exiguumque in vita civili habent effectum, sæpe etiam eorum exhibitio multum vanitatis, simulationis ac irrisionis habet adjunctum ac rarò illa sincere & ex animo verè amico præstantur,

§. 4. Imprimis autem illa bona, quæ citra nostrum detrimentum, molestiamque aut laborem præstari possunt, non libenter in alios dispensare, detestanda malignitas & inhumanitas habetur. Quæ vocari solent *res innoxie utilitatis*, seu quæ accipienti profunt, præstantem non gravant. Uti sunt, non prohibere aquam profluentem; pati ab igne ignem capere, consilium fidele deliberanti dare, erranti comiter monstrare viam. Sic si
O
quis

quis rem aliquam amplius possidere nolit propter nimiam copiam, aut quia asservatio ejus ipsi molesta est; cur non malit eam potius integram relinquere, ut aliis non hostibus usum præbere possit, quam eandem corrumpere? Sic non fas nutrimentum perdere, ubi nos saturati sumus, neque fontem obturare, aut occultare, ubi nos affatim bibimus, neque signa navigationis itinerisque abolere, postquam iis usi sumus. Huc pertinent modicæ stipēs locupletum in egenos collatæ; item illa humanitas, quæ justa de causa peregrinantibus exhibetur, præsertim ubi aliqua ipsos calamitas oppresserit: & ejus generis alia.

Observ. 188.

Imprimis autem illa bona) Define aliis prosumus, dum certis personis vel vulgarem humanitatem exhibemus, vel beneficia præstamus. Prius varia ratione fieri potest, hinc diversas conclusiones formare licet §. 4. b. quibus ex Op. Maj. l. 3. c. 3. §. 5. seqq. aliæ addi possunt, ut nimirum innoxium transitum per terras nostras aliis concedamus, commercia institui patiamur, ac ad littus nostrum accessum indulgeamus.

2. Qui ista officia & similia negligit, dicitur *Inhumanus*, cavendum tamen est, ne indistincte, ob omittas istas actiones, inhumanitatis quem infimulemus, nam illa præcepta non aliter obligant,

gant, quam posita *commoda occasione*, qua deficiente, recte omittuntur actiones alioqui præceptæ. Ex quo liquet, officia hæc satis laxa esse & exigui effectus. Imo inter diversas civitates sæpe magna hic opus est circumspectione & prudentia, ne inconsulta humanitas noceat, est enim inter diversas gentes, si non perpetua hostilitas, attamen amicitia parum fida, ac sempiternum alios subruendi studium.

3. Sunt de cætero officia humanitatis reciproca, & qui nostram humanitatem expertus est, ad similem data occasione obstringitur, ad quam obligationem implendam sæpe Gentes sese mutuo adigunt. Ex quo principio vectigalium & stapulæ æquitas deducitur *vid. d. c. 3. §. 6. 7.*

§. 5. Sublimior gradus humanitatis est, ex singulari benevolentia gratis quid in alterum conferre, impensa aut opera laboriosa constans, quo ipsius necessitatibus subveniatur, aut eidem insignis quæpiam utilitas concilietur. Quæ κατ' ἐξοχήν vocantur *beneficia*, aptissima materia insignem laudem parandi, si magnitudo animi, & prudentia eadem rite temperavit. Eorum dispensationem ac modum fere conditio dantis atque accipientis inoderatur. In quibus id cum primis observandum, ne obsit benignitas & iis ipsis, quibus benigne videtur fieri, & cæteris: deinde ne

major benignitas sit, quam facultas; tum ut pro dignitate cuique tribuatur, & quidem ante omnia bene meritis, tum ut quisque nostræ opis indiget, observatis quoque conjunctionis gradibus inter homines. Videndum quoque, quid cuique maxime necesse sit, & quid quisque nobiscum, aut sine nobis possit consequi aut non possit. Modus quoque dandi multum gratiæ beneficiis addit, si hilari fronte, promte, & cum contestatione benevolentia demus.

Observ. 189.

Sublimior gradus humanitatis est) Præterea ad sublimiorem humanitatis gradum, seu beneficium conferendum quoque homines obligantur, sed itidem non aliter, quam *presente occasione*, quæ ex persona dantis & accipientis ferè æstimatur §. 5. b.

Observ. 190.

Modus quoque dandi) Posita occasione, beneficium prompte conferri jubet lex naturalis, si occasio desit, aliquis beneficium conferendo, etiam male agere potest, nisi per ignorantiam excusetur, in quam partem proclives esse debemus, cum satius sit, decem indignis beneficium dare, quam uni, qui illud merebatur, negare, si quis cum animi averfatione, liberalitatem exerceat, is laudem viri benefici non meretur *add. l. 3. c. 3. §. 15.*

§. 6. Vicissim in eo, qui beneficium accepit, existere debet *gratus animus*, quo is ostendit, istud sibi acceptum fuisse, dantiq; eam ob causam favet, & occasionem querit paria reponendi, aut amplius, quantum ejus fieri potest. Nam id non necessarium est, ut præcise tantum reddamus, quanti id fuit, quod datum est; sed sæpe studium & conatus obligationem explent. Modo tamen nihil sit, quod ei, qui beneficium se dedisse prætendit, recte opponi possit. Nam qui me ex aquis extraxit, ei nihil debeo, si me in eas prius conjecerat.

Observ. 191.

Vicissim in eo) Ex collatione beneficii veri, in accipiente oritur obligatio ad gratitudinem, quæ indefinita est, tam ratione *temporis*, quam *rei præstandæ*.

§. 7. Cæterum quo magis ad devinciendos hominum animos apta sunt beneficia, eo acrius ad gratiam referendam incumbere decet, qui ista accepit. Saltem ne eum, qui fiducia nostri prior nobis benefecit, ob eam rem deteriore esse conditione patiamur; ne vè beneficium accipiamus, nisi animo nitendi, ne dantem merito dati poeniteat. Nam si certam ob causam peculiariter alicui nolimus obligari, licebat oblatum beneficium dextre

recusare. Et sane si absque necessitate gratiæ referendæ foret, contra rationem fecerit, si quis sua temere jactaverit, & quod perituum prospicit beneficium prior contulerit. Quo modo omnis tolleretur inter homines beneficentia & fiduciam, unaque omnis benevolentia, neque esset inter eos quidquam gratuiæ opis, nec ullum gratiæ conciliandæ initium.

Observ. 192.

Ceterum quo magis) Veritas memoratæ obligationis duplici argumento, ab *intentione conferentis & absurdo*, quod negatam obligationem sequeretur, desumpto, probatur, quæ satis certa sunt *add. l. 3. c. 3. §. 16.* nec obstat, quod *intentio obligandi, cum beneficio non consistere posse, sed illud in creditum mutare videatur*, nam obligatio indefinita saltem intenditur, porro nec id obest, quod *obligatio illa videatur supervacanea, cum accipiens ex communi humanitatis præcepto benefactori suo jam sit obligatus*, commune enim hoc vinculum nova obligatione magis intenditur.

§. 8. Quanquam autem *in animo ingrato per se nulla sit injuria*: foedius tamen & magis odiosum ac detestabile habetur nomen ingrati quam injusti. Censetur enim animi valde abjecti & degeneris, seipsum indignum declarare eo judicio, quod alter de ipsius probitate

bitate

bitate tulit; ac ne beneficiis quidem, quæ etiam bruta demulcent, moveri posse ad concipiendum humanitatis sensum. In foro tamen civili ob simplicem ingratitudinem seu ubi quis nude beneficii obliviscitur, & occasione id data referre negligit, *actio* non solet dari. Pars enim optima beneficii perit, si actio, uti certæ pecuniæ, detur; jam enim creditum esse incipiet. Et cum res honestissima sit referre gratiam, desinet esse ira splendide honesta, si sit necessaria. Denique huic uni legi vix omnia fora essent suffectura, ob difficillimam æstimationem circumstantiarum, quæ beneficium vel intendunt, vel elevant. Et eam ipsam ob causam beneficium dedi, i. e. ejus quod dedi refusionem mihi stipulatus non sum, ut & alteri foret occasio ostendendi, se honesti amore, non ex metu pœnæ humanæ aut coactionis gratiam retulisse; utque ipse non spe lucri, sed ob humanitatem exercendam videar erogasse, de quo recipiendo mihi caveri noluerim. Enimvero qui non solum beneficium non rependit, sed, & benefactori insuper malum reponit, ille ob hocce factum eo graviore pœna est afficiendus, quo fœdiorum animi malignitatem sibi inesse ostendit.

animi in iras ac ulciscendi libidinem concitantur. Adeo ut multi deprehendantur, qui vitam malint presenti periculo exponere, multo magis pacem adversus alios abrumperé, quam contumeliam inultam pati. Quippe cum per hanc violetur gloria & existimatio, cujus integritate & vigore omnis animi voluptas constat.

Observ. 184.

Magis adhuc peccatur) Summus hic est superbiæ gradus, si, ut jam diximus, nullus superbiendi prætextus simul subsit *add. l. 3. c. 2. §. 7. 8. Thomasi. 7. 7. D. l. 2. c. 3.* De cætero aliorum contemptus non semper ex superbia procedere videtur, cum etiam ex lasciviâ & iracundia originem habere possit.



Observ. 195.

Enim vero qui non solum) Propter ingratitudinem atrocem actio in foro civili conceditur, aut prout alii loqui malunt, ingratitudo illa actionem, ex delicto aliquo ortam, aggravat, quamvis hæc conciliari posse videantur, nam delictum, quod à propria suâ forma, injuria v. gr. vel furtum audit, in ordine ad benefactorem, recte etiam ingratitudo dicitur.

CAPUT IX.

DE

OFFICIO PACISCENTIUM IN GENERE.

§. I.

AB officiis absolutis ad hypothetica fit velut transitus per pacta inter media, quippe cum omnia officia, præter jam enumerata, pactum expressum aut tacitum videantur præsupponere. Igitur hoc loco agendum erit *de natura pactorum*, & quid illa ineuntibus observandum sit.

Observ. 196.

Ab Officiis absolutis) Connexio hæc non satis solida est, nam officia hypothetica non tantum ex pacto,

pactis, sed & delicto oriuntur, deinde officia hactenus enumerata sæpe etiam pactum præsupponunt, quis enim dubitet, quin alios, ratione eorum, quæ ex pacto tenent, lædere prohibeamur, aut illorum respectu, humanitatem erga illos exercere jubeamur? ipse Autor c. 6. §. 3. prius submonuit; denique officia, deinceps explicanda sæpe quidem, sed non semper, pactum præsupponunt, sermo sane absolutis socialitatis præceptis non raro dirigitur, ceu ex infra dicendis constabit, eum verò pacto esse introductum, Autor quidem putat, sed sine ratione, ceu suo loco ostendemus.

Observ. 147.

Igitur hoc loco agendum) Potius igitur dicendum, expendi nunc alteram conclusionem generalem, quæ ex præcepto de non lædendis aliis resultet *vid. Observ. 154.* ac, absoluta ita præceptorum Socialitatis consideratione generali, eadem deinceps, ratione Objectionum specialium, distinctius considerari, de cætero nec generalis nec specialis tractatio, aptè satis mihi cohærere videtur quæ tamen mutare non licet. Hoc loco (1) de *pactis* (2) *officiis circa ea*, agendum erit,

§. 2. Fuisse autem *necessarium pacta inter homines iniri*, satis manifestum est. Quamquam enim officia humanitatis late sese per vitam humanam diffundant: haut quidquam tamen ex eo solo fonte deduci omnia possunt, quæ

quæ hominibus ab se invicem utiliter percipere licebat. Nam neque quibusvis ea est ingenii bonitas, ut omnia, quibus aliis prodesse possunt, ex sola humanitate velint præstare citra exploratam spem paria recipiendi. Et frequenter illa, quæ ab aliis in nos proficisci queunt, ejusmodi sunt, ut gratis eadem nobis exhiberi salva fronte postulare nequeamus. Sæpe quoque nostram fortunam aut personam non decet, alteri tale beneficium debere. Adeoque ut plurimum alter dare non potest, sæpe nos accipere nolumus, nisi iste paria à nobis recipiat. Non raro denique alios latet, qua ratione commodis nostris inservire queant. Igitur ut mutua inter homines officia, qui fructus est socialitatis, eo crebrius & ad certas velut regulas exerceantur, necessum fuit homines ipsos inter se convenire super ejusmodi rebus invicem præstandis, quæ ex sola humanitatis lege certo sibi polliceri ab aliis non poterant. Adeoque in antecessum determinandum fuit, quid alteri quis præstare, quidque ab eodem iterum expectare, suoque jure exigere deberet. Id ipsum autem fit per *promissa & pacta*.

Observ. 198.

Fuisse autem necessarium) Pactum est duorum vel plurium consensus, obligationis licite constituen-
da

de vel tollenda causa datus. Quodsi homines absoluta socialitatis decreta exactè observarent tum dominia rerum, ut & imperia, cum multis capitibus, eadem sequentibus, probabiliter cessarent, hinc, isto rerum statu, vel nullus vel exgius etiam pactorum foret usus, Ast si indolem generis humani supponas, pro-ut revera est, tum sine pactis vitam exigere, plane est impossibile. In summa, opus pactis est (1) ut obligationes novæ constituantur, quod quatuor rationibus Autor §. 2. b. confirmat *conf. l. 3. c. 4. §. 1.* (2) bello abruptæ restituantur (3) constitutæ tollantur, ac (4) imperfectæ & laxiores nonnunquam magis adstringantur.

§. 3. Circa isthæc generale officium ex lege naturali debitum est: *ut quilibet fidem datam servet*, seu promissa & pacta expleat, Citra hoc enim si esset, plurima pars utilitatis periret, quæ humano generi communicatis invicem operis ac rebus enasci apta est. Et ni promissa servandi necessitas foret, haut-quidquam liceret rationes suas firmiter aliorum hominum subsidiis superstruere. Quin & ex decepta fide justissimæ querelarum bel-lique causæ pullulare sunt idoneæ. Nam ubi ego ex pacto aliquid præstiterim, altero fidem fallente, mea mihi res aut opera frustra perit. Sin vero nihil adhuc præstiti, rationes tamen,
& de-

& destinata mea turbari molestum est; cum alio modo rebus meis potuissem consulere, nisi iste se mihi obtulisset. Et indignum est ludibrio haberi, quia alterum cordatum ac bonum virum credidi.

Observ. 199.

Circa isthac generale officium) De hoc demum agendum erat post conceptum pacti adæquatè expositum. Quoad rem ipsam, potest vel quæri *de officio aliorum*, qui paciscentes non lædere, ipsisque, in conciliando pacto humanitatem exhibere tenentur, vel *ipsorum paciscentium*, hos etiam tam ante pactum, quam in pacto, memorata præcepta obstringunt, post pactum verò, præceptum de non lædendo, fidem datam servare jubet, cujus conclusionis, cum suo principio connexionem, Autor §. 3. b. ostendit, *add. l. 3. c. 4. §. 2.*

§. 4. Observandum autem, ea quæ ex solo humanitatis officio debentur, in eo potissimum differre ab iis, quæ ex pacto aut promisso perfecto debentur; quod ista quidem recte petantur, & honeste præstentur; sed ubi alter ea ultro præstare neglexerit, de inhumanitate duntaxat, feritate, aut duritia ejusdem queri possum, non tamen per violentiam propriam aut superioris eundem ad præstandum cogere. Id quod tamen licet, ubi ultro non præstantur, quæ ex promisso perfecto aut pacto

pacto debentur. Inde etiam ad illa *jus imperfectum*, ad hæc *jus perfectum* habere: sicut & ad illa *imperfecte*, ad hæc *perfecte obligari* dicimur.

Observ. 200.

Observandum autem) Uti autem præceptum de fide servanda, ob infinita pactorum exempla, infinitas quoque conclusiones magis speciales sub se continet, ita idem regulariter *jus & obligationem perfectam* producit, quo nomine à præceptis humanitatis *jus & obligationem imperfectam* saltem producentibus, illud differre, Autor §. 4. *h.* docet, dicendum tamen est, quod hæc non *naturâ sua*, aut *in se*, imperfecta sint, sed saltem ob *defectum idonei executoris*, nam præcepta humanitatis, & in se laxiora ac quodammodo incerta sunt, eorumque observantiam vita civilis præcise non requirit, hinc eorum executio cuiusvis conscientiae relinquitur.

§. 5. Fidem damus vel *per actum solitarium* seu *μονόπλευρον*, vel *per actum reciprocum* seu *διπλευρον*. Quandoque enim unus se duntaxat ad quid præstandum obstringit; quandoque autem duo pluresvè mutuo se ad quid præstandum obligant. Prior actus vocatur *promissum gratuitum*, posterior *pactum*.

Observ. 201.

Fidem damus vel per actum) Distinguitur pactum à *sine* in *Obligatorium*, quod obligationis constituendæ *Liberatorium*, quod ejus tollendæ causâ

initur, & *Mixtum*, quo obligatio partim constituitur, partim tollitur exemplum est in *Transactione*. De illo hic saltem agitur, istud vero *cap. 16.* expenditur, ex qua utraque tractatione, hoc quoque intelligitur.

2. Poterit pactum Obligatorium à variis circumstantiis, variè iterum distingui, quæ divisiones eatenus in Jurisprudencia naturali commemorari possunt, quatenus præsupponunt circumstantias omnibus Gentibus communes, hæ enim Juris Gentium meritò existimantur. Sic pacta rectè discernuntur (1) in *unilateralia* & *bilateralia* §. 5. b. denominationes Autoris sunt arbitrariæ (2) *expressa* & *tacita* §. 9. b. (3) *realia* & *personalia* (4) *benefica* & *onerosa*, & si quæ ejus generis alia occurrunt. In jure Romano aliæ pactorum divisiones occurrunt, sed Romanis propriæ, ac ex fori Romani corruptione ferè oriundæ, quæ adeo extra juris naturalis Disciplinam sunt hætenus, ut eas ita simpliciter memorare non liceat.

§. 6. *Promissio* potest dividi in *imperfectam* & *perfectam*. Illa est, quando ipsi quidem, qui promittimus, utique obligari volumus; ut tamen alteri jus ad exigendum non demus, seu ut nolimus ad promissum nostrum implendum violenter compelli. v. g. Si ita concipiam promissum; ego serio destinavi hoc vel illud tibi præstare, & peto, ut mihi credas. Sic enim videor obligatus magis ex lege veracitatis,

citatis, quam justitiæ, maloque videri propriæ constantiæ & gravitatis impulsu ferri ad faciendum officium, quam propter jus alterius. Huc spectant pollicitationes virorum potentum aut gratiosorum, quibus alicui non per verba honoris, sed serio suam commendationem, intercessionem, promotionem, aut suffragium spondent: quæ tamen hautquaquam velut jure aliquo abs se volunt exigi, sed in solidum suæ humanitati ac veracitati cupiunt imputari: ut officii sui gratia eo major sit, quo longius ab eodem coactio abfuerit.

Observ. 202.

Promissio potest dividi) Promissio imperfecta in statu naturali non aliter occurrit, quam quatenus hoc actum est. In statu autem civili non tantum illud promissionis imperfectæ exemplum datur, quo pertinet doctrina Autoris §. 6. b. add. l. 3. c. 5. §. 5. 6. sed & promissio imperfecta est, quæ juxta juris civilis præscriptum non est inita, aut quam Princeps, Imperantem non habens, subditis suis facit, nam deest legitimus & idoneus executor.

§. 7. Perfecta autem promissio est, quando non solum ipse utique obligari volo, sed & simul jus in alterum confero, ut rem promissam velut debitam plene me poscere queat.

Observ. 203.

Perfecta autem) Promissio perfecta est, ad quam
im-

implendam quis jure cogi potest & solet, sæpe tamen ex accidenti promissiones illæ, in effectu imperfectæ sunt, dum, in statu civili, Magistratus negligenter & languide auxilia imperitur, vel in statu naturali, pars læsa viribus alterum cogendi destituitur, adeoque, per regulas prudentiæ, bellum omittere, obligationisque impletionem, alterius arbitrio relinquere tenetur.

§. 8. Porro ut promissa & pacta nos obligent ad aliquid dandum aut faciendum, quod antea non debebamus, aut omittendum, quod antea jure poteramus facere, maxime requiritur *ultroneus noster consensus*. Nam cum cujusvis promissi & pacti impletio cum aliquo onere sit conjuncta, nulla propior ratio est, quare super eo conqueri recte nequeamus, quam quia ultro in id consensimus, quod evitare penes nos erat.

Obseru. 204.

Porro ut promissa & pacta) Pactorum essentia consistit in *Consensu*, nam uti sine hoc, præstationem quandam maximè operosiorē & molestam, aliquem postulare, læsio est, ita eo posito, omnis querendi causa cessat, & jus naturale præstationem illam exigit §. 8. *b.* Debet autem consensus esse (1) *declaratus* (2) *verus* & (3) *mutuus*.

§. 9. Consensus etsi regulariter per *signa*, puta voces, literas, nutusque exprimi soleat;

P

ali-

aliquando tamen contingit, ut ille citra isthæc signa ex ipsa negotii natura, aliisque circumstantiis liquido colligatur. Sicuti interdum *silentium*, cum certis circumstantiis consideratum, loco signi consensum exprimentis valet. Unde & dantur *pacta tacita*, quando nempe consensus noster non per ejusmodi signa, quæ regulariter in commercio hominum recepta sunt, exprimitur, sed quando idem ex negotii natura, aliisque circumstantiis liquido colligitur. Sic & principali pacto sæpe adhæret pactum tacitum, quod ex ipsa negotii natura profluit. Sicut & usitatissimum, ut in pactis tacitæ quædam exceptiones & conditiones necessariae sint subintelligendæ.

Observ. 205.

Consensus etsi regulariter) Juxta ordinem Autoris, consensus (1) debet esse *declaratus*. Declaratur autem vel *expresse*, per signa exprimendo consensui inter homines recepta, vel *tacitè*, per facta & non facta, à sciente suscepta, declarandæ tamen voluntati directò non adhibita, quam declarandi rationem alterâ esse obscuriorem magisque incertam, facile liquet. Consistit ergo natura consensus taciti in eo, si ratio humana ex scientiâ ac affectu hominis agentis, vel non agentis, consensum colligat, hanc collectionem si quis dicere velit *Presumptionem*

nem, tum consensus *tacitus* & *præsumtus*, hactenus coincident. Sed sæpe ille consensus, *præsumtus*, seu stilo juris Romani, *fictus* dicitur, quando ejus, qui rem ignorat, adeoque in eam neque directè neque indirectè consentire potest, consensus ideo asseritur, quod, si sciret & intelligeret, in eam facile esset consensurus, aut etiam ob æquitatem consentire deberet, hoc sensu consensum tacitum & præsumtum differre, manifestum est. De cætero hujus consensus præsumti, in vita civili, nulla est vel necessitas vel utilitas, sed Romani Juri & interpretes eum faltem finxerunt, quod obligationem aliquam inde repeterent, cum tamen, sine ullo consensu prævio, ex absolutis Socialitatis decretis, illa asseri queat.

Observ. 206.

Unde & dantur pacta tacita) Eaque vel *principalia*, quorum quatuor exempla recensentur *l. 3. c. 6. §. 2.* vel *accessoria*, quorum itidem exempla quædam *d. §. 2.* afferuntur. Sed exemplum *negotiorum gestionis & tutelæ administrationis*, quod inter priora occurrit, ostendit, quod Autor consensum tacitum & præsumtum seu fictum confuderit.

Observ. 207.

Sicut & usitatissimum) Hæc rectè quidem dicuntur, sed præter scopum, hic enim est quæstio de consensu tacitè declarando, sed doctrina allata ostendit, quod consensus generaliter & expresse datus, per circumstantias nonnun-

quam tacite restringatur, quæ res ad materiam interpretationes pertinet.

§. 10. Ut autem aliquis liquido consentire possit, requiritur *usus rationis* hætenus, ut præsens negotium intelligat, an sibi conveniat, & abs se præstari queat, eoque perpenso consensum suum sufficientibus signis exprimere possit. Unde sequitur, promissa & pacta *infantum*, ut & *amentium ac furiosorum* (nisi ubi dilucidis intervallis furor distinguitur,) nulla esse. Id quod & de promissis *ebriorum* est pronunciandum, si ebrietas jam eousque processerit, ut ratio sit plane obruta & sopita. Nam pro vero & deliberato consensu haberi nequit, si quis vel maxime momentaneo & inconsulto impetu in aliquid inclinet, aut signa quædam edat consensum alias exprimentia, eo tempore, quando mens velut medicamine quodam loco mota fuerat. Sed & impudens foret, tale promissum, præsertim cum magno onere conjunctum, exigere velle. Quin si quis ebrietatem eam captavit, & observata alterius facilitate promissum astute elicit, ne abs doli quidem fraudisque crimine immunis erit. Ast qui, discussa crapula per ebrietatem acta rata habuerit, utique obligabitur non tam ex eo, quod ebrius, quam quod sobrius egit.

Observ.

Observ. 208.

Ut autem aliquis liquido) Porro consensus (II) debet esse *Verus*. Veritas autem summam æstimatur (1) ex *facultate consentiendi physica* (2) *moralis* ac (3) *serio & libero facultatis illius exercitio*. Ob defectum primi requisiti, infantes, amentes & ebrii vere consentire & pacisci nequeunt §. 10. b. add. l. 3. c. 6. §. 3.

§. II. Cæterum quousque in *pueris* duret imbecillitas rationis, contrahendam obligationem impediens, in universon adeo accurate definiri nequit; cum in aliis citius, in aliis tardius iudicium mature scat. Sed illud est ex cujusvis quotidianis actionibus iudicandum. Etsi in plerisque civitatibus leges civiles certum huius temporis terminum constituerint. Sicuti & alicubi salutariter est receptum, ut aliorum prudentiorum auctoritatem adhibere necessum haberent in contrahendis obligationibus, quousque inconsultus ille iuventutis impetus deferbuisse censeretur. Quippe cum ea ætas, etiam quando negotium, quod geritur, intelligit, vehementi fere ac parum provido impetu feratur, ac in promissa sit facilis, spei plena, liberalitatis famam captans, in amicitias ambitiose colendas prona, ac diffidere nescia. Unde & dolo vix caret, qui istius ætatis facilitati imminet; & aliorum dispendiis locuple-

tari vult, quæ isti per iudicii imbecillitatem prævidere aut æstimare non norunt.

Observ. 209.

Caterum quousque in pueris) Mero jure naturali, i. e. sepositâ lege civili, ætatem, ineundis pactis idoneam, non esse definitam, facile liquet, hinc pactorum validitas, hoc rerum statu, particulariter, quoad singula individua, æstimari debet, in quâ quidem æstimatione faciendâ, tum alterius capacitas & iudicium, tum paciscentis alterius intentio, sincera illa fuerit, an callida & dolosa consideranda erunt. Est de cætero illa æstimatio tædiosa & lubrica, nec facile eâdem indigemus, cum leges civiles certius illam rem definiant.

Observ. 210.

Et si in plerisque civitatibus) Ita est: leges civiles ætatem, pactis aliisque negotiis expediendis necessariam, certius determinant, quam dispositionem, perinde ac pacta; in disciplina juris naturalis præsupponere licet, quamvis enim ad hanc decreta legis civilis, pertinere non videantur, attamen hoc est intelligendum de decretis singularibus, uni vel alteri Genti propriis, & v. gr. merè Romanis, aut si aliqua lex civilis, ex communibus æquitatis & utilitatis principiis, oriatur, ac omnibus Gentibus & Rebus publicis communis fit, indolique generis humani conveniat, hæc eodem jure in doctrina juris naturalis adduci & præsup-

supponi potest, quo pactum, nam & hoc in se aliquid positivi est.

Observ. 211.

Sicuti & alicubi salutariter) Regulariter hæc co- hærent, quando ætas definitur, tum simul disponitur, ut teneræ ætati tutores vel Curatores assistant. Stante autem hac dispositione civili, hæc, ex hypothese, naturalia sunt (1) ut pupillus vel minor suo saltem consensu se obligare nequeat, sed negotium susceptum potius nullum sit, nam existentia obligationis naturalis, non tantum ex voluntate agentis, sed & Imperantis æstimanda est (2) ut pupillus & tutor sibi mutuo ad indemnitatem obligentur (3) negotium vel cum tutore, vel ab hoc solo, bona fide gestum, validum sit ac pupillo imputetur, quod si tamen hic nihilominus læsus sit, æquum est, uti ei succurratur. Romani dicunt, quod negotium aliquando *ipso jure nullum sit*, aliquando per *restitutionem in integrum rescindatur*, utriusque etiam remedii durationem diverso tempore circumscribunt, quæ doctrina partim Romana, partim naturalis, nam remediorum distinctio, diversa appellatio & duratio Romanis tribuenda est, quod vero aliquando negotium penitus nullum sit, aliquando saltem læsionis emendatio peti queat, id à voluntate agentis & imperantis dependet, adeoque naturale est, idem dicendum de probatione, quæ pro casuum diversitate, diversa est.

2. Secundum veri consensus requisitum *vid. Observ. 208.* deficit in iis, quibus leges vel divinæ vel humanæ facultatem paciscendi adimunt. Quo loco notandum, quod leges humanæ triplici modo hic aliquid constituere soleant, vel enim pacta simpliciter prohibent, vel iis vim civilem non largiuntur, vel paciscentibus facultatem poenitendi concedunt, illo casu, obligatio oriri non potest, isto naturalis adest, hoc, incerta existit, quæ tamen arbitrio promittentis in validam converti queat.

§. 12. Consensum quoque impedit *error.* Circa quem hæ regulæ sunt observandæ. 1. Ubi in promissione aliquid tanquam conditionem supposuerim, citra cujus intuitum promissurus non fueram, naturaliter promissionis nulla erit vis. Nam promissor consensit non absolute, sed sub conditione: qua non adparente, promissio quoque nulla est. 2. Si ex errore ad paciscendum aut contrahendum fuerim impulsus, eumque re integra & quando nihil adhuc fuit præstitum deprehendero, æquum sane fuerit, ut facultas poenitendi mihi concedatur: præsertim ubi præmetulero, dum ad paciscendum accedo, quæ me causa impellat, nec alter ex mea poenitentia detrimentum patiatur, aut id pensare ego paratus sim. Verum ubi res non amplius est integra, & ubi error tunc demum patuerit, quan-

quando jam pactum est impletum, ex toto aut ex parte; qui erravit à pacto resilire non poterit, nisi quantum alter ex humanitate velit indulgere. 3. Ubi error contigerit circa ipsam rem, de qua convenitur, pactum vitatur non tam errorem, quam quia legibus pacti non fuit satisfactum. Nam in pactis ipsa res, de qua convenitur, ejusque qualitates debent esse cognitæ; citra quam cognitionem liquidus consensus intelligi nequit. Unde defectu deprehenso, qui lædendus fuerat, vel à contractu resilire potest, vel alterum ad defectum supplendum adigere, vel etiam ad præstandum id, quod interest, ubi ipsius dolus aut culpa intervenit.

Observ. 212.

Consensum quoque impedit error) Tertium requisitum, de quo *Observ. 208.* deficit (1) in iis, qui per jocum vel verba honoris aliquid promittunt vid. *Op. Maj. l. 3. c. 5. §. 10.* (2) errantibus, errorem scilicet efficacem, non concomitantem, nam juxta hanc distinctionem, omnis hæc res expedienda, ac de regulis Autoris quoque judicandum est vid. *Observ. 25. 45.*

Observ. 213.

Ubi in promissione) Hæc regula rectè se habet, cum aperte res aliqua ad negotium destinata, adeoque error, circa eam commissus, efficax sit, ac necessarium consensum excludat. Nihil porro interest, siye in re principali, siye rei qua-

litate erratum sit, nam sufficit, quod certæ rei contemplatione unice pactum sit initum, adeoque ea cessante, consensus deficiat *add. l. 3. c. 6. §. 6.*

Observ. 214.

Si ex errore ad paciscendum) Si quis in causa impellente erret, dum v. gr. putat, se res necessarias furto amisisse, adeoque alias comparare debere, Autor censet, pacto perfecto, errantem posse recedere, sed consummato & impleto, non idem ipsi licere. Verum hæc doctrina non satis cohæret, nam si idonea aliqua ratio errantis causam, in primo casu tuetur, eadem omnino in secundo etiam, valida erit, aut si hoc, ratio deficit, nec in illo aliqua aderit, imo si, ut Autor amplius docet, primo casu damnum ab errante pensandum est, non habet Idem jus poenitendi ac à pacto recedendi! Simpliciter itaque dicendum, quod errans pactum servare debeat, nam licet error fuerit invincibilis, tamen concomitans saltem est ac necessarium consensum non tollit, causa enim impellens, de qua contrahens vel plane tacet, vel eam narrative saltem exponit, extra negotium est, adeoque error in ea commissus, nihil operatur. Idem erit dicendum, si quis in persona, cum qua contractum onerosum celebrat, erret, hic enim error etiam concomitans saltem est, certum enim individuum, nisi tempestiva destinatio accesserit, ad contractum talem non requiritur *conf. Observ. 45.*

Observ.

Observ. 215.

Ubi error contigerit) Hæc etiam regula bene se habet, ac cum prima fere coincidit, ratio autem Autoris, *quod pactum vitietur non tam ob errorem, quam quod legibus pacti non fuerit satisfactum*, parum accurata est, quia subordinata opponit, nam error ostendit, quod errans in rem, quæ revera adest, non consenserit, quodque adeo alter ejus intentioni non satisfecerit.

Observ. 216.

Unde defectu deprehenso) Hæc doctrina generalis est, pertinetque ad erroris efficacis effectum, de eo verò sic in genere pronuntiandum: si errans id, in quo erratur, præcipue vel unice respexerit, tum ei integrum est, à pacto plane recedere, si vero non fuerit potissima causa, tum salvo pacto, habet saltem jus petendi id, quod ejus interest. Romani Jcti ad hoc fundamentum in effectum quidem respexerunt, sed illud ambigua doctrinâ involverunt, ceu ostendi in *Observ. ad Compend. Jur. Lauterbach*: *Observ. sn. seqq.*

§. 13. Quod si quis *dolo* & malitiosa fraudulentia alterius inductus fuit ad promittendum aut paciscendum, ita est habendum.
1. Si tertius dolum adhibuerit, non colludente eo, quicum paciscimur, negotium erit firmum: ab eo tamen, qui dolum adhibuit, poterimus repetere id, quod intererat, nos non fuisse deceptos. 2. Qui dolo suo malo cau-
fam

ſam dedit, ut ipſi quid promitterem cum eovē
 paciſcerer, ei ex iſthoc actu haut quidquam ob-
 ligor. 3. Si quis ultro quidem & liquida
 cum deſtinatione animi ad paciſcendum ac-
 ceſſerit, in ipſo tamen negotio, puta, circa ob-
 jectum, ejusvē qualitates & æſtimationem do-
 lus interceſſerit; hætenus pactum erit vi-
 tioſum, ut in arbitrio decepti ſit illud peni-
 tus diſſolvere, aut læſionis penſationem exi-
 gere. 4. Quæ ad eſſentiam negotii non fa-
 ciunt, nec expreſſe fuerunt designata, actum
 de cætero rite conceptum non vitiant; licet
 forte alter de iis, dum paciſcitur, tacite cogi-
 tavit; aut ejus opinio actu fuit confirmata,
 quouſque contractus concludus foret.

Obſerv. 217.

Quod ſi quis dolo) Tertium veri conſenſus requi-
 litum *vid. Obſerv. 212.* deficit (3) in *deceptis*. Hi
 etiam errant, ſed quia alterius dolo in errorem
 conjiciuntur, ideo non tam ex errore, quam
 alterius delicto, pacti invaliditas repetitur.
 Nihil quidem vetat, ad utrumque reſpicere,
 ſed quia ſolus dolus improbando pacto ſufficit,
 ideo ad hunc ſolum fere reſpicitur.

Obſerv. 218.

Si tertius dolum adhibuerit) Regula hæc bene ſe ha-
 bet, ſive enim ex errore, ſive dolo invaliditatē
 pacti repetere velis, neutra ratio ſufficiet, er-
 ror enim concomitans eſt *conf. Obſerv. 214.* do-
 lus

lus verò ab ipso paciscente non est commissus, hinc nihil superest, quam ut, salvo pacto, dolus ad satisfactionem præstandam adigatur.

Observ. 219.

Qui dolo suo malo causam dedit) Dolus qui dat causam contractui, ac ab ipso paciscente adhibitus fuit, facit negotium, ratione læsi, nullum, nam absurdum esset, si quis delicto alium sibi validè obstringere posset. Romani hoc casu aliquando pactum ipso jure nullum, aliquando, per restitutionem in integrum, rescindendum pronunciant, sed istas tricas, rabulariam fori Romani redolentes, merum jus naturæ ignorat, imo improbat *vid. Observat. ad Lauterbach. Observ. 116. seqq.*

Observ. 220.

Si quis ultro quidem) Si dolus in pactum saltem inciderit, Autor adhuc læso electionem asserit, utrum à pacto recedere, an, eo salvo, interesse petere velit, quæ sententia, ob alterius delictum, admittenda videtur, maxime, si id, in quo dolus commissus, læsus præcipuè resperit. Romani quidem, ob dolum incidentem, saltem jus ad interesse concedunt, sed illam sententiam indoli negotii, & æquitati non satis convenire, in *Observ. ad Lauterbach. Observ. 119. ostendi.*

Observ. 221.

Quæ ad essentiam negotii) Hoc casu pactum pro
va-

valido merito habetur, quia verus dolus non intervenit, sed læsus seipsum velut decepit.

§. 14. *Metus*, qui circa promissa & pacta intervenit, *dupliciter* sumitur, vel pro *suspitione* probabili fore, ut ab altero decipiamur, idque vel quia ejusmodi vitium in animo ipsius hæret, aut quia malignam suam voluntatem sat perspicue significavit: vel pro *veementi animi terrore*, orto ex intentato gravi malo, ni promissum aut pactum inire velimus. Circa *priorem* speciem metus ita habendum. 1. Qui confidit illius promissis & pactis, cui fidei religio in universum nihili fit, imprudenter quidem facit; sed eam solam ob causam pactum non redditur irritum. 2. Ubi pactum jam sit initum, ac nulla nova emergant indicia intentatæ deceptionis, non licebit à pacto resilire ex obtentu vitiorum, quæ ante pactum erant cognita. Nam quæ causa aliquem non prohibuit, quo minus pacisceretur, eadem quoque prohibere non debet, ne pactum impleat. 3. Ubi post pactum initum certissima emergant indicia, alterum id agere, ut mihi, quando meum priore loco præstitero, illudat, non prius ad præstandum adigi potero, quam contra eam deceptionem mihi cautum sit,

Observ.

Observ. 222.

Metus qui circa promissa) Denique verus consensus non est (4) in *metuentibus*, sed non indistinctè. Metus, qui pro suspitione doli accipitur, adeoque hujus, si interveniat, relatum est, peculiaribus regulis non nititur, sed circa eum recurrunt, quæ proxime de dolo diximus. Neque etiam Autor novi quid hic affert, sed vel occurrit prætextibus, quorum pertinet regula *prima & secunda*, vel ea inculcat, quæ prudentia requirit, quo spectat *tertia add. l. 3. c. 6. §. 7.*

§. 15. Circa *alteram* speciem metus hæ regulæ observandæ. 1. Pacta, quæ ineuntur propter metum à tertio incussum, valida sunt. Nam in hoc utique nullum residet vitium, quo minus jus ex pacto sibi adversus me acquirere queat; & mentum ab altero intentatum discussisse, pensatione utique dignum est. 2. Quæ pacta ex metu aut reverentia imperii legitimi ineuntur, aut ob auctoritatem eorum, quibus magnopere devincti sumus, valida sunt. 3. Pacta, ad quæ ab illo ipso, cui promittit aut quicum paciscitur, injusta ejusdem vi quis compellitur, invalida sunt. Nam injuria, quam alter incusso metu injusto mihi infert, incapacem eum reddit, ut jus sibi adversus me ex illo actu quærere possit. Et cum quis alias teneatur pensare damnum abs sese da-

datum, per compensationem velut tolli obligatio intelligitur, si non solvitur id, quod statim restitui debeat.

Observ. 223.

Circa alteram speciem metus) Metus, qui ex representato malo oritur, proprie hoc nomen gerit, ac opponitur Vi, cui tamen dolus, verum non clandestinus, sed apertus, & qui verorum delictorum omnium est anima, inest, propriisque regulis nititur, quarum summa est, eatenus metum impedire pacta, quateus consensus obligatorium tollit.

Observ. 224.

Pacta quæ ineuntur) Vera est hæc regula, nam metus à tertio incussus, vel nondum est præsens, vel si hoc etiam sit, pactum cum alio celebratum non attingit, sed saltem jus contra eum, qui metum intulit, largitur juxta doctrinam *Observ.* 218. *add. l. 3. c. 6. §. 10. seqq. l. 9. §. 1. ff. quod met. caus.*

Observ. 225.

Quæ pacta ex metu) Hæc quoque doctrina bene se habet, nam uti vis omnem consensum non tollit, ita coactus debebat consentire, ac adeo incogente nullum est delictum, hinc nihil est, quod valorem pacti impediat.

Observ. 226.

Pacta ad quæ ab illo ipso) Vis injusta & vera pactum reddit invalidum, ceu datis rationibus Autor ostendit, quarum prior κατ' ἀλήθειαν, πο-

posterior κατ' ἀνθρώπων, rem demonstrat. Non obstat, quod vis consensum non penitus tollat, nam utut qualis consensus adsit, attamen, ob cogentis delictum, producendo ac imputando juri & obligationi non sufficit. Romani pactum, metu initum, validum, sed restitutione in integrum rescindendum dicunt, quarum tricarum nulla vel necessitas vel utilitas est, de quo dixi in *Obs. ad Laut. Observ. 113. seqq.*

§. 16. Præterea oportet *consensum* non in pactis solum, sed & promissis esse *mutuum*; lic ut consentire debeat non solum qui promittit, sed & cui promittitur. Quando enim hujus consensus abest, seu quando is oblatum promissum acceptare detrectaverit, res promissa penes promissorem manet. Qui enim alteri rem suam offert, neque invito eam vult impingere, neque pro derelicta habere. Ergo si alter non acceptet, juri promittentis in rem oblatam nihil decedit. Quod si rogatio antecessit, censetur ea durare, nisi expresse fuerit revocata; eoque casu in antecessum acceptatio facta intelligitur. Ita tamen ut rogationi respondeat oblatio. Nam si hæc discrepet, expressa requiritur acceptatio; quia sæpe mihi non consulitur, nisi tantundem quantum rogavi accepero.

Q

Observ.

Præterea oportet consensum) Denique consensus (III) debet esse *Mutuus*, vid. *Observ. 204.* nam nisi utriusque paciscentis voluntas in idem placitum conspiraverit, obligatio valida nasci non potest, utrius vero consensus præcedat, aut sequatur, nihil refert §. 16. In pollicitationibus & Votis, solo promittentis consensu, citra acceptationem, obligationem validam produci, existimant Jcti Romani, eorumque interpretes plerique, quæ sententia communem rationem offendit *vid. l. 3. c. 6. §. 15.*

§. 17. Circa *materiam* promissorum & pactorum requiritur, ut, quod promittimus aut paciscimur, *non sit supra nostras vires*, nevé id patrare lege aliqua prohibeamur: alias enim aut stolide aut improbe promittimus. Exinde consequitur; neminem sese obligare posse ad id, quod ipsi est impossibile. Quod si autem res, quæ tempore pacti initi possibilis habebatur, post impossibilis aliquo casu citra paciscentis culpam facta sit, re integra pactum erit nullum. Ubi quid præstitum ab altero jam fuit, id restituendum, aut æquipollens reponendum. Sine hoc quidem fieri possit, summus erit conatus adhibendus, ne alter detrimenti quid capiat. Nam in pactis primario respicimus ad id, de quo expresse fuit conventum; ubi hoc obtinere non possumus,

mus,

mus, sufficit æquipollens exhiberi: saltem ne damnum sentiamus omni modo cavendum est. Qui vero dolo aut gravi culpa sibi ipse vires præstandi detraxit, non solum ad summum conatum tenetur, sed & velut in supplementi vicem malo insuper poterit mactari.

Observ. 228.

Circa materiam promissorum) Ex iis, quæ hæcenus de consensu diximus, ultro intelligitur, tum *quinam pacisci queant, ac revera paciscantur*, nimirum qui gaudent facultate consentiendi physica & morali, ac serio & libere consentiunt, quæ omnia regulariter præsumuntur, tum quæ sit *materia pactorum*, nempe actiones & res licitæ & possibiles §. 17. *b add. l. 3. c. 7. §. 1.*

Observ. 229.

Exinde consequitur) Ad impossibile quidem nemo se pacto obstringere potest, aliquando tamen occasione ejusmodi promissionis, ob intervenientem læsionem, ad damnum resarciendum, promittens obligatur, cui intelligendo distinguendum, utrum *impossibilitas tempore pacti adfuerit* hoc casu si promissor solus eam sciverit, ad interesse tenetur, quia invitum læsit, si vero vel neuter, vel uterque, vel solus Creditor, illam intellexerit, obligatio cessat, damnum enim vel fortuitum est, vel invito non accidit *vid. l. 3. c. 7. §. 2. an illa post pactum supervenerit.*

Quodsi autem res) Altero hoc casu Autor amplius distinguit, utrum *impossibilitas supervenerit casu*, & tum vel æquipollens præstandum esse, vel à pacto recedi existimat, *add. l. 3. c. 7. §. 3.* sed hoc verum tantum est in negotiis, quæ dominium non transferunt, ut locatione conductiōe, non autem in pactis dominii translativis, ut emtione, venditione, nam si hac perfectâ, res vendita casu përierit, emtoris est periculum, quia potius jus habet, imo, mero jure naturali, jam dominus est, hinc venditor pretium acceptum retinet, aut promissum exigit, *an culpa promissoris*, hoc casu eum ad interesse teneri, facile liquet.

§. 18. Patet quoque ad *rem illicitam* præstandam obligari nos non posse. Nam nemo valide se potest obstringere ulterius, quam ipsi est potestas. Ast qui lege actionem prohibet, adimit utique potestatem eam suscipiendi, & de eadem præstanda obligationem admittendi. Contradictorium quippe est, ex obligatione per leges confirmata aliquid necessario debere facere, quod per easdem leges est omittendum. Unde peccat quidem, qui illicita promittit; sed bis peccat, qui eadem præstat. Unde & hoc colligitur; non servari debere promissa, quæ illi, cui fiunt, noxæ sunt futura; cum naturali lege prohibitum sit,

fit, ne quis alteri, etiam stolidè volenti, malum inferat. Si igitur pactum circa rem turpem fuerit initum, neuter ad id explendum tenebitur. Quin & ubi turpe facinus, ab uno fuit præstitum, alter ad solvendam conventam mercedem non obligabitur. Quod tamen illo intuitu jam est datum, repeti nequit, nisi forte dolus aut enormis læsio accesserit.

Observ. 231.

Patet quoque ad rem illicitam) Turpia quoque valide promitti non possunt, quod probe ostenditur *h. add. l. 3. c. 7. §. 6. 7.* nihil autem refert, utrum lex divina an humana aliquid prohibeat, modo hæc actum, contra prohibitionem susceptum, nullum esse velit, nam sæpe aliam poenam exigit, ac ea præstita, de invaliditate velut dispensat.

Observ. 232.

Si igitur pactum) Quo de invaliditate pacti turpis eo rectius judicari queat, triplex ejus status est distinguendus, vel enim (1) *saltem est initum*, & neuter ad id explendum tenetur, vel (2) *turpe factum est præstitum*, tum merces non est solvenda, quod contra Grotium amplius ostenditur *l. 3. c. 7. §. 8.* vel (3) *merces est soluta*, tum accipiens ad eam reddendam non est obligatus, nisi forte insignis ejus improbitas & dolus subsit, *§. 18. h. add. d. c. 7. §. 9.* quia in pari turpitudine melior est conditio possidentis. Ita vulgo, sed illam doctrinam non esse natu-

ralem, sed civilem & quodammodo absurdam, jam ostendi in *Observ. ad Lauterbach. Observ. 354.* hinc juxta merum jus naturale, restitutionis necessitas omnino asserenda est, nam in accipiente nullum jus est retinendi, uterque tamen tam hoc, quam præcedentibus casibus, puniri potest, quod si solius accipientis turpitudine subsit, & ad restitutionem, quod vulgo etiam recte concedunt, & ad poenam, solus tenebitur.

§. 19. Denique & hoc manifestum est, frustra promittere nos aut pacisci circa *res alienas*, in quantum illæ non nostræ, sed alterius directioni & arbitrio sunt subjectæ, Quod si autem ita promiserō; me operam daturum, ut alter, (cui pro imperio me quid imperare non posse præsupponitur,) præstet: tunc teneor omni modo moraliter possibili, (i. e. quantum alter honeste à me postulare potest & quantum vitæ civilis ratio fert,) laborare, ut ad eandem præstandam alter permoveatur. Sed & super rebus aut actionibus nostris, in quas jam alteri jus fuit quæsitum, tertio valide promittere non possum, nisi forte in eum casum, quo alterius jus expiraverit. Nam qui prioribus promissis aut pactis jus suum in alterum jam transtulit, ipse utique nullum tale jus reliquum amplius habet, quod in tertium possit conferre. Ac nullo negotio omnia pro-

promissa & pacta possent fieri irrita, si liceret aliud inire, in quo contraria priori disponentur, ac quicum prius simul expleri nequit. In quo fundatur tritum illud: qui prior tempore, potior jure.

Observ. 233.

Denique & hoc manifestum est) Circa actiones & res, vel simpliciter, vel certo respectu alienas, etiam validè pacisci non licet, quamvis occasione rerum alienarum quis atq. factum proprium, vel interesse obstringi queat §. 19. b. add. d. c. 7. §. 10. ii. hæc enim in ipsius potestate sunt.

Observ. 234.

Sed & super rebus aut actionibus nostris) Mero jure naturali, super rebus & actionibus nostris, in quas aliis jam est jus quæsitum, simpliciter pacisci non possumus, sed pactum, quatenus in præjudicium juris quæsitum tendit, est invalidum, quam doctrinam Autor hic sequitur. Sed juxta leges civiles, introducto juris realis & personalis discrimine, pactum saltem invalidum est, si alii jus reale in res nostras sit quæsitum, jus vero personale pactum posterius non impedit, sed ejus, quod interest, persecutionem saltem operatur.

§. 20. Est præterea circa promissa potissimum observandum, illa concipi solere vel *pure & absolute*, vel sub *conditione*, ut scilicet validitas promissionis conferatur in aliquem eventum, à casu aut arbitrio humano penden-

tem, Sunt autem *conditiones* vel *possibiles*, vel *impossibiles*. Illæ subdividuntur in *casuales* seu *fortuitas*, quæ ut existant vel non existant, penes nos non est: *potestativas* seu *arbitrarias*, quæ, ut existant vel non existant, penes eum est, cui promittitur: & *mixtas*, quarum impletio partim ab arbitrio ejus, in quem confertur, partim à casu dependet. *Impossibiles* autem sunt vel *physice* tales, vel *moraliter*; i. e. quædam per rerum naturam fieri à nobis non possunt, quædam per leges & honestatem fieri non debent. Et impossibiles quidem conditiones, si naturalem interpretandi simplicitatem sequamur, orationem promittentem faciunt negativam. Etsi per leges fieri possit, ut, si adjectæ sint negotio alicui serio, habeantur pro non adjectis; ne per actus nullum eventum sortituros hominibus illudatur.

Observ. 235.

Est præterea circa promissa) Ex libertate naturali paciscimur vel *pure*, vel cum *aliqua adjectione*. Adjicitur autem *tempus*, *conditio* vel *modus*. Tempus, ratione cognitionis humanæ, distinguitur in *certum* & *incertum*, ac adjicitur *pactis*, vel ut terminus *à quo* vel *ad quem*, ex qua adjectione, diversitas, quoad durationem vel existentiam obligationis, resultat, *vid. l. 3. c. 5. §. 8.* Romanorum subtilitates, quod obligatio non

non desinat ipso jure, aut quod dies nonnunquam cesserit, sed non venerit, & similes extra jus naturale, ac nullius usus sunt.

Observ. 236.

Ut scilicet validitas) Plenius conditio sic definitur: Est *adjectio incerti eventus eo animo facta, ut ejus existentia negotium perfectum resolvat, vel imperfectum perficiat.* Autor saltem ad conditionem suspensivam, respexit.

Observ. 237.

Sunt autem conditiones) Est hæc divisio æquivoci in sua æquivocata, nam conditio impossibilis, revera non est conditio, neque enim suspendit aut resolvit, sed vel actum purum relinquit, vel eum destruit, aut oriri non patitur, hinc etiam definitio conditionis ei non convenit, ex quo patet, divisionem definitioni fuisse præmittendam.

Observ. 238.

Ille subdividuntur) Conditio possibilis, proprie conditio est, ac dividitur (1) ab *eventu adjecto*, in *Casualem*, *Potestativam* & *Mixtam*, de quo Autor §. 20. *h. add. l. 3. c. 8. §. 4.* (2) à *fine* in *suspensivam*, quæ negotii perfectionem suspendit ac id sua existentia perficit, & *Resolutivam*, quæ perfectum resolvit.

2. Quo igitur effectus conditionum recte judicetur, triplex earum status est distinguendus, vel enim (1) conditio *pendet*, tum negotii perfectio aut resolutio est quoque inpendenti, vel (2) *existit*, juxta voluntatem scilicet paci-

scientium, de quo ex circumstantiis judicandum, tum negotium perficit vel resolvit, & ab eo quidem tempore, quo id fieri voluerunt paciscentes, vel (3) *deficit*, tum perfectio aut resolutio amplius speranda vel metuenda non est.

Observ. 239.

Impossibiles autem sunt) Conditionum impossibilium *divisio* & *Effectus* adducitur, sed huic intelligendo distinguendum, utrum adjectio fiat *negative*, ne impossibile vel turpe fiat, hoc casu pactum purum & validum est, cujus enim affirmatio est impossibilis, ejus negatio est necessaria; an *affirmative*, quo impossibile aut turpe fiat, hoc casu, pactum impedit, juxta naturalem interpretationem, ceu recte docet Autor, id quod de turpi etiam dicendum, nam licet hæc casu, vel etiam ex proæresi impleri queat, attamen cum promissor, sub tali conditione valide quid promittere nequeat, præterea ejusmodi conditio, juxta communem mortalium affectum, pro impossibili & nunquam exstitura habeatur, hinc promissor et, iam talem eventum, ut nunquam secuturum, considerasse, ac adeo nihil serio promisisse, merito censetur.

§. 21. Denique promittimus & paciscimur non solum per nosmetipsos, sed etiam aliorum hominum interventu, quos ipsi voluntatis nostræ *internuncios* atque interpretes constitui-

stituimus. Per quos, ubi bona fide egerint, quod a nobis in mandatis habebant, valide obligamur apud eos, qui cum istis velut nostras vices gerentibus egerunt.

Obseru. 240.

Denique promittimus) Possumus per alios obligari ac jus acquirere, qui vel nostra voluntate sunt instructi, ac juxta eam, indiciis habilibus explicatam, agunt, vel quorum gesta ex postfacto rati habemus, *vid. l. 3. c. 4.* hinc in specie stipulationem, ab alio sine nostra voluntate factam, acceptare, ac promissorem ad implendum promissum adigere possumus. Illud autem in genere observandum, quod personæ intermediæ aliquando solius instrumenti rationem habeant, aliquando vero suo etiam consensu paciscantur, illo casu pactum illos plane non attinet, hoc autem, quamdiu qualitas intermediæ personæ in iis durat, ipsæ etiam ex pacto agere & conveniri possunt, quorum pertinent procuratores & institores similesve personæ, circa quas tamen jus Romanum varias tricas introduxit, quæ sunt extra jus naturale.

§. 22. Atque hæc sunt officia hominis absoluta, ut & per quæ velut transitus ad alia fit. Reliqua præsupponunt aliquod *institutum* humanum, generali pacto subnixum, & in genus humanum introductum; vel etiam *statum* aliquem peculiarem. Institutorum istorum de-
pre-

prehenduntur potissimum *tria*; *sermo, dominium rerum*, earundemque *pretium, & imperium humanum*. De singulis, ut & quæ inde resultant, officiis, deinceps exponendum.

Observ. 241.

Atque hæc sunt officia hominis) Hanc connexionem minus probam nobis videri, ex *Observ. 152. 196.* jam liquet. Nimirum hæc displicent (1) Quod triplicis generis officia asserantur, cum tamen omnia vel statum naturalem, vel adventitium præsupponant, ceu d. *Observ. 152.* admonitum. Imo quam nullo partitio illa trimembris nitatur fundamento, vel inde colligas, quod de imperio humano, inter officia, quæ ex statu adventitio resultent, agatur, cum tamen, juxta factam partitionem, ad secundi generis officia, ejus consideratio pertineat (2) quod hypothetica officia ex pacto saltem repetantur, id quod d. *Observ. 196.* rejectum (3) quod officia deinceps exponenda, ab hætenus expositis, diversa credantur, cum tamen sint eadem, ceu res ipsa loquitur, nisi quod, in materia matrimoniali, nonnulla occurrant, quorum hætenus non est facta mentio, tetigimus tamen eorum fundamentum *Observ. 79. n. 5.* (4) quod instituta hic laudata, pro fundamento præceptorum quorundam, habeantur, cum tamen præceptorum statum naturalem vel adventitium præsupponentium, seu absolutorum & hypotheticorum, sint saltem objectum (5)
quod

quod sermo, cum dominio & imperio, eâdem classe censeatur, id quod non recte fieri, inde liquet, quod ille sit actio humana, hæc vero, jura seu res morales, adeoque toto genere differant (6) quod sermo uni loco includatur, cum per totam Jurisprudentiam naturalem se diffundat. Non melior connexio redditur in Op. Maj. l. 3 c. 9. §. 8. Quid mihi videatur, jam indicavi *Observ. 197.* nempe post explicationem præceptorum naturalium generalem specialior eorum tractatio, juxta varia objecta, in vita civili occurrentia, institui debet, quam uti Autor in sequentibus molitur, ita eadem, ordine accurato, non est instituta, in quæ tamen mutandi arbitrium hætenus nobis non competit, hinc rem ipsam spectabimus.

CAPUT X.

DE

OFFICIO SERMOCI- NANTIUM.

§. I.

Quam utile ac plane necessarium sit instrumentum societatis humanæ sermo, nemo est, qui ignorat: cum multi vel ea sola facultate collegerint

rint, hominem ad agendam vitam socialem à natura destinatum. Circa hujus ergo legitimum & societati humanæ proficuum usum id officii lex naturalis hominibus dictitat: *ut ne quis sermone, aut aliis signis ad exprimenda animi sensa institutis alterum decipiat.*

Observ. 242.

Quam utile ac plane) Circa sermonem duo summatim spectanda (1) ipse *sermo* (2) *officium sermocinantium*, seu sermonis *natura & moralitas*. Utrumque caput prolixius expositum est in *Dissert. de Offic. sermocin: sub meo moderamine Lips. 1695. habita.* Hoc loco summa rei breviter exhiberi debet.

2. Sermo est *vox articalata, ex impositione hominum, ad communicanda animi sensa, aliquid significans*. Est idem ex genere signorum *arbitrariorum*, quæ ex impositione significant, quibus opponuntur signa *naturalia*, quæ ob connexionem physicam, rem aliquam indicant *vid. Op. Maj. l. 4. c. 1. §. 2. Thomaf. 7. 7. D. l. 2. c. 7. §. 5.* Summam autem sermonis esse utilitatem *§. 1. h. d. l. 4 c. 1. §. 1.* facile liquet, interim attendi illa non solet, quia sermo nunquam plane deficit, quæ negligentior æstimandi ratio, omnibus hujus generis rebus accidere solet.

Observ. 243.

Circa hujus ergo legitimum) Doctrina de officio sermocinantium, & alieno loco posita, & insufficientis est, cujus insufficientiæ non alia est cau-

causa, quam quod sermonis explicatio in loco proprio non sit instituta. Nos de hac re mox paulo plenius agemus.

§. 2. Sed ut indoles sermonis penitus intelligatur, sciendum est, circa sermonem, voce viva aut literis expressum, duplicem obligationem occurrere. *Una* est, qua isti, qui eadem lingua utuntur, certæ rei certum vocabulum, prout usus cujusque linguæ fert, adplicare tenentur. Cum enim neque voces, neque certi literarum ductus certam rem natura notent: [alias enim omnes linguæ aut scripturæ genera coincidere deberent,) inde ne usus linguæ foret inanis, si quisque quo vellet vocabulo quamlibet rem nuncuparet: necessum est inter eos, qui eadem lingua utuntur, tacitam intercessisse conventionem, ut certam rem certo, & non alio vocabulo denotent. Ni enim in uniformem vocum adplicationem fuerit conspiratum, impossibile est, ex sermone alterius sensa animi colligere. Unde vi istius pacti quilibet tenetur, ita adhibere in sermone communi vocabula, prout receptus ejus linguæ usus fert. Ex quo etiam hoc consequitur, ut quanquam sensa animi à sermone discrepare queant, id tamen in vita humana quisque voluisse censeatur, quod verba ejus præ se ferunt, etsi fortasse intrinseca

seca mentis destinatio ab istis discedat. De hoc enim cum nisi per signa constare nequeat, omnis usus sermonis redderetur irritus, si interna animi cogitatio, quam sibi quisque pro lubitu fingere posset, id quod signa præ se ferunt in communi vita elidere posset.

Observ. 244.

Sed ut indoles sermonis) Circa sermonem, duplicem obligationem occurrere censet Autor, quarum prior ad ejus *vim significativam*, posterior, ad *usum* pertineat, sed illam gratis asseri, mox ostendam.

Obsurv. 245.

Una est qua isti) Sermonem naturâ suâ nihil significare, sed *vime* ejus *significativam* esse ab impositione hominum, satis quidem certum est, *vid. d. c. i. §. 4.* sed *an illa impositio simplici consensu an obligatorio facta sit*, quaeritur? Autor posterius asserit, *add. d. c. i. §. 5.* sed prius magis verum est, nam (1) homines, impositionis faciendæ causa, nunquam convenerunt, sed potius successive impositio facta est, adeo ut saepe ab uno hodiè illa fiat, reliqui vero eam ultro, sine ulla se obligandi intentione, admittant, non secus ac, uno historiam vel fabulam narrante, multi eius redduntur participes, atque ita communis notitia, sed nulla obligatio, existit [2] si conventionè esset facta impositio, tum inno-

innoxia etiam mutatio in vitio esset, quod tamen nemo dixerit, & experientia refellit.

Observ. 246.

Cum enim neque faceret) Hæc ratio non probat conventionis, sed simplicis impositionis necessitatem, & qui posset conventio iniri, ubi nulla est hominum consociatio, ac nulla in iis, se, vel alios sibi, obligandi intentio?

Observ. 247.

Unde vi istius pacti) Circa sermonem occurrere obligationem, quæ ejus usum dirigat, ac in specie sensum inusitatum, ac reservationes mentales, nonnunquam prohibeat, aut adhibitas improbet, certum omnino est, sed quod illa obligatio ex conventionem, quâ sermoni vis significativa tributa sit, oriatur, illud utique gratis, ex præconcepta illa conventionem, asseritur, fuit potius illa obligatio ex communibus socialitatis præceptis, vel pactis specialibus, uno verbo: est illa obligatio, de qua §. 3. *h.* agitur.

2. Id circa vim significativam etiam observandum est, quod sæpe vocabula quoad significatum principalem conveniant, non vero quoad accessorium, hinc unum altero nonnunquam est gratius vel magis odiosum *vid. d. l. 4. c. 1. §. 6.* aut etiam majoris minorisve ponderis.

3. *Origo* sermonis à primordio generis humani repetenda est, *incrementa* vero & *varietas* tam à causa in S. literis adducta, quam Gentium ul-

teriori cultura variisque migrationib9 deduci debent *vid. d.c.1. §. 3.* In singulis vero hominibus sermo ex auditu provenit, adeo, ut surdi nati loqui non possint, quamvis nostro præsertim tempore nonnulla laudentur specimina quibus facultas loquendi & scribendi surdis natis conciliata sit. *vid. Ammam. Mnt. loqu.*

4. Sermonis *Affectiones* sunt *Veritas* i.e. voluntaria sermonis, consuetudo sensu intellecti & rei convenientia, & *Falsiloquium* i.e. voluntaria loquelæ, usitato significatu acceptæ, & rei disconvenientia. Differunt igitur à Veritate & Falsitate logica, quæ in conformitate vel difformitate intellectus & rei conceptæ simpliciter, nulla verborum habita ratione, consistunt. *Oppositum* Sermonis, est *Silentium* i.e. sermonis omisio.
5. Cognata affectionum sermonis & silentii, sunt *Sinceritas*, quæ facta menti attemperat, *Simulatio*, quæ actiones à mente alienas format, & *Disimulatio*, quæ facta mentem indicatura omittit: Illa veritati, Ista falsiloquio, Hæc silentio similis est. Omnes hi actus, veritas inquam, falsiloquium, silentium, sinceritas, simulatio & disimulatio, seposita lege, sunt indifferentes, possunt autem omnes boni & mali fieri, prout leges illos vel jubent, vel prohibent.

§. 3. *Altera obligatio, quæ in sermone intervenit, in eo consistit, ut quis alicui per sermonem animi sui sensa ita debeat pandere, ut hæc ex illo liquido cognoscere queat. Cum enim non loqui tantum, sed & tacere homo queat, & cum non semper, quod quis in animo volvit, id coram quibusvis aperire teneatur: igitur necessum est, ut peculiaris existat obligatio, quæ alicui necessitatem adferat, tum ad loquendum, tum ad ita loquendum, ut alter sensa animi nostri intelligat. Oritur autem illa obligatio vel ex peculiari pacto, vel ex communi præcepto legis naturalis, vel ex præsentis negotij indole, cui contrahendo sermo adhibetur. Sæpe enim expresse cum aliquo convenitur, ut quis animi sui sensa super aliquo negotio mihi aperiat; ut, si quem informatorem mihi in aliqua disciplina adsciscam. Sæpe quoque præceptum aliquod legis naturalis meam scientiam alteri communicare jubet, ut hoc modo ipsi prosim, vel noxam ab eodem avertam, aut ad noxam accipiendam causam vel occasionem non præbeam. Aliquando denique præsens negotium, quod cum alio susceptum est, aliter expediri nequit, ni judicium meum super eo pandam; uti circa celebrandos contractus contingit.*

Altera obligatio) Postea etiam sermonis moralitas seu sermocinantium officium expendi debet. Dux sunt quæstiones (1) an *detur obligatio circa sermonem*? quæ dubio procul asserenda, cum enim omnes hominum actiones legi naturali subsint, mirum foret, si sermo exemptus sit, atque eo pertinet philosophia Autoris *b.* (2) *quæ præcepta obligationem introducant*? Autor §. 1. *b.* laudat præceptum de non lædendo alio, sed hujus doctrinæ insufficientiam mox §. 3. *b.* agnoscit, quando præceptis humanitatis aliquem etiam locum relinquit, quamvis ne sic quidem rei hujus latitudinem exhauriat.

2. Dicendum igitur potius, quod tota lex naturalis, ut alias actiones, ita etiam sermonem dirigat. Pertinet igitur huc (1) *præceptum de Deo colendo*, quod exigit, ne sermone, ad contemptum Dei abutamur, id quod Autor supra c. 4. §. 7. admonuit, positive vero, ad Deum sermone colendum, nullam obligationem naturalem subesse putamus, quia in genere obligationem ad cultum externum negavimus *Observ. 105.* (2) *Præceptum de exercenda Philautia*, quod sermonem, ad conservationem propriam ac utilitatem innoxiam, dirigi præcipit. Denique (3) *præcepta socialitatis huc spectant*, hinc sermone aliis benefacere, malum avertere, (quod officium Autor supra c. 8. §. 4. dum consilium fidele deliberanti dandum ac erranti comiter monstrandam esse viam docuit, agnovit

gnovit) ac eos nulla ratione lædere debemus. In specie hoc ultimum, intuitu pactorum etiam occurrit, dum ante pactum, & in pacto læsionem prohibet, ac post pactum fidem, de sermone datam, servari præcipit. Tandem (4) *clausula penalis* quam præceptis naturalibus cohærere, diximus *Observ. 79. n. 10.* eatenus sermonem dirigit, ut per eum veritas delictorum eruatur, ac de iis, in quantum utilitas publica hoc exigit, poenæ sumantur.

Observ. 249.

Oritur autem illa obligatio) Ex præsuppositis cætera facile explicantur. Doctrina Autoris, in se quidem bona, sed insufficiens, ac modus docendi ambiguus est, quando ex *præsentis negotii indole* obligatio repetitur, nam principium sublimius, ipsum scilicet præceptum de alio non lædendo, allegari debebat.

§. 4. Quia autem non semper usu venit, ut ex aliquo horum capitum quævis cogitata mea alteri sint significanda; patet, me non alia teneri alteri sermone meo indicare, quam ad quæ ex me intelligenda *jus perfectum aut imperfectum* habet. Adeoque recte tacendo dissimulare me posse, ut ut maxime interroger, quæ ut ex me sciat alter jus non habet, neque ad id aliqua obligatione ego teneor.

§. 5. Imo quia sermo *non solum* est inventus *propter alios, sed & propter nos ipsos*: ideo

ubi aliqua mea in eo versatur utilitas, neque cujusquam alterius jus læditur, licebit mihi sermonem ita formare, ut diversum ab eo, quod in animo volvo, exprimat.

§. 6, Denique quia sæpe isti, ad quos loquimur, ita sunt dispositi, ut si sermone simplici & aperto rem ipsam perciperent, detrimento hoc ipsis futurum esset, nec nobis bonum quem intendimus finem ad sequi liceret: igitur hisce in casibus licebit uti ficto coloratoque sermone, & qui nostram sententiam & intentionem audientibus directe non repræsentet. Nam qui alicui prodesse vult & debet, non utique id tenetur facere eo modo, quo finem suum non erat obtenturus.

Observ. 250.

Quia autem semper usu venit) Uti certum est, quod sermo legi naturali subfit, ita alia quaestio est, an hæc semper veritatem exigat? quod mihi non videtur, hinc potius ita dicendum (1) si *cum Deo agamus*, veritas semper dicenda, Deum enim omniscium aliquid celare velle, vesana foret impietas, aut (2) quod *præceptum Philautias* attinet, pro certo supponendum, quod veritas, falsiloquium & silentium eodem loco haberi debeant, hinc prout illa cum utilitate innoxia conveniunt aut pugnant, vel in neutram partem tendunt, ita præcepta, prohibita aut licita existimanda sunt, cum enim juxta
hoc

hoc fundamentum, obligatio naturalis, quoad alias actiones, judicanda sit, nulla apparet ratio, quare non idem de veritate, falsiloquio & silentio dici debeat (3) Quoad *præceptum socialitatis*, diversi casus sunt distinguendi, nam si per hostilitatem socialitas abrupta sit, ac adeo erga hostem officia socialia cessent, manifestum est, quod usus sermonis nostro arbitrio relictus sit, hinc stultum fuerit, si eo ita utaris, ut hostis malo te multare queat. Si vero status socialitatis duret, observandum tamen est, quod non omnia ad socialitatem sint referenda, sed sui ipsius etiam rationem habere liceat, hinc si intra æquilibrium amoris proprii & alieni consistatur, regulæ socialitatis non obligant, adeoque usum sermonis propriæ utilitati attemperare fas est. Quod si autem sermo regulis illis subsit, tum veritatem, falsiloquium & silentium eadem jubent, prohibent & permittunt, prout illa cum natura sociali conveniunt, pugnant, aut in neutram partem vergunt, quæ sententia aperte, intrepide & constanter tenenda est, contra vulgare nulloque fundamento subnixum præjudicium, quo veritas semper præcepta, falsiloquium vero prohibitum ac illicitum existimatur, quod, ut alia multa, inde enatum est, quod de moralitate, sine certa & constanti normâ, philosophentur. Juxta hæc igitur falsiloquium & silentium non tantum licita, juxta doctrinam Autoris §. 4. 5. 6. sed & nonnunquam præcepta sunt

add. l. 4. c. 1. §. 8. Denique (4) *Clausula pœnalis* judicem sermone ita uti jubet, ut veritas delictorum eruatur, quo fine nonnunquam veritate, falso loquio aut silentio opus est. An vero delinquens veritatem semper dicere debeat, aliqua quæstio est, quæ ex affirmativa priori, necessario non est affirmanda, *vid. l. 4. c. 1. §. 20. 21.*

§. 7. Ex hisce colligitur, in quonam consistat *veritas*, cujus studio boni viri tantopere commendantur: nempe ut verba animi nostri sensa commode repræsentent alteri, cui eadem intelligendi jus, quæque ut ipsi aperiamus, nobis obligatio perfecta aut imperfecta incumbit, idque eo fine, ut vel idem ex intellectis animi nostri sensis debitum aliquod commodum nanciscatur, vel ne, ubi diversum fuerit significatum, damno præter meritum multetur. Ex quo & hoc obiter patet, non semper mendacium admitti, quando etiam data opera non dicitur, quod vel cum ipsa re, vel cum cogitatis nostris examiussim congruit: adeoque veritatem quasi logicam, quæ in congruentia verborum cum rebus consistit, cum veritate morali non per omnia coincidere.

Observ. 251.

Ex hisce colligitur) Veritas est *voluntaria sermonis*, *consueto consensu intellecti*, & *rei convenientia*, *ex obligatione profecta*. Est species *Justitiæ*, hinc etiam *Veritas Justitiaria* à nonnullis dicitur.

Veri-

Veritati igitur, juxta habitum physicum definitæ *Observ. 247. n. 4.* hic adjicitur moralitas.

Observ. 252.

Adeoque veritatem quasi logicam] Veritatem a lege abstractam, differre à veritate, ad legem relata manifestum est. Interim Autor termino *veritatis logicæ*, hic aliter paulo utitur, quam vulgo fit, & nos secuti sumus *Observ. 247. n. 4.* nisi forte in termino *quasi logicæ*, conciliatio quærenda est. Sed de his non valde contendendum, in majoris tamen perspicuitatis causa dici poterit, veritatem triplici modo spectari, vel quatenus in mente, vel in verbis, vel sub obligatione legis est, illa *mentalis*, vulgo *Logica*, ista *verbalis*, hæc *Ethica* sive *moralis* recte appellabitur.

§. 8. *Mendacium* contra est, ubi de industria sermo aliam præ se fert sententiam animi nostri, quam quæ revera est, cum tamen hanc ipsam is, ad quem sermo dirigitur, intelligendi jus haberet, nobisque obligatio incumberet efficiendi, ut ille nostram sententiam utique intelligeret.

Observ. 253.

Mendacium contra est) *Mendacium* est *voluntaria loquela, usitato significato acceptæ, & rei disconvenientiæ, contra obligationem instituta.* Est species Injustitiæ, & falsiloquio, quod notat sermonis & rei disconvenientiam à lege abstractam juxta *Observ. 247. n. 4.* heic accedit turpitude, ex

prohibitione legis resultans, vulgo tamen frustra talis prohibitio semper occurrere, ac adeo falsiloquium & mendacium coincidere existimatur.

§. 9. Ex dictis igitur constat, mendacii notam haut quidquam contrahere, qui fictis sermonibus, fabulisque utuntur adversus pueros aut similes, ad eorum meliorem informationem, quatenus nudæ veritatis non sunt capaces. Et qui alii fictum sermonem bono fine adhibent, quem plano adsequi non licebat; puta, si innocens protegendus, iratus placandus, mœstus demulcendus, meticuloso animus addendus, fastidiosus ad medicamenta capienda movendus, pertinacia alicujus frangenda, aut malum propositum alterius intervertendum, aut si arcana reipublicæ & consilia, quæ interest aliorum notitiæ subtrahi, fictis rumoribus velut obvelanda, & aliorum importuna curiositas sit amolienda, aut si hosti, quem aperta ratione lædere poteramus, fabulis in strategematis vicem illudamus.

Observ. 254.

Ex dictis igitur constat) Quoties prohibitio circa falsiloquium cessat, toties à vitii labe illud alienum est, tum verò aliquando licitum, aliquando etiam præceptum existimari debet, id quod exempla, Autori hic memorata, recte expendentibus facile, apparebit.

§. 10.

§ 10. Contra si aliquis utique tenebatur alteri sensa animi sui liquido significare, culpam non effugit, si vel partem duntaxat veridicat, aut ambiguo sermone alteri illudat, aut tacitam quandam restrictionem, à communi usu abhorrentem, in mente reseruet.

Observ. 255.

Contra si aliquis) Quoties verò prohibitio circa falsiloquium adest, toties id vitii notam incurrit & mendacii demum nomine venit. De cætero vel aperte falsiloquio obligationem violamus, vel *quesito colore*, dum sermo consueto sensu acceptus, falsus, sed alio respectu, aliaque ex suppositione, de qua tamen ex habilibus indiciis non constat, verus est, ad quem colorem pertinet fallacia divisionis, ambiguitas & reservatio mentalis §. 10. b. quæ & ejus, generis alia, inventa stulta non minus quam injusta sunt, dum iis effectus externus ac contra alios valiturus tribuitur, cum tamen nullo indicio declarentur, eademque ad decipiendos alios adhibentur *add. d. l. 4. c. 1. §. 8. seqq.*

2. Quo igitur moralitas sermonis, contra vulgaria præjudicia, breviter intelligatur, tres casus sunt distinguendi. Vel adest (1) *obligatio ad dicendam veritatem*, hoc casu veritas est virtus, falsiloquium vero & silentium, ad vitia pertinent, vel (2) *obligatio ad falsiloquium & silentium*, tum res inverti, & utrumque pro virtute,

te, veritas vero pro vitio haberi debet, quod nomine *Garrulitatis*, non male forsitan exprimeres, vel (3) *obligatio in nullam partem occurrit*, tum veritas, falsiloquium & silentium sunt species *Prudentiae* & *Imprudentiae*, hinc prout iis prudenter, vel secus quis usus fuerit, ita nomen *Prudentis* aut *Imprudentis* meretur, quorsum virtutes *Peripateticorum* *Homileticæ*, quas vocant, si non semper, certe plerumque, pertinent. Ex dictis etiam liquet. illud dictiterium, quod ne joco quidem mendacium dicendum sit, vel contrarium habere sensum, vel recte explicatum, ineptum & nimis superstitiosum esse.

CAPUT. XI.

DE

OFFICIO JURANTIUM.

§. I.

Per *jusjurandum* sermoni nostro, omnibusque actibus, circa quos sermo intervenit, insigne accedere firmamentum judicatur. Est quippe illud *assertio religiosa, qua divine misericordiae renunciamus,*

mus, aut divinam pœnam in nos deposcimus, nisi verum dicamus. Dum autem omniscius & omnipotens testis simul & vindex invocatur, præsumptio veritatis ideo excitatur, quod nemo temere tam impius credatur, ut ita petulanter gravissimam Numinis indignationem in se deposcere sit ausurus. Inde officium jurantium hoc esse intelligitur, *ut & ad jurandum cum reverentia accedant, & quod juratum est religiose observent.*

Observ. 256.

Per jusjurandum sermoni) Sermonis consideratio uni loco, in Disciplina juris naturalis, non recte includitur, hinc ordo, quo jusjurandum sermoni subjicitur, parum naturalis est. Debebat potius illud pactis subjici, quamvis usus juramenti assertorii in materia Probationis, quæâ laudatâ modo disciplinâ exulare non debebat, expendendus sit. Sed quicquid hujus sit, summatim [1] *jusjurandum* [2] *officium jurantium* specari possunt.

Observ. 257.

Est quippe illud assertio) Sed hæc definitio etiam Perjurio potest applicari! Rectius ita: *Jusjurandum est provocatio vindictæ divinæ, sub conditione mendacii aut perfidiæ facta, ubi tamen mendacium aut perfidia non adest.* Utrum vero conditio, sub qua vindicta divina provocatur, ad-

adsit nec ne, illud homines ut plurimum latet, hinc etiam illi plerumque ignorant, utrum revera juramentum præstitum, an sub ejus specie perjurium commissum sit. In vita tamen civili illud tamdiu præsumitur, donec hoc probatum fuerit.

Observ. 258.

Inde officium jurantium) Hoc nimis maturè inculcatur, antequam enim de officio rectè judicare possis, ipsum juramentum debet esse adæquatè cognitum, præterea insufficiens est hæc doctrina, quare suo loco plenius explicatiufque officium jurantium expendemus.

§. 2. *Finis porro & usus juramenti* in hoc maxime vertitur, ut homines ad enuncian- dum verum, aut servandum promissum pactumve eo firmitus adstringantur metu divini Numinis omniscii & omnipotentis; cujus vindictam si scientes fallant, per jusjurandum in se invocant, ubi alias metus ab hominibus imminens non satis efficax videbatur, quippe quorum vires contemnere aut declinare, vel scientiam fallere se posse sperabant.

Observ. 259.

Finis porro & usus) Juramentorum finis est, ut veritas probabiliter eruatur, ac promissa servantur, ceu hic & §. 1. Autor docet *add. l. 4. c. 2. §. 2.* Nemo scilicet tam impius præsumitur, ut mentiri & fidem fallere, ac simul in illos eventus, poenam divinam in se provocare velit,

lit, hinc, facta provocatione hac, veritatem dixisse & pacta servaturus esse, potius creditur. Ex quo liquet, juramenta ob malitiam humanam invaluisse, adeoque illa, in statu Integritatis, quem Christiani credimus, locum haut fuisse habitura.

§. 3. Quia vero præter Numen nihil est omniscium, aut omnipotens, inde absurde juramentum concipitur *per rem aliquam, quæ opinionione divinitatis destituitur*, hoc sensu, ut ea res testis atque ultrix perjurii invocetur. Etsi hoc frequens sit, ut in juramentis *certaines res nominetur, per quam juretur*, hoc sensu, ut Deus, si jurans fefellerit, vindictam suam in istam potissimam rem exerat tanquam juranti carissimam & maximi æstimatam,

Observ. 260.

Quia vero præter Numen) Forma juramenti essentialis consistit in provocatione vindictæ divinae, sub conditione mendacii aut perfidiæ, quæ non adest, facta, hinc de Deo illud concipiendum esse facile liquet §. 3. *b. add. l. 4. c. 2. §. 3.*

§. 4. In juramentis *formula* illa, qua Deus, dum testis & vindex invocatur, describitur, *accommodanda est ad persuasionem seu religionem, quam circa Deum fovet, qui jurat*. Frustra quippe jurando quis adigitur per Deum, quem non credit, adeoque nec metuit. At nemo per Deum jurare se putat alia sub formula, aut

aut alio sub nomine, quam quod suæ, i. e. ex opinione jurantis, veræ religionis præceptis continetur. Inde quoque est, quod qui *per falsos Deos* jurat, quos ipse tamen pro veris habet, utique obligetur, & si fefellerit. revera perjurium admittat. Quia sub quocunque speciali conceptu generalem Numinis notionem ante oculos habuit; adeoque dum sciens pejeravit, divinæ majestatis reverentiam, quantum in se, violavit.

Observ. 261.

In juramentis formula illa) Non tamen sufficit illud, sed formula illa provocatoria religioni juraturi, licet falsæ, attemperari debet §. 4. *b. add. d. c. 2. §. 4.* quo ipso tamen exigens falsam religionem haut approbat, nam juramentum inter exigentem & jurantem, spectatur ut medium civile, quo controversia vel negotium aliquod, quod aliter expediri non poterat, determinatur, hinc hætenus illud exigitur, veritas aut falsitas religionis, ejusque vel approbatio, vel reprobatio extra sphæram hujus ætus sunt constituta, hinc nimis superstitiosum foret, si quis ab eo, qui falsam sectatur religionem juramentum se salva conscientia exigere non posse, arbitrari velit.

Observ. 262.

Inde quoque est) Provocatio vindictæ divinæ, juxta falsæ religionis formulam facta, proprie quidem nec juramentum, nec perjurium est, utrius-

utriusque tamen effectum habere potest, nam si quis metu Numinis sui fictitii, in ultionem provocati, verum dicat, aut promissa servet, effectus juramenti veri obtentus est, si vero, spreto Numine falso, mentiatur aut fallat, ille contemptus ad verum Deum etiam porrigitur, adeoque poena perjurii perjuro metuenda est §. 4. b. De cætero provocatio vindictæ divinæ, diversis formulis & ceremoniis, arbitrio privato vel lege civili determinandis, porro immediate aut mediate, fieri potest *vid. d. l. 4. c. 2. §. 16.* quod ad formam accidentalem recte retuleris.

§. 5. Ad juramenti obligationem requiritur, ut *animo deliberato* id susceptum sit. Unde juramento hautquidquam obstrictus erit, qui simpliciter juramentum *recitando* protulerit, aut ejusdem verba concepta in prima persona alteri præiverit. Ast qui speciem serio juraturi præ se tulit, is utique obligabitur, quicquid demum in animo suo, dum jurat, agitaverit. Nam alias omnis usus juramentorum, imo omnis ratio intervenientibus signis sese obligandi ex humana vita tolleretur, si quis tacita sua intentione posset impedire, ne effectus ille actum aliquem sequatur, cui producendo idem est institutus.

Observ. 263.

Ad juramenti obligationem) Ut alii actus, ita etiam
S jura-

juramentum fit voluntate *vera*, facultatem scilicet physicam & moralem præsupponente, ac *seria*, quæ ex proæresi jurandi fluit, id quod ex indiciis habilibus, non interna animi destinatione, judicandum §. *s. b. add. d. c. §. s.* Ex his facile constat, tum *qui jurare possint ac revera jurent*, nimirum qui utramque illam facultatem, ac serium liberumque jurandi propositum habent, tum *super qua re recte juretur*, nempe possibili, honesta, liciti & utili, seu explicatius, *super veritate, quam scire refert, quæque aliter commode investigari nequit, eruenda, nec non promisso possibili & licito, cujusque autoritas aliter commode defendi nequit, ac in quo tuendo jusjurandum alicujus efficaciæ esse solet.*

§. 6. Juramenta in se non producant novam & peculiarem obligationem; sed obligationi in se validæ velut *accessorium quoddam vinculum* superveniunt. Semper enim, dum juramus, supponimus aliquid, quo non præstito divinam pœnam in nos provocamus. Quod ineptum esset, nisi illicitum foret non præstare id, quod supponitur; adeoque nisi jam antea obligaremur. Ex quo sequitur, quod actus, quibus in se vitium adhæret, obligationem impediens, per juramentum accedens obligatorii non fiant. Sicuti nec per subsequens juramentum antegressa obligatio valida eliditur, aut jus per eandem quæsitum alteri

teri tollitur. Inde frustra quis juraverit, sese alteri debitum non soluturum. Nec obligabit juramentum, ubi constat, eum qui juravit factum aliquod supposuisse, quod revera ita se non habeat, ac nisi id credidisset, non fuisse juraturum; in primis ubi per dolum ejus, cui juratur, in errorem fuerit adductus. Nec qui injusto metu me ad jurandum adigit, ex eo juramento jus sibi acquirit, ad aliquid á me recte postulandum. Nullas quoque habebit vires jusjurandum super præstanda re quapiam illicita; imo & super omittendo aliquo bono, quod legibus divinis aut humanis præcipitur. Denique juramentum non immutat naturam & substantiam promissi pactive, cui accedit. Inde frustra jurantur impossibilia. Et promissio conditionata per juramentum non mutatur in absolutam, seu puram. Et æque in jurato promisso requiritur acceptatio.

Observ. 264.

Juramenta in se non producant) Effectus jusjurandi *assertorii*, est præsumptio veritatis, quæ tamen probatione contraria elidi potest; *promissorii* vero effectum, tum negative, tum positive Autor expendit. Nimirum jusjurandum hoc non producit novam & peculiarem obligationem, quia, ut philosophatur Autor, aliam semper præsupponit, quæ tamen ratio parum

valida est, rectius igitur urgetur natura actus, jusjurandum non est actus obligatorius, sed provocatorius, quo in eventum obligationis, mendacio vel perfidia violatæ, poena divina provocatur, quare, cum hoc non agatur, peculiarem obligationem non producit.

Observ. 265.

Ex quo sequitur, Generale confectarium inde fluit, quod actus invalidi, per jusjurandum validi & obligatorii non fiant. Quo loco observandum, triplicis generis actus invalidos occurrere posse, nam aliquando actus est invalidus (1) ob *promissi impossibilitatem* (2) *legis, vel divinæ vel humanæ prohibitionem* (3) *consensum vel simpliciter, vel certo modo deficientem*. Primo & secundo casu, actus neque valet, neque ex postfacto confirmari potest, nisi forte lex humana, si illa sola actum prohibuerit, aliquid indulgeat, tertio vero jusjurandum ansam præbere potest, ut consensus deficiens suppleatur, atque ita actus ratihabitione confirmetur.

Observ. 266.

Sicuti nec per subsequens juramentum) Hoc promissum est nullum, ob legis naturalis prohibitionem, adeoque nec ex postfacto à jurante confirmari potest *add. l. 4. c. 2. §. 6.* interim exigentem & jurantem, graviter juramenti abusu peccare, manifestum est.

Observ. 267.

Nec obligabit juramentum) Promissum erroneum, ob defectum consensus, invalidum est, nec ju-

ob

ramento confirmatur, modo error efficax & involuntarius fuerit, nam qui promittit & jurat, neutrum simpliciter facit, sed sub conditione, si ita se res habeat, prout is eam, per errorem, sibi repræsentavit, re igitur aliter se habente, nihil actum est, ex quo liquet, nec jurantem alicujus peccati esse reum, interim ex postfacto tale promissum confirmari potest *add. d. l. 4. c. 2. §. 7.*

Observ. 268.

Nec qui injusto metu) Promissum coactum itidem ob defectum consensus, nullum est, nec juramento firmatur, hoc enim per se nullam producit obligationem sed saltem provocat poenā divinam, si promittens obligationem violat, cum tamen nulla subsit, hinc liquet, nullo respectu, negotio coacto valorem conciliare juramentum, sed esse irritum & inefficax, quæ sententia eo magis admittenda est, quo magis contraria, sub pietatis specie, malitiæ humanæ patrociniatur, si enim coacto Juramento, vinculum conscientis injici potest, habent sane homines maleferiati habile medium, quo nequitia suæ fructum obtinere queant. Non obstat nobis, *quod minimum evitando peccato, ne scilicet quis frustra jurasse videatur, promissum servandum sit*, nam temeritas quidem aliqua subest, sed coacto illa non potest imputari *vid.*

Observ. 141. n. 5. add. l. 4. c. 2. §. 8.

Observ. 269.

Nullas quoque habebit vires) Jusjurandum actus

prohibitos confirmare nequit, cujus exemplum jam habuimus *Observ. 266.* nam absurda à Deo postulantur, ut scilicet jurantem puniat, si ea non faciat, quæ per leges facere non debet, subesse autem in hoc abusu grave peccatum, facile constat. De cætero nihil refert, si lex divina, si humana actum prohibeat, nisi forte hæc in eventum adjecti juramenti, prohibitionem suspendat, tum enim actus valebit, quam limitationem Jus Canonicum sequi solet *add. l. 4. c. 2. §. 9. 10.*

Observ. 270.

Denique juramentum non immutat) De hoc facile constat, interim ex tribus exemplis, quæ hic adducuntur, primum non adeo huc pertinet, nam nullitas actus, potius ex objecto dependet, & nequidem ex postfacto, novo consensu tolli potest, jurantemque gravis peccati arguit *conf. d. c. 2. §. 11.*

§. 7. Hoc autem efficiunt juramenta propter interpositam Dei invocationem, quem neque astu quis deceperit, & cui nemo impune illuserit, ut non solum *atrocior pœna* censetur manere eum, qui juratam, quam qui injuratam fidem fefellit; sed & ut à negotiis, quibus adjiciuntur, omnis dolus & *cavillatio* sit excludenda,

Observ. 271.

Hoc autem efficiunt) Postea effectus juramenti promissorii, positivè expenditur. Nimirum (1)
jura-

*juramentum actum in se validum, reddit firmiorem, dum ob metum majoris poenæ, jurans illum non temere violaturus præsumitur vid. d. c. 2. §. 6. iste tamen effectus solum jurantem, non etiam heredem afficit, meritò enim provocatio vindictæ divinæ pro actu personalissimo habetur, ne alterius factum, alii grave malum conciliet. Heres igitur pactum violando, perfidus, non perjurus est, nec aliam, quam perfidiæ poenam, meture debet vid. d. c. 2. §. 17. (2) actum ob concessam lege humana poenitendi facultatem, invalidum, confirmat, animus enim poenitendi, tam seria provocatio-
ne merito exclusus censetur, modo in altero contrahente dolus absit.*

Observ. 272.

Sed & ut à negotiis) Ex mente Autoris, juramentum (3) genuinam postulat interpretationem. Sed hæc doctrina non satis accurata est, licet enim verum sit, quod à pactis juratis dolus & cavillatio abesse debeant §. 7. h. quod illa quandoque late, quandoque stricte explicanda sint, quod tacitas conditiones non respuant §. 8. h. quod ab iis inusitati sensus & reservationes mentales exulent §. 9. h. add. d. c. 2. §. 12. 14. 15. attamen illa interpretatio non est effectus jurisjurandi, sed eam potius lex naturalis exposcit, hinc etiam in pactis injuratis eadem obtinet.

§. 8. Non tamen semper late, sed & stricte quandoque juramenta sunt interpretanda,

siquidem subjecta materia id requirere videatur; puta, si juratum sit in odium alterius, & non tam promissioni, quam minis juramentum sit adjectum. Quin nec juramentum excludit tacitas conditiones & limitationes, quæ ex ipsa rei natura rite flunt. Puta, si alicui quisquid velit petendi optionem jurato concessi, ubi iste iniqua aut absurda petierit, hautquidquam tenebor. Qui enim aliquid indefinite alteri roganti promittit, antequam noverit, quid iste sit petiturus, præsupponit alterum petiturum honesta, moraliter possibilia, non absurda, non sibi aut aliis pernicio-
sa.

Observ. 273.

Put a si juratum sit in odium alterius.) Interpretationem strictam in pactis juratis admittimus quidem, doctrina tamen, quæ hic proponitur, ac exemplis *d. c. 2. §. 13.* amplius illustratur, incommodè eo refertur, cum stricta illa explicatio, à cavillatione vix possit absolvi. Separanda igitur potius sunt exempla, quædam enim juramenta simpliciter *invalida* sunt, hæc aperte negligi possunt, nec opus est, ut neglectui, strictam quandam interpretationem prætexamus, si verò quædam *valida* sint, tum stricta illa interpretatio merito omittenda, cum cavillationem redoleat *add. Thomas. J. J. D. l. 2. c. 8. §. 50. seqq.*

§. 9. Id quoque notandum, in juramentis sensum totius orationis valere, prout capere se illum profiteatur is, qui juramentum defert, seu cui juratur. Hujus enim præcipue, non jurantis causa juramentum præstatur. Unde ejusdem quoque est concipere verba juramenti, & quidem quantum fieri potest planissime; sic ut ipse significet, quomodo illa intelligat, & jurans annuat, se istius sensum probe percipere; eaque mox ab hoc liquido sunt exprimenda, sic ut nulla ratione eadem cavillari & eludere queat.

Observ. 274.

Id quoque notandum) Videntur hæc contradicere iis, quæ Autor §. 4. docuit, ubi scilicet juramentum persuasioni jurantis accommodandum censuit. Sed salva res est; juramentum strictè dictum persuasioni jurantis attemperari debet, at promissio, ex sententiâ deferentis, communem significatum secutâ, intelligi debet.

§. 10. *Divisio* juramentorum commode desumitur *ab usu*, cui illa in vita communi adhibentur. Quædam enim promissis pactisque adduntur, ut eo majore cum religione observentur. Quædam autem adhibentur ad confirmandam alicujus assertionem, circa factum illiquidum, & ubi veritas aliis rationibus commodius investigari nequit. Quale
 S 5 exigi.

exigitur à testibus, sive qui alieni facti conscius habentur. Quandoque etiam ipsi, qui inter se disceptant, deferente iudice, aut altera parte, suo juramento litem solvunt.

Observ. 275.

Divisio juramentorum) Juramenta dividuntur à fine, in *Promissoria*, quibus futura facimus certiora, *Affertoria*, quibus præteritorum veritatem eruimus, & *Mixta*, quibus utrumque agimus. Singulorum multiplex in vita civili est usus, hinc variae species exsurgunt, quas Jurisprudencia particularis distinctius persequitur *add. d. c. 2. §. 18. 19. 20. 21. 22.*

2. Jurijurando opponitur (1) *Temeraria vindicta divinae provocatio*, quæ scilicet circa res impossibiles, illicitas aut nullius pretii, vel sine iudicio & deliberatione fit (2) *Perjurium* quod est *provocatio vindictæ divine*, subconditione mendacii aut perfidiæ facta, ubi mendacium aut perfidia adest. Vel si mavis, est *mendacium aut promissorum violatio*, audaci provocatione, iræ ac pœnis divinis exposita. Sed prior definitio accuratior est, mendacium enim & pactorum violatio perjurii conceptum, exquisitè philosophando, non ingrediuntur (3) *Relaxatio*, quæ soli promissorio opponitur, est autem vel *impropria*, dum juramentum actui invalido appositum, nullum declaratur, vel *propria* i. e. obligationis juratæ à Creditore, vel ob justam causam, ab Imperante facta remissio *add. l. 4. c. 2. §. 23. 24.*

3. Offici-

3. Officium Jurantium, de quo adhuc dicendum, ut recte intelligatur, observandum est, quod juramentum duplici modo spectari queat, vel ut *actus hominis erga Deum*, qui respectus perpetuus & uniformis est, eoque pertinet *officium generale*, quod præcepta divina, de Deo colendo ac speciatim propria cujusvis religio, dirigunt; vel ut *instrumentum negotiorum in vita civili expediendorum*, quo respectu in varias formas speciales se componere solet, eoque spectat *officium speciale*, quo quis nonnunquam juramentum præstare cogitur, quodque ex præceptis socialitatis ac Philantiæ, nec non legibus humanis dependet.
4. Officium speciale, pro ratione variorum juramentorum in vita civili occurrentium, distinctius persequitur Jurisprudentia particularis, sed Generale, quod circa quodvis juramentum speciale, fundamenti loco supponitur, hic delineandum est; poterit illud in *Antecedens*, *Concomitans* & *consequens* distingui.
5. Circa *Antecedens*, tres occurrunt quæstiones (1) *an juramentum jure naturali sit prohibitum?* quod negandum, in casum enim delicti, hominibus incogniti, poenam divinam provocare irreverens non est, modo delictum absit (2) *an sit præceptum?* & hoc negandum, nam uti jusjurandum est actus externus, ad quem jus naturæ non obligare, *Observat. 105.* diximus, ita admissa licet, quoad cultum Dei externum, obligatione, ad juramentum tamen eadem

dem non pertineret, cum in eo honorans Dei cultus non contineatur (3) *an sit licitum?* hoc unicum superest, adeoque affirmari debet. Sed juramenta sunt licita, non temeraria & inconsulta vindictæ divinæ provocatio, multo minus perjurium; *Non temere igitur, juramenti pretextu, pœna divinæ provocatio vel poscenda, vel facienda vid. l. 4. c. 2. §. 2. verb: Et hoc nomine,* contra quod in vita civili, sub pietatis specie, graviter sæpe peccatur, dum ad impedienda delicta maximè inolita, jusjurandum promissorium exigitur, atque ita ipsis revera perjurium additur. Alia ratio est jusjurandi assertorii, hoc enim, ob probabile perjurii periculum, non est omittendum, sed tum demum non recte exigitur, si morali æstimatione perjurium certum subsit, aut probatio alio medio æque commodo haberi queat, vel de re vilissima arguat.

6. *Officium Concomitans*, est, ut [1] *cum reverentia & pietate ad juramentum accedamus*, quod Autor §. 1. b. admonuit [2] *per Deum juremus*, qui autem per falsos Deos jurant, illi non tam jurando, quam falsam religionem sectando, peccant (3) *ne sub specie juramenti pejeremus*. Denique *consequens* est, ne (1) *præstito juramento, miraculum expectemus vid. d. l. 4. c. 2. §. 2. & ut (2) quod jurato promissum est, servemus §. 2. 1. b. conf.* Observat. ad Lauterbach. Comp. Jur. *Observat. 321. 322.*

CAPUT. XII.

DE

OFFICIO CIRCA AD-
QVIRENDUM RERUM
DOMINIUM.

§. I.

Cum ea sit conditio corporis humani, ut adsumtis extrinsecus rebus indigeat, queis nutriatur, & contra ea, quæ ipsius conpagem destructum eunt, muniatur; per complures quoque res isthæc vita commodior & mollior reddi possit; inde tuto colligitur, volente utique summo universi Moderatore fieri, quod homo alias creaturas ad usus suos adhibeat; quin ut etiam multas earundem destruat. Neque id solum obtinet circa vegetabilia, & quæ citra sensum corrumpuntur: sed & circa innoxia animalia, quæ utut cum dolore moriantur, citra peccatum tamen ab homine cibi causa occiduntur & consumuntur.

Observ. 276.

Cum ea sit conditio) Usus præceptorum naturalium ac præcipuè socialitatis, postea circa dominium

minium expenditur, explicata in antecessum hujus indole. Id igitur Ratio ex consideratione humanæ naturæ, recte colligit, *aliquam rebus creatis utendi facultatem hominibus à Deo esse concessam*, & quidem non solum quoad res inanimatas, sed & animatas §. 1. b. nam nulla inter homines & bestias est juris communio, quæ hoc impediat, præterea etiam nullam aliam prohibitionem ratio reperit *vid. Op. Maj. l. 4. c. 3.* quæ omnia in S. Codice confirmata inveniuntur *Gen. I. 28. IX. add. Albert. Comp. Jur. nat. l. 2. c. 7. §. 14.* Ista autem facultas recte habetur pro *jure*, oritur enim ex permissione Imperantis, imò pro *vero dominio universalis*, nam nisi hoc præsupponas, dominia singularia, facto hominum, introduci non potuissent. Nec obstat, *quod illa facultas toti humano generi competat, nemoque per eam excludatur, adeoque dominium dici nequeat, cum hoc in exclusione aliorum consistat*, nam domini essentia consistit in *plenâ rei alicujus ad aliquem pertinentiâ*, non vero in *exclusionem aliorum*, sed hæc saltem regulariter dominium sequitur, salva tamen ejus essentiâ abesse potest, licet Autor aliud, at sine ratione, persuasum sit *l. 4. c. 4. §. 3. 5. 10. 11. 12.*

§. 2. Cæterum ab initio omnes istæ res intelliguntur abs Deo *velut in medio hominibus expositæ*, ita ut non magis ad hunc, quam ad alterum pertinerent. Ita tamen ut sic cir-

ca eas disponderent homines, prout conditio humani generis, & ratio pacis ac tranquillitatis, bonique ordinis in eodem conservandi videretur exigere. Inde cum adhuc intra paucos genus mortalium subsisteret, placuit, *ut illa quidem cujusque fierent, nec ab altero ipsi eripi deberent, quæ quis adprebendisset* hac intentione, ut eadem ad usus suos adplicaret; ipsa tamen corpora, ex quibus illæ res provenirent, in medio ad neminem peculiariter spectantia manerent. Sed postea multiplicatis hominibus, & cum cultura cœpisset adhiberi rebus, ex quibus homini alimenta & tegumenta proveniunt, ad evitandas rixas, & introducendo bono ordini *ipsa quoque corpora rerum inter homines divisa*, & cuilibet sua portio propria assignata, hac addita conventionem, *ut quæ in prima rerum divisione in medio forent relicta, deinceps ejus possent fieri, qui primus eadem sibi asseruisset.* Sic igitur volente Numine, prævio consensu hominum, pactoq; saltem tacito, *proprietas rerum sive dominium* fuit introductum.

Observ. 277.

Ceterum ab initio) Quomodo verò dominium illud universale, à Deo humano generi oblatum, acceptaverint homines, quæque adeo dominiorum & communionum singularium, quæ

quæ hodie occurrunt, prima sit origo, deinde quæritur? Quæ disquisitio miristrice, quas scriptores pro captu, hypothesiumque suarum habitu commentisunt, referta est, videturque in universum plus difficultatis & curiositatis, quam utilitatis habere, nisi quod ei aliquid dandum videatur, quo conclusiones, quæ quoad controversiâs hodiernum occurrentes, nonnunquam inde elici solent, eo rectius intelligere possis.

2. Mihi paucis ita videtur: Ab initio omnes res fuerunt *nullius*, id est earum dominium hominibus à Deo quidem *donatum*, sed ab his nondum *acceptatum* fuit, in quem sensum verba Autoris *h.* accipietiam possunt. Si quis primævum istum statum, velit dicere *communio-nem negativam*, non quidem repugno, modo propositum teneat, nec ambiguitate doctrinæ, sibi ac aliis imponat. Id pro certo supponimus, res nullius ex eo æstimandas esse, si adsit quidem *destinatio*, sed desit, *acceptatio*, nam si vel omnes, vel multi, vel singuli sibi res asserant, tum manifestum est, quod res hætenus *nullius*, fiant *alicujus*, & quidem vel *communes*, vel *singulorum*, id quod exemplo rerum, quæ per derelictionem iterum nullius fiunt, satis intelligi potest.

Observ. 278.

Ita tamen ut sic circa eas) Uti acceptatio oblatis dominii ab hominibus fieri debuit, ita modus ac-

acceptandi adeoque dominium habendi, ab eorum quoque arbitrio, legibus tamen socialitatis attemperato, dependit, ceu recte hic dicitur, nam Deum modum partiendi dominium præcepisse, aut communionem aliquam vel dominium singulare introduxisse, aut vel omnibus, vel nonnullis humani generis individuis, de proprietate singulari, immediate prospexisse, nec ratione nec revelatione probari potest, præterea ex ista assertione varia incommoda resultant.

2. Origo ergò domini singularis, à facto hominum repetenda est, & hoc quidem non aliud fuit, quam *Occupatio*, hæc sane pro primo & antiquissimo meritò habetur, nam quando universitati, quæ non simul & semel, sed successive existit, nec res communiter habere potest aut solet, (qualem universitatem gens humanum repræsentat) aliquid indefinite donatur, tum ex voluntate donantis, primi homines eâ utiq; prærogativa gaudent, ut occupando dominium, contra alios valiturum, sibi acquirere queant, imo in universum ea vis occupationi, voluntate donantis tribuitur, ut quivis per eam rem nullius sibi comparare possit, modo plus justo sibi non asserat, sed intra leges socialitatis subsistat, nec opus est cæterorum, qui excluduntur consensu, nam ex ordinatione donantis, vim excludendi occupatio sortitur. Atque hæc non elidunt ea, quæ vulgo, pro necessitate pacti cujusdam expressi vel taciti e-

vertendæ Occupationis efficacix, adducunt, *vid. Op. Maj. l. 4. c. 4. §. 5.*

3. Jam si præsupponas originem generis humani, prout eam S. literæ tradunt (non sine ejusmodi præsupposito, ratio hic philosophari nequit) tum probabile est, primos homines statim occupando, sibi aliquas res asseruisse, hinc Adamo, Evæ, eorumque liberis, sub imperio paterno licet adhuc existentibus, proprias res tribuere, nil vetat *vid. Gen. IV.* Reliqua, quæ primi homines non attigerunt, remansere in statu concessionis divinæ, seu res *nullius*, donec multiplicatis hominibus, successivè occupata, dominium vel communionem singularem subirent. Quod si adhuc hodie res incognitæ, vel saltem nondum acceptatæ occurrant, illæ erunt *nullius*, quemadmodum in illum statum recidunt, quæ à dominis derelinquuntur. Si verò quædam omnium usibus sufficiant, ut vastus Oceanus, illæ accurate loquendo non sunt amplius *nullius*, quia homines sibi eas asseruerunt, sed potius sunt *communes universaliter & negative.*

Observ. 279.

Inde cum adhuc intra paucos) Ex iis, qui Auctoritatem S. literarum admittunt, Grotius *de J. B. P. l. 2. c. 2. §. 2.* sub initium generis humani communionem asserit. Autore eandem quoque admittit, sed *negativam* fuisse contendit *§. 2. h. l. 4. c. 4. §. 5.* cujus à positivâ, ex mente

te Nostri, discrimen in eo positum est, quod positiva, ad exemplum dominii singularis, nonnullos excludat, sed negativa neminem, de cætero utraque communem quandam proprietatem involvit *d. l. 4. c. 4. §. 3. 9. 10. 12.* adeoque negativa, statum rerum nullius, prout illum *Observ. 277. n. 2.* repræsentavi, neutiquam notat.

2. Enimverò, quod pace Summi viri dixerim, illud discrimen nimis dilutum est, ut id comminisci, operæ non fuerit pretium, nam positivam communionem necessario alios excludere debere, id quidem idonea ratione probari nequit, ceu *Observ. 276.* Jam admonui, dein admissum etiam discrimen, nihil ad rem facit, quando enim de primævâ communionem controvertitur, non de eo disputatur, an aliqui ab ea sint exclusi, sed an primi mortales, res communiter sibi asseruerint possederintque? hinc res eodem recidit, sive positivam, sive negativam communionem asseras, adeoque utraque etiam iisdem argumentis defenditur *vid. d. l. 4. c. 4. §. 7. seqq.* & impugnatur,

3. Jam quod attinet illam, de primæva communionem, sententiam, non rectè quidem eadem inde improbatur, quod talis communio naturæ humanæ haut conveniat, vel impossibilis sit *vid. d. l. 4. c. 4. §. 13. add. Boecler. ad Grot. l. 2. p. 42.* nihilominus tamen illa parum probabilis est, nam (1) nulla apparet ratio, quare primi mortales, ex rebus in medio expositis, ali-

quas sibi haut affuerint ! Equidem in magna rerum copia, hominumque paucitate, de dominionon adeo anxie laborari solet, ut tamen illud præcise negemus, ac communionem statuamus, nulla cogit ratio. Imo (2) si primi mortales, ceu Noster contendit, de usu rerum necessariarum, singulis secure relinquendo, inierunt conventionem, cur non eadem opera de ipso dominio eos transegisse putemus ? Dubio procul etiam (3) communio illa primæva, ex hypothesebus Gentilium, homines subit è terra enatos fabulantium, *vid. d. l. 4. c. 4. §. 8.* quas Grotius *d. l. 2. c. 2. §. 2.* satis indicat, originem habet, quibus explosis, hæc merito quoque rejicitur, Denique (4) S. literæ memorant res liberorum Adami proprias *Gen. IV.* quas etiam ipse Autor *d. c. 4. §. 11. 12.* post emancipationem admittit, quæ sane communionem ad aliquod tempus durantem, ac pacto, quoad usum rerum necessariarum, limitatam, satis evidenter destruunt.

Observ. 280.

Sed postea multiplicatis) Negata communione, hæc quoque corruunt. Negamus igitur *divisionem & pactum, futurae occupationi efficaciam tributurum, add. l. 4. c. 4. §. 6.* quo ultimo etiam opus non fuisset, licet communionem & divisionem admittas, cum occupatio proprià vi, dominium alios exclusurum, operari queat, ceu *Observ. 278. n. 2.* ostendimus, præterea nimis scholasticum videtur, rudioribus hominibus

bus (quales post lapsum primos mortales fuisse, probabile est) tam profundam curam tribuere, ut æterno pacto, posteritati, post multa secula venturæ, quoad acquirenda rerum dominia, prospexerint, hujus sane tabulas sancte asservari, posterorum intererat!

Observ. 281.

Sic igitur volente Numine) Hæc etiam conclusio ex præmissis emendanda est. Deum contulisse dominium universale, eoque volente, dominia singularia & definita, ah hominibus esse constituta, rectè dicitur, sed illam constitutionem, præsupposita communione, factam esse divisione ac pacto quoad futuram occupationem, id vero haut admittimus, sed occupatione potius solitaria, quam tam primi quam secuti mortales, in rebus nullius fecerunt, originarie dominia definita, esse constituta, arbitramur.

2. Alii, quibus communio displicuit, in alterum extremum prolapsi asserunt, dominium singulare & definitum, immediate à Deo esse constitutum, dum ille *Adamo dominium, toti humano generi competens, adeoque commune, præterea vero dominium etiam privatum, pro me, te &c.* contulerit *vid. Albert. C. J. N. p. 2, c. 7. §. 14. 29. add. Boecler. ad Grot. d. l. p. 38.* Sed hæc alterà longe est deterior, nam hominum, quibus nec ratione, nec revelatione, portio data innotuit, conscientiis perpetuum injicit laqueum, præterea sibi ipsi contradicit, jam

enim *dominium* divinitus tributum, causam occupationis, non occupationem, causam dominii esse, seu ex dominio privato occupationem suam sortiri effectum contendit vid. d.c. 7. §. 23. 29. jam res vacuas, & per occupationem originarie dominio subjiciendas asserit, d.c. 7. §. 27. 31. seqq. quæ non satis cohærent.

§. 3. Est autem *dominium* jus, quo alicujus rei velut substantia ita ad aliquem pertinet, ut eodem modo in solidum non pertineat ad alium. Ex quo consequitur, ut de rebus, quæ tanquam propriæ ad nos pertinent, pro arbitrio nostro disponere, & ab eorundem usu quosvis alios arcere possimus; nisi quatenus per pacta singulare jus à nobis sibi quæsierint. Etsi in civitatibus contingere soleat, ut *dominium* non semper penes quosvis sit illibatum, sed certis limitibus circumscriptum per imperium civile, aut ex dispositione & conventionem hominum inter se. Quando autem res una ad plures indivisim eodem modo pertinet, illa istis pluribus vocatur *communis*.

Observ. 282.

Est autem dominium } Hoc in suâ perfectione spectatum, clarius dixeris *jus*, ob quod res aliqua corporalis, ad plenissimum utendi effectum, nostra est. Consistit adeo ejus essentia in pertinentiâ ad nos, non exclusionem aliorum, ceu præcipit Auctor

tor l. 4. c. 4. §. 3. hæc enim saltem consequitur, pluribus hominibus existentibus, interim certum est, quod de dominio non adeo sumus solliciti, si soli existamus, quod tamen ei negando non sufficit.

Observ. 283.

Nisi quatenus per pacta) Dominium à diversis circumstantiis variè distingui potest (1) ab effectu est vel *plenum*, de quo definitio, vel *minus plenum* seu *restrictum*, cujus effectus imminutus est. Est illa restrictio vel *indeterminata*, dum per imperium civile, pro utilitate Reipublicæ, varie dominium circumscribitur, vel *determinata*, quando privatis per conventiones similesve actus, intuitu rei nostræ, aliquod jus acquiritur, quod quidem diversum esse solet, vel enim *partem domini*, consequuntur, quo casu oritur dominium directum & utile, vel *aliud jus*, rem ipsam afficiens, aut servitutem pignus, accipiunt, vel *jus personale*, vi cujus dominum, præstationem personalem postulare queant, sibi acquirunt (2) à *duratione* in *revocabile* & *irrevocabile*.

Observ. 284.

Quando autem res) Amplius (3) à *subjecto* in *singulare*, quod uni, & *Commune*, quod multis competit. Hoc uno nomine dicitur *Communio*, quæ uti suos habet gradus, ut alia altera sit generalior, ita certo respectu est *positiva*, quatenus dominium commune ponit, & *negativa*,

quatenus alios excludit (quod tamen ad essentiam communionis non pertinere, aliquoties admonitum) vel sociis jus, cæteros socios excludendi, aut singulis dominium pro diviso, negat. Quod si res aliqua ita sit communis, ut eadem in dominium singulare redigi nec possit, nec debeat, tum communio etiam peculiari sensu, *negativa* evadit. *vid. Observ. 278. n. 3. in fin.*

2. Competit dominium hominibus, etiam rationis usu destitutis, hi enim vicaria operâ illud acquirunt & sustinent *vid. l. 4. c. 4. §. 15* Porro domini sunt capaces personæ morales compositæ, quo nomine certus hominum coetus, peculiari ratione consociatus, ac â certis individuis abstractus, adeoque ut immortalis spectatus, venit, tales personæ sunt, Civitates, municipia, Collegia, Ecclesiæ, Nosocomia similesve, quæ itidem in rebus acquirendis & administrandis, aliorum operâ uti solent. A dominorum autem diversitate, res fortiuntur diversas denominationes, ut communes publicæ, universitatis, privatæ &c. dicantur, quas denominationes adeò mutabiles esse, liquet. In iuro Romano, â negatione domini, pleraque illa rerum nomina repetuntur, quod generaliter intellectum â veritate abludit.

§. 4. Sicuti autem res non simul & semel in proprietatem iverunt, sed successive, & prout

ut

ut usus humani generis postulare visus est: ita non necessum fuit, ut omnes & singulae res propriae fierent, sed salva pace generis humani aliqua potuerunt, aliqua debuerunt intra primævam velut communionem permanere. Nam quæ utilia licet hominibus, *inexhausta* tamen sunt, sic ut omnium usibus possint pateri, nec tamen singulis usus iste reddatur malignior; ea dividere velle super vacuum simul ac ineptum foret. Uti est lumen calorque solis, aër, aqua profluens, & si quæ sunt similia. Qvo refertur etiam vastus Oceanus, magnis continentibus interjectus, quoad partes à litoribus remotissimas. Quippe cum ille non solum omnium usibus promiscuis sufficientissimus, sed & uni alicui populo ejus *custodia moraliter sit impossibilis*. Ubi enim aliqua res ita sit comparata, ut nullo modo alii ab ejus usu arceri queant, illam dividi, aut propriam cujuspiam fieri non supervacuum solum est, sed & inanibus litigiis materiam præbere aptum.

Observ. 285.

Sicut autem res) Doctrina hæc, si recte intelligatur, admitti potest, nimirum res successive in proprietatem iverunt, dum primi, eosque successive secuti homines, mediante occupatione, res nullius maximam partem sibi subjicerunt, at-

T s

que

que ita dominium originariò constituerunt. Quodsi autem, præsupposita communione, per divisionem & occupationem, generale aliquod pactum præsupponentem, dominia successive introducta dicas, tum doctrinam illam haut admittimus.

Observ. 286.

Ita non necessum fuit] Dominia singularia, in omnes res, non esse constituta, recte quidem dicitur, sed inde non sequitur, quod quædam intra primævam communionem permanferint, cum hæc probabiliter nunquam fuerit, quare ita potiùs philosophandum esse arbitramur. Ex rebus nullius, quales ab initio omnes fuerunt, pleraque dominium privatum subierunt, quædam vero, quas homines nondum attigerunt, mansere nullius, sicut etiam in illum statum recidunt res derelictæ, quodsi autem res aliqua sit, inexhausti usus ac omnibus sufficiat, illa est reddita communis negative *vid. Observ. 278. n. 3.* ut nec unius sit, nec fieri possit.

Observ. 287.

Nam quæ utilia licet) Refert Autor exempla rerum negative communium, cum quo fere conspirat Jus Romanum §. 1. *f. de R. D.* Sed nihil impedit, quo minus luminis calorisque solis, aëris & aquæ profluentis dominium, quatenus illa rebus nostris continentur, asseramus, licet usus innoxius ex lege humanitatis, permittendus sit. Quoad aquam profluentem consentit Autor in *Op. Maj. l. 3. c. 3. §. 4.*

Ob.

Observ. 288.

Quo refertur etiam vastus Oceanus) Hic merito pro re, negative communi, juxta respectum allatum habetur, hinc non tantum stolidum sed & injustum foret, si una aliqua Gens, dominium vasti Oceani sibi asserere velit. Alia ratio est maris, quod terras alluit, ac instar munimenti est, hoc enim cum littoribus, merito certa aliqua Respublica sibi asserit *vid. l. 4. c. 5. §. 5. seqq.* Ex quibus summa fluit conclusio: Objectum dominii singularis, esse res, quarum usus omnibus non sufficit, & quarum custodia moraliter uni est possibilis *vid. l. 4. c. 5. §. 1. 2. 3. 4.*

§. 5. *Modi acquirendi* dominii sunt vel *originarii* vel *derivativi*. Per illos ab initio in rem aliquam proprietas introducitur. Per hos dominium jam constitutum ab uno in alterum transit. Priores modi iterum sunt vel *simpliciter tales*, quibus dominium in corpus alicujus rei acquiritur; vel *secundum quid*, queis incrementum aliquod ad rem nostram adjungitur.

Observ. 289.

Modi acquirendi) Præsuppositâ divina dominii universalis concessione, homines suo facto dominia singularia introduxerunt, ac introducta variè in alios transferunt. Factum illud dicitur *Modus acquirendi dominii*, & nihil aliud est, quam *actus, ob quem dominium vel com-*

munio particularis, à lege vel naturali vel civili, proximè constituitur.

*Observ. * 290.*

Sunt vel originarii) Tripliciter potissimum Modi illi distingui possunt (1) intuitu *dominii* in *originarios* & *derivativos*, illi pertinent ad res nullius, hi ad res alicujus (2) *rei* in *principales* & *accessorios*. Autor quidem hanc divisionem, pro sub-divisione modorum originariorum habet, sed ad derivativos quoque illa pertinet (3) *legis*, quæ dominium tribuit in *naturales* & *civiles*, quæ divisio satis quidem trita, non usque adeo tamen liquida est, interim sic dicendum videtur modus naturalis est, qui *solo consensu acquirentis*, quoad *res nullius*, vel *mutuo transferentis & acquirentis*, quoad *res alicujus*, constat. Civilis vero, qui, *sine consensu domini speciali*, dominia transfert, vel aliquando plus, quam *mutuum consensum*, exigit.

§. 6. Post recepta inter homines divisa rerum dominia ita inter homines conventum; ut quæcunque sub primævam divisionem non venerunt, ea cederent occupanti, i. e. ei, qui primus eadem corporaliter adprehendisset animo sibi habendi. Sic ut hodie originarius modus dominium in corpus alicujus rei adquirendi sit *sola occupatio*. Hoc igitur modo adquiruntur regiones desertæ, quas nullus unquam homo sibi asseruit; quæ
fiunt

sunt illius, qui primus eas ingreditur animo sibi habendi, ita ut culturam eis adhibeat, & certos limites constituat, quousque eas suas esse velit. Ubi autem coetus multorum hominum junctim occupaverit partem quampiam terræ, usitatissimum est, ut singulis ex eo coetu aliqua portio adsignetur; quæ supersunt, ad totum coetum pertinere censeantur. Per occupationem quoque adquiruntur feræ bestiæ, aves, pisces, in mari, fluminibus aut lacubus versantes; item si quæ à mari in litus solent ejici; modo tamen per imperium civile promiscua ejusmodi rerum captura non sit interdicta, aut certo alicui assignata. Quas necessum est, si nostræ debent fieri, ut corporaliter adprehendamus, & in nostram potestatem redigamus. Occupatione quoque adquiruntur res, in quibus dominium, cui ante subiectæ fuerant, plane est extinctum. Puta, si quæ abjiciuntur ea intentione, ne amplius ea sint nostra; aut quæ ab initio inviti amittimus, sed post pro derelictis habemus. Quo etiam pertinet thesaurus, seu pecunia, cujus dominus ignoratur; qui inventori cedit, ubi per leges civiles aliter non est dispositum.

Observ. 291.

Post recepta) Antiquissimum modum originarium, *divisionem* fuisse censet Autor. Sed nobis

com-

communio primæva, eam secuta *divisio* & *pactum de rebus vacuis occupanti concedendis*, fabulosa videntur *vid. Observ. 279. 280. 281.* hinc & olim & hodie sola occupatio, sine pacto prævio spectata, modus originarius fuit & est. Quod si autem plures homines rem vacuum occupent, adeo ut mediante occupatione communio particularis constituatur, tum per divisionem posse dominia singularia introduci, ac hoc sensu, eā pro modo originario haberi concedim⁹.

Observ. 292.

Sic ut hodie) De hoc modo diximus. De cætero occupatio est *rei nullius animo sibi habendi facta apprehensio*. Habetur illa recte pro modo naturali, per ea quæ diximus *Observ. 278. n. 2.* Reliquorum, qui per occupationem excluduntur, consensum ex pacto, primæ divisioni addito, repetere, fabulosum, ex studio autem socialitatis, præsumere, non necessarium est. Neque tamen occupatio, ad acquisitionem originariam præcisè est necessaria, sed requiritur saltem, ut *medium voluntatem acquisituri aliis indicandi*, quod si adeo alii, in acquisitionem rei nullius, aperte consentiant, vel acquisiturus voluntatem habendi, alio actu æque habili, declaret, tum etiam sine occupatione, dominium originarium acquiri potest *vid. Grot. de J. B. P. l. 2. c. 8. §. 2.*

Observ. 293.

Hoc modo igitur acquiruntur) Generale Occupationis objectum sunt *res nullius*. In specie igitur

tur occupatione acquiruntur (1) *regiones vacuæ vel iterum deserta*, vid. l. 4. c. 6. §. 3, 4. quando autem duo circa acquirendam regionem contendunt, tum neque occupatio, neque similis actus, acquisitioni, alterum exclusuræ, sufficit, sed res utrique potius est communis, ex quo controversiam d. c. 6. §. 8. propositam, rectius forte decideris, quam vel ab Arbitris, vel ab Autore, ibidem factum est.

Observ. 294.

Per occupationem quoque acquiruntur) Porro occupatione acquiruntur (2) *feræ bestię & res à mari ejectæ* d. c. 6. §. 5. Sed hæc vera sunt, quamdiu illæ res revera sunt nullius, sed in Civitatibus non recte pro talibus habentur, cum ex Earum indole liqueat, res alicujus pretii, quæ privatum possessorem non habent, non amplius esse nullius, sed ad Rempublicam pertinere, adeoque earum occupandarum jus nulli competere, nisi cui Civitas & Imperans id concefferint. Hoc si admittas, non opus est, ut cessantem occupandi facultatem demum à speciali legis prohibitionem repetamus, ac de ejus æquitate simus solliciti, quæ vulgaris est philosophia, cui Autor etiam indulget §. 6. h & d. c. 6. §. 6.

Observ. 295.

Quas necessum est) Quoad privatos, opus quidem est, ut voluntas acquirendi, actu habili aliis innotescat, occupatio tamen præcise non est
ne-

necessaria, sed vulneratio, persecutio, inclusio similesve actus, idem omnino præstare possunt; libet vulgò ex falsa, de absoluta occupationis necessitate, hypothese dissentiant, a qua doctrina nec Autor valde abludit *d. c. 6. §. 9. 10. 11.* In civitatibus autem recte, ante occupationem specialem, dominium ferarum similiumque rerum, quatenus in territorio continentur, imperio civili tribuitur, licet Autor ex memorata modo hypothese, iterum dissentiat *d. c. 6. §. 7.*

Observ. 296.

Occupatione quoque) Ad objecta occupationis (3) *res derelictæ & thesaurus* etiam pertinent *add. d. c. 6. §. 12. 13.* cumque hæ res semel dominio privato subfuerint, hinc si derelinquantur, non statim publicæ censeripossunt, sed meritò tamdiu pro rebus nullius habentur, donec per leges civiles privati ab earum acquisitione excludantur.

§. 7. Cæterum plurimæ res, quæ dominio subjectæ sunt, non in eodem semper statu persistunt, sed variis *auctibus* suam *substantiam dilatant*; quibusdam extrinseca *incrementa* accedunt; aliæ *fructus* proferunt; multis per *formam* industria humana superinductam pretium accrescit. Quæ omnia vocabulo *accessionum* comprehendi possunt; & in duas classes dividuntur. Quædam enim citra factum ho-

hominis ex sola natura istarum rerum prove-
niunt: quædam factio & industria hominum
in solidum, aut ex parte procurantur. Circa
quas ista est regula; ut qui est dominus rei, ad
eundem quoque pertineant accessiones &
quævis emolumenta; Et qui ex sua materia
speciem fecit, ejus speciei sit dominus.

Observ. 297.

Ceterum plurimæ res) Pergit Autor ad acquisitionē
Accessionum, quarum varietatem heic explicat
add. l. 4. c. 7. §. 1. Et ex ejus quidem sententia, ac-
quisitio hæc, *originaria* est, quod tamen non in-
distincte verum, cum sæpe dominium de per-
sona in personam transeat, imo plura acces-
sionum exempla sint, in quibus ne quidem ali-
qua aliqua acquisitio occurrat, sed ei saltem,
consensu aut lege positiva peragenda, occasio
præbeatur *add. Observ. 299. n. 2.*

Observ. 298.

Circa quas ista est regula) Sed illa inadæquata est,
hinc potius duæ regulæ summatim tenendæ
sunt (1) *si id, quod rei nostræ accedit, vel ex ipsa*
re proveniat, vel operâ nostrâ producatur, aut ex-
trinsecus adveniens, nullius sit, domino illud natu-
raliter acquiritur, nisi jus acquirendi in alium sit
translatum (2) *Si verò res aut opera accedens, vel*
intotum vel pro parte, alterius sit, tum naturali-
ter oritur communio, nisi transferendi voluntas in-
terveniat, quæ tamen plerumque deficit. Com-
munio autem illa solvitur, ac adeo ad acquisi-
tionem

tionem dominii devenitur, vel *consensu partium* vel *lege positiva*, quæ juxta æquitatis circumstantias, rem dirimit. Atque talem dirimendi modum Romani, Judici tradere voluisse videntur, in quem sensum, si eorum doctrinam accipias, cum censurâ Grotii *l. 2. c. 8.* illa conciliari potest. Ex his principiis, de singulis accessionum exemplis, quæ *l. 4. c. 7.* etiam adducuntur, facile poterit judicari, ut illa speciatim persequi, jam non attineat.

§. 8. Frequenter tamen contingit, ut alii ex contractu, aut alia via jus sibi quæsiwerint ex re nostra certum commodum percipiendi, aut etiam impediendi, ne nostra re omni modo utamur. Quæ jura solent vocari *servitutes*. Ac dividuntur in *personales*, ubi utilitas ex re aliena ipsi personæ immediate obvenit; & *reales*, ubi ex re aliena mediante re nostra utilitas capitur. Inter illas numerantur ususfructus, usus, habitatio, operæ servorum. Reales iterum dividuntur in *servitutes prædiorum urbanorum*, & *rusticorum*. Illæ sunt v. g. servitus oneris ferendi, luminum, ne luminibus officiatur, prospectus, stillicidii recipiendi, &c. Hæ sunt, v. g. iter, actus, via, aquæductus, aquæ haustus, pecoris ad aquam appulsus, jus pascendi, &c. Quæ omnes fere ex occasione vicinæ introductæ sunt.

Observ.

Observ. 299.

Frequenter tamen contingit) Occasione cohabitationis, sæpe alii in rebus nostris jus acquirunt, dum vel in partem domini admittuntur, hinc oritur *dominium minus plenum*, vel ratione crediti securitatem quærunt; hinc existit *pignus*, vel alicujus emolumenti percipiendi facultatem consequuntur, hinc *servitus* enascitur §. 8. *h. add. l. 4. c. 8.* quæ omnia jura ex principis naturalibus resultant, adeoque eorum in Jurisprudencia universalis, mentio recte fit, sed Particularis eadem, cum additamentis positivis distinctius pleniusque persequitur.

§. 9. Inter modos acquirendi *derivativos* alii sunt, quibus res devolvitur in alium ex *dispositione legis*; alii quibus *facto prioris domini*. Et quidem ut vel *bonorum* alicujus *universitas*, vel certa eorundem *portio* transferatur.

Observ. 300.

Inter modos acquirendi derivativos) Modi derivativi, quibus dominia constituta in alios transferuntur, sunt ratione (1) *legis*, vel *naturales*, qui mutuo consensu constant, vel *civiles*, qui sine consensu domini speciali, dominia transferunt, illi iterum sunt vel *pure tales*, qui nihil nisi mutuum consensum desiderant, vel *mixti*, qui præter memoratum consensum, dispositionem quandam civilem habent adjunctam (2) *eventus*, vel tales, qui *casum mortis* respiciunt, vel *inter vivos*, effectum habent (3) *objecti*, vel *universales*, vel *singulares*.

Alii sunt, quibus res devolvitur) Hæc sequentium partitio, parum accurata est, nam (1) modi naturales & civiles non separantur (2) dispositio legis, & factum domini prioris, sibi non recte opponuntur, denique (3) sub altero partitionis membro, seu facto domini, translationes, quæ eventum mortis, & vivos respiciunt, compinguntur, cum tamen merito separandæ sint. Rectius sic dicemus: Modi sunt vel *naturales*, vel *civiles*; Illi vel *eventum mortis* respiciunt, & vel consensu tacito vel expresso dominia transferunt, vel *inter vivos* occurrunt, utroque autem respectu vel *bonorum universitatem*, vel *aliquam portionem*, in alios deducunt. Hi, sive civiles itidem tam inter vivos, quam in eventum mortis, operantur ac vel omnia bona, vel aliquam eorum partem afficiunt.

§. 10. Universitas bonorum lege transit per mortem prioris domini in *successionibus ab intestato*. Cum enim & communi hominum inclinationi repugnet, & ad pacem generis humani minime omnium conducat, bona, quæ quis tanto cum labore, dum viveret, quævisisset, à domini morte haberi pro derelictis, & cuivis occupanti patere: inde suadente ratione apud omnes populos receptum, ut, si quis de suis bonis ipse nihil disposuisset, ejus bona devolvantur ad eos, quos pro com-

mu-

muni hominum affectu carissimos habere judicatur. Quales sunt regulariter, qui ex nobis descendunt, & juxta hos alii sanguine nobis juncti, pro gradu quisque propinquitatis. Et licet aliqui homines dentur, qui vel propter accepta beneficia, vel ob peculiarem affectum alienos quosdam magis ament, quam suos consanguineos: tamen pacis interfuit, non considerato paucorum quorundam affectu communem potius mortalium inclinationem sequi, modumque succedendi observare planissimum, & nullis impeditis disceptationibus obnoxium. Quæ emerfuræ erant, si benefactores & amici cum iis, qui sanguinis jure nituntur, possent concurrere. Et si quis omnino benefactores aut amicos cognatis volebat præferre, debebat expresse super ea re disposuisse.

Observ. 302.

Universitas bonorum lege transit) Primo occurrunt modi naturales, qui dominium, imo etiam alia jura, in eventum mortis transferunt. Fit illa translatio voluntate *tacitâ* aut *expressâ*. Illa ex affectu hominum colligitur, cum tamen istæ collectiones non usque adeò certæ sint, hinc *lex positiva* certius voluntatem defuncti præsumit, ut Autor, *lege bona transire*, hic dixerit, quæ tamen illi non est opponenda, sed subordinanda. Ex ista autem tacitâ datione,

resultat successio ab intestato, tacita sive legitima.

Observ. 303

Inde suadente) Præsumitur igitur quis bona sua consanguineis, non amicis spontaneis, relinquere voluisse, nam ex communi hominum affectu hanc rem determinare par est §. 10. b. vid. l. 4. c. 11. §. 1. 2. 15. 16. Thomas. J. J. D. l. 2. c. 9. §. 150. seqq.

§. 11. Ex his consequitur, proximos cuique hæredes esse suos *liberos*, quos & natura parentibus alendos educandosque solícite commendavit, & quibus quisque parentum censetur quam lautissime voluisse prospicere, ac quæ sibi supersunt ipsis potissimum relinquere. Per liberos autem intelliguntur præcipue, qui ex legitimo matrimonio nati sunt. His enim & ipsa ratio, & decor vitæ civilis, & leges populorum cultiorum præ naturalibus favent. Ista tamen ita demum obtinent, nisi pater aliquem pro suo filio ob sufficientes rationes noluerit agnoscere, aut nisi ob atrocissimam malitiam eundem abdicaverit. Sub liberis etiam comprehenduntur ii, qui sunt ulteriorum graduum, quos uti alere, ipsorum parentibus defunctis, avus tenetur: ita ut & ipsi cum patruis & avunculis ad hæreditatem avi concurrant æquissimum est, ne, super calami-

mitatem mature defuncti patris etiam avi hæreditate excludantur. Ubi descendentes defuncti, par est ad *parentes* defunctorum liberorum bona devolvi. Quibus liberi & parentes non sunt superstites, iis *fratres* succedent. Ubi & hi deficiunt, hæres erit, prout quisque defunctum sanguine propius contingit. Et si ad lites evitandas, quæ heic exoriri possunt frequentissimæ, simulque ut ea res ad usum reip. probe attemperetur, in plerisque civitatibus super ordine successionis accurateprehenditur dispositum. Et hunc ordinem ut sequantur privati tutissimum est, nisi graves causæ peculiariter disponere subigant.

Observ. 304

Ex his consequitur) Quo ordine itaque, ex præsumpta voluntate defuncti, hæreditas deferenda sit, Autor hic exponit. *add. d. c. ii. §. 2. seqq.* Sed non est, ut privatis illis præsumptionibus diu inno-remur, cum lege & conventionem illa omnia certius definiri soleant & debeant, negatâ hac definitione, privata illæ collectiones parum profunt, ea autem positâ, illis plane non indigemus. De cætero leges ordinem succedendi, requisita successurorum, modum dividendi, jus repræsentandi, & bonorum, in quæ succeditur, varietatem determinare solent, *add. d. c. ii. §. 18.* quæ Jurisprudencia particularis persequitur.

§. 12. Facto domini prioris universitas rerum mortis causa transit per *testamentum*. Nam & illud in quaecunque solatium mortalitatis apud plerosque est receptum, ut quis vivus sua bona transferre posset in eventum mortis, in eum, quem maxime amaret. Cæterum cum antiquissimis temporibus usitatum fuisse videatur, ut imminente jam fato palam suos hæredes nuncuparent, & patrimonium de manu in manum ipsis traderent; postea graves ob rationes multis populis aliud testamenti genus magis arrisit. Ut nempe quocunque tempore placeret ultimam suam voluntatem vel palam significare, vel literis tacitè consignare possent; quam mutare pro lubitu liceret, & ex qua hæredibus nuncupatis aut scriptis tunc demum jus nasceretur, quando testator expiraret. Atque tales ultimæ voluntates licet merito magnum habeant favorem; ita tamen temperandæ erunt, prout necessitudinum ratio, & utilitas civitatum requirit. Quæ & inde legibus sueverunt cavere, quomodo cuique testamenta sint ordinanda. A quarum dispositione qui discesserit, queri non potest, suæ voluntatis non fuisse habitam rationem.

Observ. 305.

Facto domini prioris) Postea etiam expresse bona in eventum mortis transferuntur, quæ declaran-

randi ratio, *Testamentum* audit, quod ex communi mortalium affectu, est *ultima voluntas*, qua in eventum mortis *hæres designatur*, aliaque prout visum fuerit, disponuntur, pro lubitu testatoris, revocabilis vid. l. 4. c. 10. §. 1. 2. 3. Ex ista datione resultat *successio testamentaria vel expressa*.

Observ. 306.

Nam & illud) Facultas testandi cuivis rationis usu gaudenti, ac liberam rerum suarum administrationem habenti *naturaliter* recte tribuitur, licet Autor §. 12. b. & d. c. 10. §. 4. 5. 6. dissentire videatur. Nam (1) *nulla hic occurrit prohibitio*, concessit etiam (2) Autor, *quod ab intestato, tacita voluntate bona possint transferri*, cur non itaque etiam *expressa id fieri posset*? nec obstat [3] *quod nulla hic adsit acceptatio*, nam illa post mortem sequitur, voluntas enim defuncti morte non intercidit, cum homines vivi, ex lege socialitatis, eam in statu suo, ad acceptationis effectum, relinquereteneatur. Sane, cum mortuus fuerit homo, & qui eum supervixerunt, eandem sortem mox sint subituri, magna fuerit inhumanitas, conditionisque humanæ stulta oblivio, si vivi, neglectu voluntatis, mortuos velut insultare velint, cum quod aliis ita fecerint, mox ab aliis quoque juxta legem talionis, sint passuri, talem igitur inhumanitatem jure naturali esse prohibitam, plane existimandum videtur.

Observ. 307.

Ceterum cum antiquissimis) Modus testandi, seposita

sita lege civili, à *libertate* & *prudencia* dependet, hinc maximè tutum eligere, rationis est *add. d. c. 10. §. 5. 6.* sed in civitatibus, lex civilis testandi libertatem varie circumscribere solet ratione (1) *personarum testantium* (2) *instituendarum* (3) *rerum transferendarum* & (4) *modi testandi*, quæ latius persequitur Jurisprudencia particularis, nec solent penitus vitia legum cessare, dum sæpe ultra modum illæ sunt scrupulosæ, quod exemplo legislationis Romanæ intelligi potest.

Observ. 308.

A quorum dispositione] Si leges civiles negligantur, tum testamentum ita invalidum est, ut hæres ab intestato, scriptum, salvâ conscientia, expungere queat, nam actus eorum, qui imperio civili subsunt, non ex solâ ipsorum, sed & legitimi Imperantis voluntate, æstimari jubet lex naturalis, & si, secus fiat, eosdem negligit *vid. d. c. 10. §. 7. 8. qua de re in disputat. inaug. de Obligat. ex testam. imperf. Lips. 1688. habitâ, latius disquisivi.*

2. Quod si defunctus hereditatem tacitè vel expressè alicui detulit, tum post ejus mortem, ab hærede voluntas est *acceptanda*, siquidẽ exitum sortiri debeat, ista acceptatio, stilo juris Romani, dicitur *Aditio hereditatis*, ubi quidem voluntati testatoris mortui, id maximè consentaneum videtur, ut tam ipsæ hæres adire, quam jus adeundi ad hæredes transmittere queat, sed Jus Romanum a simplici hac senten-

tentia sæpe abit, ac voluntates defunctorum non tam explicat, quam potius evertit. Illud interim liquet, quod alienationes, in eventum mortis, tacite vel expresse factæ, *recte* pro *modis naturalibus* habeantur, involvunt enim mutuum consensum, nec tamen *pure tales* sed *mixti* sunt, dum lex civilis, circa declarationem & acceptationem consensûs, varia disponit.

§. 13. Inter vivos factio prioris domini res transeunt vel *gratis*, vel *interposito contractu*. Prioris generis translationes vocantur *donationes*. De contractibus infra erit agendum.

Observ. 309.

Inter vivos factio) Sicut in eventum mortis, ita etiam inter vivos, mutuo consensu, naturaliter dominia transferuntur, qui hoc casu nomen *pacti* aut *contractus* assumit, qualis etiam est donatio, ut non opus sit, hanc isti cum Autore opponere, quæ opposito redolet præjudicium, ex Jure Romano haustum. Mero autem jure naturali, nil nisi mutuus consensus ad translationem domini requiritur, traditio ultrò adhiberi potest, sed præcise non debet *add. l. 4. c. 9.* Cæterum lex civilis, ex rationibus utilitatis publicæ, præter consensum, aliud quid exigere solet, ex quo invaluit distinctio *Tituli & Modi*, quæ, mero jure naturali, incognita est.

§. 14.

§. 14. Quandoque etiam *invito priore domino* res transferuntur; & quidem in civitatibus potissimum per modum pœnæ, dum ob delicta damnatis interdum omnia bona, interdum certa eorum portio eripiuntur, & vel publico, vel læso adplicantur. Sic & in bello invitæ res per hostem viribus superiorem eripiuntur, raptoriqve adqviruntur; ad quas tamen recuperandas pari violentia prior dominus jus non amittit, quousque per subsequentes pacis tractatus omni prætensioni ad easdem renunciaverit.

Observ. 310.

Quandoque etiam invito domino) Sequuntur modi Civiles, quando v. gr. lex (1) in pœnam, bona invito aufert, de quo *l. 2. c. 13.* in genere agitur (2) hostis hosti invito res eripit §. 14. *b. add. l. 4. c. 6. §. 14.* de quo *l. 2. c. 16.* amplius dicendum erit. De cætero accurate loquendo heic nulla vera est acquisitio, nam Imperans ex justa causa, invito subdito rem quidem auferre potest, sed hostis in hostem non habet imperium, adeoque invito nihil, cum effectu juris, eripit, sed quicquid in bello accidit, id omne facti est, secutæ demum pacificationes acquisitionem determinant.

§. 15. Peculiaris denique modus adqvirendi est *usucapio*; per quam is, qui bona fide iustoque titulo rei alicujus possessionem nactus

Actus' est, eamque diu quietam & non interruptam obtinuit, demum pro perfecto domino ejus rei habetur, ita ut antiquum dominum, si postea rem eam vindicare velit, repellere queat. Cujus juris introducti ratio fuit, partim quod pro relicto rem habere judicaretur, qui diu eandem vindicare neglexerit, cum longo tempore ad id occasiones vix deesse judicentur: partim quod tranquillitatis & pacis interesset, aliquando possessiones rerum extra controversiam collocari. Præsertim cum longe gravius videatur post diuturnam possessionem re bona fide parta privari, quam olim amissa, & cujus desiderium dudum erat digestum, in perpetuum carere. Ut tamen in civitatibus certi termini, prout ratio & utilitas civitatis suggererit, definiantur, intra quos usucapio compleatur, tranquillitatis & pacis interest.

Observ. 311.

Peculiaris denique modus) In primis ad modos civiles pertinet [3] Usucapio, quæ est actus, quo rei alienæ, juxta certa requisita (ad quæ digittum intendit Autor *b. add. l. 4. c. 12. §. 2. 3. 4.*) possessæ, sine speciali prioris domini consensu, dominium per legem humanam consequimur. Præscriptio est quidem inventum legis humanæ, sed omnibus Gentibus usitata, hinc illa, perinde ut pactum, est generale aliquod

quod jura variandi medium, adeoque ejus fundamenta & generalis habitus, in Jurisprudentia Universali recte proponuntur, si quis tamen in ea tradenda rite versari velit, ei præjudicia & confusio Juris Romani seponenda sunt, de quo plura admonui in *Observat. ad Lauterbach. Comp. Jur. Observ. 1033.*

Observ. 312.

Cujus juris introducti) Duæ inprimis quæstiones generales hic occurrunt [1] *An usucapio sit licita?* quod merito asseritur, subest enim ejus, qui læditur, consensus indirectus. §. 15. *b. add. d. l. 4. c. 12. §. 5. 6. 7.* [2] *an mero jure naturali obtineat?* quod negandum, quatenus a momento temporis, illa vim sortitur, talem enim determinationem nemo ex jure naturali probaverit. Qui autem ex præsumpta domini prioris derelictione amissionem juris, inter liberas Gentes repetunt, eoque respectu Præscriptionem asserunt, *vid. d. c. 12. §. 7. seqq.* illos alio sensu eam supponere manifestum est. De cætero uti tacita illa derelictio inter Gentes, sæpe inane aut non necessarium nomen est, ita cur illi Præscriptionis imago sit circumponenda, ejus rei nondum validam rationem reperire licuit, id quod in *Specim. Jur. publ. Romano-germ. l. 2. c. 3. §. 21.* jam admonui, ac in *Vindic. Vitriar. Castigar. annot. 120.* amplius confirmavi.

2. Post modos acquirendi domini expositos, ejus

jus Effectus etiam considerari potest. Consistit ille in eo, ut re plenissime uti, eamque a quovis vindicare queas. Facultas vero alienandi ex dominio frustra repetitur, licet, post multos, ita etiam Auctori *l. 4. c. 9. §. 1.* persuasum sit, nam eadem res non potest simul esse alienationis causa & objectum. Facultas itaque alienandi fuit ex libertate naturali, quæ tam circa dominium, quam alia jura tamdiu occurrit, quamdiu lege, conventionem similive actu non est restricta, hinc etiam non tantum dominium, sed & alia jura, sepositis illis impedimentis, alienari possunt, quæ ideo præcipue admonere visum est, quo falsæ conclusiones, quæ ex contraria sententia nonnunquam eliciuntur, rejici queant.



CAPUT. XIII.

DE

OFFICIIS, QUÆ
EX DOMINIO RERUM
PER SE RESULTANT.

§. I.

EX introducto rerum dominio ista officia inter homines provenerunt. I. *Ut quilibet teneatur alterum (non hostem) pati rebus suis quiete frui, neque vi aut per fraudem illas corrumpere, intervertere, aut ad se trahere sustineat.* Quo ipso furta, rapinæ, & similia crimina, in res alienas tendentia, vetantur.

Observ. 313.

Ex introducto rerum dominio) Tradita Autoris rem hanc non exhauriunt, plenius paululum ita dicendum: Præcepta circa dominium occurrentia, vel respiciunt *dominum ipsum*, qui totam legem naturalem, intuitu rerum propriarum, observare tenetur, adeoque iis in contemptum Dei haut abuti, nec vel se vel alios lædere, sed ad commodum tam proprium, quam aliorum, eas adhibere debet, vel *alios*. Horum officio

officio intelligendo, distinguendum, utrum res sit *apud dominum*, & aliis hominibus observandum est præceptum, quod §. 1. *b.* refertur, an *apud alium*, idque vel *volente dominum*, hoc casu, juxta tenorem conventionis, utriusque, tam domini quam possessoris officium, ex præcepto de fide servanda damnoque resarciendo, judicandum erit, vel *invito*, tum res detinetur vel à *sciente seu malæ fidei possessore*, qui rem cum omnibus fructibus, perceptis & percipiendis, restituere tenetur, à domino tamen impensas necessarias & utiles, durante utilitate, recte repetit, vel *ignorante seu bonæ fidei possessore*, ad quem casum Autor respicit, ac tam domini quam possessoris officium conjunctim explicat, quæ in Jure Romano ad titulum de *Rei vindicatione & Hereditatis petitione* fusius diduci solent, sed non sunt illa Romana, sed, maximam partem, naturalia.

§ 2.2. *Quando res aliena ad nos pervenit sine nostro crimine, & bona nostra fide, eamque adhuc in nostra potestate habemus, tenemur efficere, quantum in nobis est, ut illa in potestatem legitimi sui domini redeat.* Non tamen tenemur illam rem restituere nostris impensis, & si quas in eam servandam fecimus, recte possumus repetere, aut rem tantisper, quoad illæ solvantur, retinere. Et ad restituendum tunc demum actu tenemur, quando innotuit nobis, illam rem esse alterius. Tunc
X
enim

enim debemus significare, rem eam penes nos esse, nec per nos stare, quo minus dominus suum possit recipere. Quod tamen iusto titulo adquisivimus, non tenemur ipsi in dubium revocare, & velut publice denunciare, an quis eam rem sibi velit vindicare. Atq; isthoc officium præponderat contractibus particularibus, iisque exceptionem dat. v.g. Si fur apud me inscium furti rem furtivam deposuerit, & post verus ejusdem dominus adparuerit, huic, non furi, eadem erit restituenda.

Observ. 314.

Quando res aliena) Hæc satis plana sunt, ac obligationis ad rem reddendam, tum *initium*, tum *efficacia*, speciatim adstruitur *add. l. 4. c. 13. §. 2. 3. 4. 5.* in quo ultimo tamen, parum accurate, obligatio ad rem domino restituendam, ex conventionem hominum universali repetitur, eique inde prærogativa præ obligationibus specialibus, asseritur, nam: ejusmodi conventiones universales gratis finguntur, earumque etiam adstruendarum nulla omnino adest necessitas, introducto enim dominio, merum jus naturæ, cæteros homines, intuitu novi hujus objecti, obligat, ut conventionem aliquam quoad eos comminisci, plane supervacaneum sit.

§. 3. 3. Quod si autem res aliena, bona fide
de

de parta, sit consumpta, officii est tantum restituere domino, quantum facti sumus locupletiores: ne ex immerito alterius damno lucrum capiamus.

Observ. 315.

Quodsi autem res aliena) Hæc etiam assertio satis plana est, quamvis rarius forte ad liquidum deducatur, an & in quantum quis, ex re aliena, sit locupletior factus. Quodsi autem dominus rei suæ justam æstimationem aliunde acceperit, tum bonæ fidei possessor non amplius rem alienam, sed propriam possidet, adeoque ad nihil denetur *vid. d. c. 13. §. 6.*

§. 4. Ex hisce porro sequentes conclusiones deducuntur. 1. Possessor bonæ fidei non tenetur ad ullam restitutionem, *si res periit*; quia nec res ipsa penes eum est, nec lucrum ex ea re.

Observ. 316.

Si res periit] Non tantum casu, sed & possessoris voluntate, nam nec rem habet, nec lucrum ex re, ceu Autor docet, nec sua voluntate alii nocuit, cum putaverit, sibi, velut domino, licere re propriâ abuti, hinc voluntas, in nullius læsionem directâ, adhuc pro casu habenda est *add. d. c. 13. §. 7.*

§. 5. 2. Bonæ fidei possessor tenetur ad restituendum non solum rem, sed & *fructus adhuc extantes.* Naturaliter enim ad quem

X

per-

pertinet res, ad eundem quoque fructus pertinent. Licebit tamen possessori detrahere omnes impensas in rem ejusque culturam, quo fructus provenirent, factas.

Observ. 317.

Bona fidei possessor tenetur) Hæc quoque doctrina manifestam habet rationem *add. c. 13. §. 8.* Interim cum bonæ fidei possessor, ad alterius instantiam, re abscedere non statim cogatur, cum petitoris jus illicò non sit liquidum, hinc, lite ad tempus protracta, intercedenteque consumptione, ac calculi, hic ineundi, difficultate, iste juris naturalis rigor vix observari potest, sed ut plurimum eo nomine transigitur.

§. 6. 3. B. f. possessor tenetur ad restitutionem rei & fructuum *consumptorum*; si modo alias tantundem consumpturus fuerat, & possit rei evictæ pretium ab autore suo recuperare. Nam in hoc factus est locupletior, dum rem alienam consumendo suæ pepercit.

Observ. 318.

B. f. possessor tenetur) Ratione fructuum consumptorum teneri b. f. possessorem, si sit locupletior factus, recte dicitur, habet enim rem alienam, cujus retinendæ jus, ex nullo fundamento idoneo ei asseri potest *add. d. c. 13. §. 9.* nec alia est Juris Romani sententia, licet vulgo aliter sentiant. Applicationem tamen hujus
juris

juris in vita civili esse rariorem, per ea quæ paulo ante dixi, omnino arbitror.

Observ. 319.

Si modo alias tantundem consumpturus fuerat) His verbis non tam limitatio, ceu Autor putat, quam potius specialis casus, quo quis locupletior factus, innuitur; nimirum si quis ex rationibus suis œconomicis, certam quantitatem consumpturus, eam ex fructibus rei alienæ sumserit, atque ita rei suæ pepercerit, is eo ipso, dum suam, alias consumendam, servavit, factus est locupletior. De cætero ad hunc casum obligatio possessoris non est præcisè restringenda, cum nihil referat, utrum alienam consumendo & suam servando, an vice versa, lucrum consecutus sit.

Observ. 320.

Et possit rei evictæ pretium ab autore suo recuperare) Hæc limitatio non est necessaria, nam licet pretium ab autore non possit recuperare possessor, attamen lucrum quod ex re aliena habet, reddere tenetur, cum damnum quod sentit, cessante pretii restitutione, non domino rem vindicanti, sed auctori & suæ imprudentiæ imputare debeat.

§. 7. 4. B. f. possessor non tenetur pensare fructus, quos *neglexit*. Quia nec rem habet, nec quidquam rei successit.

Observ. 321.

B. f. possessor non tenetur) De fructibus percipiendis,

dis, bonæ fidei possessorem non teneri recte dicitur, ob rationem quam *Observ.* 316. dedimus *add. l. 4. c. 13. §. 10.*

§. 8. 5. Si b. f. possessor rem alienam sibi donatam alii *donaverit*, non tenetur; nisi omnino ex officio aliquo tantundem donaturus fuerat. Tunc enim lucrum erit rei suæ *pepercisse*.

Observ. 322.

Nisi omnino ex officio) Vix hæc doctrina in vita civili usum habebit, nisi forte solennis fuerit donatio, quam ex more regionis, vel aliis rationibus politicis facere debebamus, nam hoc casu ostendi potest, quod donans rei suæ parcendo, lucrum fecerit. Videndum tamen etiam fuerit, annon dominus rem suam ab ultimo donatario recuperare queat, hoc enim posito, intermedius ad nihil tenebitur *add. d. c. 13. §. 11.*

§. 9. 6. Si b. f. possessor rem alienam oneroso titulo partam quocunque modo *alienaverit*, non tenetur, nisi quatenus ex ea lucrum fecit.

Observ. 323.

Nisi quatenus ex ea lucrum fecit) Ante omnia videndum, annon dominus ab ultimo possessore queat rem recuperare, hoc enim posito, alienans domino ad nihil tenebitur, sed alteri, cui res evicta, evictionem præstare debebit, siquidem titulo oneroso illa in hunc translata sit.

Si

Si vero dominus ab ultimo possessore rem recipere nequeat, tum alienans teneri videtur, in quantum locupletior factus *add. d. c. 13. §. 12.* quamvis ab illa obligatione etiam absolvi forte possit, cum lucrum non tam ex re, quam negotiatione prudenter peracta, perceptum videatur *vid. l. 21. ff. de hered. Et action. vend.*

§. 10. 7. B. f. possessor etiam *oneroso partam titulo* rem alienam tenetur restituere, neque dominum id, quod erogavit, reposcere potest, sed illum duntaxat, abs quo eam rem accedit. Nisi quatenus dominus rei suæ possessionem recipere sine aliquo impendio probabiliter non potuit, aut *μηνυλον* ultro pollicitus fuerit.

Observ. 324.

Neque dominum id, quod erogavit, reposcere potest)

Hic enim est effectus dominii, quod rem tuam à quovis, sine refusione pretii, vindicare queas, si vero possessor pretium ab autore suo recuperare nequeat, tum damnum quidem sentit, sed dominus vindicans hoc ei non infert, verum propria ejus imprudentia *add. d. c. 13. §. 13.*

Observ. 325.

Nisi quatenus dominus) Sed hæc exceptio proprie non est de regulâ, nam dominus ita non restituit pretium rei, sed impensarum saltem, quas ipse probabiliter facere debuisset, has enim dum possessor fecit, merito illas dominum reposcit.

§. II. Qui rem alienam *invenit*, quam domino invito excidisse probabile sit, non potest eam colligere hoc animo, ut eandem domino requirenti subtrahat. Ubi autem dominus non ad paret, recte eandem sibi retinere potest.

Observ. 326.

Qui rem alienam invenit) Doctrinæ hujus rationes sat manifestæ sunt *conf. d. c. 13. §. 15.* Potest etiam emtor, recepto pretio, rem venditori restituere, ad declinandam litis molestiam *d. c. 13. §. 14.* quemadmodum, ut hoc obiter adjiciamus, is, qui rem ei dedit, cujus solius turpitude suberat, eam recte repetit naturaliter, consensus enim non fuit liber, sed dolo vel vi alterius elicitus, quamvis aliter Grotio & Auctori viedeatur *d. c. 13. §. 16.*

CAPUT XIV.

DE PRETIO.

§. I.

Post introducta rerum dominia cum nec omnes res ejusdem essent naturæ, nec eundem usum humanis necessitatibus præberent, nec cuivis ista rerum copia adesset, quam ad usus suos desideraret, mature in-

inter homines receptum, res invicem *permutare*. Sed quia sæpissime contingeret, ut res disparis naturæ aut usus essent transferendæ, ne alteruter ejusmodi permutatione læderetur, necessum erat conventionem hominum rebus assignari aliquam quantitatem, juxta quâ res invicem comparari, ex æquarique possent. Quod itidem contigit circa actiones, quas in aliorum usum non gratis adplicare placuit. Ea quantitas nomine *pretii* venire solet.

Observ. 327.

Post introducta rerum dominia) Si homines eximia charitate se mutuo prosequerentur, ac operas suas in aliorum commodum libenter & bona fide dispensarent, tum nulla inter eos rerum propriarum foret cura, sed omnia omnibus essent communia, ceu Grotius *de J. B. P. l. 2. c. 2. §. 2.* jam recte, licet ex falso præsupposito, agnovit, cujus doctrinæ pretium, imputata Ei, ab Autore nostro *l. 4. c. 4. §. 9.* communionis *positivæ & negativæ* confusio, haut imminuit. Ast in tanta humani generis corruptione, ac habendi dominandique libidine & studio, quemvis de rebus propriis oportuit esse sollicitum. Post introducta autem rerum dominia cœpisse commercia, ultrò liquet & hic recte admonetur.

2. Tum verò (1) *homines & res, commerciis aptæ esse debuerunt*, quæ aptitudo etiam nomine *commercii* venire solet, ac nihil aliud est, quam *jus*

aliquod indeterminatum, ob quod quis res, cum juribus eò pertinentibus, acquirere potest. Homines commercium habere, res in commercio esse dicuntur, illi sunt subiectum, hæ objectum, id quod in omnibus juribus ita esse solet. De cætero facile liquet, quod commercium ex ipsa velut humanitate, ac libertate naturali, tamdiu præsumatur, donec per legem civilem ademptum probetur.

Observ. 1328.

Sed quia sæpiissime contingeret) Deinde etiam (2) rerum permutandarum habitum exquirere, earumque æqualitatem vel inæqualitatem magis determinare debuerunt, si exortum est pretium, quod est quantitas moralis, rebus & actionibus, in commercium venientibus, juxta naturalem earum habitum, consensu hominum imposita, juxta quam eadem inter se conferri, ac æquales vel inæquales haberi, atque ita, sine læsione, in contractus deduci possunt §. 1. b. add. l. 5. c. 1. §. 2. Dicitur quantitas moralis, quia rerum æqualitas, vel inæqualitas, hic non æstimatur ex habitu physico in se spectato, sed quatenus per illum, res usum vitæ civili præstare possunt, quo sensu etiam, habitus illius physici, in definitione mentionem fecimus.

§. 2. Dividitur pretium in vulgare & emens. Illud spectatur in rebus, & actionibus seu operis in commercium venientibus, quatenus usum aliquem & delectationem homi-
ni-

nibus afferunt. Hoc autem cernitur in *numo*, quatenus is omnium rerum & operarum pretium virtualiter continere, & communem iisdem mensuram præbere intelligitur.

Obsev. 329.

Dividitur pretium) Merito hic præmittenda est divisio pretii in *virtuale*, quod rebus ex naturali suo habitu inest, etiamsi ab omni impositione humana abstrahamus, & *formale*, quod hominum voluntas determinat, & debebat quidem illa determinatio virtuale pretium semper sequi, sed nonnunquam aliter se res habet.

Obsev. 330.

In vulgare & eminens) Est subdivisio pretii formalis, & differunt saltem duæ illæ species *objecto*, sed quoad *fundamentum*, *modum imponendi* & *formam*, nulla est differentia. Separatio autem ideo fieri solet, quia ad pretium nummi cæterarum rerum pretia exiguntur, & id omnium rerum pretiis æquale fieri potest.

§. 3. Vulgaris pretii *fundamentum* in se est aptitudo illa rei vel operæ, qua aliquid mediate aut immediate conferre potest ad vitæ humanæ necessitates, & ad eandem commodiorem aut jucundio rem reddendam. Unde & res nullum plane usum præbentes nullius pretii solemus vocare. Dantur tamen res quædam, vitæ humanæ utilissimæ, quibus nullum

lum certum pretium impositum intelligitur; vel quia dominio sunt & debent esse vacuæ, vel quia ad permutationem sunt ineptæ, & inde à commerciis sepositæ, vel quia in commerciis nunquam aliter quam appendix alterius rei considerantur. Sed & dum lex divina aut humana quasdam actiones extra commercium removet, seu pro mercede obire vetuit, pretium quoque iisdem detraxisse intelligitur. Sic quia superiores partes aëris, æther, ac cœlestia corpora, vastusque oceanus à dominio humano sunt exempta, nullum quoque pretium iisdem tribui potest. Sic liberi capitis nullum est pretium, quia liberi homines in commercium non veniunt. Sic apri cum solis lumen, liquidus & purus aër, amæna facies terræ, quatenus oculos duntaxat pascit, ventus, umbra, & similia, in se & seorsim considerata, pretium non habent; cum homines talibus sine usu terræ frui nequeant. Quibus ipsis tamen magnum momentum inest circa augendum aut minuendum pretium regionum, fundorum, atque prædiorum. Sic illicitum est pretio addicere actiones sacras, quibus effectus aliquis moralis ex instituto divino est assignatus; quod crimen simoniam vocant. Et improbe justitiam venalem habet iudex.

Observ. 331.

Vulgaris pretii fundamentum) Circa pretium vulgare tria spectari possunt (1) *fundamentum*, ob quod (2) *res*, quibus, & [3] *ipsa impositio*, qua pretium imponitur Fundamentum Autor esse putat, *aptitudinem præstandi usum add. l. 5. c. 1. §. 4.* sed cur aqua pretium non habet, quæ tamen est utilissima? facile igitur liquet, aptitudinem illam, non esse unicam pretii imponendi causam. Mihi sententia, quam in *Observ. ad Laut. Comp. Jur. Observ. 503.* jam proposui, adhuc placet, nempe duas esse causas, ut *res sit apta præstandum usum*, & tamen *omnibus non sufficiat, adeoque suo modo rara sit*, ex quo rei habitu, oritur pretium virtuale, quod impositio humana merito sequitur.

Observ. 332.

Dantur tamen res quædam) Objectum pretii imponendi sunt *res & actiones in commercium venientes*, hinc eæ, quas vel natura, vel lex à commerciis removet, pretio carent §. 3. *h. add. d. l. 5. c. 1. §. 5.* Quo loco tamen duo notanda (1) quasdam actiones certo saltem respectu pretium non habere, sic administratio justitiæ, salario utique æstimatur, sed à partibus accipere pecuniam, judici fas non est, nisi quatenus lex permittit (2) nonnullas res, verbis inæstimabiles pronunciari, sed re ipsa vilissimè sæpe æstimari, quorsum referas literas similesve artes.

§. 4. Causæ autem cur unius & ejusdem
rei

rei pretium *intendatur vel remittatur*, quodq; adeo una res alteri præferatur, licet hæc æqualem aut majorem usum in vita humana videatur obtinere, sunt variæ. Heic enim usque adeo necessitas rei aut nobilitas usus primas semper non tenent; ut potius vilissima esse cernamus, quibus vita humana minime carere potest: ideo quod non sine singulari Dei providentia uberem eorum proventum natura profundat. Ad *intensionem* igitur pretii inprimis facit raritas; quæ non parum commendatur, ubi ex locis remotis res afferuntur. Inde ambitiosa hominum luxuria multis rebus, queis vita humana commodissime carere poterat, enormia pretia posuit; puta unionibus & gemmis. Rerum vero quotidiani usus pretia potissimum intenduntur, quando raritas earundem conjungitur cum necessitate seu indigentia. Pretia rerum artificialium præter raritatem maxime solent intendere subtilitas & elegantia artis, quam præ se ferunt, quandoque & fama artificis, nec non operis difficultas, artificum & operariorum raritas, & similia. Operarum & actionum pretia intendit earundem difficultas, dexteritas, utilitas, necessitas; agentium raritas, dignitas, libertas; & denique ipsa artis opinio, nobilis an ignobilis illa habeatur. Contraria

traria horum pretium *minuere* solent. Aliquando denique certa aliqua res non in univ-
ersum, sed à singulis magni æstimatur ex
peculiari affectu; puta quod ille, à quo ista
in nos profecta est, maximi à nobis fiat, ex-
primendoque ipsius affectui data sit; aut
quod eidem adsueverimus, aut quia insignis
casus sit monumentum, aut ejusdem ope ma-
gnum malum declinaverimus, aut quia à no-
bis metipsis confecta sit. Quod solet vocari
pretium affectionis.

Observ. 333.

Cause autem cur unius) Sicut Autor fundamen-
tum pretii *imponendi* non recte explicavit, ita
b. & l. 5. c. 1. §. 6. 7. frustra, peculiaria funda-
menta pretii *intendendi* & *remittendi* laudat,
nam licet sola aptitudo præstandi usum, pretia
non intendat, quod Autor urget, attamen ab
aptitudine illa, & rerum insufficientia ac hinc orta
raritate, omnis pretii intensio & remissio de-
pendet, nam sicut illa fundamenta habent suos
gradus, ita, pro horum diversitate, pretia quo-
que crescunt, vel minuuntur.

Observ. 334.

Ad intensiorem igitur pretii] Cum Autor sine cer-
tis principiis hic philosophetur, hinc doctrina
fluctuat, jam enim causas pretii intendendi &
remittendi inadæquate adducit, jam fortuito ve-
lut veram sententiam proponit, jam eandem
causam sibi ipsi opponit, adeoque entia præter
necessitatem multiplicat.

Observ.

Observ. 335.

Inprimis facit raritas) Sed non *sola* verum si *usus* concurrat, qui sane in unionibus & gemmis etiam est, neque enim de usu rerum, præcise juxta veritatem, sed potius hominum affectum, imo stultitiam, judicandum est. Alias, si rem maximè raram, ex locis remotissimis afferas, ea tamen nullum habeat usum, pretio quoque illa carebit.

Observ. 336.

Rerum verò quotidiani usus) In hoc exemplo Auctor genuina fundamenta agnoscit, laudat enim *raritatem* & *usum*. Cumque hic usus sit necessarius, nec à vana hominum opinione dependeat, hinc concurrenter raritate, harum rerum pretium maxime intenditur, illæque omnes alias res, æstimatione superant, sic, imminente famis periculo, gemmam pretiosissimam, pro frustra panis commutabis.

Observ. 337.

Pretia rerum artificialium) In hoc exemplo uti *usus* omittitur, ita *raritas*, artis subtilitati & elegantiae, nec non operis difficultati, non recte opponitur, nam uti hæc rei habitum naturalem indicant, ita raritatem quoque innunt, quamvis simul usum connotent, atque ita utrumque fundamentum exhibeant.

Observ. 338.

Aliquando denique certa aliqua res) Etiam hoc casu *raritas* & *usus* pretium efficiunt, nam res aliqua, cum certis circumstantiis considerata, uti-

utiquerara est, præterea insignem usum apud eum habet, cui res illa grata est.

§. 5. Ast circa *definienda singularum rerum pretia* alia quoque considerari sueverunt. Et inter eos quidem, qui in naturali libertate invicem vivunt, rerum singularium pretia non aliter, quam contrahentium conventionione definiuntur. Quippe cum illis liberum sit alienare aut adquirere, quæ velint; nec communem habeant dominum, qui eorum commercia moderetur. Ast in civitatibus duplici modo pretia rerum definiuntur; uno per decretum superioris aut per legem; altero per communem hominum æstimationem atq; iudicium, seu usum fori, accedente consensu eorum, qui inter se contrahunt. Illud pretium aliqui solet vocare *legitimum*, hoc *vulgare*. Ubi pretium legitimum in gratiam emtorum fuit constitutum, quod frequentius fit, non licebit venditoribus plus exigere; etsi minus accipere, si velint, non prohibeantur. Sic ubi merces operarum publice sit taxata in gratiam eorum, qui conducunt, operario non licet plus exigere, etsi idem non prohibeatur minus accipere.

Observ. 339.

Ast circa definienda singularum rerum pretia, alia quoque considerari sueverunt) Nihil aliud, quam ipsa impositio, quam tertio loco considerandam esse

esse *Observ. 331.* diximus, nam alias in pretiis rerum, tam in genere, quam in specie determinandis, nihil aliud, quam duo illa fundamenta, antea laudata, considerantur. De cætero debebat impositio merito fieri juxta usum verum, necessarium, licitum ac honestum, sed uti hominibus non semper, secundum merita & virtutes, existimatio tribuitur, sed sæpe mortalium improbißimi maximis fruuntur honoribus, ita etiam rebus vanis & honestis non raro ingens pretium adscribitur.

Observ. 340.

Et inter eos quidem) Duplex hæc imponendi ratio, à libertate & imperio civili dependet, quod facile intelligitur *add. l. 5. c. 1. §. 8.* quando enim communis Imperans non adest, tum arbitrio contrahentium omnia determinanda sunt, illo autem existente, libertas tamen naturalis non penitus cessare solet, hinc duplex determinandi ratio existit.

Observ. 341.

Illud pretium aliqui solent vocare) Sed doctrina erit magis perspicua, si alterum dicas *legitimum* seu *legale*, alterum *pactitium* seu *conventionale*, cum vulgare pretium, jam alio sensu occurrerit, adeoque in illo termino ambiguitas sit, quod si tamen hanc notes, poteris etiam eodem, prout visum fuerit, uti.

Observ. 342.

Ubi pretium legitimum) Tam Imperans quam paciscentes, in definiendo pretio, ad fundamen-

ta antea laudata, seu pretium virtuale, respicere quidem debent, sed ille definitione sua, communem & constantem normam efficere potest, quod his negatum, hinc pretium legale & conventionale differunt (1) ratione *certitudinis*, illud enim in puncto velut consistit, adeoque minimus excessus invitum lædit §. 5. *b. add. l. 5. c. 1. §. 8.* sed hoc aliquam habet latitudinem (2) *durationis*, illud est constans, nec ad momentaneam pretii virtualis variationem, mutari statim solet, hoc verò est inconstans, ac variationem illam perpetuò sequitur, adeo ut, juxta dies, imo horas, diversa rerum pretia nonnunquam esse soleant.

§. 6. Enimvero vulgare pretium, quod per leges non est taxatum, habet aliquam latitudinem, intra quam plus minusvè dari & accipi potest ac solet, prout inter contrahentes fuit conventum. Quod tamen fere sequitur usum fori. Ubi solet haberi ratio laborum & expensarum, quas mercatores communiter faciunt in mercibus adportandis & tractandis; nec non quo modo ematur aut vendatur, in magna quantitate, an minutatim. Subito quoque interdum mutatur commune pretium ex copia aut paucitate eementium, pecuniæ aut mercium. Nam paucitas eementium & pecuniæ, (ex peculiari causa emergens) & mercium abundan-

tia pretium minuit. Contra emturientium & pecuniæ copia, & mercium raritas pretium intendit. Sic & ad minuendum pretium facit, si merx quærat emtorem. Contra intenditur pretium, ubi venditor ultro rogatur, alias non venditurus. Denique & illud solet attendi, paratam quis pecuniam offerat, an in diem solutionem differat; *cum etiam* dies sit pars pretii.

Observ. 343.

Enimvero vulgare pretium) Jam diximus, quod vulgare pretium aliquam habeat latitudinem, cum enim accuratè rerum pretia determinari non possint, nec paciscens in alium habeat imperium, hinc facile fieri potest, ut secuta determinatio à præcedente abeat; Interim illa laxitas non est nimis extendenda, nam si à pretio rerum virtuali nimis discessum fuerit, tum læsionem subesse, meritò dixeris *add. d. l. 5. c. 1. §. 9.*

Observ. 344.

Ubi solet haberi ratio laborum) In determinando rerum singularum pretio, nihil aliud respicitur, quam *usus & raritas*, quo etiam in effectu hæc doctrina collimat, hoc saltem notandum, quod nonnunquam non unius, sed plurium rerum pretium simul constituatur, sic mercator non tantum mercem, sed & operas ac impensas æstimat, quarum omnium tamen pretium, ex usu & raritate est *add. d. c. 1. §. 10.*

Observ.

Observ. 345.

Subito quoque interdum) Mutatio pretii conventionalis subitanea, ex iisdem causis dependet, prout enim mercium magna est raritas vel abundantia, aut iis indigemus, utilitatemque inde speramus, vel non, ita earum pretia crescunt vel minuuntur *add. d. c. 1. §. 10.* Pretia verò legalia, ceu modo diximus, tam subito mutari non solent, licet aliqua in rebus quoad raritatem & usum accidat mutatio, neque enim definitionem legalem tam crebro mutare par est, maximè cum circumstantiæ nunc mutata, mox fortassis ad pristinum statum sint reditura. Quod si tamen mutatio illa sit constantior, aut crescentibus aliarum rerum pretiis, per indirectum certæ alicujus rei vel operæ æstimatio quoque augeatur, tum, pretium legale mutari, æquitas jubet. Sic quando eorum, quæ ad victum & amictum pertinent, vile est pretium, operæ quoque mercenariorum modico pretio taxantur, sed illorum pretio crescente, harum etiam pretium augeri par est, cum operarii res ad victum necessarias carius emere debeant, adeoque earum æstimatio, ipsas operas, deinceps præstandas, ingrediatur. Sed illa procedunt, si operarum aliquis usus esse putetur, nec magna hominum, eas præstantium, sit copia, nam alias æstimatio non augebitur, sic munerari salariis, in summa rerum vilitate constitutis, hodie quoque plerumque æstimari solent.

§. 7. Cæterum postquam à primæva simplicitate mortales desciverunt, & varia quæstus genera introduxerunt; facile fuit prehensum, solum illud vulgare pretium non sufficere expediendis hominum negotiis, & gliscentibus commerciis. Nam tunc sola permutatione commercia constabant, & operæ aliorum locari aliter, quam mutua opera, aut re tradita non poterant. Atqui postquam tam varia desiderare ad commoditatem aut voluptatem cœpimus, non sane in proclivi fuerat cuivis ejusmodi res possidere, quas alter suis mutare vellet, aut quæ alterius rebus æquivalerent. Et in civitatibus cultis, ubi cives variis statibus distinguuntur, complura hominum genera dari necessum est, quæ, si simplex illa rerum & operarum permutatio vigeat, vitam plane non tueri, aut ægre queant. Hinc plerisque gentibus, queis amplior vitæ cultus arridebat, visum fuit conventionem quadam *pretium eminens* certæ rei imponere, ad quod cæterarum rerum pretia vulgaria exigerentur, & in quo eadem virtualiter containerentur. Adeo ut interveniente illa re quamlibet rem venalem quis sibi comparare, & quævis commercia, & contractus commode posset exercere.

Observ.

Observ. 346.

Ceterum postquam) Ad commercia expedienda introducendum fuit pretium eminens §.7. *b.add.* l. 5. c. 1. §. 11. 12. Clarius diceret; certam aliquam rem ita fuisse præparandam, ut ejus pretium, omnium rerum, maximarum & minimarum, pretiis æquale fieri posset, hujus autem rei, ita præparatæ pretium, deinde à Scriptoribus *Eminens* esse dictum, ob rationes forte, quas *Observ. 340.* retuli, nam alias non apparet, quid impositio pretii eminentis, in se spectata, ad commercia promovenda conferre potuerit.

Observ. 347.

Visum fuit conventionem quadam) Hæc conventio ambigua est, imo plane falsa, si eo sensu accipiat, quod vel plures Gentes inter se, eo nomine convenerint, vel in una Gente & Republica, generalis conventio intercesserit. Nummi potius pretium formale, ab impositione Imperantis, & conventionibus paciscentium singularibus, dependet.

§. 8. Hunc ad finem plerisque gentibus placuit adhibere *metalla* nobiliora, & non admodum frequentia. Nam & illa substantiæ sunt valde compactæ, sic ut usu non facile deteri queant, & divisionem in plurimas minutas particulas admittant. Nec minus custodiæ & tractationi eadem sunt habilia; & propter raritatem multis aliis rebus æquivalente

re possunt. Etsi quandoque ex necessitate, & apud quasdam gentes ex defectu metallorum, aliæ res in vicem numorum sint adhibitæ.

Observ. 348.

Hunc ad finem) Qualia autem requisita habere debeat res, in usum commerciorum præparanda, ex fine facile liquet. Intendimus hoc, ut res *illa omnium rerum pretiis, æqualis fieri queat.* Ergo debet (1) habere pretium virtuale (2) substantiæ vaide compactæ, quo durare possit (3) divisioni & (4) tractationi custodiæque habilis esse. Quæ requisita in metallis nobilioribus reperiuntur, hinc à Gentibus ad hunc usum meritò sunt adhibita *add. d. l. §. c. 1. §. 13.*

Observ. 349.

Etsi quandoque) Quod si rebus, virtuali pretio destitutis, eminens pretium imponatur *vid. d. c. 1. §. 13. 14.* tum, quia valor unice ab impositione dependet, iustitia exigit, ne pretium antea tollatur, quam aliis rebus virtuali pretio gaudentibus, illæ redemptæ sint, hinc liquet, in iis saltem civitatibus, istum modum secure adhiberi posse, in quibus fides publica, integra, non suspecta & græca est.

§. 9. In civitatibus porro *valorem numi definire* est penes summos imperantes; & inde publica signa iisdem solent imprimi. Est tamen in eo definiendo respicienda communis

nis

nis gentium vicinarum, aut quibuscum nobis commercia exercentur, æstimatio. Alias enim, si nimis magnum numis suis valorem posuerit civitas, aut si materiam eorum rite non temperaverit, commercia civium suorum cum extraneis, quæ quidem sola rerum permutatione absolvi non possunt, valde sufflaminabit. Et ob eam ipsam causam non temere in valore numorum fieri debet mutatio, nisi summa reip. necessitas id exigat. Et si gliscente auri argentique copia paulatim numorum valor in comparatione ad pretium fundorum, & quæ inde dependent, soleat vel ut ultro decrescere.

Observ. 350.

In civitatibus porro) Cum valor nummi, secundum virtuale metallorum pretium, quod, in ordine ad alias res, hæ, habent, imponi debeat, hinc fide publica, opus est, quæ de nummorum quantitate, homines certi reddantur, hinc facile liquet, curam monetæ cudendæ, ad Rempublicam & Imperantem pertinere, qui adeo vel juxta certum pondus, vel certas partes formatas, valorem imponit *vid. d. c. 1. §. 13. in fin.* Quod si fides illa publica vacillet, tum Rempublicam morbidam agnoscere debemus.

Observ. 351.

Est tamen in eo definiendo) In imponendo valore,
Y 5
ad

ad pretium metallorum virtuale respiciendum esse, recte hic dicitur *add. d. c. 1. §. 14.* quod si tamen pecuniæ nimis magnus valor tribuatur, aut ejus materia non ritè temperetur, aliis non nocetur, si illa impositio aperte & universaliter fiat, tum enim cæterarum rerum pretium crescit, si vero tale quid particulariter, subdolè & clam fiat, tum subditi non sentientes, opibus emunguntur, cum exteris verò, rerum suarum satagentibus, & iniquitati illi sese haut submittentibus, commercia sufflaminantur.

Observ. 332.

Et ob eam ipsam causam) De mutatione monetæ, ex præcedentibus judicandum, si illa aperte & universaliter fiat, ac unicuique relinquatur libertas, res vel operas suas æstimandi, tum est innoxia, aut si eo fine suscipiatur, ut viliori monetâ debita exsolvantur, aut non attendentibus vel invitis res auferantur, tum imposturam subesse, facilè intelligitur. Quod si prava moneta irrepperit, tum & ei, sine iniquitate, valorem non posse abjudicari, sed eam potius justo pretio, à Civitate redimi debere, palam est *add. l. 5. c. 1. §. 14.*

Observ. 353.

Et si gliscente auri) Quemadmodum aliarum rerum pretia, pro ratione raritatis & usus, mutantur, ita idem accidit pecuniæ, hic non tantum ejus valor decrescit, si major copia existat,

stat, sed & si aliarum rerum usus augeatur, vel raritas eveniat *add. d. c. 1. §. 15. 16.*

2. Officia circa pretii impositionem, non alia sunt, quam quæ circa contractus occurrunt. Exigit scilicet lex naturalis, ne erga proximum inhumani simus, aut, quod gravius est, illum positivè lædamus, hinc hæ regulæ ferè observandæ (1) rebus, quibus alii indigent nimis magnum pretium haut est statuendum (2) materiæ quantitas & qualitas, cujus intuitu illa pretium habet, non est mutanda (3) rerum quotidiani usus raritas, coëmendo aut retinendo, non debet effici.

CAPUT XV.

DE

CONTRACTIBUS, QVI PRETIA RERUM PRÆSUP- PONUNT, ET FLUEN- TIBUS INDE OFFICIIS.

§. I.

P*Actum* in genere est consensus & conventio duorum pluriumvè in idem placitum. Sed quia frequenter simpli-

plicia *pacta contractibus* contradistinguuntur, id *discrimen* in hoc potissimum videtur consistere, quod *contractus* vocentur pacta, quæ circa res & actiones in commercium venientes versantur, adeoque dominia & prædia rerum præsupponunt. Sed quæ circa alia inveniuntur conventiones, communi pactorum vocabulo insigniuntur. Etsi ex hisce quibusdam promiscue pactorum & contractuum nomen tribuatur.

Observ. 354.

Pactum in genere est) Juxta jus Romanum, *Pactum* & *Contractus*, differunt ut *Genus* & *Species*, Romanis enim, negotia obligatoria, varie à *forma* distinguere, visum est. Nimirum *Pactum* est vel *Nudum*, vel *Non nudum*. Illud est vel *tale in specie*, vel *adjectum ac legitimum*. Hoc, uno nomine, dicitur *Contractus*, qui in *verum* & *Quasi contractum* discernitur, ille est vel *innominatus* vel *nominatus*, sub quo *realis*, *verbalis*, *literalis* & *consensualis*, vulgò comprehenditur.

2. Sed illa positiva, ac parum prudenter constituta sunt, artemque rabulariam sat apertè redolent. Mero jure naturali nulla est, inter pactum & contractum, differentia, sed pactum, contractus, conventio synonymice accipiuntur, nec opus est discrimine, quod Autor §. 1. b. inculcat *add. l. 5. c. 2. §. 1. 2. 3. 4.* quin potius omnis distinguendi conatus, præjudicia ex Jure Romano hausta, arguere censendus est.

3. Id

3. Id etiam admonendum, quod jure naturali omnes contractus tantum *veri & consensuales* sint, nam *contractus fingere*, aut præter *consensum*, ad eorum essentiam, *rem verba vel literas* requirere, id omne iterum Romanum est, ac à simplicitate naturali abhorret.

§. 2. Contractus dividi possunt in *beneficios & onerosos*. Illi alteri contrahentium parti gratis commodum aliquod afferunt; uti est *mandatum*, *commodatum*, *depositum*. Hi utramque partem ad æquale onus adstringunt; quippe in quibus eo fine præstatur aut datur aliquid, ut tantundem recipiatur.

Observ. 355.

Contractus dividi possunt) In hac doctrina, divisiones juris Romani & Gentium, quas promiscue recenset Autor *d. l. §. c. 2. §. 5. seqq.* merito distinguere debeat. Ad posteriorem classem pertinent omnes divisiones, quæ oriuntur ex circumstantiis, omnibus Gentibus communibus, qualis est distinctio in *beneficios & onerosos* §. 2 *h.* aliæque, de quibus *Observ. 200.* jam dixi.

Observ. 356.

Uti est mandatum) In hunc censum etiam pertinet *donatio*, quam Autor, ob præjudicium ex jure Romano haustum, omisisse videtur *vid. Observ. 309.* De cætèro doctrina Autoris, qua *mandatum, commodatum & depositum* con-

jun-

jungit, parum accurata videbitur iis, qui nil nisi jus Romanum edocti sunt, cum prior consensualis, duo posteriores vero, reales, eo jure audiant, sed huic censuræ jam occursum *Observ. 354. n. 3.*

§. 3. Habent autem hoc omnes contractus onerosi, ut in illis versari *æqualitas* debeat, seu ut uterque contrahentium tantundem nanciscatur: & ubi inæqualitas intervenerit, alteri, qui minus accepit, nascatur jus ad postulandum, ut suppleatur, quod sibi deest, aut ad contractum plane abrumpendum. Id quod tamen in civitatibus potissimum obtinet, ubi usu fori, aut lege pretia rerum definiuntur. Ad hanc autem æqualitatem inveniendam & determinandam requiritur, ut utrique contrahentium res ipsa, circa quam contrahitur, cum suis qualitatibus, quæ aliquod momentum heic habent, sint *cognite*. Unde & qui per contractum rem in alterum est translaturus, indicare debet non solum qualitates rei æstimabiles, sed & earundem privationes & vitia. Citra hoc enim justum pretium constitui nequit. Etsi illas circumstantias, quæ per se rem non contingunt, indicare non sit necessum. Vitia autem utrinque jam nota non opus est indicari. Et qui sciens vitiosi quid comparat, habet, quod sibi imputet, *Observ.*

Observ. 357.

Habent autem hoc omnes) In contractibus onerosis legem naturalem requirere æqualitatem, ac, eâ deficiente, læsionis emendationem, ex contrahentium intentione, facile apparet, quamvis ob pretiorum incertitudinem & laxitatem læsio non semper doceri queat *add.*

l. 5. c. 3. §. 1.

Observ. 358.

Ad hanc autem æqualitatem) Quo igitur æqualitas illa, quantum indoles vitæ civilis admittit, obtineatur, lex naturalis, rerum in contractus onerosos deducendarum, vitia & virtutes indicari jubet, quod enim vult finem, dubio procul etiam vult media, quod latius declaratur *d. l. 5. c. 3. §. 2. 3. 4. 5.*

§. 4. Eousque autem in hisce contractibus æqualitas est adhibenda, ut licet nihil dissimulatum sit; tamen si postea inæqualitas deprehendatur etiam citra culpam contrahentium, puta, quod vitium latebat, aut in pretio sit erratum, ea corrigenda sit, & demendum ei, qui plus habet, addendumque minus habenti. Etsi ad declinandam multitudinem litium leges civiles vix aliis quam enormibus læsionibus heic medeantur; de cætero quemque rerum suarum satagere jubeant.

Observ. 359.

Eousque autem in hisce) Læsio etiam involuntaria emendari in contractibus onerosis debet, si
ex

ex postfacto appareat, nam nisi hoc fieret, alter nunc minimum, sua voluntate alterum læderet, quod juri naturali itidem repugnat.

Observ. 360.

Etsi ad declinandam) Indoles quidem negotiorum humanorum haut permittit, ut pretia rerum, accuratâ & exacta penitus proportionem, constituentur, ac adeò omnis læsio excludatur, nec tamen ideo opus est determinatione positiva, qua læsio, quæ emendari debeat, definiatur, cum ob difficultatem probandi ultro læsus actionem sæpe sit omissurus, adeoque rectius, omnis illa res ejus arbitrio relinquatur. Imprimis vero illæ leges censuram merentur, quæ læsionem enormem, eamque in puncto velut consistentem, requirunt, nec ob aliam læsis succurri volunt, de quo aliqua dixi in *Observat. ad Lauterb. Comp. Jur. Observ. 541. add. Op. Maj. l. 5. c. 3. §. 6. seqq.*

§. 5. *Contractus benefici* sunt præcipue tres, mandatum, commodatum, & depositum. *Mandatum* est, quando quis gratis alterius negotia ipso requirente & committente expedienda suscipit, Idque contingit *duplici* ratione; vel ut præscribatur ipsi modus rei expediendæ, vel ut is ejusdem judicio ac dexteritati relinquatur. In hoc contractu uti summa cum fide & industria versandum est; quippe cum nemo fere nisi amico, & de quo opti-

optime sentit, mandet: ita contra mandatarium indemnitas præstari debet à sumtibus in rem sibi commissam factis; nec non à damnis, in quæ ex causa mandati incidit, & quæ proprie ex ipsa re mandata profluxerunt.

Observ. 361.

Contractus benefici) In singulis contractibus, summatim duo spectari possunt (1) *ipse contractus*, in cujus explicatione, doctrina generalis de consensu, personis & materia habilibus, ex *cap. 9.* supponitur, postea verò cujusvis forma habitusque specialis qui ex fine peculiari resultat, expendi debet (2) *Officium circa illum occurrens*, quod ad §. 16. delineabimus. De cætero cum singulorum contractuum explicatio, in Jurisprudentia particulari, prolixè instituatur, itaque hic brevissimi erimus.

Observ. 362.

Mandatum est) Circa hujus conceptum *conf. l. 5. c. 4. §. 1. l. 3. c. 9. §. 2.* Mandantis ac mandatarii officium est, fidem servare ac damnum datum resarcire §. 5. *h. add. d. l. 5. c. 4. §. 2. 3. 4. 5.* ad fortuitum tamen damnum, quod occasione mandati, mandatarius accepit, resarciendum, mandans non est obligatus, quia nec voluntarium est, nec invito accidit.

§. 6. *Commodatum* est, quo rei nostræ usum alicui gratis concedimus. In quo observandum, ut quis eandem rem solícite & summa cum diligentia servet, tractetque ne-

Z

que

que ipsam ad alios usus adhibeat, aut ulterius, quam commodans concessit : ac illam & prout accepta fuit, restituat, nisi quantum per ordinarium usum eidem decessit. Quod si res ad certum tempus fuerit concessa, & interea dominus eadem valde indigere incipiat, ex casu aliquo tempore commodationis factæ non præviso, repetenti eadem citra tergiversationem erit restituenda. Quod si autem res commodata casu fortuito & improvise citra omnem commodatarii culpam perierit, ejus æstimatio non erit solvenda, ubi eadem apud dominum quoque peritura fuerat. Alias æquum videtur commodatarium æstimationem rei præstare, quippe quam dominus amissurus non fuerat, ni adversus alterum benignus fuisset. Vice versa si quid utilium aut necessariarum impensarum in rem commodatam factum sit extra eas, quæ alias usum rei regulariter comitantur, id à domino refundendum erit.

Observ. 363.

Commodatum est) Juxta simplicitatem naturalem, est contractus consensualis de usu rei gratis concedendo, ac re illa suo tempore restituenda. Rei igitur præstatio & restitutio, non ad contractus perfectionem sed executionem pertinet, perinde sicut se res habet in locatione, omnibusque

que contractibus, præstationes successivas desiderantibus. Romani negotium, quo quis de usu rei concedendo rogatur, dixerunt *pactum preparatorium*, postea in ipsa rei datione, formam commodati constituerunt, adeoque id *contractum realem* vocarunt, ex quo contumax præjudicium enatum est, cui Autor etiam indulget, quasi hæc sit nativa negotii hujus indoles, cum tamen iste habitus merè Romanus sit, & patiorum nudorum consecrarium.

Observ. 364.

In quo observandum) Officium commodatarii ex jure naturali est, ut re bona fide utatur, illam restituat, ac damna voluntaria præstet, de casu autem fortuito non tenetur, nisi pactum vel delictum accesserit *add. l. 5. c. 4. §. 6.*

Observ. 365.

Alias æquum videtur) Hæc limitatio nullâ æquitate commendatur, dicendum potius, commodatarium de casu fortuito non teneri, siue res apud dominum etiam perierit, siue non. Sane rationes, quæ *b. & d. c. 4. §. 6.* afferuntur, contrarium non persuadent (1) *non apparere, cur dominus magis, quam alter infortunium præstare debeat*, nam id utique apparet, cum commodans sit dominus (2) *commodatarium præbuisse occasionem, ut infortunium res mea incurreret*, sed commodans quoque in eam consensit, cum sciret, aut certe ignorare non deberet, casus ejusmodi accidere posse (3) *dominum rem non fuisse amissurum, ni adversus alterum be-*

nignus fuisset, nulla subest iniquitas, quia dominus in damnum consensit, & alias illa ratio retorqueri potest, durum esse, si commodatarius acceptum beneficium, tanto pretio redimere cogatur.

Obferu, 366.

Vice versa si quid) De officio commodantis, ex nostra hypothefi, paulo aliter philosophandum, nimirum ille obligatur (1) ad rem in ufum gratuitum concedendam, quod vulgò omitunt, deinde (2) ad impensas præftandas & [3] damnum voluntarium refarciendum.

S. 7. *Depositum* est, quo rem noſtram, aut ad nos quocunque modo ſpectantem alterius fidei committimus, ut eandem gratis cuſtodiat. In quo requiritur, ut res concredita diligenter cuſtodiat, & quandocunque deponenti placuerit, reſtituatur; niſi ea reſtitutio domino aut aliis noxia ſit futura, eoque intuitu differenda ſit. Neque licebit re depoſita citra conſenſum domini uti, ſiquidem ea ullo modo per uſum fiat deterior, aut domini interſit, ne ea conſpiciatur. Ac ſi quis hoc auſus fuerit, quævis pericula, in quæ res ob uſum incidit, præſtabit. Sed nec licet rem depoſitam exuere illis vinculis aut receptaculis, quibus à deponente fuit incluſa. Cum autem valde turpe ſit, & foedius furto depoſitum abnegare; tum id multo eſt turpius, ſi quis

quis inficiatus fuerit depositum miserabile, seu quod ob periculum incendii, ruinæ, tumultus deponitur. Vicissim à deponente sumtus in rem depositam facti sunt refundendi.

Observ. 367.

Depositum) Juxta philosophiam naturalem, est *contractus consensualis, de re in gratuitam custodiam accipienda, eademque, ad libitum deponentis, restituenda, ubi repetenda ea, quæ diximus Observ.* 363.

Observ. 368.

In quo requiritur) Officium depositarii est (1) ut rem in custodiam recipiat, aut saltem tempestive contractui renunciaret, hoc enim ex natura negotii benefici fluere videtur (2) ut acceptam probe custodiat ac [3] damna voluntaria præstet.

Observ. 369.

Vicissim à deponente] In hoc nulla est obligatio antecedens ad contractum consummandum, quia hic ejus favorem unicè respicit, hinc tantum, eo consummato, de impensis & damno voluntario tenetur *add. l. 5. c. 4. §. 7.*

§. 8. Inter *contractus onerosos* antiquissimus fere, & quo ante inventum numum commercia expediebantur, est *permutatio*, qua utrinque res pro re æquivalente datur. Et si & hodie post inventam pecuniam inter mercatores cum primis usitatum sit genus per-

mutationis, quo non simpliciter res inter se comparantur, sed prius pecunia taxantur, & deinde loco pecuniæ invicem traduntur. Diverſum tamen negotii genus à contractu permutationis eſt *reciproca donatio*; in qua, ut æqualitas obſervetur, neceſſum non eſt.

Obſerv. 370.

Eſt permutatio) Hæc eſt *contractus conſenſualis de re, pro alia æquivalente, habenda*. Traditio non pertinet ad *perfectionem* ſed *conſummationem*, ſæpe tamen ipſum conſenſum comitatur, adeoque pars negotii eſſe videtur, in quem ſenſum accipienda definitio Autoris *h. add. l. §. c. §. §. I.* Jus Romanum miram permutationis effecit naturam, à cujus adeò commentis, in doctrinâ juris naturalis, cavendum eſt.

2. Officia permutantium ſunt, ut res promiſſas præſtent ac damna voluntaria ſibi reſarciant. Inito autem contractu, res, ante traditionem, mutuo contrahentium ſunt periculo, hinc caſus fortuitus à neutra parte præſtatur.

§. 9. *Emptio venditio* eſt, qua pro pecunia rei alicujus dominium, aut eidem æquipollens jus acquiritur. Ejus ſimpliciſſimum genus eſt, ſi, ubi in pretium fuit conſenſum, emptor ſtatim pretium, venditor mercem offerat, tradatque. Frequenter tamen ita convenitur, ut merx quidem ſtatim tradatur, pretium autem poſt certum intervallum ſit ſolvendum.

vendum. Aliquando super pretio quidem convenitur, sed ut traditio rei seu mercis ad certum terminum debeat fieri. Ubi æquitati conveniens videtur, ut ante elapsum eum terminum res sit periculo venditoris: sed si post eum elapsum emtor in mora fuerit, quominus eam sibi tradi curarit, emtori deinceps res peribit. Solent & emtionis venditionis contractui varia pacta adjici: uti est *addictio in diem*, qua res ita venditur, ut liceat venditori meliorem conditionem, ab altero intra certum tempus oblatam, acceptare. Item *lex commissoria*, quando ita convenit, ut si ad certum diem pretium non solvatur, res sit inempta. Item *retractus*, seu pactum de retrovendendo, quod vel ita concipitur, ut si pretium intra certum tempus, aut quodcumque offeratur, emtor rem teneatur venditori restituere: vel ut si res offeratur, venditor pretium teneatur restituere; vel ut si emtor ultro sit iterum venditurus, prior venditor ad emendum præ cæteris admittatur: quod etiam dicitur jus protimiseos. Sic & frequens est, ut ex prædiis venditis aliquam sibi particulam, aut certum ejus usum *recipiat* venditor. Est quoque emtionis genus, quod vocant *per aversionem*, quando multæ res disparis pretii non sigillatim æstimatæ, sed conjunctim & velut

confuse taxatæ] emuntur. In eo modo venditionis, quæ vocatur *auctio*, res demum illi addicitur, qui ex pluribus licitantibus plurimum obtulerit. Est denique & genus emtionis, quo non certa res, sed probabilis tantum *spes* emitur; cui aleæ quid est admixtum: sic ut neque emtor, si spes fefellerit, neque venditor, si ea multum supra fuerit, queri debeat.

Observ. 371.

Emtio venditio) Est *contractus consensualis de re, cum dominio similive jure, pro certo pretio, habenda*. *Tratitio* itidem non ad *perfectionem*, sed *consummationem* pertinet. De cætero vel statim sequitur, vel ad tempus, prout conventum fuerit, differtur, de quo Autor *b. add. l. 5. c. 5. §. 2. 3.*

Observ. 372.

Ubi æquitati conveniens videtur) Officia emtoris & venditoris eadem sunt, quæ permutantium, quæ modo indicavimus *add. d. c. 5. §. 5.* Inito contractu, rei venditæ periculum casuale, ante traditionem, est emtoris, nam vel ipsum dominium, vel saltem jus præstantius habet, venditoris vero jus, quod superest, saltem precarium est, ab eoque, pro lubitu emtoris, advocari potest. Autor *b. & d. c. 5. §. 3.* quodammodo fluctuat, interim ejus doctrina, non de eo, quid natura contractus, sed specialia pacta exigant, accipienda videtur.

Observ.

Observ. 373.

Solent & emtionis venditionis contractui) Circa pacta emtioni adjici solita generaliter observandum, quod fidem datam lex naturalis servari jubeat. Specialius singula diducere, nimis longum foret, nec opus videtur, cum Jurisprudentia particularis, additis legum civilium decretis, distinctius illa persequatur *add. l. s. c. s. §. 4. s.*

Observ. 374.

Est quoque emtionis genus) Datur etiam multiplex emendi *modus*, ex quo variæ *species* resultant. Emtio *per aversionem* seu *indefinita*, non tantum in multis rebus, sed & in una re locum habet, si scilicet à mensurâ, ad quam aliàs illa vendi solebat, nos avertamus. Ei opponitur Emtio *definita*, quæ vel juxta certas res speciales initur, vel mensura, número, aut pondere aliquando determinatur.

Observ. 375.

In eo modo venditionis) Auctionis, à consueto emendi & vendendi modo, abire saltem videtur quoad *pretii determinationem*, quæ non speciali tractatu, sed per mutua licitantium certamina fieri debet, adeoque aliquid alex admixtum habet. Venditor igitur certamina illa, libera relinquere, minimè vero, artibus clanculariis, eadem intendere, aut res iterum ad se trahere, vel retinere, ex jure naturali tenetur, sicut emtores, in perniciem venditoris, colludere eodem jure prohibentur, quæ omnia

omnia legibus positivis, ad evitandas fraudes, certius definiri solent. Quoad *res venditas* nihil peculiare hic subesse videtur, hinc venditor de vitiis rerum, omninò tenebitur, nisi aliter conventum sit.

Observ. 376.

Est denique & genus emtionis) In emtione spei, quam vocant, Partes habent intentionem emendi, vendendi, donandi & donationem acceptandi, eventus autem ostendit, quod aliquando pura emtio venditio, aliquando donatio, aliquando negotium ex utraque mixtum, sit celebratum. Sicut porro in aliis conventionibus, ita hic etiam, quæstiones voluntatis, ex consuetis interpretandi principiis decidendæ, incidere solent *vid. l. 5. c. 5. §. 6. 7.*

§. 10. *Locatio conductio* est, qua pro mercede alicui usus rei, aut opera addicitur. In qua licet regulariter in antecessum de mercede soleat conveniri: tamen si quis citra definitam prius mercedem alteri operam aut usum suæ rei addixerit, censetur id expectare, quantum communis usus, aut conductoris æquitas tulerit. Circa hunc contractum observandum, si res locata plane perierit, ex eo tempore conductorem ad mercedem seu pensionem non amplius teneri. Quod si res locata certum ac definitum habeat usum, uti dominus eam præstare debet, quo ei usui sit

fit idonea: ita si illa detrimenti quid ceperit, conductor de pensione detrahit, quantum usui rei decesserit. Sed si rei locatae proventus sit incertus, & aliquid aleæ contineat, uti exuberans proventus conductoris lucro, ita malignus ejusdem damno est: nec stricto jure de pensione ob sterilitatem quidquam detrahendum; præsertim cum unius anni sterilitas alterius ubertate soleat pensari. Nisi casus, qui proventum interceperint, rariores fuerint, & de quorum alea in se suscipienda conductor non cogitasse præsumitur. Hos enim ad pensionem minuendam aut remittendam valere utique æquum est. Cæterum uti qui rem aliquam alteri locavit, præstare tenetur, ut ipsa usui sit habilis, impensasque necessarias tolerare: ita conductor ad boni patrisfamilias modum eadem uti, & quæ ipsius culpa perdita fuerunt, restituere debet. Et qui opus faciendum conduxit, quod sua culpa corruptum est, itidem præstat. Qui momentaneam suam operam alicui locavit, ubi eam quocunque casu præstare impeditus fuerit, mercedem petere non potest. Sed qui continuam alicujus operam conduxit, ubi is morbo aut alio casu per modicum tempus ad operam inutilis fuerit factus, inhumaniter ipsum vel plane sua functione

ctione dejicit, vel de pensione quid eidem detrahit,

Observ. 377.

Locatio conductio) Est contractus consensualis de usu rei vel operæ, pro certa mercede habendo. Traditio vel præstatio rei promissæ, ad executionem spectat, & juxta indolem negotii, successivè fieri solet, qua in re Jus Romanum consentit. Est de cætero locatio vel rei, vel operæ, vel operis.

Observ. 378.

Circa hunc contractum observandum) Officia locatoris & conductoris confuse & inadæquate Autor recenset, breviter ita dicendum. In locatione Rei locator debet rem usui habilem præstare, impensas necessarias tolerare ac damnum voluntarium resarcire. *Operarum*, operas fideliter exhibere, alias ad interesse tenebitur. *Operis*, debet opus debito tempore perficere ac de damnis, ex ipsius culpa proventuris, respondere. Conductor autem in quavis locatione mercedem solvere tenetur, modo usum rei vel operæ acceperit, præterea in locatione rei, ad modum boni patrisfamilias, re uti, eandem finito tempore reddere, ac damna voluntaria resarcire debet, quæ omnia in Jurisprudencia particulari latius disputantur *add. l. 5. c. 6.*

*. II. In contractu *mutui* datur alicui res fungibilis ea lege, ut is post intervallum idem genus

genus reddat in eadem quantitate & qualitate. Vocantur autem res, quæ mutuo solent dari *fungibiles*, seu quæ functionem in suo genere recipiunt ideo, quia quodlibet ex isto genere vicem alterius ita subire potest, ut qui ex eodem genere, eadem quantitate & qualitate receperit, idem quod dedit recepisse dicatur. Eadem quoque res pondere, numero, & mensura determinantur, & specificantur: quo respectu etiam quantitates solent adpellari, speciebus contradistinctæ. Cæterum datur aliquid mutuo vel gratis, ita ut non plus, quam datum fuit, recipiatur: vel cum aliquo emolumento, quod *usura* vocabulo insignitur. Quæ nihil habet naturali juri repugnans, siquidem fuerit modica, & respondens lucro, quod alter ex pecunia, aut alia re credita facit; meoque damno, aut lucro cessanti, quod ex absentia rei meæ capio; & ubi non exigatur ab hominibus tenuibus, apud quos mutuum vicem eleemosynæ subit.

Observ. 379.

In contractu mutui) Mutuum, juxta merum jus naturale, est *contractus consensualis*, quo quis de re fungibili, vel gratis vel sub conditione accipiente usura, concedenda, rogatur, ac alter, post rem acceptam, tantundem suo tempore reddere tenetur. Romani negotium, quo quis de re con-

concedenda rogatur, *pactum preparatorium* dixerunt, ac in *ipsa datione*, mutui essentiam collocarunt, quod sequitur Autor *b. & l. s. c. 7. §. 1. 2. 3. 4. 5.* Præterea iis persuasum fuit, mutuum natura sua esse gratuitum. Sed illa omnia mere Romana, ac in disciplina juris naturalis, non sequenda arbitramur, hinc traditio & restitutio ad *executionem* pertinet, ac ex natura contractus, successivè fieri debet.

Observ. 380.

Ceterum datur aliquid mutuo) Duplex hic contrahendi modus, mutuo naturalis censeretur debet, ceu jam admonuimus, natura enim negotiorum, ex usu Gentium, æstimanda est, jam vero non tantum gratis, sed & sub conditione usuræ accipiendæ, pecuniam similesve res dari solere, experientia docet. Romani a communi illa æstimatione, non aliam ob causam discesserunt, quam quod, consensum solum, producendæ obligationi, non sufficere existimaverint.

Observ. 381.

Quæ nihil habet naturali) Moralitatem usurarum pluribus persequitur Autor *l. s. c. 7. §. 8. seqq.* forte de licentia usurarum non valde dubitatum fuisset, nisi Jus Pontificium fucum aliquem fecisset. Positâ vero licentiâ, deinde etiam homines ad solvendas usuras *obligari* possunt, quæ obligatio summatim vel ex *pacto*, vel *mora*, vel *accepta utilitate* dependet.

2. Officium Mutuantis est, *ut rem promissam exsolvat,*

solvat, de quo vulgo non quærunt, dum id extra Mutui limites esse putatur, Mutuatarii vero, *ut ex eodem genere tantundem restituat*, quod quidem non ex valore imposito, vel externo habitu, sed intrinseca rei conditione æstimandum est, de quo alias prolixa est disquisitio *add. l. 5. c. 7. §. 6. 7.* De damni restitutione vel periculo casuali, nulla est quæstio, cum dominium rei in mutuatarium sit translatum, & res in genere debita perire nequeat.

§. 12. In contractu *societatis* duo pluresvè inter se pecuniam, res, aut operas conferunt eo fine, ut quod inde redditus lucri inter singulos pro rata dividatur; & si quid damni capiatur, id simili modo à singulis pro rata feratur. In qua societate uti officii est fides & industriam adhibere; ita ex illa intempestive & in fraudem socii discedi non debet. Cœterum societate soluta quilibet post detractum lucrum aut damnum, quantum intulit, recipit. Quod si autem unus pecuniam aut rem, alter operam contulerit, videndum est, quo modo facto sit Collatio. Quando enim alterius opera tantum versatur circa istius pecuniam aut rem tractandam aut distrahendam, partes lucri ita definiuntur, prout sese pecuniæ aut rei emolumentum ad pretium operæ habet, & sors salva est ac perit ei, qui contulit. Quando autem opera impenditur

ditur ad meliorandam rem ab altero collatam, ipse pro ratione ad meliorationis in ipsa quoque re partē habere intelligitur. Ast ubi omnium bonorum societas est inita, singuli socii uti quæ lucrantur fideliter conferre debent; ita contra ex communi massa pro ratione conditionis suæ singuli sustentandi. Soluta autem societate divisio bonorum fit pro ratione eorum, quæ singuli in societatem initio intulerunt; non attendendo, per cujus bona societati lucrum aut damnum provenerit; nisi aliter sit conventum.

Observ. 382.

In contractu societatis) Societas est *contractus consensualis, de rebus vel operis conferendis, ut lucrum & damnum fortuitum inter conferentes dividatur.* Solo consensu hunc contractum perfici, ac traditionem pertinere saltem ad executionem, Jus Romanum etiam concedit.

Observ. 383.

In qua societate) Officia Sociorum uti dubio procul, ex præceptis naturalibus, de nemine lædendo, fide servanda ac damno rescarciendo fluunt, ita Autor minus distinctè eadem proposuit; indicabimus generales respectus. Officia sociorum respiciunt vel *ipsos socios*, de quibus §. 12. *h. add. l. 5. c. 8.* quæ distinctius quoad societatem initam, consummatam & solutam, expendi possunt, vel *alios* his ex fide data

obil-

obligari, eosque, ex eodem principio, sibi obstringere solent; Ob præsuppositam autem societatem, socii in contractibus, cum Exteris celebratis, pro Correis credendi & debendi (quorum indolem exposui *Observ.* 161.) haberi debent, nisi aliud actum sit.

§. 13. Dantur quoque complures *contractus, qui aleam continent*. Quos inter referre possis *sponsiones*, quando eventus alicujus, nondum utrinque notorii, existentiam alter affirmat, alter negat, certo pretio utrinque deposito, quod illi cedat, cujus assertioni eventus congruere deprehensus fuerit. Huc pertinent omnia *ludorum* genera, in quibus aliquo pretio certatur. Inter quos tamen minus aleæ habent, qui certamen ingenii, dexteritatis, solertiæ aut roboris continent. In quibusdam ingenium & alea pari vigore sese exserit. In aliis denique alea prædominatur. Et si rectorum civitatis sit dispicere, quousque ex usu publico aut singulorum sit, ejusmodi contractus tolerari. Huc spectat lotaria, quando plures de re, quam collatitia pecunia emunt, post sorte decernunt, cui soli ea tota debeat cedere. Item *olla fortuna*, quando, dejecto in urnam certo tesserarum seu schedularum numero inscriptarum & inanium, pretio redimitur facultas easdem extra-

hendi, ita ut extrahens id accipiat, quod illarum inscriptio præ se fert. Hisce contractibus affinis est *asssecuratio*, seu contractus periculi avertendi & præstandi, quo quis certa pecunia accepta in se suscipit & præstat pericula, quæ subituræ sunt merces in alia loca transportandæ; ita ut si has interire contigerit, asssecurator earundem pretium domino restituere teneatur.

Observ. 384.

Dantur quoque complures contractus, qui aleam continent) Alea hic notat incertum eventum, qui lucrum & damnum nobis afferre queat, contractus igitur, qui aleam continere dicuntur, consensum indefinitum, in utrumque eventum directum, complectuntur, quæ indefinite consentiendi ratio, omnem querendi causam excludit, utcunque eventus ceciderit, modo dolus absit.

2. Ad ejusmodi negotia pertinet etiam *Sors decisoria*, quæ est actus, quo id, quod voluntate humana purè decidi poterat, sub conditione incerti eventus, determinatur. Sub ejusmodi conditione Imperans milites pericula adire jubet, vel in delictis dispensat, privati hæreditates dividunt, aut in genere homines consilium capiunt, quæ in specie *sors consultatoria* audit.

3. Totum igitur negotium voluntate humana deciditur, & eventus fortuitus est, suamque
effica-

efficaciam sortitur à consensu hominum, perinde sicut se res habet in promissionibus, sub conditione aliâ, vel in diem factis. De cætero, circa eventum illum, providentiæ divinæ concursus ordinarius, imò specialis & extraordinarius non negatur, pro speciali tamen voluntatis divinæ revelatione, necessariaque agendi normâ, nobis præscripta, non habetur, ex quo moralitas & licentia sortis decisoriae apparet.

4. Opponitur *Ei fors divinatoria*, qua ex eventu vel naturali vel miraculoso, voluntatem Dei nobis imaginamur, ac inde, quid vel futurum sit, vel nos agere oporteat, amplius concludimus. Hæc, extra casum specialis permissionis divinæ, illicita est, magnâ enim irreverentiâ, Deum ad manifestandam voluntatem, adigere volumus, præterea superstitiosum est, voluntatem illam sibi imaginari, cum tamen nulla revelatio facta sit, nec eo nomine aliqua promissio occurrat. De cætero divinatio illa aliquando in terminis stultæ superstitionis, subsistit, si scilicet ex eventu aliquo te futura scire putes, aut actum in se licitum, ex jussu divino scilicet! suscipias, aliquando in scelus aliquod degenerat, si v. gr. hominis occisio similisve actus eam sequatur.

5. Nonnulli, ac in specie Becmann. *lin. doctrin. moral. c. 8. §. 9. 10. 11.* Sortem decisoriam & divinatoriam distinguunt quidem, sed in explanatione utramq; confundunt, hinc objectum

fortis decisorix *negotia humanitus inexplicabilia esse*, per eam ad *verum Deum appellari* ac semel missam, *non posse iterari* contendunt, quæ omnia ad sortem decisoriam non quadrare, periti facile intelligunt. *conf. Op. Maj. l. 5. c. 9. §. 2. 3.*

Observ. 385.

Quos inter referre possis sponsiones) Sponsio est *patum*, quo, occasione contradictionis in conversatione civili occurrentis, duo pluresve sententiæ suæ *fidiâ*, sibi mutuo ita aliquid promittunt, ut is, cuius assertio *fefellerit*, alteri quid præstare cogatur. Quodsi adeo omnia seriò & bona fide acta sint, tum juxta mensuram consensus dati, lex naturalis paciscentes ad fidem servandam obligat. *add. d. c. 9. §. 4.*

Observ. 386.

Nondum utrinque notorii) Ineuntur sponsiones de rebus futuris, præteritis & præsentibus, quoad istas tamen & has, certam scientiam abesse debere, vulgo contendunt *vid. Becman. d. c. 8. §. 13.* quod etiam sequitur Autor *h.* sed arbitror, quod sponsio recte ineatur, licet quis rem certo sciat, modo dolus absit, i. e. modo quis, altero tacente, nihil dicat, aut de certa scientia interrogatus, callidè nihil dissimulet, ac alter firmo satis judicio utatur, ejusque rationes jacturam talem, qualis heic subest, ferre queant, qui enim cum altero, de cujus scientia ipsi nihil constat, in certamen descendit, is in omnem eventum consentire censetur,

tur, adeoque damnum sibi imputare debet. Rationes dissentientium fere in circulum recurrunt, aut sponfionem à sciente factam, cessantibus requisitis, quæ supposuimus, illicitam esse ostendunt.

Observ. 387.

Huc pertinent omnia ludorum genera) Ludus est conventio, qua duo pluresve adhibitis certis instrumentis eventum, à fortuna vel ingenio dependentem, procurant, ac, prout ille ex compacto ceciderit, ita aliquid lucrantur vel perdunt. Est vel artis, vel fortune, vel mixtus add. l. 5. c. 9. §. 5.

Observ. 388.

Et si Rectorum civitatis sit dispicere) Officium triplex hic occurrit, (1) *antecedens*, ubi quæritur, *an licitum sit ludere?* quod recte asseritur d. c. 9. §. 5. frustra dissentiente Becmanno *lin. doctr. mor. c. 8. §. 12.* consuetudo tamen ludendi, quæ hodie passim obtinet, licita existimari nequit. Atque huic abusui, leges humanæ modum ponere solent, ut innuit Autor *b.* sed rarò servantur, dum exempla opposita, iis sunt efficaciora (1) *concomitans*, ludentes dolo abstinere, nec eventum, qui à fortuna & arte licita dependet, mediis furtivis procurare, vel vi adhibita, timidiores pecunia emungere debent (3) *consequens* si licitè & bona fide lusus peractus est, fides data servari, ac res promissa præstari debet.

Observ. 389.

Huc spectat lotaria) Quæ etiam *Riffa* à nonnullis dici-

dicitur Becman, *d. c. 8. §. 13.* de cætero est contractus, ex emtione, & forte decisoriâ mixtus, ex quo officia paciscentium facile intelliguntur, *add. l. 5. c. 9. §. 6.*

Observ. 390.

Item olla fortune) Hæc nihil aliud est, quam *emtio spei*, hinc ea obtinent, quæ *Observ. 376.* diximus. Nulla alia igitur lex hic locum habet, quam ut ea, quæ ollæ inesse dicta sunt, vel de quibus probabiliter cogitatum est, revera etiam in illâ reperiantur, nec per fraudem aliquid eximatur, quo fine nonnunquam custodes publici apponuntur. Aliquando à Republica ejusmodi ollæ panduntur, quo Exteri, quibus imperari nequit, vel potentiores Cives, quibus tributum solvere aliàs molestum est, spe lucri alliciantur, ac in usus publicos aliquid conferant *add. d. c. 9. §. 7.*

Observ. 391.

Hisce contractibus affinis est affecuratio) Est conventio, qua quis mercium transportandarum vel advebendarum securitatem asserit, ac si assertione eventus respondeat, certam mercedem à domino earum, sibi stipulatur, sin minus, illarum aestimationem promittit. Sæpe hic contractus cum temeritate vel injustitia est conjunctus *add. l. 5. c. 9. §. 8.*

§. 14. Ad majorem firmitatem & securitatem contractibus, frequenter solent adjici *fidejussiones & pignora.* In *fidejussione* alius homo, qui creditori idoneus judicatur, principa-

principalis debitoris obligationem velut in subsidium in se suscipit, ita ut nisi iste solvat, hic ipsius vices subeat; ut tamen, quod erogavit, à principali debitore ipsi refundi debeat. Et si autem ad maiorem summam fidejussor, quam debitor principalis teneri non possit, non tamen repugnat istum, quam hunc arctius teneri; quippe cum huic plus, quam illi, fidei fuerit habitum. Naturaliter tamen principalis debitor prius, quam fidejussor est appellandus, nisi hic istius obligationem plane in se receperit; qui expromissor vocari solet. Quod si plures pro uno fidejusserint, pro rata duntaxat erunt singuli conveniendi; nisi forte quis eorum solvendo non sit, aut ejusdem conveniendi non detur facultas. Tunc enim reliqui hujus portione onerabuntur.

Observ. 392.

Ad maiorem firmitatem) Solent contractibus vel obligationibus, principalibus aliquando adjici contractus vel pacta accessoria, idque duplici fini vel (1) ut *easdem temperent*, circa quæ generaliter tenendum, quod omnia mero jure naturali valeant, nisi legibus repugnent, aut contradictionem involvant, *vid. l. 5. c. 10. §. 1. seqq.* Leges Romanæ hic valde trlicantur, quæ artis rabulariæ inventa extra disciplinam juris na-

turalis sunt, vel (2) ut eas reddant firmiores, quo
prtinete *fidejussio* & *pignus*.

Observ. 393.

In fidejussione alius homo) Fidejussio est *contractus consensualis*, quo quis, in maiorem Creditoris securitatem, obligationi alienæ accedit, dicitur fidejussor, etiam sponzor vel Adpromissor.

Observ. 394.

Uti tamen quod erogavit] A fidejussione debet discerni *Negotium*, quod inter fidejussorem & debitorem principalem intercedit, & est vel *mandatum*, si pro sciente & volente, vel *negotiorum gestio*, si pro ignorante, vel *donatio*, si pro invito, quis fidejusserit, illo & isto casu debitor ad restitutionem ejus, quod fidejussor creditori solvit, est obstrictus, hoc verò obligatio cessat.

Observ. 395.

Et si autem ad maiorem summam) Fidejussor obligatur Creditori, ex natura contractus, *accessoriè*, hinc arctius quidem, sed non durius, debitore principali, obstringi potest, nec ante hunc solvere debet, nisi aliud actum §. 14. *h. add. d. l. 5. c. 10. §. 9. 10. 11. 12.* Vice versa Creditor ex contractu, utpote unilaterali, fidejussori non tenetur, ne tamen actionem, contra debitorem aliosque fidejussores competentem, in præjudicium unius fidejussoris, malitiose differat, id æquitas manifeste exigit, hinc etiam moras ne-ctens, ad agendum urgeri potest, quo fundamento nititur decantatum illud, inter juris
Ro-

Romani interpretes hominesque forenses remedium ex *L. si contendat*.

Observ. 346.

Quod si plures pro uno fidejusserint) Hoc casu, ex natura contractus, singuli saltem pro rata Creditori obligantur, eamque etiam partem tantum solvere tenentur, quod si verò id actum sit, tum ut correi debendi erunt obstricti, hinc singuli quidem ratam partem etiam solum debent, solidum tamen solvere coguntur, in primis si cæteri absint, vel non solvendo existant §. 14. b. Qui autem solidum præstitit, à confidejssoribus partes repetit, nam horum quoque nomine Creditori solutum est, id quod interpretes juris Romani, dum naturam obligationis correalis non satis intelligunt, negare vulgò solent.

§. 15. Sæpe quoque solet creditori in securitatem crediti tradi aut assignari à debitorre certa quæpiam res, *pignoris* aut *hypothecæ* nomine, quousq; istud fuerit exsolutum. Cujus finis est non solum, ut debitor ad solvendum urgeatur desiderio rei suæ recuperandæ: sed & ut in promptu sit, unde sibi solvatur. Inde & regulariter pignora tanti aut majoris esse solent, quam ipsum debitum. Cæterum res, quæ pignori opponuntur, sunt vel *fructuose*, vel *steriles*. Circa priores sæpe adjici solet pactum *ἀντὶ χρημάτων*, seu ut creditor loco

usuræ fructus istius pignoris percipiat. Circa posteriores autem *lex commissoria*, ut nempe pignus cedat creditori, ubi intra certum tempus solutio non sit facta. Id quod naturaliter iniquum non est, ubi pignus pluris non est, quam debitum, & usuræ intermedii temporis, aut si quod excedit domino, restituatur. Uti autem creditor pignus solutione facta debet restituere: ita interea non minorem, quam propriis rebus illi custodiam debet: & ubi pactum antichreticum non accesserit, sitque talis res, quæ usu atteratur, aut si debitoris ullo modo intersit, invito hoc eadem uti non potest. Differt hypotheca à pignore, quod hoc constituatur rei traditione; hæc autem re non tradita constat nuda assignatione rei imprimis immobilis, ex qua solutione non facta creditor suo credito potiri queat.

Observ. 397.

Sape quoque solet) In Jure Romano *pactum hypothecæ & contractus pignoratitius* separantur, hicque pro contractu reali habetur, sed cum à simplicitate naturali abire, jam dixerim *Observ. 354.* si præter consensum, ad contractus perfectionem, aliud quid requiratur, hinc de pignore etiam paulò aliter philosophandum erit. Est scilicet *contractus consensualis accessorius, de re, in securitatem Creditoris, obliganda vel*

tradenda, initus, juxta quæ tradita Autoris quoque accipienda.

Observ. 398.

Cujus finis est non solum) Finis pignoris est Creditoris *securitas*, ex hac igitur diversa etiam paciscendi ratio fluit, si enim res amoveri vel non possint, vel non soleant, tum sufficit, si illæ Creditori assignentur & obligentur, si vero facile amoveri & occultari queant, tum Creditor securus non redditur, nisi eas in suam recipiat custodiam, illo casu, traditio nulla desideratur, hoc vero illa fieri debet, sed non pertinet ad *perfectionem* sed *executionem* contractus. *add. l. 5. c. 10. §. 13.*

Observ. 399.

Ceterum res quæ pignori opponuntur) Quoad pactum antichreticum, æquitas exigit, ut æqualitas inter debitorem & creditorem servetur, hinc fructus ex re oppignorata percipiendi, emolumentum, quod debitor ex pecunia debitâ sentit, non valde superare debent, id quod leges civiles certius definire solent, dum fructus ad quantitatem legitimarum usurarum reducantur.

Observ. 400.

Circa posteriores autem lex commissoria) Pactum commissorium, prout hic supponitur, æquitati naturali non contrariatur, sed vulgò alio sensu accipitur, quatenus scilicet avari creditores modicâ pecuniâ, pignora magni pretii, debitoribus egenis extorquent, quod humanitati

nitati repugnare manifestum est *add. d. c. 10. §. 14.*

Observ. 401.

Uti autem Creditor) Ex mea hypothese, de officiis debitoris & creditoris, ita dicendum: debitor debet rem tradere, si ita conventum sit, ac impensas necessarias & utiles tolerare, Creditor vero, accepta pecunia, pignus reddere ac damnum voluntarium resarcire tenetur *add. d. c. 10. §. 14. 15.*

Observ. 402.

Differt hypotheca) Differentia hæc à diversitate rerum & modi contrahendi dependet, prout enim illæ amoveri vel non amoveri possunt aut solent, ac iis debitor commodè carere potest, nec ne, ita hunc regulæ æquitatis & prudentiæ adhiberi suadent. Quoad ipsum jus verò, hypotheca & pignus non differunt *add. d. c. 10. §. 16.*

§. 16. Cœterum quænam contrahentium sint officia, ex fine & natura horum contractuum liquido adparet.

Observ. 403.

Cæterum quænam) De officiis contrahentium, in singulis contractibus actum est, ex quibus autem fontibus officia resultent, tum quinam heic obstringantur, id generaliter jam *Observ. 198.* ostensum est, ut illa hic repetere, non attineat *conf. Observ. 361.*

CAPUT XVI.

QVIBUS MODIS SOL- VANTUR OBLIGATIONES, QVÆ EX PACTIS ORI- UNTUR,

§. I.

INter modos solvendi obligationes, ex pa-
ctis oriundas, quibusque adeo officia inde
promanantia plane expirant, maxime na-
turalis est *expletio* aut solutio *ejus, de quo fuit
conventum.* Ubi licet regulariter is, qui de-
bet,olvere teneatur; tamen si præstatio fiat
ab alio nomine ejus, qui obligationem con-
traxit, hæc dissolvitur; siquidem alias nihil
interfit, abs quo expletio fiat. Ita tamen ut
qui pro altero animo non donandi solvit, ab
hoc quod erogavit, repetere queat. Solven-
dum præterea ei, cui debetur, aut quem hic de-
legavit, ut ipsius nomine debitum recipiat.
Et denique illud ipsum præstandum, aut sol-
vendum, de quo conventum fuit: non aliud
ejus loco, integrum non mutilum, non pars
duntaxat, non divisum, loco itidem & tempo-
re

re convento. Et si sæpe humanitas creditoris aut impotentia debitoris subigat terminum solutionis prorogare, aut diffindere, vel etiam aliud pro alio accipere.

Observ. 404.

Inter modos solvendi) Hi in jure Romano, ab *effa-*
ctu discernuntur, dum alii obligationem *ipso*
jure seu penitus, alii *ope exceptionis*, sive minus
plenè, tollere dicuntur. Sed illa merè Ro-
mana, & malis rationibus sancita sunt, hinc
promiscuè modos tollendi recensere licebit,
quia verò de iis, in Jurisprudencia particulari,
prolixè agitur, itaque fundamento hic indi-
casse, satis erit.

Observ. 405.

Maximè naturalis est expletio) Solutio, hic strictè
accipitur, ac ad rem debitam & obligationem
simul refertur, nam dum hæc, per illius præ-
stationem, tollitur, solutio intercedere dici-
tur, alias si solam obligationem spectemus,
quivis tollendi modus, nomen Solutionis ge-
rere potest. De cætero *quis* solvere debeat
aut possit, tum *cui*, aut *quid* solvendum sit, id
omne, ex natura conventionis, judicandum
est, requirente subinde aliquod tempera-
mentum humanitate, quæ omnia naturalia
sunt *add. l. 5. c. 11. §. 1. 2. 3. 4.* in personis autem,
quæ solvant, aut quibus solvatur,abilitas
præsupponenda est, quam leges civiles, sed o-
mnibus fere Gentibus communes, certius de-
finiunt *conf. Observ. 209.*

§. 2. Tolluntur quoque obligationes *compensatione*, quæ est crediti & debiti inter se contributio, seu quando debitor ideo liberatur, quia eidem ipse creditor rem ejusdem generis, & quæ tantidem est, vicissim liquido deber. Cum enim in primis in rebus fungibilibus tantundem sit idem; & vero ubi mutuum est debitum, mihi statim tantundem esset reddendum, atque ipse accepi: igitur declinandis inutilibus solutionibus commodissimum est utrumque suum retinendo solutione defungi. Patet autem compensari proprie posse res fungibiles ejusdem generis, quarum solvendarum tempus præsens est, aut præterit: non aliæ res aut præstationes diversæ naturæ: nisi forte illæ utrinque in sui æstimationem, seu in pecuniam resolvantur.

Observ. 406.

Tolluntur quoque obligationes compensatione) Hæc est debiti, ob aliud debitum reciprocum, sublatio, ab eo tempore, quo utrumque existit, ex communi mortalium affectu, facta de quo plura dixi in *Observat. ad Lauterb. Comp. Jur. Observ. 446. seqq.*

Observ. 407.

Pater autem compensari proprie posse) Mero jure naturali quævis obligationes, rerum præstationem respicientes, compensari possunt, licet ve-

verum sit, quod in rebus fungibilibus, ac imprimis in pecunia, quarum pretia, sine prævia taxatione, jam nota sunt, expeditissime compensatio procedat, leges autem civiles, uti non semper inter quosvis debitores compensationem admittunt, ita eam etiam à nonnullis obligationibus removent *add. d. c. ii. §. 5. 6.*

§. 3. Tollitur quoque obligatio *condonatione* seu remissione ejus, cui quid debebatur, & cujus interest obligationem fuisse expletam. Ea solet fieri vel expresse per adhibita signa consensum testantia; puta, data acceptilatione, redditis aut abolitis chirographis: vel tacite, si quis ipse impediatur, aut in causa sit, quo minus, quod sibi debetur, possit præstari.

Observ. 408.

Tollitur quoque obligatio condonatione) Obligationes unilaterales, condonatione, remissione, acceptilatione vel pacto, de non petendo, tolli quoque possunt, hæc enim mero jure naturali coincidunt, & nihil etiam refert, expresse an tacite consensus detur, quamvis ille hõc sit evidentior *conf. d. c. ii. §. 7.*

§. 4. Solent quoque solvi obligationes, quæ utriusque partis præstatione constant, re adhuc integra, *nullo dissensu*; nisi leges positivæ id prohibuerint. Ubi autem ab altera par-

parte jam quid sit præstitum, accedat oportet vel hujus condonatio, vel ut alia ratione id sarciatur.

Obervo. 409.

Solent quoque solvi obligationes) Reciprocae obligationes mutuo dissensu, si arbitrio obligatorum subsint, solvuntur, nec attendenda erunt scrupulosa discrimina, quæ Jus Romanum introduxit. Requiritur autem, ut *res sit integra* i.e. contractus quidem perfectus, sed nondum consummatus, nam si consummatio accesserit, tum consensus contrarius non solvit obligationes, utpote rerum præstatione jam sublata, sed novum pactum continet, quod tamen mero jure naturali etiam validum est.
add. d. c. n. §. 8.

§. 5. Præterea non tam solvitur, quam *abruptitur* obligatio alterius partis *perfidia*. Quando enim unus non præstat, de quo est conventum, neque alter tenetur præstare, quod intuitu istius præstationis recepit. Nam capita præstandorum in pactis priora posterioribus insunt per modum conditionis, quasi ita dictum foret; præstabo, si tu præstiteris prius.

Obervo. 410.

Præterea non tam solvitur) Si alter contrahentium perfidus sit, ac à contractu resiliat, tum certum est, quod alteri etiam recedere inte-

grum sit, quo spectat doctrina Autoris *b. add. d. c. II. §. 9.* attamen is perfidum dimittere non tenetur, sed habet electionem, utrum perfidiam velut acceptare (quo facto mutuus dissensus ex postfacto existit) an perfidum, ad fidem servandam, mediis habilibus adigere velit.

§. 6. Expirant quoque obligationes, quando *statum*, in quo eadem unice fundabantur, *mutaverit* vel ille, qui præstare, velis, cui præstari debebat.

Observ. 411.

Exspirant quoque obligationes) Mutato statu naturaliter obligationes exspirant, quia consensus restrictè datus est, adeoque cessante eo, cuius intuitu intercessit, evanescit *add. d. c. II. §. 10.*

§. 7. Ipso *tempore* exspirant obligationes, quarum duratio à puncto aliquo temporis suspensa fuit; nisi expressa aut tacita partium conventionem illa prorogata fuerit. Necessum est tamen, ut intra illud tempus facultas exigendi obligationem extiterit.

Observ. 412.

Ipso tempore exspirant obligationes) Eadem hic subest ratio consensus non absolute sed restrictè datus est, hinc elapso tempore cessat ac obligatio necessario desinit *add. d. c. II. §. II.* Subtilitas Juris Romani, de qua in §. 3. *J. de V. O.* juri naturali incognita est, & malis rationibus nititur.

§. 8.

§. 8. *Morte* denique solvuntur obligationes, in persona alicujus radicata, subjecto quippe sublato accidentia quoque extinguere necessum est. Sæpe tamen in superstitibus defunctorum obligatio continuatur. Idque vel quia superstes ex officio pietatis, aut alias ob rationes defuncti obligationes explendas in se suscepit; vel quia ex defuncti bonis obligationi erat satisfaciendum, quæ cum isto onere in hæredem transierunt.

Observ. 413.

Morte denique solvuntur) Ut morte solvantur obligationes, ad personam restrictæ, id naturale est, ac ex consensu fluit. Interim regulariter id non obtinet, cum enim facillimè mors homines opprimat, ideo conditioni humanæ haut convenit, ut obligationes cum persona expirent, sed æquitas potius, utilitas hominumque affectus exposcit, ut ad alios illæ transeant, hinc ea obligandi ratio, tamdiu etiam præsumenda, donec restrictior probetur.

Observ. 414.

Idque vel quia superstes) De transitione obligationis in alios ita summatim habendum [1] obligatio specialis, ex contractu descendens, ex communi mortalium affectu, ad hæredes similesve successores transmittitur; Quod si quis ultro eam suscipiat, tum de transmissione res est liquida, sed id ad rarius contingentia

referendum (2) obligatio ex delicto orta, ac ad damni restitutionem pertinens, in eos, qui bona obligati accipiunt, transmitti debet, ut inique transmissio negetur, ceu fit in Jure Romano (3) Obligatio ad poenam pecuniariam, hæredibus non est imponenda, nisi diserte lex poenalis hoc velit, scopus enim poenarum, transitionem non requirit (4) obligationem, ad poenam, corporis, existimationis, vel vitæ afflictivam, transmitti, prohibent leges socialitatis *add. d. c. 11. §. 12.*

§. 9. Per *delegationem* substituit quis creditori suo consentienti debitorem suum, ut hic loco ipsius debitum suum exsolvat. Ubi creditoris quidem consensus requiritur, non autem tertii istius debitoris, quem etiam ignarum & invitum alteri volenti delegare possum. Nam nihil interest, utri quis solvat: multum autem, à quo quis debitum exigat.

Observ. 415.

Per delegationem) Per hanc Autor *b. & d. c. 11. §. 13.* intelligit *Cessionem*, de cætero hæc non tam jus & obligationem tollit, quam *transfert*, nisi velis dicere, ratione prioris Creditoris, obligationem tolli, quod jure naturali verum est, licet Jus Romanum, per otiosas tricas & ambages heic etiam incedat. Alias *Delegatio* est *actus*, quo Creditori suo volenti, alium sive debitorem sive non debitorem, quis delegat, ut is nova promissione debitum in se unice recipiat, ad quem trium
con-

consensum esse necessarium, manifestum est.

2. Ad modos tollendi etiam pertinent (1) *Confusio*, quæ est juris eique respondentis obligationis, in eandem personam concursus ac inde veniens utriusque interitus *add. d. c. 11. §. 14.* (2) *Novatio in specie*, qua inter Creditorem & debitorem eundem, obligatio renovatur, ut eam juris civilis propriam dicamus cum Autore *d. e. 11. §. 15.* nulla cogit necessitas, perinde enim, ut alii actus, mutuo consensu constat novatio, ac ex libertate naturali, ab omnibus hominibus suscipi potest & solet (3) *rei interitus*, modo certa species debeatur, & si qui adhuc alii ejus generis modi occurrunt.

CAPUT. XVII.

DE

INTERPRETATIONE.

§. I.

ITa quidem est, ut neque in illis, quæ imperio injunguntur, quis ulterius obligetur, quam hic voluit; neque ad quæ quis ultro sese adstringit, ulterius teneatur, quam ipse voluit. Qui tamen de voluntate hominis al-

ter homo judicare non potest, nisi ex actibus & signis in sensus incurrentibus: inde demum in id quilibet obligari in foro humano censetur, quod recta signorum interpretatio suggerit. Unde tam ad leges quam ad pacta rite intelligenda, & exinde officio explendo plurimum prodest *regulas bona interpretationis circa verba* potissimum, tanquam communissimum signum, constitui.

Observ. 416.

Ita quidem est) Interpretationis in actu signato consideratio utilis est §. 1. *b.* quia ejus cognitio, mentem, in eruenda voluntate dubia, adjuvat. Ex Recentioribus nonnulli eam retulerunt ad Logicam, quod rejeci in Art. Cogit. c. 18. §. 48. *seqq.* hinc arbitror, generalia interpretandi principia in Disciplina quadam Generali, hactenus desideratâ, *vid. d. tr. c. 19.* posse proponi *d. c. 19. §. 126.* specialiore vero Interpretationis considerationem, ad *Philologiam, Theologiam & Jurisprudentiam* pertinere, quamvis ubique, eadem ferè interpretandi regulæ, occurrere videantur.

2. Hoc loco *Interpretatio Juridica*, considerata erit, quam quidem minus recte Autor huic loco reservavit, *vid. l. 5. c. 12. §. 1.* cum in parte præliminari explicanda illa fuisset *vid. Observ. 91. n. 22.* Rem ipsam quod attinet, repetendum est, quod *d. n. 22.* admonui, agi saltem de inter-
pre-

pretatione *voluntatis positivæ*, non *legis naturalis*, deinde observandum, quod voluntatem dubiam, signis externis declaratam, vel Legislator, vel usus forensis, vel homo privatus interpretetur, hinc triplex interpretatio, *Authentica, Usualis & Doctrinalis* exoritur, sed cum illa & ista, pro autoritate fieri soleat, nec certis regulis adstricta sit, ideo ad hanc unicè deinceps erit respiciendum.

3. Est igitur Interpretatio doctrinalis, *Voluntatis juridicæ factis vel verbis declaratae*, per probabiles plerumque conjuncturas facta expositio. Objectum est voluntas *juridica* i. e. in studio juris occurrens *factis*, & *verbis declarata*, adeoque *positiva*, ac potissimum *obscura*, non quidem obscuritate universalis seu subjectiva, sed particulari seu objectiva, prout nonnulli philosophantur. Oritur autem illa obscuritas, quoad voluntatem verbis prolatam, vel ob *externum accidens*, nempe in sermone dicto, propter sermonem parum distinctum, scripto, ob externam figuram male se habentem, quam ultimam obscuritatem qui tollunt, *Criticorum* nomine superbiunt; Vel ob *internum verborum sensum*, id quod potissimum accidit ob verborum antiquitatem, novitatem, peregrinitatem, perplexitatem, ambiguitatem & pugnantiam *vid. Thomaf. J. J. D. l. 2. c. ii. §. 20. seqq. Logic. German. p. 2. c. 3. §. 37. seqq.* Facta quod attinet, illa regulariter voluntatem obscurius indicant. Ostendit porro voluntatem Inter-

pretatio plerumque saltem per *probabiles conjecturas*, ceu innuit definitio, aliquando tamen etiam sententia *certa* adest.

4. Solet interpretatio dividi in *Declarativam*, quæ voluntatem juxta indicia æque late patentia, declarat, *Extensivam*, quæ voluntatem, indiciiis latiore, extendit, & *Restrictivam*, quæ indicia voluntate latius patentia, ad hujus mensuram coarctat. Poterunt sane species illæ ita distinguui, sed, ad eruendam voluntatem sollicitudine illà opus non est.
5. Quo quis voluntatem dubiam ritè interpretetur, *Aptitudo* in eo requiritur, hanc ei conciliat (1) *nativa ingenii bonitas*, quæ, ut alibi, ita hic etiam, utramque facit paginam (2) *cognitio indiciorum*, quam quomodo quis sibi comparet, id ex illorum diversitate judicandum. Sermonem minus articulatam is intelligit, qui frequenter cum malè loquente conversatur, literas perperam scriptas, is interpretabitur, qui earum lectioni adfuetus est, denique linguam callere ille censendus est, qui ejus idiotismos novit (3) *materia interpretanda* vid. Thom. J. J. D. d. l. §. 83. 84. (4) *preceptorum logicorum*, nam qui in genere rectè ratiocinari scit, is ad interpretandum quoque, cæteris parib9, aptus erit, cum interpretatio sit species ratiocinationis (5) *regularum interpretandi*, hæ concipiuntur juxta certas circumstantias, quas agentes respexerunt, & ex quibus adeò voluntas eorum probabiliter potest colligi.

§. 2. De *verbis popularibus* hæc est regula: verba regulariter intelligenda sunt in proprio suo & famoso significato, quem ipsis imposuit non tam proprietas aut analogia grammatica aut derivationis conformitas, quam popularis usus; quem penes arbitrium est, & jus, & norma loquendi.

Observ. 417.

De verbis popularibus) Quod si ad voluntatem verbis prolatam respiciamus, circumstantiæ, quas modo laudavimus, duplicis generis esse videntur, vel enim *in verbis*, vel *extra ea* occurrunt. In illis occurrit (1) *obligatio*, qua quis in negotiis civilibus, juxta consuetum significatum, verbis uti debet. Hoc igitur fundamento subnixus interpres, non ad libitum dicentis, sed secundum ejus obligationem verba interpretatur, ac reservationum mentalium sensusque inusitati, nullam habet rationem *add. l. 5. c. 12. §. 2.* (2) *significatus maxime usitatus*, hinc regula, *verba regulariter & in dubio*, i. e. si circumstantiæ magis evidentes aliud non exigant, *sunt accipienda in significato maxime famoso* §. 2. b. *add. d. c. 12. §. 3.* nam loquens maxime usitatum sensum, juxta communem hominum consuetudinem, sectatus meritò præsumitur, quamdiu circumstantiæ evidentiores aliud non exposcunt, quo sensu regulam subsistere puto, licet eam alias improbet *Dn. Thomas. in Logic. German. c. 3. §. 107.*

§. 3. *Vocabula artium* explicanda sunt secundum definitiones prudentum cujusque artis. Quod si vocabula artium à diversis diversimode definiantur, ad lites præscindendas facit, popularibus verbis exprimere, quid per eam vocem intelligamus.

Observ. 418.

Vocabula artium) Pertinet hæc doctrina ad regulam præcedentem, nam in terminis technicis, ille significatus maximè famosus censeretur debet, quem iis artifices imposuerunt. Quod si tamen loquens, artis alicujus non fuerit gnarus, tum facile circumstantiæ evidentiores alium sensum insinuabunt, aliamque adeo postulabunt interpretationem.

Observ. 419.

Quod si vocabula) Hæc cautela non pertinet ad voluntatem dubiam interpretandam, sed ad eam perspicue exprimendam litesque adeo, inde orturas, præcavendas, ut quodammodo illa à scopo abludat *add. d. l. 5. c. 12. §. 4.*

§. 4. *Conjecturis* autem ad eruendum genuinum sensum opus est, si vel verba simplicia, aut verborum complexio sint *ambigua*; aut si partes quædam orationis sibi invicem videantur repugnare, ut tamen dextra explicatione adhibita conciliari invicem possint. Nam ubi certa & manifesta est repugnantia, posterius derogabit prioribus.

Observ.

Observ. 420.

Conjecturis autem) Non nunc demum opus est conjecturis, sed hæ ubique requiruntur, tota enim interpretatio, conjecturalis est! Interim Autor si explicari debet, ut accipiatur de conjecturis, quæ ex circumstantiis, extra verba occurrentibus, desumuntur, hoc enim contextus exigit *add. d. c. 12. §. 5. 6.*

Observ. 421.

Nam ubi certa & manifesta) Hoc regulariter verum est, nam aliquando prior voluntas, etiam posteriori præfertur, si scilicet constet, majori cum curâ illam, quam hanc esse conceptam, sic primæ, investituræ literæ, posteribus regulariter præferuntur.

§. 5. Conjecturæ voluntatis, rectique sensus in sermone ambiguo aut intricato petuntur potissimum *ex substrata materia, ex effectu, & conjunctis.* Circa materiam hæc est regula verba regulariter sunt intelligenda secundum substratam materiam. Nam semper illi, quo locutus est, materia, de qua sermo institutus est, ob oculos versari præsumitur, ideoque semper ad eandem sententia verborum attemperanda.

Observ. 422.

Conjectura voluntatis] Extra verba igitur, variæ circumstantiæ occurrere possunt & solent, ex quibus voluntatem conijcere liceat, potiores Autor indicat. Eo pertinet scilicet (1) *substrata*

strata materia §. 5. *b. add. d. c. 12. §. 7.* Thomas.
J. J. D. l. 2. c. 11. §. 49. seqq.

§. 6. De *effectu & consequentibus* hæc est regula: Ubi verba crude & simpliciter accepta vel nullum, vel absurdum aliquem effectum post se essent tractura, à receptiore sensu paulisper deflectendum, quatenus nullitatis aut absurditatis vitandæ necessitas requirit.

Observ. 423.

De effectu) Deinde eo spectant (2) *Effectus & consequentia* §. 6. *b. add. c. 12. §. 8.* hæ circumstantiæ ostendunt, quam interpretationem facere non liceat, sed eo ipso quoque verum legis aliisve actûs sensum innuunt.

§. 7. Ex *conjunctis* validissimæ sumuntur conjecturæ; quia regulariter quilibet sibi constare præsumitur. *Conjuncta* sunt vel *loco*, vel *tantum origine*. De prioribus hæc est regula: si sensus in ejusdem sermonis loco aliquo plane & perspicue sit expressus, obscuriores locutiones ex illis planis sunt interpretandæ. Cui vicina est altera: In omni sermone interpretando accurate ad antecedentia & consequentia est attendendum, quibus interjecta attemperari & respondere præsumuntur. De posterioribus autem ista habetur regula: Unius & ejusdem hominis obscurum dictum interpretandum est ex ipsius dictis

dictis clarioribus, licet alio tempore & loco prolatis; nisi manifeste adpareat, ipsum sententiam mutasse.

Observ. 424.

Ex conjunctis) Non minus eò pertinent (3) Con-
juncta ve origine & loco simul, vel origine tantum
seu clarius, voluntas aut sententia jam proposita,
hanc enim si cum alia sententia dubia confe-
ras, hujus sensum eo rectius intelligere licebit
§. 7. b. add. d. c. 12. §. 9.

§. 8. Plurimum quoque prodest ad ve-
rum sensum investigandum, in legibus cum-
primis, inspicere *rationem legis*, seu causam
& respectum illum, qui ad legem ferendam
latorem moverit; imprimis ubi constat, uni-
cam eam legis rationem fuisse. De qua hæc re-
gula est: Illa interpretatio legis est sequenda,
quæ rationi legis congruit; & contra rejici-
enda, quæ ab eadem discrepat. Item, ces-
sante ratione legis unica & adæquata, cessat
ipsa lex. Verum ubi plures ejusdem legis
fuerint rationes, non statim una cessante tota
lex cessat; cum reliquæ rationes ad ejus vim
sustinendam sufficere possint. Sæpe quoque
sola voluntas legislatoris sufficit, ut ratio le-
gis subjectos lateat.

Observ. 425.

Plurimum quoque prodest) Inprimis attendenda
est

est[4] *Ratio legis vel aliūs actūs*, à qua affirmative & negative argumentari licebit, modo illa sit *vera & adequata*, de quo caute, in subsidium vocatà historià, judicandum §. 8. *b. add. d. c. 12. §. 10.* Porro eò referri Possunt (5) *personæ affectio* (6) *conditio*, & si quæ aliæ ejus generis circumstantiæ adhuc occurrunt *conf. Thomas. d. c. 11. §. 63. seqq.*

Observ. 426.

Sæpe quoque sola voluntas) Hæc recte quidem dicuntur, sed præter scopum, jam enim non agitur de legis *autoritate*, quæ semper salva est, si subditi ejus rationem sciant, sive ignorent, sed *sententia*, ad hanc intelligendam opus utique est, ut legis ratio sit manifesta.

§. 9. Observandum præterea est, multa vocabula habere plures una *significationes*, alteram *laxiorem*, alteram *strictiorem*. Sed & aliam *materiam* esse *favorabilem*, aliam *odiosam*, aliam *mixtam*. *Favorabile* est, quod utriusque partis æqualem facit conditionem, quod communem utilitatem spectat, quod actus quoslibet conservat, quod pacem promovet. &c. *Odiosum* est, quod unam duntaxat partem, aut unam magis quam alteram gravat, quod pœnam in se continet, quod actam reddit irritum, aut priora immutat, quod bellum promovet. *Mixtum* est, v. g. si quod priora quidem immutat, sed pacis tamen causa,

fa. De istis hæc est regula: Favorabilia latius, odiosa strictius interpretanda.

Observ. 427.

Observandum præterea) Hæc etiam observatio add. d. l. 5. c. 12. §. n. alieno loco posita est, de verborum enim ambiguitate, aliisque obscuritatis causis, agi debet, quando interpretationis conceptus in genere evolvitur, secundum nota Obs. 416. n. 3.

Observ. 428.

Sed & aliam materiam esse favorabilem) Materia subtrata inter fundamenta eruendæ voluntatis dubiæ, recte admittitur, sed illa doctrina, quæ specialius *materia qualitatem*, favorabilis illa sit, an odiosa, inculcat, cui Autor post Grotrium *h. & d. e. 12. §. 12.* etiam indulget, nullius momenti & usus censi debet; nam omnia negotia licita (qualia hic omnino supponi debent) sunt naturâ sua velut indifferentia, nec odiosa nec favorabilia, hinc etiam definitiones, quæ hic afferuntur, vel præcariæ sunt, ac eadem facilitate possunt rejici, qua afferuntur, vel etiam sibi contradicunt; v. gr. favorabile est, *quod communem spectat utilitatem*, odiosum, *quod pœnam in se continet*, ergo idem simul erit favorabile & odiosum, cum tralatitium sit, quod pœnarum impositio, communem spectet utilitatem!

Observ. 429.

De istis hæc est regula) Sed eam esse nasum cereum, ac nullius usus, ex præmissis ultrò consequi-

quitur (1) non datur certa favorabilis & odiosa definitio, hinc etiam hoc fundamento, in eruenda voluntate dubia niti non possumus (2) In exemplis, quæ illustrandæ regulæ *d. l. 5. c. 12. §. 13. 14. 15. 16.* afferuntur, si vera sit interpretatio, vel *committitur fallacia causæ*, dum interpretationi, quæ a proprietate verborum, ratione actus, vel simili causa dependet, odium aut favor frustra prætexitur, vel *plane contra regulam sit interpretatio* v. gr. conventum est inter vicinos, ut alter in alterius fundo venari possit quaslibet feras, ut tamen cervi sint excepti, quæritur, an sub cervis etiam cervæ comprehendantur? Affirmatur hoc *d. c. 12. §. 13.* quia negotium bilaterale, velut favorabile, late explicandum, Sed subest fallacia causæ, vera enim ratio factæ interpretationis, est a proprietate vocabuli, imo interpretatio illa regulam evertit, nam clausula: *quod cervi excepti esse debeant*, priora immutabat, adeoque, velut odiosa, stricte de solis cervis, generis masculini erat accipienda! Aliud exemplum *d. c. 12. §. 15.* proponitur. Inter Romanos & Carthaginienses foedus erat initum, *ne Carthaginienses bellum in Africa, neve extra Africam, injussu populi Romani gererent*, quæritur, an hoc etiam de bello defensivo sit intelligendum? recte hoc negat Autor *d. l.* sed frustra putat hoc à favore negotii fluere, cum ex *scopo* foederis id probabiliter colligatur, ceu ipse *d. l.* verbis: *suadet quoque hanc,*
agno-

agnoscit, imò cum foedus illud pacem promoveat, adeoque juxta datam definitionem, favorabile sit, videbatur potius late etiam de bello defensivo explicandum esse! *add.* Thomas. *J. J. D. I. 2. c. II. §. 159. seqq.*

2. Cæterum hætenus dicta eò saltem pertinent, quod in negotiis licitis, *favor aut odium naturale*, quod per naturam velut ei insit, non datur, *adventitium* verò, quod ab affectu Legislatoris, vel paciscentium aut testantium dependeat, non negamus. Sic in jure Romano libertas ac dos, res favorabilis esse perhibetur, sicut vice versa, secundæ nuptiæ, apud multos erant odiosæ, in his autem exemplis non opus est, ut in interpretanda voluntate, favorem vel odium allegemus, cum rectius ad *affectum* eorum, à quibus actus dependet, provocemus.

§. 10. Dantur quoque conjecturæ aliunde, quam ex verbis ortæ, quæ efficiunt, ut *interpretatio* quandoque sit *extendenda*, quandoque *coarctanda*. Etsi facilius dentur rationes, quæ suadeant interpretationem coarctari, quam extendi. Potest igitur lex ad casum, qui in lege non exprimitur, extendi, si constet, rationem, quæ in illum casum quadrat, unicam fuisse, quæ legislatorem moverit, eamque ab ipso consideratam fuisse in sua generalitate, & ut æquipollentes quoque casus complecteretur.

retur. Sed & extendi lex debet ad illos casus, qui in fraudem legis ab hominibus prave solertibus inveniuntur.

Observ. 430.

Dantur quoque conjectura aliunde, quam ex verbis orta) Sed hætenus memoratæ conjecturæ, ex verbis non sunt ortæ, verum à substrata materiâ similibusque circumstantiis dependent! Autoris sententia eo tendit, conjecturas hætenus fuisse occupatas circa sententiam legis vel pacti, ex verbis declarandam, nunc ad illam extendendam vel restringendam, illas quoque referri *vid. d. c. 12. §. 17.*

Observ. 431.

Et si facilius dentur rationes) Referuntur hæc *d. §. 17.* cæterum in hac comparatione, nulla utilitas sita est, sufficit, si intelligas, causas, ob quas lex vel extendenda vel restringenda sit.

Observ. 432.

Potest igitur lex) Extensio legis ob varias causas sæpe tamen ob rationem legis aliûsve actûs fit, quo sensu accipienda doctrina Autoris *b.* quemadmodum etiam ut plurimum leges prohibitivæ extendi debent, cum salvis verbis, earum sententiam, circumvenire soleant homines prave solertes *vid. d. c. 12. §. 17. 18. add. Thom. J. J. D. l. 2. c. 11. §. 85. seqq.*

§. II. Ut autem verba generaliter posita *restringantur*, contingit aut ex defectu voluntatis originario, aut ex casus emergentis cum
volun-

voluntate repugnantia. Quod aliquis ab initio, quid noluisse præsumatur, intelligitur 1. *ex absurdo*, quod alias inde sequeretur, id quod nemo sanus voluisse judicatur. Inde verba generalia sunt restringenda, in quantum alias absurditas inde erat emerfura. 2. *Ex defectu rationis*, quæ unice ipsius voluntatem movit. Inde sub generali locutione non comprehenduntur casus, in quos ratio legis unica & adæqvata non quadrat. 3. *ex defectu materiae*, de qua semper is, qui loquitur, cogitasse censetur. Inde & ad eandem verba generalia semper sunt attemperanda.

Observ. 433.

Ut autem verba generaliter posita) Duplex adhibenda restrictionis causa generalis esse perhibetur [1] *si voluntas originarie deficiat* i. e. certum aliquem casum ab initio statim non comprehendat (2) *si casus emergens cum voluntate pugnet* i. e. sub eadem non contineatur *add. d. c. 12. §. 19.* sed ita statim liquet, inter duas illas causas non esse justam oppositionem, sed eas potius coincidere, nam si voluntas originarie deficit, causas emergens non potest non ab eâ abire.

Observ. 434.

Quod aliquis ab initio quid noluisse) Defectum voluntatis ex triplici fundamento colligi posse censet Autor *b. & d. c. 12. §. 19. 20.* sed illa so-

lum, exempli loco, assumenda sunt, nam ex *affectu* aut *conditione* personæ, aliisque circumstantiis itidem voluntatem deficientem colligere licebit.

§. 12. Quod autem casus, qui postea emergit, cum voluntate ejus, qui aliquid constituit, pugnet; id deprehenditur vel *ex naturali ratione*, vel *ex aliquo signo voluntatis*. Prius contingit, si ab æquitate foret discedendum, nisi certi casus ab generali lege eximerentur. Est quippe *æquitas* correctio ejus, in quo lex deficit ob universalitatem. Quia enim non omnes casus prævideri, nec ob infinitam varietatem exprimi possunt; ideo quando generalia verba ad speciales casus sunt adplicanda, eximendi sunt illi casus, quos exempturus fuerat ipse legislator, si super tali casu consultus fuisset. Ad isthanc tamen æquitatem decurrere non licet, nisi sufficientia indicia subigant. Inter quæ certissimum est, si adpareat, violatum iri legem naturalem, ubi presse quis literam legis humanæ sequi velit. Proximum ab hoc, si non quidem illicitum sit verba legis sequi; sed tamen rem humaniter æstimanti id nimis videatur grave & intolerabile, sive in universum omnibus hominibus, sive certis personis; aut si finis tanti non videatur, qui tam care sit redimendus.

Obsev.

Observ. 435.

Quod autem casus) Uti Autor non rectè fecit duas adhibendæ restrictionis causas, cum saltem unica sit, ita falsæ doctrinæ, hic & *d. c. 12. §. 21.* addit aliam ambiguum, nam interpretandi principia, quæ laudantur, generalia sunt, ac ad omnem interpretationem pertinent, utique enim omnis interpretatio fit per *naturalem rationem*, ac ex *aliquo signo voluntatis* i.e. circumstantia voluntatem indicante!

Observ. 436.

Prius contingit) Aliis verbis repetitur, quod §. II. n. 1. jam dictum est, nam restrictio, quæ inculcatur, ab *absurdo*, quod ea omissa, secuturum esset, desumitur.

Observ. 437.

Est quippe æquitas) Ita etiam docet Autor *l. 5. c. 12. §. 21.* & jam supra *c. 2. §. 10. b. tr.* ita docuit. Verum accurate loquendo, æquitas & interpretatio restrictiva plane differunt, illa est dictamen juris naturalis, hæc actus mentis & species ratiocinationis, præterea nec hoc Autori concedendum, quasi circa solam interpretationem restrictivam, æquitas occurrat, cum hæc potius omnem interpretationem dirigat
add. Observ. 62.

Observ. 438.

Proximum ab hoc) Quæ hic & *d. l. 5. c. 12. §. 22.* inculcantur, etiam sunt jam proposita §. II. n. 2. 3. *b.* nimis enim manifestum est, quod restrictio,

ctio, ex consideratione *rationis* & *materie*, de-
sumatur.

2. Poterit igitur omnis res breviter & perspicue sic proponi. Restrictione opus est, quoties deficit voluntas, defectum autem illum ex consuetis interpretandi fundamentis, inter quæ tria illa, quæ §. II. b. laudantur, utique occurrunt, colligimus.
3. Autor, dum nimis secure Grotium sequitur, in modo docendi varie impingit (1) facit duas adhibendæ restrictionis causas, cum saltem unica sit (2) tria adducit interpretandi fundamenta, cum tamen plura dentur (3) eandem rem, sub novis saltem, iisque ambiguis terminis, repetit (4) æquitatem, cum interpretatione restrictiva, vel confundit, vel illam huic soli adjungit.

§. 13. Denique & ab universali locutione facienda est exceptio, si verba alio loco posita cum præsentī lege aut pacto non quidem directe pugnant; sed propter certam temporis circumstantiam heic & nunc simul observari nequeunt. Heic igitur certæ sunt observandæ regulæ, ut intelligi possit, *quanam lex in eo casu, ubi utrique simul satisfieri nequit, præferri debeat.* 1. Id quod permittitur tantum, cedit ei, quod jubetur. 2. Quod faciendum est certo tempore, præfertur ei, quod quovis tempore fieri potest. 3. Affirmativum præceptum

ceptum cedit negativo; seu quando præcepto affirmativo satisfieri nequit, nisi violato præcepto negativo, istius impletio erit in præsens omittenda. 4. Inter conventiones, legesq; cætera æquales, peculiaris præfertur generali. 5. Inter duas præstationes, certo temporis articulo invicem collisas, quarum una causas magis honestas aut utiles, quam altera habet, hanc isti cedere par fuerit. 6. Injuratum paulum cedit jurato, quando utrique simul satisfieri nequit. 7. Obligationi perfectæ cedit imperfecta. 8. Lex beneficentiæ, cæteris paribus, cedit legi gratitudinis.

Observ. 439.

Denique & ab universali locutione) Aliquando duplex sententia inter se *apparenter* pugnat, tum ex consuetis interpretandi principiis explicatio genuina facienda est, aliquando autem *vere* sibi invicem contrariatur, tum si contrarietas sit *absoluta*, obtinet regula §. 4. *h. add.* *Observ.* 421. si autem *certo respectu* saltem occurrat, ex *materia substrata* præcipuè judicandum, utra alteri sit præferenda.

Observ. 440.

Heic igitur certæ sunt observandæ regulæ) Ad illud fundamentum collimant regulæ hic laudatæ ampliusque illustratæ l. 5. c. 12. §. 23. sed ex iis quædam bene se habent, aliæ falsæ sunt, quædam à scopo abludunt.

Observ. 441.

Id quod permittitur) Hæc regula est nullius momenti, verum quidem est, quod permissio cedat jussui, sed si hic specialis, illa verò generalis sit, hinc si rem invertas, permissio specialis prævalebit jussui generali, ut facile liqueat, ex specialitate, & generalitate, non jussu & permissione, prærogativam esse judicandam.

Observ. 442.

Quod faciendum est certa tempore) Hæc regula recte se habet, nam ex materiâ apparet, quod specialia generalibus sint præferenda.

Observ. 443.

Affirmativum præceptum) Hæc regula, si accipiat de præceptis naturalibus, vera quidem est, sed à scopo abludit, quia de interpretatione juris naturalis, jam non agitur, si vero de legibus positivis eo sensu exaudiatur, prohibitionem præferri jussui, tum falsa vel ambigua est, nam omnis prærogativa hic iterum à specialitate desumenda est, hinc prout illa vel circa prohibitionem, vel jussum occurrit, ita nunc illa, nunc hic potior erit.

Observ. 444.

Inter conventiones) Quarta hæc regula, ut &, quæ sequitur, quinta, admitti debent, nam specialia generalibus, magis necessaria minus necessariis, præferri debere, materia substrata evidenter insinuat.

Observ.


Observ. 445.

Injuratum pactum) Hæc etiam regula ad falsas referri debet, nam si pacta sint contraria, tum posterius priori erit præferendum, sive juratum sive injuratum fuerit. Si autem sint diversa, tum speciale prævalebit. Videtur regula ex falsis hypothesebus, quibus jusjurandum, peculiarem obligationem producere, vel singularem interpretationem postulare existimatur habere originem.

Observ. 446.

Obligationem perfectæ) Hæc & sequens regula admitti quidem potest, sed pertinet ad jus naturale, de cujus interpretatione jam non agitur.

2. Verbo etiam attingenda hîc est *Legum applicatio*, quæ ab interpretatione in eo discernitur, quod hæc pertineat ad *legis sensum intelligendum*, adeoque ad *scholas* potissimum spectet, ille verò, præsuppositâ sensus cognitione, de *facti evenientis moralitate* sit sollicita, atque ita ad *forum* respiciat. De cætero totum applicationis negotium, his regulis dirigitur (1) ad illud tantum respice, de cujus moralitate quæritur (2) genus legum applicandarum recte elige, ac legem controversiæ propriam inde sume (3) quo applicatio rite procedat, omnes facti circumstantias accurate expende. Hæc plana sunt, eademque cuivis Ratio facilè insinuat, ignaris tamen hic etiam via præmonstranda est.



SAMUELIS PUFENDORFII

DE

OFFICIO HOMINIS ET CIVIS

LIBER SECUNDUS.

CAPUT I.

DE STATU HOMINUM
NATURALI.

§. I.

Proximum est, ut inquiremus de illis *officiis*, quæ homini obeunda incumbunt *ex diverso statu*, in quo in vita communi degereprehenditur. Vocamus autem *statum* in genere illam conditionem, in qua homines constituti intelliguntur ad certum genus actionum obeundum. Quem etiam peculiaria fere jura comitantur.

Observ.

Observ. 447.

Proximum est) Hanc connexionem minus probam esse, nec alia præcepta ac officia, à præcedentibus distincta, nunc inculcari, jam *Observ. 241.* diximus. Interim ambigua illa connectendi ratio, aliquam peperit confusionem, nam generalis de statu philosophia, quæ §. 1. 2. 3. 4. 5. 6. 7. proponitur, ad explicationem legis naturalis pertinet *vid. Observ. 79. n. 8.* comparatio autem status naturalis & civilis, quæ §. 8. *seqq.* habetur, ad materiam Civitatis referri debebat.

Observ. 448.

Vocamus autem statum) De hoc diximus *d. Observ. 79. n. 8.* Nimirum sicut homines *habitu* aliquo *physico* gaudent, ita natura & factum proprium, ipsis etiam *habitum* aliquem *moralem*, juxta quem actiones, ex legis naturalis præscripto, sint instituendæ, velut circumposuit. Porro sicut habitus ille *physicus*, *spatium* aliquod requirit, ita homines, ob *moralem* habitum seu dispositionem, in aliquo velut *spatio morali* concipiuntur, quod *status* nomine venit. Ita hujus indoles proprie concipienda est, sed sæpe illa accuratio negligitur, ac status & Dispositio seu Conditio, promiscue accipiuntur.

§. 2. *Status* hominum est vel *naturalis*, vel *adventitius*. *Naturalis* triplici modo considerari, solo prælucente rationis lumine, potest, vel in ordine *ad Deum Creatorem*, vel in ordine

ordine singulorum hominum ad seipsos, vel in ordine ad alios homines.

Observ. 449.

Status hominum est vel naturalis vel adventitius)

In illo per naturam homines existunt, in hoc propria voluntate constituuntur, de quo

Observ. 78. 79. pluribus actum. Illud hic ob-

servandum, quod sub statu naturali contineatur (1) status humanitatis (2) sexus, [3] reli-

giosis [4] Philantropiæ [5] Socialitatis &

[6] æqualitatis. Juxta quinque priores signi-

ficatus, status naturalis opponitur adventi-

tio, saltem ut *rei diversæ*, hinc cum eo con-

currit, juxta ultimum verò, ut *rei contrariæ*,

hinc per adventitium specialiter & generali-

ter, pro ratione facti præcedentis, tollitur.

Observ. 450.

Naturalis triplici modo considerari) Sed triplicis illi-

us considerationis, prout hic instituitur, nul-

lus est usus, quin causatur illa potius assertio-

nes falsas aut otiosas, dum connexa divellit,

ac non necessaria comminiscitur, ceu mox di-

stinctio apparebit, quamvis alias, juxta verum

sensum, diversa illa consideratio non male

instituitur, ceu ex iis, quæ *Observ.* 78. diximus,

colligi potest.

§. 3. *Priori modo* consideratus naturalis

status hominis est illa conditio, in qua à

Creatore est constitutus, dum eximium præ

cæteris animal eundem esse voluit. Ex quo

statu

statu fuit, quod homo debeat autorem sui agnoscere, colere, & ipsius opera admirari; ac diversa plane ratione à brutis vitam suam exigere. Inde & ei statui *opponitur vita & conditio brutorum.*

Observ. 451.

Priori modo consideratus) Status naturalis in ordine ad Deum, censetur esse *humanitatis*, ac opponi *conditioni brutorum*, quæ rectè quidem dicuntur, sed non rectè, huic respectui ille status vindicatur, nam homo etiam in statu humanitatis concipiendus est, si ad seipsum & alios referatur, rectius igitur homo, in ordine ad Deum, in statu *religiositatis* concipitur.

§. 4. *Altero modo* statum hominis naturalem considerare possumus, si animo fingamus, qualis ejusdem conditio futura esset, si quilibet sibi soli relictus foret sine ullo adminiculo ab aliis hominibus accedente, & quidem posita illa naturæ humanæ conditione, qualis jam deprehenditur. Quæ sane miserior, quam cujusvis belluæ videtur futura fuisse, si expendatur, quanta cum debilitate in hunc mundum jam egrediatur homo, periturus statim sine aliorum auxilio: & quam rudem sit vitam idem exacturus, si nihil aliud: cuique adesset, quam quod propriis viribus; ingenioque debeat. Quin potius quod ex tanta imbecillitate adolescere potuimus, quod
infi..

in finitis jam commoditatibus fruamur, quod animum corpusque in nostrum & aliorum usum excoluimus, id omne ab auxilio aliorum hominum provenit. Et in hoc sensu status naturalis *opponitur vitæ per industriam hominum exulta.*

Observ. 452.

Altero modo) In ordine ad hominem ipsum, status naturalis perhibetur esse *solitudinis*, *add. l. 2. c. 2. §. 1. 2.* Verum licet ille status fingi, imo aliquando revera existere possit, attamen uti illa fictio, ad explicandum juris naturalis fundamentum nihil omnino confert, ceu *Observ. 78. n. II.* ostendimus, ita, cum Deus hominem destinaverit ad socialitatem, adeoque, ex intentione Dei, status naturalis, sit socialis, oppido *ἀκύρωτος* status solitudinis, naturalis esse dicitur, cum potius sit præternaturalis. Rectius hominem, in ordine ad seipsum, in statu *Philautiæ temperatæ* conceperis.

§. 5. *Tertio modo* statum hominis naturalem consideramus, prout intelliguntur homines sese invicem habere ex nuda illa & communi cognatione, quæ ex similitudine naturæ resultat ante pactum aliquod aut factum humanum, quo peculiariter unus alteri redditus fuit obstrictus. Quo sensu in statu naturali invicem vivere dicuntur, qui neque communem habent dominum, & quorum unus alteri
non

non est subjectus, quique inter se neque beneficio neque injuria sunt cogniti. Quo sensu status naturalis *opponitur statui civili.*

Observ. 453.

Tertio modo statum) In ordine ad alios homines, status naturalis, *æqualitatis* esse censetur, quod recte quidem dicitur, sed reliqua status naturalis facies, quod scilicet sit, *humanitatis, sexus & socialitatis*, alios etiam homines respicit, quod implicite hic negari videtur, præterea status ille æqualitatis, non *civili* tantum, ut Autor censet, sed generalius potius, *adventitio*, sub quo civilis, velut species exstantior, continetur, opponitur. Denique oppositionis modus, quod naturalis adventitio hic ut rei contrariæ, opponatur, merito quoque indicari debuisset.

§. 6. Hujus porro naturalis status indoles considerari potest vel prout *per fictionem* representatur, vel prout *revera* existit. Prius fit, si vel concipiamus ab initio aliquam multitudinem hominum simul extitisse sine ulla unius ab altero dependentia; uti de Cadmaïs fratribus in fabulis est: vel si fingamus, totum genus humanum jam ita dissolutum esse, ut quilibet seipsum seorsim gubernaret, & nemo ulli alio esset vinculo conjunctus, quam similitudine naturæ. Sed status naturalis, qui revera existit, id habet, ut quis cum
aliqvi-

aliquibus hominibus peculiari societate jungatur; cum reliquis autem omnibus nihil præter speciem humanam obtineat commune, nec alio nomine quidquam ipsis debeat. Qualis status jam inter diversas civitates ac cives diversarum rerum publicarum existit, & quondam inter patresfamilias segreges obtinebat.

§. 7. Manifestum quippe est universum genus humanum nunquam simul & semel in statu naturali extitisse. Qui enim ex protoplastis geniti erant, ex quibus quidquid est, mortalium originem ducit, prout divinæ tradunt scripturæ, eidem potestati patriæ subjecti erant. Neque tamen eo minus postea status hicce naturalis inter quosdam homines emerfit. Nam primi mortalium, ut orbem adhuc vastum implerent, & laxiorem sibi suisque pecoribus habitationem quærerent, relictis laribus paternis in diversa discesserunt, suamque sibi fere singuli mares familiam constituerunt. Inter quorum posteros itidem sese dispergentes, peculiare cognationis vinculum, & ortus inde affectus, paulatim exolevit, & commune tantum illud, ex similitudine naturæ resultans, remansit. Donec postea, cum genus humanum insigniter fuisset multiplicatum, deprehensis vitæ segregis in-

incommodis, paulatim proximi quique cohabitantes in civitates coivere, minores primo, dein majores, ex pluribus minoribus ultro aut per vim coalitis. Quas inter civitates utpote nullo alio, quam communis humanitatis vinculo junctas, status naturalis utique existit.

Observ. 454.

Hujus porro naturalis status) Universaliter & absolute status naturalis inter homines revera non existit, sed tantum per fictionem repræsentatur, cujus quidem fictionis, in explicanda Officiorum diversitate, ac Civitatum origine, aliqua est utilitas; Particulariter vero aut temperatè status naturalis existere potest & solet, quod amplius §. 6. 7. b. ostenditur, add. l. 2. c. 2. §. 4.

§. 8. Eorum autem, qui in statu naturali vivunt, hoc est præcipuum *jus*, quod nemini præterquam Deo sint subjecti, atque obnoxii. Quo respectu etiam ille status nomine *libertatis naturalis* venit; per quam quilibet citra antegressum factum humanum sui juris potestatisque, ac nullius hominis imperio subjectus esse intelligitur. Quo ipso etiam quivis cuiusvis alteri, cui neque ipse subjectus est, neque eundem sibi subjectum habet, *æqualis* censetur. Cum porro homini lumen rationis sit insitum, quo prælu-

cente actiones suas temperare possit; consequitur, quemlibet, qui in naturali libertate vivit, in regundis suis actionibus à nullo mortalium dependere; sed ex proprio judicio atque arbitrio omnia, quæ sanæ rationi congruunt, agendi habere potestatem. Et cum homo ob communem inclinationem omnibus animantibus insitam non possit non ad conservationem sui corporis vitæque nec non ad dispellenda ea, quæ eandem destruere videntur, omnibus modis incumbere, mediaque ad eum finem adhibere; & vero in statu naturali nemo habeat alterum hominem superiorem, cui voluntatem judiciumque suum submiserit, inde in eo statu quilibet ex proprio judicio definit de aptitudine mediorum, an ad conservationem sui conducant, nec ne. Nam si vel maxime alterius consilium audiat, penes ipsum tamen est, an velit alienum consilium probare vel non. Ut tamen isthæc propria sui gubernatio recte sese habeat, requiritur, ut ea juxta dictamen rectæ rationis, legemque naturalem suscipiatur.

Observ. 455.

Eorum autem) Hoc facile liquet, in statu naturali summam esse libertatem & æqualitatem, non tamen omnimodam, cum utique leges natu-

naturales multa, etiam in hoc statu, exigant, atque hac restrictione, absurdam Hobbesii sententiam, recte correxit Autor *b. & l. 2. c. 2. §. 3.* Cæterum libertas, summa dicitur quoad singulos, nam alias Imperantis libertas, in statu civili, longe major est, propter plura objecta, circa quæ illa versatur.

§. 9. Status naturalis, utut libertatis nomine, & immunitatis ab omni subjectione insigniter blandiatur; idem tamen antequam ab hominibus in civitates fuerit concessum, plurima habet adjuncta *incommoda*; sive fingamus, omnes & singulos in eo existere, sive consideremus conditionem patrumfamilias segregum. Nam si animo concipias hominem etiam adulta ætate in hoc mundo destitutum solum, & sine omnibus commodis & adminiculis, quibus vitam cultiorem & molliorem reddidit solertia hominum; videbis animal nudum, mutum, inops, famem radicibus & herbis, sitim obvia aqua, injurias aëris antris utcunque dispellens, feris bestiis expositum, & ad cujusvis occursum pavidum. Paulo cultior vita potuit esse inter eos, qui in familiis se gregibus degebant. Sed quæ tamen cum vita civili nullo modo comparari poterat, non tam ob indigentiam, quam inter coërcitas cupiditates familia sic satis videtur

posse dispellere, quam quod securitati parum ibi sit consultum. Et ut in pauca rem conferamus, in statu naturali quisque propriis tantum viribus protegitur; in civitate omnium: ibi fructus ab industria sua nemini certus; heic omnibus: ibi imperium affectuum, bellum, metus, paupertas, foeditas, solitudo, barbaries, ignorantia, feritas: heic imperium rationis, pax, securitas, divitiæ, ornatus, societas, elegantia, scientiæ, benevolentia.

Observ. 456.

Status naturalis, utut libertatis nomine) Instituitur comparatio status naturalis & civilis, Ille hōc libertate præstat, sed hic vice versa variis commodis gaudet, quæ ab illo exulant. Cæterum assertio illa non penitus quidem rejicienda est, parum apte tamen hic deducitur & probatur.

Observ. 457.

Nam si animo concipias) Primum argumentum, quo incommoda status naturalis probantur, desumitur à *solitudine*. Sed illa solitudo saltem fingitur, revera autem non existit, nisi aliquando inter paucos homines & ad breve tempus, nam alias statum naturalem esse sociale, manifestum est, ac ab ipsomet Autore, contra dissentientes adstruitur *L. 2. c. 2. §. 5. in fin.* Utut igitur ex hypothese solitudinis, statum

tum naturalem, miserum dicere liceat, attamen cum præsuppositum saltem fingatur, nec id, quod inde elicitur, vere adesse potest.

Observ. 458.

Paulo cultior) Alterum argumentum petitur à *ruditate & securitatis defectu*. Enimverò quod ultimum attinet, gratis omninò tantus metus in status naturali asseritur, cui ab hominibus, per familias distributis, non potuerit occurrere, id quod c. 5. pluribus ostendam. Primum verò quod concernit, observandum est, quod vita exculta, vel elegantia & splendor conversationis civilis in civitatibus non ubique occurrat, sed tantum in urbibus magnis & populosis hinc generaliter statui civili, præ naturali, prærogativa tribui nequit, præterea observandum, quod sæpe vita simplex, candida, doli & fuci expers, nomine vitæ inexcultæ aut barbaræ traducatur, vanitas vero, stultitia ac fucata malitia, pro morum elegantia habeatur, ut hætenus status civilis, naturali non valde præstare videatur!

Observ. 459.

Et ut in pauca rem conferamus) Non in summam hætenus dicta contrahuntur, sed potius, comparatio longe largior, inter statum naturalem & civilem, nunc instituitur. Sed dum Autor philosophiam Hobbesii *de civ. c. 10. §. 1.* secure nimis sequitur, & veritati & sibi ipsi quodammodo obloquitur, videamus distinctius!

De 3

Observ.

Observ. 460.

In statu naturali quisque propriis tantum viribus protegitur, in civitate, omnium) Sed cur non liceat in statu naturali pacta quoad mutuam defensionem inire? sic sane defensio viribus conjunctis fiet, & licet illa cum defensione, quam civitas bene composita præstare apta est, conferri nequeat, attamen illa repellendis malis, quæ in statu naturali, ante exortas civitates, occurre possunt, sufficit, præterea id etiam observari meretur, quod in civitatibus sæpe omnium viribus singuli opprimantur, quod malum in statu naturali haut metuendum.

Observ. 461.

Ibi fructus ab industria sua nemini certus, heic omnibus) Sed utrumque probandum erit! In statu naturali sæpe securius industriæ suæ fructu quis gaudet, quam civili, in quo non raro per malos Imperantes, ad sanguinem usque, miseri subditi exhauriuntur. Percurramus cætera, inspersâ brevi paraphrasi: *Ibi imperium affectuum* [pravos affectus in statu naturali non penitus esse cessaturos, ex indole hominum facile intelligitur, sed quod ibi sit imperium affectuum, i. e. affectus ibi in summo gradu dominantur, nec tam pravi in statu civili occurrant, illud utique gratis dicitur] *bellum* [sed ex accidenti, nec tam grave sicut exortis civitatibus geri solet, nam statum naturalem, non esse hostilem, sed socialem, ex genuinis aff.

principiis certum est, ac ab ipso Autore §. II. b. asseritur latiusque contra ineptas Hobbesii strophos, deducitur l. 2. c. 2. §. 5. seqq.) *metus* (sed suppetunt etiam media illum reprimendi, præterea, exortis civitatibus, major metuendi causa existit) *paupertas* [quoad ignavos aut prodigos, nam labore & parsimoniâ, necessaria vitæ adminicula facile parari & conservari poterunt) *fœditas, solitudo, barbaries, ignorantia, feritas* (hæc ex falsa Hobbesii hypothesi, qua status naturalis, hostilis esse contenditur, fluunt, qua negata, consuetudina quoque cessant, quin' interim ex accidenti, illa incommoda statum naturalem infestare possint & soleant, non negatur, sed nec eadem à statu civili penitus absunt) *heic imperium rationis* (hoc scilicet ambitionis, avaritiæ, voluptatis, iniustitiæ ac inhumanitatis monstra, quæ in aulis dominari solent, ac inde in subditos quoque, maximam partem, deveniunt, ostendunt!) *pax, securitas* (hoc ex horrendis persecutionibus, quas nonnunquam subditi patiuntur, ex bellis crudeliter gestis intelligitur!) *divitiæ* [de quibus innumerus mendicorum numerus, subditique ad sanguinem usque exhausti, testantur!] *ornatus, societas, elegantia, scientiæ, benevolentia*, sed his nomibus sæpe vanitatem & stultitiam, pedantismum, prævios affectus ac subtiles fallendi artes regi, certum est, si quid autem boni iis inest, id à statu naturali etiam non penitus exulat.

2. Hactenus igitur comparatio status naturalis & civilis, non satis recte vel instituta, vel explicata videtur. Rectius forsitan eam juxta triplicem quæstionem expedies (1) *qualis tam naturalis quam civilis status, ex intentione Dei, esse debeat?* uterque socialis & felix (2) *qualis juxta malitiam humanam esse soleat?* uterque infocialis & infelix (3) *qualis per media humana esse queat?* heic fatendum est, quod civis, magis socialis & felicior esse possit naturali, cum per imperium civile, malitia humana efficacius reprimi, ac adeo socialitas conservari & felicitas promoveriqueat. Sed illa vera sunt, si legitimus imperii civilis sit usus, si verò ejus occurrat abusus, qui sane frequentissimus est, tum status civilis, naturali longe infelicior censeri debet, quod tot bella, calamitates & vitia, ex abusu illo provenientia, ac à statu naturali abfutura, satis demonstrant.

§. 10. In statu porro naturali, si vel quis alteri ultro non præstet, quæ ex pacto debet, aut si injuriam intulit, aut si alias controversiæ quid oriatur.; nemo est, qui pro imperio alterum ad præstandum debitum, reparandamvè injuriam adigere, litemque decidere possit; uti in civitatibus, ubi judicis communis auxilium implorare datur. Quia tamen non ob quamvis causam natura in bellum ruere permittit, etiam ubi quis de justitia suæ

sux causæ ampliter sit persuasus: igitur prius tentandum, num molliori via res possit componi, disceptatione scilicet partium amica, & puro (non conditionato) compromisso, seu *provocatione ad arbitro*. Qui arbitri æquos sese utrique parti gerere debent, & in ferenda sententia nihil odio aut gratiæ dare, sed unice merita causæ respicere. Quam ob rationem etiam non tolet quis capi arbiter in ea causa, in qua ipsi commodi, vel gloriæ peculiaris spes major adparet ex victoria unius partis, quam alterius; adeoque ubi ipsius interest alterum quocunque modo causam obtinere. Hinc & nullum pactum aut promissum intercedere debet inter arbitrum & partes, cujus vi pronunciare in gratiam alterius teneatur. Quod si arbiter neque ex communi partium confessione, neque ex certis instrumentis aut indubiis rationibus & signis quid in facto sit cognoscere valeat, ex *effatis testium* id erit cognoscendum. Quos licet ad verum dicendum lex naturalis, & plerunque juramenti religio adstringat: tutissimum tamen fuerit tales non admittere, qui erga alterutram partem ita sunt affecti, ut conscientiæ ipsorum cum gratia, odio, vindictæ libidine, alioque violento animi motu, aut etiam arctiore quadam necessitudine sit

velut luctandum : quibus superandis non omnibus sat constantiæ est. Aliquando etiam per communium amicorum interpositionem lites tolluntur; quod merito inter sanctissima officia habetur. Cæterum in hoc statu executionem, ubi ultro ab altero non præstatur, quod debetur, sibi quisque facit.

Observ. 462.

In statu porro naturali) De modo litigandi, juxta præscriptum juris naturalis, tam intuitu status naturalis quam civilis, alio loco agendum erat, sed uti, hujus respectu, nihil omnino proposuit Autor, ita, ejus intuitu, nonnulla hic inferere voluit, quæ potissimum spectant ad civitates, in statu naturali existentes. Id facile liquet, opus esse modo hoc litigandi, *ortâ controversiâ*, cum enim hanc communis judex decidere nequeat, & tamen regulæ humanitatis in bellum statim ruere prohibeant, hinc de molliori processu prius laborandum §. 10. b. add. l. 5. c. 13. §. 1. 2. 3.

Observ. 463.

Disceptatione scilicet partium amica) Possunt igitur lites tolli per communium amicorum interpositionem, quæ uti inter sanctissima Officia merito ab Autore *in fine b.* refertur, *add. d. c. 13. §. 3.* ita inter Gentes ambitiosas viribusque ac potentiâ subnixas, raro effectum habet, frequentius verò, postquam armis fuit certatum, ani-

animorumque vigor belli malis est fractus, controversiæ amicorum interventu, per tractatus & transactionem componi solent.

Observ. 464.

Et puro non conditionato compromissa) Deinde etiam per arbitros controversiæ terminari possunt, qui compromisso non conditionato constituendi esse perhibentur, quod eo sensu verum est, quod conditio, sententiam arbitri, à voluntate & ratihabitione compromittentium suspendere non debeat, nam, alio sensu conditiones adjici, nihil prohibet *add. d. c. 13. §. 3.*

Observ. 465.

Qui arbitri equos sese) De officio & potestate arbitrorum, ex prævio compromisso judicandum, quod naturale est & latius diducitur *d. c. 13. §. 4. 5. 6. 7.* Potest etiam de possessione arbiter pronunciare, si jus possessionis sit evidens, quod contra Grotium in *Observat. ad Lauterbach.* jam adfluxi *Observ. 1081. n. 2. add. d. c. 13. §. 6.*

Observ. 466.

Quam ob rationem etiam non solet) Hæc ad regulas prudentiæ pertinent, si quis secus fecerit, ac arbitro suspecto causam suam committat, is imprudenter quidem agit, eam solam tamen ob causam, si dolus ac sordes arbitri non appareant, sententiam latam improbare non potest.

Observ.

Observ. 467.

Hinc & nullum pactum) Tale pactum scopo compromissi contradicit, adeoque cum eo simul consistere nequit. Sed ita solent Gentes agere: controversias majoris momenti arbitrorum sententiæ non facile committunt, ac eo forte facto, sententiam tacitis artibus eludere conantur, aut, si hac viâ res non procedat, eam aperte spernunt.

Observ. 468.

Quod si arbiter) Inter partes officii, quod arbitro incumbit, quoque esse, ut de facti veritate, ac genuina probatione sit sollicitus, facile liquet. De cætero probatio, vel confessione partium, vel instrumentis, vel testibus peragitur. Poterit etiam partibus iurjurandum deferri, & quidem, si circumstantiæ & æquitas id exigant, etiam sine alterius consensu, quamvis aliter sentiat Autor l. 5. c. 13. §. 8. sed de hoc frustra forte disputatur, cum feroces Gentes nec iuramentum tale facile subeant, nec Arbiter, invitis Partibus, illud temere decernat.

Observ. 469.

Quod licet ad verum dicendum) Quid lex naturalis Testibus injungat, aut Prudentia in iis admit- tendis exigat, de quo b. add. d. c. 13. §. 9. id facile intelligitur. Numerum verò quod attinet, ratio naturalis etiam insinuare videtur, quod unius testimonium non sufficiat, duorum tamen, non suspectorum, & omni exceptione majorum (quales censerî nequeunt, nisi

nisi etiam de dicenda veritate juraverint) effa-
to fides fieri possit *add. d. c. 13. §. 9.*

Obseru. 470.

Ceterum in hoc statu) Executio rei iudicatæ, non
ab arbitro, sed victore ipso fit; Verum ubi
ad vim deventum fuerit, raro intra terminos
executionis consistitur, quin potius conde-
mnatus non segnius vim repellit, quam alter
infern, ut facile liqueat, inter Gentes bellico-
sas, raro molliori aliquo remedio controver-
siam componi, sed Marte iudice, omnia ferè
peragi *add. d. c. 13. §. 10.*

§. II. Quanquam autem natura ipsa inter
homines aliquam cognationem esse voluerit,
cujus vi nefas si alteri homini nocere, & poti-
us fas sit cuivis aliorum commodis sese di-
spensare: tamen inter eos, qui in naturali li-
bertate invicem vivunt, hæc cognatio sat de-
biles fere exferit vires, ita ut quivis homo,
qui non est noster civis, seu quicum in statu
naturali vivimus, non quidem pro hoste,
sed tamen pro *amico parum firmo* sit haben-
dus. Cujus rei ratio est, quod homines non
solum sibi invicem maxime possint, sed &
variis de causis sæpissime velint nocere. A-
lios quippe pravitas ingenii, aut dominandi
& superflua habendi libido ad lædendos alios
incitat; alii modesto licet ingenio, studio se
conservandi, & ne ab aliis præveniantur, in
arma

arma ruunt. Multos ejusdem rei desiderium, alios ingeniorum contentio committit. Inde in isto statu tantum non perpetuæ vigent suspensiones, diffidentia, studium aliorum vires subruendi, libido alios præveniendi, aut ex aliorum ruina vires suas augendi. Ergo uti probi est hominis rebus suis contentum alios non laceßere, nec aliena adpetere: ita cauti est, suæque salutis amantis ita omnes homines amicos credere, ut tamen iidem mox hostes fieri queant: ita pacem cum omnibus habere, quasi quæ mox bello murrari possit. Qua de causa & felix habetur res publ. quæ etiam in pace de bello cogitat.

Observ. 471.

Quamquam autem natura) Rectius hic Autor de statu naturali philosophatur quam §. p. b. Est scilicet status *socialis*, sed *parum tutus*, cujus causa generalis est *malitia humana*, quæ vincula legum facile perrumpit, nisi præsentaneo aliquo malo reprimatur.

Observ. 472.

Ergo uti probi est hominis) Egregium hoc est socialitatis & prudentiæ monitum, de cætero, pro diverso status naturalis habitu, intenditur aut remittitur, nam si homines in statu naturali dispersos, aut per familias exiguas distributos supponas tum, quia tam validè nocere non possunt tanta circumspectione non sunt obser-

observandi, quod si verò in valida corpora seu civitates digesti sint, tum in pace semper de bello, non inferendo, sed repellendo, cogitandum est *add. l. 2. c. 2. §. 12.*

CAPUT II.

DE

OFFICIIS CONJUGALIBUS.

§. I.

INter *status adventitios*, seu in quibus homo facto aliquo humano autecedente constituitur, primo loco venit *matrimonium*.

Quod ipsum etiam est primum velut specimen vitæ socialis, simulque generis humani seminarium.

Observ. 473.

Primo loco venit matrimonium) Circa hoc initio observandum, quod duplex ius naturæ separari debeat, *commune*, quod inter conjuges læsionem prohibet, ac damnum resarciri, aut fidem datam servari jubet, & *proprium*, ac quod unicè ad propagationem pertinet, explicatu satis diffici. e est. Summam retulimus *Observ.*

79. n. 5. nempe homines genus suum propagare debent eo modo, qui & naturæ propagantium sociali convenit, & homines natos ad religiositatem, philantiam temperatam & socialitatem, quam optime disponit, ex quo conclusiones speciales hic deducere conabimur.

§. 2. Circa hoc initio constat, ardentem illum sexuum inter se proclivitatem à sapientissimo Creatore institutam non ad inanem voluptatem satiandam; quippe quæ unice spectata summam foeditatem & confusionem in genere humano excitatura erat: sed tum ut eo jucundior inter conjuges esset conversatio, tum ut eo lubentius homines propagationi sobolis operam darent, ac molestias tolerarent, quæ istius susceptionem atque educationem comitantur. Ex quo consequitur, naturali legi repugnare omnem usum membrorum genitalium, qui ab hisce finibus abit. Quo nomine etiam vetita libido in diversam speciem, aut eundem sexum ruens; quævis fædæ pollutiones, & denique omnis commixtio sive mutuo consensu suscepta, sive invitæ foeminæ intentata extra matrimonium.

Observ. 474.

Circa hoc initio constat) Primo igitur ex illo præcepto consequi videtur, libidinem seu Venerem inanem jure naturali prohiberi, ceu Auctor b.

CON

contendit *add. l. 6. c. 1. §. 2. 4.* nam ex fine, de moralitate medii, videtur judicandum, hinc omnis usus membrorum genitalium, qui *contra & præter* finem propagationis est, jure naturali prohibitus censeri debet, licet alii dissentiant *vid. Thomas. 7. 7. D. l. 3. c. 2. §. 21. seqq.* Habet igitur voluptas Veneri addita, rationem incitamenti vel præmii, quo homines ad molestam Generis sui propagationem eò magis permoveantur, quam adeo seorsim, sine scopo principali, vel obtinendo vel obtento, expetere fas non est.

§. 3. *Obligatio ad contrahendum matrimonium* considerari potest vel in *respectu ad totum genus humanum*, vel in *respectu ad singulos*. Illa in eo consistit, quod propagatio speciei humanæ haut quidquam sit instituenda per vagos & solutos concubitus; sed utique legibus connubialibus circumscribenda, adeoque per matrimonium duntaxat exercenda. Citra hoc enim decora & bene disposita inter homines societas, vitæque civilis cultus intelligi nequit. *Singuli* autem ad matrimonium in eundem tenentur, quando comoda sese ejus occasio offert: quam tamen non sola ætas generandique facultas absolvit; sed ut copia quoque sit decentis conditionis, nec non facultas alendi uxorem & prolem nascituram; ac ut mas quoque sit idone-

us ad gerendam personam patrisfamilias. Nisi tamen aliquis compositus sit ad exigendum castum cælibatum, sentiatque plus se utilitatis posse procurare humano generi, aut civitati cælibem, quam uxoratum; præsertim ubi nulla prolis penuria sit metuenda.

Observ. 475.

Obligatio ad contrahendum matrimonium) Porro ex præcepto præsupposito judicandum, *an & quomodo* homines genus suum propagare debeant. Circa primam quæstionem recte quidem Autor monet, quod illa vel *in respectu ad totum genus humanum*, vel *singulos* considerari possit, sed dum eam, juxta primum respectum, decidere vult, quæstionem *an & quomodo*, confundit, seu ab illa, ad hanc delabitur.

Observ. 476.

Illa in eo consistit) Hæc à scopo abludere, jam dixi, hoc potius quærebat, *an homines genus suum propagare debeant?* quod dubio procul asserendum, nam alias genus humanum, contra finem à Deo intentum, interiret, nec etiam hac in parte ulla subest difficultas aut scriptorum dissensus *add. d. l. 6. c. 1. §. 3.* de altera vero quæstione, *quomodo propagatio facienda sit*, quam Autor hic intempestive immiscuit, mox dicemus.

Observ. 477.

Singuli autem) In quantum singuli ad generis sui propagationem teneantur, satis hic exponitur,

tur, quæ etiam ex fine à Deo intento, eique surrogato præcepto antea relato, facile deduci possunt; Aliquando obligatio propagandi, pro ratione status, in hoc vel illo intenditur *add. l. 6. c. 1. §. 6. 7. 8. Thomas. 7. 7. D. L. 3. c. 3. §. 9. seqq.*

§. 4. Inter eos, qui matrimonium inituri sunt, intervenire solet & debet *pactum*, quod ubi *regulare & perfectum* fuerit, hisce capitibus absolvitur. *Primo*, quia vir, abs quo ut contractus incipiat utriusque sexus indoli magis congruit, propriam utique sibi sobolem intendit quærere, non supposititiam aut adulterinam; igitur *fidem dare viro debet femina*, quod nemini præterquam ipsi corporis sui usuram velit concedere. Quod itidem à marito *femina vicissim* solet stipulari. *Deinde* cum nihil magis ab indole vitæ socialis & civilis abhorreat, quam vita vaga ac desultoria, incertolare, nulla fortunarum sede; cumque communis sobolis educatio commodissime instituaturs conjunctis utriusque parentis operis; ac cohabitatio continua plurimum contineat jucunditatis inter conjuges bene compositos, per quam etiam marito certius de castitate uxoris constare potest: igitur in id quoque fidem marito dat uxor; quod *viro continuo cohabitare*, adeoque in arctissimam vitæ societatem, eandemque familiam cum ipso

coalescere velit. Cui ipsi & mutua promissio de tali invicem conversatione, qualem indoles ejus societatis requirit, inesse intelligitur. Quia autem non solum naturali utriusque sexus conditioni maxime congruit, ut in matrimonio viri conditio sit potior, sed & maritus familiæ, à se utique constitutæ, caput sit; consequitur, ut uxor in negotiis matrimonium ac familiam concernentibus directioni mariti sit obnoxia. Inde & mariti est de domicilio constituere; nec uxor isto invito peregre abire aut secubare potest. Tale tamen imperium, quod jus vitæ & necis, gravemque coërcitionem, nec non plenam potestatem circa quævis bona uxoris disponendi comprehendat, ad essentiam matrimonii necessarium non videtur: sed istud ex peculiaribus pactis inter conjuges, aut ex legibus civilibus alicubi constituitur.

Observ. 478.

Inter, eos qui matrimonium) Postea etiam quæritur, *quomodo homines genus suum propagare debeant?* Non per vagos & solutos concubitus, ceu recte Autor §. 3. *b.* dixit, sed pacto & societate conjugali circumscriptos §. 4. *b. add. l. c. c. i. §. 5.* nam pecuina illa propagandi ratio, nec naturæ propagantium rationali & sociali convenit, nec sobolem natam, ad legis natu-

ralis observantiam, reddit aptam, hinc merito jure naturali prohibita censetur.

Observ. 479.

Primo quia Vir) Sic ergo, ex præscripto juris naturalis, futuram propagationem, antecedere debet pactum, quo sobolem propagaturi, in arctiorem quandam societatem conjungantur. Hoc pactum, uti cum aliis id habet commune, quod verus ad illud requiratur consensus, de quo *L. i. c. 9. b.* generaliter actum *conf. l. 6. c. 1. §. 26. Thomaf. 7. J. D. l. 3. c. 2. §. 87. seqq.* ita quæ ejus capita essentialia sint, ad quæ scilicet constituenda, jus naturale, ex hypothesi pacti ineundi, antecedenter obliget, hic inquirendum est.

Observ. 480.

Abs quo ut contractus) Hoc ad essentialia capita non pertinet, sed consuetudinis & solennitatis est *add. d. l. 6. c. 1. §. 9. 10.* Est igitur [1] caput essentialiale, quo conjuges *corporum conjunctionem sibi mutuo promittunt*, nam sine hoc finis intentus obtineri nequit, atque de hoc nullum etiam est dubium.

Observ. 481.

Propriam utique sibi) Porro (2) *quo fœmina soli marito usuram corporis pollicetur*) id quod non tantum ex *affectu mariti*, quem Autor hic urget, sed & ex *præscripto juris naturalis antecedente*, fieri debet. An verò vice versa maritus idem fœminæ promittere debeat, quæstio-

nis magis dubiæ est, sed utrumque ad §. 5. b. distinctius paululum expediemus.

Observ. 482.

Deinde cum nihil magis) Denique [3] quo *fœmina viro cohabitationem continuam promittit*, quod præcedens consequitur *add. d. c. 1. §. 10.* Tria hæc capita, per præceptum ab nobis *Observ.* 473. præsuppositum, requiri omnino videntur, hinc si promissio accedat, duplici vinculo conjuges obstringuntur. Interim alii ex suis hypothesebus dissentiunt, ac duo posteriora capita essentialia negant, *vid. Thomas. 7. 7. D. l. 3. c. 2. §. 100. seqq.* sed quamdiu principium antea præmissum subsistit, tamdiu de conclusionibus hic allatis non despero.

Observ. 483.

Qui autem non solum) Imperium proprie dictum, conjugalis societas non requirit, directio tamen ut sit penes conjugem prudentiorem, id naturale est, cumque ut plurimum sexus masculinus foeminino, animi & corporis robore præstet, hinc, hoc sensu, directio marito tribuitur.

Observ. 484.

Tale tamen imperium) Hoc mero jure naturali merito negatur, *vid. d. l. 6. c. 1. §. 9. 10. 11. 12, 13.* de jure tamen divino positivo universali, aliquod imperium marito tribui solet, *vid. Thomas. 7. 7. D. l. 3. c. 3. §. 35. seqq.* sed forte hoc nomine nihil aliud innuitur, quam directio, ex præstantiâ sexûs resultans. Illud certum nobis

bis videtur, quod imperium istud, non involvat potestatem, pro lubitu uxorem insultandi, aut eam ob delictum, per judicii modum, coercendi, nam si uxor ob convitia aliasque injurias marito illatas, ab eodem male habeatur, id jure belli fit, ac ex communi defensionis jure resultat, nec specialem permissionem præsupponit.

§. 5. Porro uti illud manifeste legi naturali repugnat, *unam mulierem pluribus viris simul* cohabitare: ita ut *unus simul duas pluresve uxores* habeat, apud plurimas gentes, & in ipso quondam Judaico populo receptum. Nihilominus si vel maxime à primæva matrimonii institutione in divinis literis tradita abstrahamus; ex ipsa tamen recta ratione constat, longe decentius juxta atque utilius esse, unum una esse contentum. Id quod & usus omnium, quas novimus, gentium Christianarum à tot seculis comprobavit.

Observ. 485.

Porro uti illud manifeste) De secundo pacti matrimonialis capite, quod *Observ. 481.* laudavimus, paulo distinctius hic agendum. Quærebatur scilicet, *an conjuges sibi solis usuram corporis promittere debeant?* quæ quæstio etiam sic proponi potest, *an polygamia sit prohibita?* nam de venere vagâ & solutâ, à conjugibus exercendâ, non opus est quærere, cum ea in gene-

re jure naturali sit prohibita, ceu *Observ. 474-478.* adstruximus.

2. Autor igitur censet, Polyandriam jure naturali esse prohibitam *add. d. c. 1. §. 15.* quod probamus, nam hujus conjunctionis nullus legitimus finis allegari potest, sed fit vel ob solam libidinem, vel propagationem impedit, vel incertam sobolem dat, ac in universum à natura hominis rationali & sociali abhorret, corruptissimosque mores præsupponit.

Observ. 486.

Ita ut unus simul duos) De Polygyniâ nota est controversia, dum eam nonnulli non tantum licitam, sed & præceptam pronunciant. Quod illa multis Gentibus in usu fuerit, imo adhuc sit, hic recte asseritur, ampliusque *d. c. 1. §. 16.* illustratur, sed inde solum patet, quid fiat, non quid fieri debeat.

Observ. 487.

Nihilominus scilicet vel maxime) Communior est sententia, quod, extra casum specialis pacti, Polyginia, jure naturali sit licita *vid. d. c. 1. §. 17. 18. Thomaf. 7. 7. D. L. 3. c. 2. §. 200. seqq.* prohibeatur tamen Jure divino positivo universali, quod ejusdem, cum jure naturali, sit autoritatis & effectus *vid. Thomaf. d. tr. L. 3. c. 3. §. 76. seqq.* Hanc sententiam ejusque fundamentum Autor hic innuit, egoque ipsam etiam approbavi in *Specim. Jur. Eccles. l. 4. c. 2. §. 7.*

2. De cætero in asserenda illa prohibitionem, ob defectum dispositionis expressæ, non levis sub-

subest difficultas; Mihi alias breviter sic visum est: Postquam Deus *Gen. I.* præceptum naturale, de propagando genere suo, hominibus dederat, deinde monogamiam inter Protoplastos *Gen. II.* instituit, quo ipso adeo libertatem ineundi Polygamiam, fustulisse censendus est, cum alius finis æque commodus, institutioni monogamiæ, assignari non posse videatur. Illa vero prohibitio universalis, deinceps quoad Judæos limitata fuit, sed in novo testamento, universaliter iterum vim suam exseruit, quo referas *I. Cor. VII. 2. Tim. III. 2.*

Observ. 488.

Ex ipsa tamen recta ratione constat Non insubdum est, si ipso jure naturali Polygyniam prohibitam dicas, quo collimat doctrina Autoris *h. add. d. c. 1. §. 12.* Nam (1) nullus legitimus Polygyniæ scopus allegari potest, cum monogamia, conservando generi humano, abunde sufficiat (2) repugnat indoli tam arctæ conjunctionis, qualis est conjugalis (3) suscipitur ob solam libidinem (4) habet originem à Gentibus voluptati deditis, aut quæ aliàs pravis moribus vixerunt, ac penes quas, Tyrannis libertatem & æqualitatem naturalem nimis oppressit (5) contraria est æqualitati sexûs, ut non crediderim, ullam erectioris ingenii foeminam, eâ lege marito esse nupturam, si integrâ illa gaudeat libertate, quæ naturalis inclinatio, juri naturali conveniens

censeri debet, cum ei nihil obstat [6] turbat socialitatem cæterosque fines à Deo intentos, cum unus Pater, educationi tot liberorum non sufficiat, nec eos etiam, sine aliorum injuriâ, alere possit, sed civitatem vel mendicabulis repleat, vel aliorum bona, sub specie recti, ad se trahat, quo tam numerosa proles laute vivere queat. Juxta hæc igitur, tam concubitus foeminæ, quam mariti, juxta jus naturale, in crimen adulterii incidit, sicut etiam consensus mariti in uxoris concubitum, lenocinii notam incurrit, nam hæc res ejus arbitrio non subest, licet alii aliter sentiant *vid. Thomas. 7. 7. D. l. 3. c. 2. §. 218.*

§. 6. Nec minus natura tam arctæ conjunctionis ostendit, *matrimonium debere esse perpetuum*, & non nisi alterutrius conjugum morte finiendum: nisi principalis pacti matrimonialis capita fuerint violata per adulterium, & malitiosam desertionem. Ob mores autem male compositos, & qui cum malitiosa desertione eundem non producant effectum, separatio duntaxat quoad thorum & mensam inter Christianos recepta est, sine permissione ad secunda vota transeundi. Cujus inter alias etiam hæc ratio est, ne facultas divortii contumaciam morum alat; sed potius alterius conditionis desperatio ad commoditatem morum, mutuamque tolerantiam

conjuges inciter. Cœterum ob violata pacti matrimonialis capita pars læsa tantum vinculo exsolvitur ; quod in altero continuatur , siquidem pars læsa velit, & cum altero in gratiam redire dignetur.

Observ. 489.

Nec minus natura tam arctæ) Illud quoque disputatur, *an pactum & societas conjugalis sint indissolubilia?* Ut plurimum hoc mero jure naturali negatur, ac divortium i. e. *conjugii legitime contracti, ac per copulam quoque carnalem consummati, utroque conjugum superstite, plena solutio, eodem asseritur.* Prohibitio vero ejus ex jure divino positivo universali iterum repetitur *vid. Thomas. d. l. 3. c. 2. §. 124. c. 3. §. 49. seqq.* quam sententiam hætenus semper secutus sum, eamque in *specim. Eccles. l. 4. c. 2. §. 46. c. 4. §. 16.* proposui.

2. Verum sicut, juxta communem pactorum naturam, unius dissensu matrimoniale pactum, si suis illud constet requisitis, naturaliter solvi nequit, ita non improbabile est, si ne quidem mutuo dissensu, ob nullas vel leves causas, illud dirimi posse dicamus, modo concubitu illud consummatum fuerit, nam levitas illa naturæ hominum sociali haut convenit, præterea adulteriis locum facit, quam facile enim fuerit, cum uxore dimissa & alii juncta, antiquos repetere amores denique bonum aliquem finem isti divertendi licentiæ non temere assignaveris *add. l. 6. c. 1. §. 20.*

Observ.

Observ. 420.

Nisi principalis pacti) Si capita essentialia pacti matrimonialis fuerint violata, tum læso facultas recedendi dubio procul competit, id autem non tantum contingit per adulterium & malitiosam desertionem, sed etiam aliis modis, quos retuli in *Specim. Jur. Eccles. l. 4. c. 4. §. 17. 18. 19. 20.* qui ad jus naturale omninò etiam referri possunt, imo mores intolerabiles, si nulla emendationis spes, morali æstimatione, supersit, dirimendo matrimonio sufficere possunt *add. d. l. 6. c. 1. §. 21. 22. 23. 24.*

Observ. 421.

Ob mores autem male compositos) Si leviores causæ intercedant, separatio à thoro & mensa conceditur, quæ hætenus rationem habet, quatenus per eam majora mala impediuntur, ac conjuges ad concordiam revocantur, de qua plura dixi in *Specim. Jur. Eccles. d. c. 4. §. 23. seqq.*

Observ. 422.

Ceterum ob violata) Hoc ex generali pactorum natura fluit, nam absurdum foret, si quis suo delicto, ab obligatione legitimè constituta, se liberare posset, hinc ea res ab arbitrio læsi dependet.

§. 7. Contrahere licite matrimonium, ubi lex civilis non obstat, potest *quilibet cum qualibet*, si ætas corporisque constitutio matrimonio habilis adsit; *nisi impedimentum a-*
liquod

Aliquid morale obstat. Moraliter impeditur aliam conjugem adsciscere, qui, quævé alteri jam conjugi junctus, junctavé est.

Observ. 493.

Contrahere licitè matrimonium) In personis paciscentibus requiritur (1) *aptitudo generandi*, hinc Eunuchis matrimonium inire non licet *vid. d. c. 1. §. 25.* Thomas. 7. 7. D. l. 3. c. 2. §. 174. quamvis alii dissentiant *vid. Brückner. Decis. matrimon. c. 11.* (2) *usus rationis, ejusque liberum seriumque exercitium* *vid. d. c. 1. §. 26.* (3) *facultas moralis*, quam leges tam divinæ quam humanæ definiunt.

Observ. 494.

Moraliter impeditur) Hoc impedimentum, imprimis quoad maritum, vulgò ex jure divino positivo universaliter repetunt, sed ego id nunc ex jure naturali dependere existimo, per ea, quæ *Observ. 488. admonui add. d. c. 1. §. 27.*

§. 8. Sed & pro morali legitimarum nuptiarum impedimento habetur *arcta nimis sanguinis aut affinitatis conjunctio*. Quo nomine etiam naturali lege nefariæ judicantur nuptiæ inter adscendentes & descendentes in infinitum. Reliquæ autem nuptiæ in limite transverso, puta cum amita & matertera, cum sorore, item in affinitate cum noverca, socro, privigna, non solum lex divina, sed & cultarum leges gentium, & Christianorum con-

consensus detestatur. Quin & multorum populorum leges civiles remotiores quosdam gradus prohibuerunt, ad objiciendam velut sepe prius dictis gradibus sanctioribus, ne ad hos remerandos ita facile rueretur.

Observ. 495.

Sed & pro morali) Arctior consanguinitas & Affinitas, est etiam morale matrimonii impedimentum. Illa est *communio sanguinis inter eas personas, quarum una alteram generavit, vel quæ ab eadem stirpe dependent.* Hæc verò est *consanguinitatis ad conjugem applicatio, ex concubitu orta*, dum enim mas cum foemina per concubitus, una velut caro fit, hinc unusquisque conjugum alterius cognationi quasi inseritur, adeoque omnes uxoris cognati, maritum quoque nunc attinent, & vice versa, quæ consanguinitatis extensio, affinitatis nomine venit, de quo latius differui in *Specim. Jur. Eccles. l. 4. c. 3. §. 1. seqq.*

Observ. 496.

Quo nomine etiam naturali lege) An vero aliqua prohibitio, quoad consanguineos & affines, ex jure naturali deduci possit, valde controversum est? Autor quoad lineam consanguinitatis rectam prohibitionem adstruit, cætera ad jus positivum, divinum & humanum refert *b. de quo latius disputat d. l. 6. c. 1. §. 28. 29. 30. 31. 32. 33. 34. 35.*

2, Alii censent, ex jure naturali nullam prohibitionem

tionem posse repeti *vid.* Thomas. *J. J. D. l. 3. c. 2. §. 220. seqq.* sed ad jus divinum positivum universale *Levit. XVIII.* in philosophia generali, unice recurrendum esse, hoc verò prohibere (1) *nuptias inter parentes & liberos in infinitum* (2) *inter fratres & sorores tam bilaterales, quam unilaterales*, (3) *inter fratrem aut sororem, alteriusque fratris vel sororis descendentes in infinitum*, ac denique (4) *inter affines*, inter quos *memorati tres respectus occurrant*; reliqua ad jus humanum pertinere, quamvis circa regulas allatas, multiplex etiam Scriptorum sit concertatio *vid.* Thomas. *J. J. D. l. 3. c. 3. §. 99. seqq.*

3. Istam interim sententiam hætenus secutus sum, ac in specie eam proposui in *Specim. Jur. Eccles. l. 4. c. 3. §. 40. seqq.* sed non videtur improbabile, si quatuor illas regulas ad jus naturale referamus, nam [1] inter personas illas prohibitas est aliqua unitas, jam verò naturæ repugnat, ut quis secum ipso velut coëat, ac hac ratione genus humanum propaget (2) â natura sociali abhorret, ut cognatio vix incepta, in sua statim redeat initia, cum indoli vitæ socialis magis conveniat; ut illa latius spargatur [3] admissa concumbendi licentia adulteriis & stupris ansam præbet, denique [4] nullus legitimus finis nominari posse videtur, ob quem ejusmodi matrimonia appetenda sint. Non obstat, quod, admissâ nostrâ sententia quoad fratres & sorores, totum genus

nus humanum ex incestu natum esse oporteat, nam ad casum nece sitatis, prohibitiones non pertinere, tralatitium est.

Observ. 497.

Quin & multorum popalorum leges) De hoc non dubitandum, sed sunt illæ, leges extra sphæram Jurisprudentiæ universalis, easdemque latius explicat Jurisprudentia particularis ac privata cujusvis Reipublicæ, de quo aliqua proposui in *Specim. Jur. Eccl. l. 4. c. 3. § 45. 50. seqq.*

2. Ex dictis hæc, juxta jus naturale, fuit matrimonii definitio. Est *pactum, quo mas & fœmina, usu rationis gaudentes, ad generandum habiles ac nimia consanguinitate aut affinitate non conjuncti, in procreationem sobolis ac indissolubilem vitæ societatem, vere consentiunt.* Si autem matrimonium pro societate vel statu accipiatur, tum est *societas maris & fœminæ habilium, ad fines modo memoratos conjunctorum.*
3. Facit igitur matrimonium *consensus*, ad ejus vero consummationem pertinet *concubitus*, quanquam hunc præcisè necessarium judicaverim ad hoc, ut matrimonium sit indissolubile *vid. Observ. 489. n. 2.* quemadmodum etiam sine eo, nulla vera affinitas inter conjuges conjugumque cognatos, contrahitur *add. Op. Maj. l. 6. c. 1. §. 14.*
4. Est porro in arbitrio paciscentium positum, gradus circa consensum matrimoniale distingueret, ac requisita ejus determinare.

Hinc

Hinc mero jure naturali, modo obtinebit discrimen sponsaliorum & nuptiarum, aut matrimonii solennis & minus solennis *vid. l. 6. c. 1. §. 36.* modo non, prout scilicet paciscentibus visum fuerit, quanquam in Civitatibus illa certius definiat lex positiva. Porro cum matrimonium tam arcta imò insolubilis sit societas, ideo quoq; id naturale velut est, ut non quemvis consensum pro matrimoniali habeamus, sed illum demum, qui aperto & irrefragabili indicio sit declaratus, id quod itidem lex civilis amplius determinat.

§. 9. Cæterum uti aliis contractibus atq; negotiis certa quædam requisita sueverunt addere leges civiles, quæ si observata non fuerint, in foro civili pro validis non habentur: ita & circa matrimonium contingit, dum alicubi per leges civiles honestatis & boni ordinis causa *solennia* quædam requiruntur. Quæ licet extra jus naturale sint; citra illa tamen, qui legibus civilibus subjiciuntur, legitimum matrimonium non contrahent; aut saltem ejusmodi conjunctio effectus justi matrimonii in civitate non habebit.

Observ. 498.

Cæterum uti aliis contractibus) Legem civilem varia circa matrimonium disponere posse, dubitandum non est. De cætero dispositiones civiles vel respiciunt *personas paciscentes*, dum consanguinitatis & affinitatis prohibitio latius ex-

tenditur, vel *modum paciscendi*, dum proclamatio, hierologia, consensus Parentum, velut pars actûs, similiaque requiruntur. Exinde etiam discrimen sponsaliorum & nuptiarum, matrimonii solennis, & minus solennis, in civitatibus repetendum est. De cætero leges illas civiles explicat Jurisprudencia, Particularis, de quo egi in *Specim. Jur. Eccl. l. 4. c. 1. 2. 3. 4.*

Observ. 499.

Quæ licet extra jus naturale) Uti sine dubio subditi legibus civilibus obsequi debent, ita, si eadem de facto negligantur, poenam nullitatis Legislatori statuere licet, ita ut matrimonium, sine juris civilis præscripto initum, penitus nullum sit, nec effectus legis divinæ, actum consensuale præsupponentes, sequantur. Raro tamen tam rigidè Imperans hic versatur, sed potius, salvo matrimonio, in transgressores aliter animadvertit.

§. 10. *Officium mariti* est uxorem diligere nutrire, regere, atque defendere: *Uxoris* maritum amare, honorare, adjutorio esse ei non solum in generanda & educanda sobole, sed & in parte curarum domesticarum capefenda. *Utrique* autem indoles tam arctæ conjunctionis requirit, ut conjuges tam prosperæ quam adversæ fortunæ sint socii, & si qua alterutri calamitas obtingat, ab altero suble-

Tublevetur; nec minus ut prudenter mores ad concordiam invicem tolerandam attemperent; qua tamen in parte concedere magis uxoris est.

Observ. 300.

Officium mariti est) Officia conjugum, aut generalius, quæ circa propagationem usumque Veneris occurrunt, ex tractatu præcedente intelligi debent. In genere id saltem hic admonendum, quod ex quatuor fontibus illa repetiqueant (1) *ex jure naturali, huic negotio proprio*, quæ vel *veneris usum in genere*, vel *societatem matrimonialem ineundam*, vel *initam & contractam* respiciunt, ad ultimam classem pertinent, quæ Autor §. 10. *b.* retulit (2) *ex communibus socialitatis decretis*, *vid. Observ. 473.* (3) *ex jure divino positivo universali*, quo referunt prohibitionem Polygamix, divortii & graduum nonnullorum in consanguinitate & affinitate, sed illa juri naturali heic adscripsimus, quod si admittas, tertius fons exarescit (4) *ex jure humano*, circa quod satagit Jurisprudencia particularis.



DE
OFFICIIS PARENTUM
ET LIBERORUM

§. I.

EX matrimonio, provenit proles, in quam constituta est *potestas patria*, antiquissimum juxta ac sanctissimum genus imperii, quo parentum jussa venerari, eorundemque præ se eminentiam agnoscere liberi tenentur.

Observ. 501.

Potestas patria) Non hæc tantum circa sobolem natam occurrit, sed generalius potius, *reciprocum aliquod jus & obligatio*, nam Parentes obligantur liberis, cui adeo obligationi in his jus respondet, & vice versa Parentibus competit aliquod jus vel imperium, quod in liberis obligationem necessario requirit. Interim loquendi compendio, totus illè nexus moralis, nomine potestatis patriæ exprimitur.

§. 2. *Oritur imperium parentum in liberos duplici potissimum de causa: primo* quia ipsa lex naturalis, dum sociabilem esse hominem jussit, *parentibus curam liberorum in-*

jan.

junxit; quæ ut eo minus negligeretur, tenerimum simul affectum in prolem natura iisdem implantavit. Isti curæ exercendæ requiritur potestas liberorum actiones dirigendi ad ipsorum salutem, quam ipsi propter judicii defectum nondum intelligunt. Deinde id imperium *tacito quoque consensu prolis* nititur. Nam recte præsumitur, si infans eo, quo sublatus est, tempore usum rationis habuisset, ac perspexisset, vitam se citra parentum curam ac junctum ipsi imperium servare non posse, lubenter illam in id consensuram, commodamque sibi educationem ab iisdem vicissim fuisse stipulaturam. *Actu* autem parentibus imperium in prolem constituitur, quando illam tollunt, nutriuntque & in commodum humanæ societatis membrum pro virili formandam suscipiunt.

Observ. 502.

Oritur imperium Parentum) Sicut erga sobolem tam nascituram quam natam, non tantum Parentes, sed & alii homines communia socialitatis præcepta observare tenentur, ita proles, nata, ad observantiam legis naturalis apta reddenda, adeoque sollicitè educanda est, hoc onus autem lex naturalis meritò imponit parentibus, quia sobolem generando, in illud consenserunt. Cum porro educatio rite peragi nequeat, nisi aliquod imperium Parenti-

bus tribuatur, hinc ex eodem fonte illud fluere, manifestum est, recte igitur, cum Grotio de J. B. P. l. 2. c. 5. §. 1. dixeris, imperium parentum oriri ex generatione.

Observ. 503.

Duplici potissimum de causa) Frustra illam sententiam vellicat, Autor b. & l. 6. c. 2. §. 1. 4. dum *solan generationem ad titulum imperii, in sobolem humanam constituendi non sufficere censet*, ac cum *proles abeat in personam nobis similem, Et quæ, quantum ad jura, hominibus naturaliter competentia, nobis est equalis, inde ut nobis fiat inequalis, seu ut nostro imperio subjiciatur, alio utique titulo opus esse arbitratur*, nam proles, homo quidem est, sed iudicio proprio destitutus, ac sollicitè operâ aliorum educandus, quo respectu Parentibus est inæqualis, ob eamq; conditionem, illorum imperium subire tenetur.

Observ. 504.

Primo quia ipsa lex naturalis) Nec etiam meliora afferre potest Autor, dicit: *imperium Parentibus competere ob necessitatem educandi*, ita est, sed utrumque ipsis competit ob consensum ex generatione colligendum.

Observ. 505.

Deinde id imperium) Alter titulus est *consensus tacitus vel præsumtus ipsius infantis*. Verum uti tacitum & præsumtum hic confunditur, ita ad asserendam obligationem, frustra ejus præsumitur consensus, qui dissentire nec potest nec debet, add. Observ. 205.

Ob-

Actu autem parentibus) Hoc ex præcedentibus fluit, si enim imperium, ad explendam obligationem, Parentibus conceditur, facile liquet, quod illud tum demum sequatur, si ii hanc actum subeant.

§. 3. Cum autem ad generationem sobolis *non mater minus, quam pater* concurrat, adeoque physice proles utrique sit communis, disquirendum: *utrius jus in prolem sit potius.* Super qua re distincte pronuncian- dum. Si enim *extra matrimonium* proles sit generata, illa primo matris erit; quia pater heic nisi indicio matris cognosci nequit. Inter eos quoque, qui *in libertate naturali & supra leges civiles* degunt, pacto conveniri potest, ut non patris, sed matris jus potius sit. Sed *in civitatibus*, utique per mares constitutis, cum regulariter contractus matrimonii à mare incipiat, & is caput familiæ sit, potius erit jus patris: sicut licet proles matri utiq; reverentiam, gratumque animum debeat, jussu tamen matris non obligetur, quæ quidem non iniquis patris præceptis repugnant. Defuncto tamen patre jus ipsius in prolem, saltem nondum adultam, *matri* videtur *accrescere*; & hac ad secundas nuptias transeunte, *vitrico*, siquidem ipse in fidem & curam na-

turalis parentis succedat. Et qui desertum, aut orbatum parentibus liberaliter educandum suscipit, jure suo ab eo filialem observantiam exigere potest.

Observ. 507.

Cum autem ad generationem) Cui imperium paritum naturaliter competat, quæri etiam solet? Hobbesius *de Civ. c. 9.* ex insanis suis hypothesebus primævum jus matri tribuit, à qua illud in Patrem aliosque derivetur, ceu refert Autor *l. 6. c. 2. §. 2. 3.* sed iis immorari, operæ vix est pretium.

Observ. 508.

Super qua re distinctè) Ex sententia Autoris, si extra matrimonium versemur, matri jus potius in prolem competit, in sobolem verò ex legitimo matrimonio natam jus æquale est, nisi pacto vel lege positiva aliud cautum *add. d. c. 2. §. 5.* Sed non apparet ratio, cur Patri, si de eo constet, in sobolem illegitimam non sit tantum juris concedendum, quantum matri, hinc malim in genere æqualitatem asserere, quamdiu pacto aut lege aliud constitutum non est, quæ ultima, in civitatibus, frequentissima est, ac ita jus patrum formare solet, ut matri illud plane non competat.

Observ. 509.

Defuncto tamen Patre) Transmissio juris patrii, quæ hic asseritur, admitti potest, si juxta solum jus naturæ, illud spectetur, ast si id consi-

de-

deres, quatenus lege civili variis effectibus auctum est, transmissio non obtinet, nisi diserte lex hoc velit, quod exemplo juris Romani intelligitur.

S. 4. Ut autem accurate intelligatur, quanta *parentum* sit in *liberos potestas*, distinguendum est tum inter *patresfamilias segre-*
ges, & qui in civitatem subierunt; tum inter *potestatem, quam habet genitor ut talis, & quam habet, ut est Caput sue familiae. Patri ut tali*, cum sit à natura injunctum, ut liberos bene educet, quo in commoda humanæ societatis membra evadant, quousque ipsi sibi prospicere queant: inde tanta eidem in liberos potestas concessa intelligitur, quanta ad hunc finem sufficit. Quæ hautquaquam eousque se extendit, ut parentes prolem intra materna viscera latentem elidere, aut editam abjicere, necareque possint. Nam excitatur quidem ex substantia parentum soboles; ut tamen in æqualem conditionem humanam cum illis locetur, & injuriæ etiam ab ipsis parentibus capax sit. Neque etiam hæc potestas ad jus vitæ & necis ex occasione delicti exercendum videtur porrigi, sed ad modicam duntaxat castigationem; quippe quæ versatur circa ætatem teneram, in quam tam atrocia delicta, quæ morte sint expianda, vix cadunt. Sed si tamen, citra spem emendationis, o-

Ff 5

mnem

mnem disciplinam pertinaciter adspernetur puer, poterit domo patria ejici, atque abdicari.

Observ. § 10.

Uti autem accurate) Ad indolem patriæ potestatis penitus intelligendam, recte, distinguitur inter statum *naturalem & civilem*. In illo *patrium jus, presse dictum*, & *imperium civile* amplius discernitur, in quo vero illud consistat, tum positive, tum negative hic declaratur *add. d. c. 2. §. 6.*

§. 5. Ist hæc porro potestas, ita presse accepta, considerari potest *juxta diversitatem ætatis in liberis*. Nam *in prima ætate*, ubi immaturus adhuc rationis usus est, omnes liberorum actiones directioni parentum subjacent. Quo tempore, si quid bonorum ab aliis in impuberem transferatur, id parens loco filii acceptare, & administrare debet, ut tamen dominium ipsi filio adquiratur: et si ut fructus patri cedant ad plenam usque filii ætatem æqvissimum sit. Sic & quod ex filii labore lucri aut emolumenti provenit, id merito sibi pater vindicat; cui ex adverso filii nutritio & educatio incumbit.

Observ. § 11.

Ist hæc porro potestas) Intelligendæ patriæ potestati, presse dictæ, cum Grotio *l. 2. c. 5. §. 2.* censet Autor diversam liberorum ætatem distinguen-

guendam esse *add. l. 6. c. 2. §. 7.* sed uti illa distinctio quoad liberorum *res* non est necessaria, cum earum respectu, potestas sit uniformis, ita, licet quoad *actiones*, crescente liberorum iudicio, directio Parentum velut attenuetur & decrescat, attamen cum ea res in puncto non consistat, sed magnam habeat laxitatem, ideo in universum distinctio illa non valde est necessaria.

Observ. 512.

Quo tempore si quid bonorum) De liberorum rebus, sive propria industria sive aliorum liberalitate obvenientibus, planissime dici potest, quod earum dominium ad liberos pertineat, Pater tamen, pro ratione alimentorum præstitorum, sibi illas asserere possit, nam dominium aut usumfructum, alimenta excedentem, ipsi tribuere mero jure naturali non licet, sed illa res à lege civili dependet *add. d. c. 2. §. 8.*

§. 6. *In adulta etate*, ubi liberi pleno quidem iudicio præditi sunt, pars tamen adhuc familiæ paternæ existunt, distincte considerari potest, potestas quam pater habet *ut generator*, & quam habet *ut caput familie*. Illa cum commodam educationem & gubernationem liberorum pro scopo habeat, pater, adultos quoque liberos auctoritatem parentum tanquam prudentiorum sequi debere. Et qui vult ex paternis bonis sustentari, ac in ea deinceps

ceps succedere, necessum est, ut ad familiæ paternæ rationes sese attemperet; quam moderari utique penes patrem est.

Observ. §13.

In adulta ætate) Ut circa liberos adultos, potestatem, quam Pater habet ut *genitor*, & ut *caput familiæ*, demum distinguamus, ceu hic præcipi videtur, illud quidem opus non est, cum potius generaliter utraque illa potestas in statu naturali occurrat, quanquam posterior, circa liberos teneros tam frequenter se exferere non videatur, quam adultos.

Observ. §14.

Illæ cum commodam) Patriam potestatem ad res liberorum relatam, esse eandem jam diximus *Observ. §11.* nulla enim ratio alio ducit, si verò eadem ad *actiones* referatur, tum quoad adultos est quidem remissior, gradus tamen accurate determinare non licet, ut distinctionem ætatis non valde necessariam videri, *d. Observ. §11.* jam etiam admonitur: sit.

§. 7. Cœterum *patresfamilias*, qui nondum in civitates successerant, in domo sua aliquid instar principum gerebant. Inde & liberi, in eorum familia adhuc hærentes ipsorum imperium tanquam summum venerari debebant. Verum postea imperium istud familiare, (uti & alia jura,) ad usum & decus civitatum fuit atemperatum; & alicubi multum

tum, alicubi parum de eo patribus fuit relictum. Inde observamus, in quibusdam civitatibus patres jus vitæ & necis, ex causa delicti exercendum, in liberos obtinuisse: in aliis id ipsum iis ademptum, ne forte parentes sua in liberos potestate in fraudem boni publici, aut ad iniquam istorum oppressionem abuterentur; aut ne ob mollitiem paterni affectus dissimularentur vitia, in exitium publicum eruptura, aut ne patri tam tristici sententiæ pronunciandæ necessitas imponeretur.

Observ. 515.

Ceterum patresfamilias) Hactenus de patria potestate presse dicta. Deinde in statu naturali, etiam occurrit *imperium familiare*, quod rationem alicujus imperii civilis habet *add. d. c. 2. §. II.*

Observ. 516.

Verum postea imperium familiare) In statu civili *vid. Observ. 510.* imperium familiare, ad usum & decus civitatum, fuisse attemperatum docetur *h. add. l. 6. c. 2. §. 12.* Distinctius ita dicendum (1) in statu civili potestas, quam pater, ut genitor, & ut caput familiæ, habeat, non amplius distinguitur, sed potius (2) quicquid Patri per legem civilem vel relictum, vel concessum est, id promiscue juris patrii nomine venit, solet, etiam (3) potestas patria ejusmodi effectibus per legem civilem donari, qui
neque

neque juri patrio, neque imperio familiari, in statu naturali, formaliter insunt.

§. 8. Sed ubi *proles familia paterna plane excessit*, & vel novam sibi familiam constituit, vel alteri adjungitur; potestas quidem patria solvitur, ut tamen semper pietatis & observantiæ debitum maneat; quippe fundatum in meritis parentum, quibuscum paria facere liberi nunquam aut rarissime creduntur. Et ista merita non in eo tantum consistunt, quod parentibus liberi vitam debeant, occasionem omnium bonorum; sed & quod laboriosam ac sumtuosam educationem eorum susceperint, qua eos in commoda humanæ societatis membra formarunt, ac sæpe de mediis vitam commode & copiose exigendi iisdem prospexerunt.

Observ. 517.

Sed ubi proles) Juri patrio respondet in liberis obligatio, qua non tantum exercitium imperii paterni admittere, sed &, ob beneficia sibi collata, gratitudinem, quavis occasione, ipsis exhibere tenentur §. 8. *b. add. l. 6. c. 2. §. 10.* utrum vero generatio an educatio, sit majus beneficium, de quo *d. §. 10.* quædam recensentur, ea disquisitio, est argumentum declamationis scholasticæ, in vita civili autem ejus nullus usus, ut, eam ad seria referre velle, ineptum fuerit.

Observ.

Observ. 518.

Potestas quidem patria solvitur) Verius est, quod potestas patria, naturaliter spectata, quamdiu Pater vivit, nec delicto atrociori se eadem indignum facit, plane non solvatur, sed saltem pro diverso liberorum statu, alteretur, imminuatur, ac ejus exercitium quandoque suspendatur: mutatio igitur familiæ, de qua hic sermo est, tollit in statu naturali, imperium familiare, in civili, patriam potestatem à lege civili dependentem, quæ etiam modos solvendi magis determinat.

§. 9. Etsi autem parentibus obligatio educendi prolem à natura sit injuncta; id tamen non obstat, quo minus, utilitate prolis aut necessitate id exigente ejusdem *administratio alteri commendetur*; ita tamen ut inspectionem sibi in istum delegatum parens reservet. Unde & pater non solum præceptoribus idoneis filii informationem recte committit; sed & eundem alteri adoptandum dare potest, siquidem exinde in filium aliquod sit emolumentum redundaturum. Et si nulla alia ratio sit prolem alendi, potius quam inopia extinguatur, pater eam oppignorare, aut vendere in tolerabilem servitutem potest, saltem sub lege retractus, ubi pater ad lautiorum fortunam pervenerit, aut quispiam ex cognatis istum redimere velit.

Quod

Quod si autem parens per inhumanitatem prolem exposuerit & abjecerit, is, qui eandem sustulerit atque educaverit, in paternum quoque jus succedet; ita ut iste alumnus filialem observantiam educatori suo debeat.

Observ. § 19.

Et si autem parentibus) Obligatio Parentum est, ut liberos probe educent, quam aliquando etiam *mediate* possunt, imo debent explere, ex quo nonnulla consectaria hic ducuntur *add. d. l. 6. c. 2. §. 9.* quibus hoc adjiciendum, quod ob justam causam, mater sobolem aliis lactandam committere possit, nam si id fiat eo saltem fine, ne voluptatibus & vanitatibus quid decedat, tum id corruptos arguere mores, ac obligationi matris naturali repugnare, satis quidem certum videtur.

Observ. § 20.

Quod si autem parens per inhumanitatem] Per expositionem, nunquam liberorum cura in alios recte transfertur, licet illa satis tuta sit, ac ad ædes, in populosis urbibus nonnunquam eo fine exstructas, fiat, nam semper suppetunt, media tutiora, adeoque expositio prohibita censeri debet. Quo sensu autem is, qui expositum, alendum suscipit, in parentum jus succedat, quod Autor iterum *b.* admonet, id *Obs. 509.* ostensum.

§. 10. Uti autem pater prolem familia sua ejicere non debet, educatione & auxilio istius
ad.

adhuc indigentem, citra gravissimas causas: ita & proles non nisi cum bona patris venia ex ipsius familia excedet. Cæterum cum liberi matrimonii fere contrahendi occasione paternam familiam relinquant; & vero parentum utique intersit, cui proles sua jungatur, & ex quibus nepotes sibi proveniant; inde officium filiale utique requirit, ut *patris consensum* heic sequantur liberi, nec eo invito conjugii socientur. Quod si tamen de facto invitis parentibus matrimonium contraxerint, & consummaverint liberi, jure quidem naturali id irritum non videtur; præsertim ubi familiam paternam non amplius isti onerare velint, & alias conditio non sit indecora. Inde si alicubi ejusmodi matrimonia habentur irrita, aut illegitima, id ex legibus civilibus est.

Observ. 521.

Ulti autem Pater) Obligatio Parentum eique surrogatum imperium, non tantum adest, sed & actu se exserit, quamdiu liberi auxilio Parentum indigent, si verò illi in eum perveniant statum, ut se ipsos alere, actionesque proprias dirigere queant, tum sive in familia maneant, sive eam deserant, obligatio illa quiescit, imperiumque suspenditur ac imminuitur, utrumque tamen ferente sic occasione, se iterum exserit. Quod si liberi enormiter de-

linquant, jure suo penitus privari possunt, in statu quidem naturali, arbitrio Parentum, in civili, Imperantis *add. d. c. 2. §. 12. in fin.*

Observ. §22.

Ita & proles non nisi) Solutionem juris patrii, non pertinere ad potestatem patriam, naturaliter spectatam, sed ad imperium familiare, aut potestatem, ex jure civili dependentem, jam *Observ. §18.* diximus. De cætero solutionem illam non nisi consensu utriusque partis fieri posse, ex communi jurium societatumque indole fluit ac, in civitatibus, per legem civilem magis determinatur *add. d. c. 2. §. 13.*

Observ. §23.

Cæterum cum liberi) Rectè ait Autor, liberos, matrimonia contracturos, consensum Parentum, ex lege gratitudinis, requirere teneri, poenam tamen obligationis violatæ, & neglecti consensûs, non esse ex lege naturali, sed civili *§. 10. b. add. d. c. 2. §. 14.* nam, in genere illa nullam poenam definit.

§. II. *Officium parentum* in hoc præcipue consistit, ut liberos commode alant, corpusque & animum per dextram & cordatam educationem ita forment, quo idonea & utilia membra societatis humanæ & civilis fiant, probi, cordati, & bene morati. Item ut eosdem ad idoneum & honestum vitæ genus adplicent, & quantum ratio & occasio fert

fert, fortunam ipsorum fundent & promoveant.

Observ. 524.

Officiam parentum) Hoc ex præcedentibus intelligitur; In summa ita dicendum: Officium est vel *commune*, quod ex generali socialitatis fonte fluit, ac alios quoque homines afficit, vel *proprium*, vi cuius, Parentes *ita liberos educare tenentur*, quo Deo, sibi ipsis & proximo, recte inservire queant, ex quo præstationes speciales fluunt §. 11. *h.* Neque tamen cura liberorum, in præjudicium socialitatis, seu aliorum injuriam & læsionem, est extendenda, cui abusui, in vitâ civili frequentissimo, memorata obligatio sæpe prætexitur.

§. 12. *Liberorum contra debitum* est parentes honorare, i. e. reverentiam illis exhibere non externis tantum signis, sed multo magis interna æstimatione, tanquam autoribus vitæ, ac tantorum aliorum beneficiorum; iisdem obedire; pro viribus inservire, in primis senio aut egestate confectis; sine consilio & autoritate eorum nihil magni momenti suscipere; & denique eorum morositatem, aut vitia, si qua inveniuntur, patienter ferre.

Observ. 525.

Liberorum contra) Officium liberorum est, ut *exercitium imperii paterni admittant*, quod ex reli-

giositate, philautia & socialitate repeti potest, ac *gratitudinem erga parentes exerceant*, quod ex socialitate fluit, utrumque plures conclusiones continet §. 12. b.

CAPUT. IV.

DE

OFFICIIS DOMINORUM ET SERVORUM.

§. I.

Postquam genus humanum multiplicari coepisset, atque deprehensum fuisset, quam commode res domesticæ aliorum ministerio curari possent; mature introductum fuit, ut ad operas domesticas obeundas *in familiam adsciscerentur servi*. Quos ab initio ultro sese obtulisse probabile est, inopia adactos, aut propriæ hebetudinis sensu; stipulatosque sibi perpetuam alimentorum & aliarum necessitatum præbitionem, in perpetuum hero sua ministeria addixisse. Deinde cum bella passim increbescerent, apud plurimos populos receptum, ut quibus *bello captis* vita donata esset, servitio addicerentur, una cum

cum prole, quæ deinceps ex ipsis esset proventura. Etsi apud multos populos nulla ejusmodi servitus in usu, sed omnia munia domestica per mercenarios ad tempus conductos expediuntur.

Observ. §26.

Postquam genus humanum) Societatem herilem, non esse immediate à naturâ, ex inæqualitate domini & servi liquet *vid. l. 6. c. 3. §. 1. 2.* hinc ejus origo omnino à *facto humano* repeti debet, quo ipso tamen *lex naturalis* non excluditur, cum hæc potius, ut *occasio & causa*, conjungi debeant. De cætero à captivitate, origo præcise non est deducenda, quemadmodum etiam absurdum est, imperium herile, civili æquale existimare, cum ejus quantitas, juxta mensuram facti præcedentis sit constituenda *vid. d. c. 3. §. 3.*

Observ. §27.

Quos ab initio) Quando, aut in qua gente, primum coeperit servitus, illud forte ostendi non potest. In universum tamen, ex indole generis humani, casibusque in eodem obvenientibus, probabile est, quod ad eam impulerit *indigentia & captivitas*, proximè verò eam produxerit *pactum & lex positiva*, ut adeò summatim servitus sit vel *pactitia* vel *legalis*. An vero illa hæc sit antiquior, ac ab initio servi perpetuas operas addixerint dominis, quod utrumq; Auctor hîc asserit, de eo in neutram partem certo

pronunciari potest, nec etiam hujus rei definitio, necessaria aut alicujus usus est. *add. l. 6. c. 3. §. 4. 5.*

§. 2. Prout autem sunt *diversi* velut *gradus servitutis*; ita & potestas herorum, & servorum conditio variat. *Mercenario temporario* dominus conventam mercedem; iste huic vicissim conventam operam debet. Et quia in eo contractu domini melior est conditio, ideo etiam ejusmodi minister domino pro ratione dignitatis reverentiam exhibere tenetur; & ubi malitiose aut negligenter opus fecerit; ejusdem coercitioni est obnoxius; quæ tamen ad gravem corporis afflictionem, multo minus ad mortem, propria autoritate sumendam, procedere nequit.

Observ. §28.

Prout autem sint diversi) Indoles igitur servitutis pactitiæ, ex pacto præcedente ejusque fine, intelligi debet, nam uti illud; nihil aliud est, quam species locationis, ita, juxta ejus modum, legem naturalem jura & obligationes introducere, manifestum est §. 2. *b. add. d. c. 3. §. 4.*

Observ. §29.

Ejusdem coercitioni est obnoxius) In statu civili, ac servis merè mercenariis, hoc vix obtinet, neque etiam finis societatis herilis hoc exigit, cum servus delinquens reparationi damni saltem

tem sit naturaliter obnoxius, poena autem, si quam meruit, Magistratus arbitrio relinqui debeat, quod si vero servus injuriis domini iram provocet, ab eoque plagas accipiat, id jus coërcendi non infert, sed ea mala per modum belli imponuntur, etiam licite, si modus servatus sit.

§. 3. Ejusmodi autem *servo*, qui sese ultro alicui in perpetuum servitium addixit, dominus perpetua alimenta, & quæ alia vitæ necessaria sunt; ille huic vicissim perpetuas operas, quascunque dominus præscripserit, præstare debet, & quicquid ex illis provenit, domino fideliter consignare. In quibus tamen virium & dexteritatis servi humaniter rationem habebit dominus, ne vires ipsius excedentem laborem cum asperitate exigat. Castigationi quoque domini iste subest non solum ad expellendam negligentiam in opere exsequendo; sed & ut ipsius mores ad decus & tranquillitatem familiæ componantur. Non tamen invitus alteri vendi talis potest, quia ultro hunc & non alium dominum adscivit; & ipsius interest, utri serviat. Si atrox delictum in alium extra familiam admiserit, in civitatibus poenæ potestatis civilis subjacet; ubi familia segrex fuerit, expelli inde poterit. Sed ubi delictum in ipsam familiam segre-

gem sit admissum, à domino etiam per extrema coerceri poterit.

Observ. 530.

Ejusmodi autem servo) Si societas herilis sit perpetua, tum eadem jura & obligationes obtinent, quæ casu altero, quo ad tempus inita est, occurrunt, nisi quod hoc, temporaria, illo verò perpetua sint. Sed de hoc disquirere, forte vix operæ est pretium, cum non facile perpetuas operas quis alteri addicat, sed saltem mancipia, & qui ex his descendunt, ea conditione vivere soleant.

Observ. 531.

Castigationi quoque domini) Sed hoc jus, ex indole servitutis perpetuæ, non fluit, sed vel ad imperium familiare, in statu naturali, pertinet, vel in civitatibus, ex speciali legis civilis permissione, repetendum est.

Observ. 532.

Non tamen invitus] Hoc ex conventionem initâ resultat, ceu Autor ipse admonet, sed si jus castigandi domino competit, quod in verbis præcedentibus asseritur, jus invitum servum vendendi, ei negari non posse videtur, sunt enim illa jura ferè æqualia, imo in poenam posset talis venditio fieri!

Observ. 533.

Si atrox delictum) Distinctio, utrum servus extra, an in familiam deliquerit, hic omnino otiosa est, cum hoc solum attendendum sit, utrum

utrum dominus in *statu naturali*, an *civili* vivat, nam illo casu, atrociter delinquentem servum, vi imperii familiaris, punire, ob quodvis delictum, poterit, hoc verò poena à Magistratu erit imponenda *add. d. c. 3. §. 4.*

§. 4. In istos autem *servos*, qui bello capti fuerant, à plerisque durius agi cœptum, quod hostilis adhuc iræ quid in eos superesset, & quia ipsi extrema nobis nostrisque fortunis intentaverant. Quamprimum tamen inter ejusmodi victorem victumque mutua fides circa confociationem in familiam intercessit, omnis antegressa hostilitas remissa censetur. Et tunc utiq; injuriam etiam taliter adquisito servo facit dominus, si vel necessaria ad victum non suppeditet, vel citra rationem in eum sæviat, multoque magis si citra condignum delictum eundem occidat.

Observ. § 34.

In istos autem *servos*) Servitus, occasione captivitatis introducta, alterâ durior est, si mores Gentium spectes, quod ex sequentibus magis apparebit, *add. l. c. 3. §. 5.* de cætero tamen mores illi saltem ostendunt, quid fiat, non quid fieri debeat, ac in plerisque improbari debent, de quo postea.

Observ. § 35.

Quamprimum tamen) De cætero servitus illa constitui potest vel per *actum §. 4. h.* quod tamen non statim, simplici vitæ condonatione,

initum censetur *vid. d. c. 3. §. 6.* vel, quod frequentius puto, per *legem civilem*, quæ, cum pluribus Gentibus observari soleat, *jus Genitum* vulgo dici solet, revera autem nihil aliud est, quam *jus civile nonnullarum gentium*, exinde autem sequitur, quod hæc servitus, rectè *legalis* dicatur.

Observ. 536.

Et tunc utique) Sive autem pacto sive lege, servitus illa introducta sit, certum utique est, quod dominus, si limites positos transiliat, servo injuriam faciat *h.* quod frustra negat Hobbes *vid. d. l. c. 3. §. 8.* Eò facilius autem quis illud concesserit, si expendat, quod tota illa servitus, prout à plerisque gentibus observata fuit, aut adhuc observatur, sit mera injuria & immanitas.

§. 5. Circa illos quoque servos, qui bellica vi in eam conditionem fuerant abstracti, nec non qui pretio emuntur, receptum, ut non secus ac aliæ res nostræ in quemcunque placeret transferri, & ad instar mercium venire possent. Sic ut ipsum *corpus servi, domini esse* intelligeretur. Ubi tamen humanitas jubet, ut nunquam obliviscamur, servum utique hominem esse; adeoque nequaquam eum ita tractemus velut alias res nostras, quibus pro lubitu uti abutique, easque destruere possumus. Et ubi talem servum alienare

nare placet, ne iis data opera aut præter meritum addicatur, apud quos inhumana ipsum tractatio est mansura.

Observ. 537.

Circa illos quoque servos) Servitus hæc legalis ab eâ, quæ ultroneo pacto initur, longe differt, nam (1) ipsa serviendi conditio longe est durior (2) servos libertate civili ac existimatione humana privat, eosque ad conditionem brutorum redigit (3) illos eorumque res, dominorum proprietati subjicit *add. d. c. 3. §. 7.*

§. 6. Denique & id passim receptum; ut quæ ex servis parentibus nascitur *proles*, servilis & ipsa sit conditionis, pertineatque tanquam mancipium ad dominum matris. Id quod isthoc argumento defenditur, quod cujus est corpus, ejus quoque pars sit fructum esse, qui ex eo corpore provenit. Et quia ista proles nascitura plane non erat, si doming jure belli in parentem usus fuisset. Et quia parens nihil habet proprii, nulla ratio prolem ejusmodi alendi superest, nisi ex bonis herilibus. Cum igitur dominus alimenta præbeat ejusmodi proli diu ante, quam ipsius opera utilis esse queat, & sequentes operæ sui temporis alimenta non multum fere excedant; effugere eidem servitutem invito domino non licebit. Manifestum tamen est, cum ejusmodi vernæ nulla sua culpa in servitutem

vitutem perveniant, nullum esse prætextum, quare isti durius debeant tractari, quam conditio perpetuorum mercenariorum admittit.

Observ. 538.

Denique & id passim receptum) Tandem servitus illa (4) ad liberos quoque transmittitur, quæ transmissio, autoritate legis civilis facta, quibus rationibus aut prætextibus defendi soleat, Autor hic commemorat, *add. d. c. 3. §. 9.*

2. Præter hæc, alia nonnulla hic annotari debent [1] miseriam hujus servitutis, in libertatis & exstimationis defectu, præcipuè consistere *vid. d. c. 3. §. 10.* (2) servitutum illam, cum sit a lege civili, non posse tolli, nisi permissu Imperantis, qui adeo in civitatibus, varios manumittendi modos introducere, vel introductos limitare, eorumque effectum amplius determinare solet *add. d. c. 3. §. 11.* (3) Servitutum, pacto inter victorem & victum constitutam, non statim tolli, si dominus servo diffusus, vincula physica ei injiciat, licet cum Hobbesio, ita persuasum videatur Autori *d. c. 3. §. 6. in fin. §. 11. n. 5. conf. Cumberland. de leg. natur. c. 9. §. 14*
3. In genere quæri potest, an servitus illa, non dicam, cum regulis christianismi, sed communis socialitatis, conciliari nequeat? Circa quod distinctè pronunciandum, si enim quis bello injusto in servitutum rapiat homines innocentes, tum servitus illa, injuriæ continuatio est, adeoque dubio procul juri naturali repugnat. Idem, dicendum si bellum quidem justum

iustum sit, sed mancipia, brutorum instar, a dominis occidi queant. Si vero servitus, iusto bello introducta, intra illos limites constringatur, ad quos, quoad privatos, in civitate Romanâ, eam revocavit Imperator Antoninus, tum illa communiter licita existimatur, sed si rem penitus consideres, nec hoc respectu illa defendi potest, nam hoc utique humanitati repugnat, ut homo brutis, ad effectum commercii, comparetur, ac, ad operas duriores præstandas, rigide adstringatur, ut non dubitem, servitutem illam esse emortuæ socialitatis certissimum indicium.

¶ Quæ cum ita sint, meritò servitus illa inter Christianos est sublata, cessat etiam quæstio, an illam reduci, utile sit? imo etiam si eam admittas, nulla tamen utilitas ejus reductionem suadet, nam qui sciscunt, *sublatam, apud plerosque Christianorum, servitutem, inter causas esse, quare tanta colluvies furum vagabundorum & validorum mendicorum passim occurrat vid. d. c. 3. §. 10.* illi mali hujus causam & remedium non intelligunt.



CAPUT V.

DE

CAUSA IMPULSI-
VA CONSTITUENDÆ
CIVITATIS.

§. I.

Quanquam vix sit jucunditatis quid
atque commoditatis, quod per ha-
ctenus enumerata officia, statusque
obtineri non posse videatur; quare
tamen mortales non contenti parvis illis,
primisque societatibus magnas societates,
quæ *civitatum* nomine veniunt, constitue-
rint, jam investigandum restat. Ex hisce e-
nim fundamentis deducenda est ratio officio-
rum, quæ statum hominum civilem comitan-
tur.

Observ. 539.

Quoniam vix sit jucunditatis) Tres societates,
hactenus expositæ, si cohæreant, *Familia* no-
men assumunt, de qua tamen peculiariter a-
gendum non videtur, quia si Patrem familias,
ad uxorem, liberos & servos referas, officia il-
lorum ex præcedentibus patent, si verò il-
lum,

lum, ut Principem, consideres, eadem Ejus, quæ summorum Imperantium, sunt jura, de quibus deinde agendum erit. Porro non opus est, ut de *Pagis, Vicis, Oppidis* vel *Municipiis* seorsim agatur, nam uti incertum est, an per illos gradus, præcisè ad civitates perventum fuerit, ita, eo posito, manifestum est, corpora illa, in statu naturali, Civitatum instar fuisse, hinc non opus est, ut tractationem, mox instituendam, hic occupemus. Quodsi autem illa corpora considerentur, prout hodie in statu civili occurrunt, tum liquidum est, eorum expositionem, pertinere ad tractatum de subditis, hi enim, præter vinculum subjectionis generale, variis nexibus conjuncti ac per peculiaria ejusmodi corpora distributi esse solent. Quæ cum ita sint, Autor ad Civitates statim pergit §. 1. b. in qua quidem tractatione summatim tria spectari debent [1] causa impellens (2) aptitudo coëuntium & (3) ipsa civitatum structura.

§. 2. Heic igitur *non sufficit dixisse; hominem per naturam ipsam rapi ad societatem civilem*, ut citra eam nec possit, nec velit vivere. Sane enim cum apertum sit, hominem esse tale animal, quod seipsum & suam utilitatem quam maxime amat; necessum est, ut dum ultro societatem civilem affectat, aliquam utilitatem inde sibi proventuram respexerit. Et quanquam extra societatem cum
sui

sui similibus homo erat futurus animal longe miserrimum : tamen cum naturalibus desideriiis & necessariis hominis per primas societates, & per officia ex humanitate, aut pactis præstita abunde potuerit satisfieri ; non statim ex socialitate hominis inferri potest, ejus indolem præcise ad societatem civilem ferri.

Observ. § 40.

Heic igitur non sufficit) Primum quod attinet, hominem ad civitatem non rapuit *natura*, i. e. homo per naturam, sepositis objectis moventibus societatem civilem necessario non appetiit §. 2. *b.* quemadmodum ejusmodi appetitus, quoad diversum sexum occurrit, qui non tantum objectis præsentibus moveri, sed & absentia ultro velut quærere solet, quod quidem vel Aristoteles, vel Ejus sectatores, existimasse censentur *vid. l. 7. c. 1. §. 1. 2. 3.* de quo tamen mox amplius videbimus.

§. 3. Id quod planius fiet, si consideremus, quænam *conditio ex constitutis civitatibus* apud homines proveniat : quid requiratur, ut quis *vere* dici queat *animal politicum*, i. e. *bonus civis* : quid denique deprehendatur *in natura hominis, indoli vite civilis repugnans.*

§. 4. Qui *civis* fit, libertatis naturalis jacturam facit, ac imperio se subjicit, quod jus vitæ & necis complectitur ; & cujus jussu plurima facienda, abs quibus quis alias abhor-

horrebat; & omittenda, quæ vehementer adpetebat. Pleræque etiam actiones ad bonum societatis referendæ, quod sæpe à bono singulorum videtur discrepare. Atqui ad hoc per inclinationes jam congenitas fertur homo, ut nemini subjectus esse, ut omnia suo agere arbitrio, ut proprio commodo in omnibus velificari velit.

§. 5. *Animal verè politicum*, i. e. *bonum civem* illum dicimus, qui jussis imperantium promte paret, qui ad bonum publicum omnibus viribus connititur, ac post illud privatum bonum lubenter habet; imo qui nihil sibi bonum credit, nisi idem bonum quoque sit civitati; qui denique adversus alios cives commodum sese gerit. Atqui paucorum ingenia ultro ad hunc finem attemperata inveniuntur; maxima pars metu poenæ utcunque continetur; multi per totam vitam mali cives, & animalia non politica manent.

§. 6. Denique *nullum homine animal ferocius* aut indomitum magis, & quod in plura vitia, pacem societatis perturbare apta, sit proclive. Præter desideria enim cibi, venenisque, quibus bruta quoque solent committi, multis homo agitur vitiis, quæ bruta ignorant, uti est superfluarum rerum insatiabilis cupido, & sævissimum malorum am-
H h bitio.

bitio. Vivax item nimis injuriarum memoria, & vindictæ ardor, longo post tempore adhuc gliscens. Nec non infinita dissimilitudo inclinationum & adpetituum, & cuique pro studio suo extollendo pervicacia. Accedit, quod eo furore in proprium genus favire gaudeat homo, ut maxima pars malorum, quibus humana conditio vivit obnoxia, ab ipso homine proficiscatur.

Observ. §41.

Id quod planius fiet) De cætero ratio illi sententiæ constat, siue naturam hominis *integram*, quam ex S. literis credunt Christiani, siue *corruptam* supponas, nam *illa* civitatibus haut indignisset, sed homines integrâ naturâ præditi, legem naturalem, siue illis exactissimè servare potuissent, in hac vero observantiâ, vera felicitas hujus vitæ est posita, ut nulla appareat ratio, quare ejusmodi appetitus, naturæ integræ, fuerit velut implantandus, *banc* verò si respicias, homines corruptos, & civitates, aut potius subjectionem averfari, nec, ad subeundam conditionem civilem, satis aptos esse, pluribus hic ostendere voluit Autor §.3. 4. 5. 6. *add. d. l. 7. c. 1. §. 4.* hoc autem posito, perinde absurdum est dicere, hominem per naturam ad civitates rapi, ac si contendas, claudum, innatâ quadam & immutabili proclivitate, ad cursum ferri.

§. 7. Genuina igitur & principalis causa, quare patresfamilias, deserta naturali libertate, ad civitates constituendas descenderint, fuit; *ut presidia sibi circumponerent contra mala, quæ homini ab homine imminent.* Nam uti post Deum O. M. homo homini plurimum prodesse; sic & idem non minus obesse potest. Et recte malitiam hominum, ejusque remedium æstimant, qui in proverbii vicem receperunt: nisi judicia essent unus alterum devoraret. Postquam autem per civitates in talem sunt digesti ordinem homines, ut à mutuis læsionibus tuti esse possent, ultro deinde consecutum fuit, ut eo uberius fruerentur commodis, quæ ex hominibus in homines provenire apta sunt; puta, ut moribus à puero imbuerentur commodioribus, & varias invenirent, atque excolerent artes, quibus vita humana copiosa & commoda fuit reddita.

Observ. 542.

Genuina igitur & principalis causa) Ulterius igitur progrediendum ac ostendendum est, quid civitatem homini fecerit *appetibilem*, quæque adeò causa humanam naturam instigaverit? Alii censent, civitatem esse opus naturæ, quod naturali ordine & consecutione sit productum, quod à scopo aberrare, Autor ostendit *d. l. 7. c. 1. §. 5.* alii per indigentiam homines, ad constituendas civitates, fuisse permotos, arbi-

trantur, quod itidem rejicit *d. c. 1. §. 8.* ac Ipse existimat, ob *metum malorum, extra civitatem futurorum*, ac *spem securitatis in civitate obtinendæ*, homines in societates civiles concessisse *§. 7. h. add. d. l. 7. c. 1. §. 7.*

Observ. 543.

Postquam autem per civitates) Occurritur hic tacite iis, qui indigentiam, pro causa impellente, habent asseriturque quod vita cultior, ejusque spes, non fuerit *causa* civitatum constituendarum, sed constitutarum *confectarium*, cui sententiæ quivis pro suo arbitrio pretium statuat, neque enim vel hanc, vel Autoris opinionem sequor.

§. 8. Illustrior adhuc fiet causa constituendæ civitatis, si consideremus, *alia media non fuisse suffectura* reprimendæ hominum malitiæ. Quanquam enim *lex naturalis* præcipiat, ut ab omnibus injuriis inferendis homines sese abstineant: tamen ejus legis reverentia id præstare non potest hominibus, ut in libertate naturali satis tuto degere queant. Et si enim forte dentur homines animo ita modesto, ut ne impunitate quidem data alios violare velint; alii quoque metu proventuri inde mali cupiditates suas utcunque compescant: magna tamen ex adverso eorum turba datur, quibus omne jus vile est, quotiens spes lucri arriserit, & fiducia propriarum virium,

virium, aut solertiæ, qua repellere aut eludere læsos sese posse sperent. Quos uti nemo non cavere nititur, qui salutem suam amat: ita cautio illa commodius, quam ope civitatum obtineri nequit. Nam utut aliqui mutuo fidem dederint de auxiliis invicem ferendis; ni tamen adsit aliquid, quo & judicia eorum uniantur, & voluntates firmiter adstringantur ad explendam fidem, frustra ab iisdem certum auxilium sibi quis promittit.

Observ. 544.

Illustrior adhuc fiet causa) Veritatem suæ sententiæ magis, persuasurus Autor, contendit, nihil præter civitates, procurandæ securitati suffecisse, non (1) *legem naturalem*, quod facile quis concefferit, nam licet homines legem illam observare debeant, attamen per malitiam non observant, ut in ea persuasionem securitatem suam collocare velle, nimis simplex fuerit *add.* d. c. 1. §. 8. 9. 10.

Observ. 545.

Nam utut aliqui mutuo fidem dederint) Amplius censet, nec (2) *fœdera suffecisse, cum deficiente imperio civili, ad fidem explendam, paciscentes adigi satis nequeant*, verum hoc gratis dici & utique fœdera, pro isto rerum statu securitatem præstare potuisse, deinde ostendam.

§. 9. Denique licet lex naturalis hominibus satis insinuet, non impune laturos, qui

alios injuria affecerint: tamen neque *metus divini Numinis*, neque *conscientiæ morsus* sat validam deprehenduntur vim habere, quorumvis hominum malitiæ coërcendæ. Nam apud multos educationis & consuetudinis vitio vis rationis velut obsurdescit. Unde fit, ut illa præsentibus tantum immineant, futurorum parum curiosi; ac non nisi iis moveantur, quæ in sensus incurrunt. Cum autem vindicta divina lento fere pede soleat incedere; inde pravis mortalium præbetur occasio ad alias causas impiorum mala referendi; præsertim cum sæpe videant, improbis affatim adesse, quæis vulgus felicitatem metitur. Accedit, quod stimuli conscientiæ, quæ facinus antecedunt, non ita validi videantur, quam qui idem subsequuntur; quando id, quod factum est, infectum amplius fieri nequit. Enimvero pravis cupidinibus reprimendis præsentaneum, & ad indolem hominum probe, attemperatum remedium in civitatibus reperitur.

Observ. 546.

Denique licet *lex naturalis*) Tandem (3) *nec metum divini Numinis, nec conscientiæ morsus reprimenda hominum malitiæ suffecisse add. d. c. i. §. ii.* quod non novum argumentum, sed primi potius pars est, ac adeo cum eo conjungi debet, nam

nam uti lex naturalis non tantum ostendit, quid sit agendum vel omittendum, sed & poenam divinam simul minatur, ita, si mens humana illorum cognitione imbuatur, inde Conscientia exoritur.

Observ. 547.

Nam apud multos) De cætero facile quis etiam illam probationis partem admiserit, nam poena divina non statim urget, præterea in multis conscientia vel plane deficit, vel affectuum intemperie vincitur, quæ Autor hic inculcat, ut illorum quidem consideratio homines securos præstare non possit.

2. Hæc est Pufendorffii sententia, quæ licet Scriptoribus recentioribus plerumque probari soleat, mihi tamen rationi & veritati parum convenire, videtur, nam primo eadem, sententiæ ab initio rejectæ, si hæc recte intelligatur, non est contraria, qui enim hominem naturâ ad societatem civilem ferri docent, illi objecta externa, naturam moventia, non excludunt, sed potius præsupponunt *vid. Jacob. Thomas. Phil. Pract. Tab. 39. n. IV. V.* dum igitur ista Pufendorffius enucleatius tradere vult, tantum abest, ut sententiæ Peripateticorum contradicat, ut potius eam magis explicet. Illi bonum, quod naturam hominis ad civitatem impulerit, in genere allegant, Autor illud in specie nominat, inter quæ nullam esse contradictionem, facile liquet.

3. Sed secundò tota illa philosophia, quæ universalem aliquam ac uniformem causam impellentem adstruit, ac eo nomine metum indigentiam vel simile quid allegat, à veritate abire videtur, nam præsupponit, quasi ingens hominum multitudo convenerit, ac de construendis civitatibus deliberaverit, tandemque, post maturam deliberationem, decreverit, civitates esse erigendas eam ob causam, quod alias vita parum secura vel culta sit futura. Atqui talis hypothesis ab omni verisimilitudine est aliena, cum omnia instituta humana à tenuibus oriri soleant initiis, & solennis ejusmodi conventus probari nequeat, imo nec primi homines, etiamsi illos congregatos fuisse concedas, exactam civitatis, & bonorum vel malorum, eam comitantium, cognitionem habuerint, utpote quæ longâ experientiâ hominibus, post constitutas civitates demum advenire solet, negata vero illâ notitiâ, decretum quoque eam præsupponens corrumpit.

4. Tertiò quod metum in specie attinet, nolim quidem eum negare, contra quod disputat Autor *d. l. 7. l. c. §. 7.* hoc tamen contendo, eum non fuisse tantum, ut ideo necessario in Civitates fuerit coëundum, nam ab hominibus, vel fortuito concurrentibus, vel pacto aliquo consociatis, mala, quæ metuebantur, inferri debuerunt, hinc non apparet ratio, quare eadem ab hominibus, simili nexus genere conjunctis,

junctis, non potuerint repellere, & quare adeo foedera securitatem hominibus, in statu naturali, ante civitates, præstare non potuerint, de quo *Observ. 545.* jam dictum, licet enim imperium civile paciscentes, ad servanda foedera, non adegerit, attamen utilitas valide satis eos impellere potuit, cum illa foedera sanctissimè servari soleant, quæ mutua utilitate sanciantur, ceu ipse Autor *d. l. 7. c. 1. §. 2.* recte docet. Facile igitur liquet, illos, qui metum, pro causa impellente, venditant, ejusmodi mala, quæ à civitatibus bene compositis, inferri possunt & solent, in oculis habere, eademque ad illum generis humani statum, in quo civitates nondum erant, transferre, quo ipso philosophiæ hujus inconcinnitas apparet.

5. Magis seriò igitur, si de causâ impulsiva constitutarum civitatum, philosophandum sit, dicerem, homines naturâ ad societatem civilem ferri, ob *appetitum boni*, quæ est sententia Peripateticorum, bonum verò neque certum, neque uniforme quoad omnes homines, nominari posse, sed hunc hujus, illum alterius consideratione, fuisse permotum, ut in civitatem concederet, quare is etiam, qui per vim imperio subiectus fuit, appetitu boni permotus dici potest, nam, pro isto rerum statu, maluit esse civis, quam mori, aut graviora mala pati, seu, ex duobus malis minus elegit.

6. Quod si tamen magis definitè pronuncian-

dum sit, non improbabile est, si prima civitatū initia, ab *ambitione*, repetas, dum callidi & ambitiosi, coadunatis utcunque hominibus, simpliciores & imbelles opprēssere, in eosque dominatum sumserunt, hoc enim ex indole hominum, quid scilicet illi appetere vel averfari soleant, imo ex certaminibus, quæ circa imperia constituta occurrunt, non male forsitan colligas.

7. Jactis ita fundamentis, alii variis de causis accessere, aut etiam nova corpora civilia condere, vel evitando dominatui, respublicas polyarchicas instituere coeperunt. Postquam vero unum & alterum ejusmodi corpus validum inter homines exstitit, tum non abnuerem, alios *metu malorum* præcipuè fuisse impulsos, ut in similia corpora coirent, ne ab aliis, arctiori vinculo conjunctis, opprimerentur, sed quod metus prima fuerit causa, quæ magnum hominum numerum, ad solennem deliberationem, ac civitatis constituendæ decretum ejusque executionem compulerit, id utique fabulosum videtur.

8. Illud interim manifestum est, quamcunque demum causam constitutarum civitatum adstruere velis, quod Civitatum existentia hominum *naturam ex parte malam* præsupponat, nam vel à malitià, vel in remedium malitiæ, illæ sunt introductæ, quod si autem hominum natura penitus *recta & integra* foret, tum nihil

es.

esset quod civitatem homini facere potuerit appetibilem.

CAPUT VI.

DE

INTERNA CIVITATUM STRUCTURA.

§. I.

Proximum est, ut investigemus, qua ratione civitates sint extructæ, earundemque *interna compages* cohæreat. Ubi illud primo manifestum est, adversus mala ab hominum pravitate imminetia singulis hominibus neque locum aliquem, neque arma, neque animantia bruta commodius & efficacius præsidium potuisse suppeditare, quam *alii homines*, eorum autem vis cum in longe distantia non feratur, necessum erat *conjugi*, per quos finis iste obtinendus erat.

Observ. 548.

Proximum est.) Pergit Antor ad civitatum *structuram*, sed debebat præcedere disquisitio de *aptitudine coëuntium* vid. *Observ. 539.* de qua paucis ita dicendum. Homines ad civitates sunt apti, ob *usum rationis*, quo structuram civitatis

tis intelligunt & efficere possunt *vid. l. 7. c. 1. §. 3.* deinde ob *residuam naturæ bonitatem*, cui si accedat debita cultura, homines utique animalia politica, aut boni cives esse vel evadere possunt.

Observ. 549.

Ubi illud primo manifestum) Circa Civitatum structuram spectari poterit *materia & forma*, illam constituere homines, facile liquet, nec opus est, ut ex metu malorum, cum Autore, hoc repetamus, *§. 1. b. add. l. 7. c. 2. §. 1.*

Observ. 550.

Eorum autem vis) Forma consistit in legitima hominum conjunctione, cujus necessitatem Autor hic iterum ex sua, de metu, hypothese, repetit, sed non opus est, ut ad causam impellentem præcise respiciamus, cum finis vel ultro, vel variis de causis assumtus, illa omnia determinet. Id potius observandum, quod unio voluntatum moralis, quæ consensu fit, dupliciter fieri possit, vel enim plures ita uniuntur, ut maneant æquales ac singulis competat potestas de iis, quæ ad utilitatem totius coetus necessaria existimantur, statuendi, vel ita, ut sublata æqualitate, uni saltem vel quibusdam, illa facultas, cum imperio in reliquos, competat; Prior nexus, doctrinæ gratiâ, dici poterit *simplicis obligationis*, posterior imperii, homines *pacto & imperio* connecti docet Autor *l. 7. c. 4. §. 9.* sed inter hæc non est justa
op-

oppositio *conf.* Specim. jur. publ. Romano-German. l. 6. c. 7. §. 13. 14. 15.

§. 2. Nec minus constat, ejusmodi securitatem adversus alios homines præstare non posse duorum vel trium consensionem. Quia facile est, ut ad paucos hosce opprimendos tot conspirent, quot certissimam sibi de illis victoriam spondere possint; quibus spes successus & impunitatis fiduciam ad aggrediendum est datura. Igitur ad istum finem necessarium est, *insignem hominum multitudinem* sese conjungere; ut paucorum hominum ad hostes accessio non sit ipsis conspicui momenti ad victoriam.

Observ. 551.

Nec minus constat) Requirit porro Autor ad civitatem *homines multos* §. 2. b. add. l. 7. c. 2. §. 2. sed ex sua iterum hypothese, qua ob metum malorum, homines primò coisse arbitratur, quam si neges, etiam hic aliter erit pronuncian- dum, mihi sic videtur: Si civitatem ex sola autonomia æstimes, tum familia, in statu naturali exstistens, civitas est, illiusque adeo numerus ad hanc sufficit, si vero civitatem, vel ut majus quid, à familia distinguas, tum numerus, hac major, ad illam requiritur, qui deinceps, ex comparatione cum Rebus publicis, vicinis, amplius determinandus est.

§. 3. Inter multos istos, hoc fine coëun-
tes,

tes, oportet, ut sit *consensus circa adhibenda media ad eundem finem idonea*. Nam etiam multi, ni consentiant inter se, sed distracti sententiis in diversa tendant, nihil efficient. Aut licet ad tempus consentiant, impellente aliquo affectu: mox tamen, prout mutabilia sunt hominum ingenia & inclinationes, in diversa abibunt. Et quamvis pacto inter se promittant, quod ad defensionem communem vires suas sint adplicaturi: tamen ne hoc quidem modo ad diuturnitatem isti multitudini sat cautum erit. Sed oportet, ut quid amplius accedat, ut qui semel ad pacem & mutuum auxilium causa communis boni consenserint, prohibeantur, ne postea, cum bonum suum privatum à publico discrepare visum fuerit, iterum dissentiant.

Observ. §2.

Inter multos istos) Ut penitus constet, quo nex genere civitates construantur, præsupponendum est, quod civitas sit vel *simplex* s. *una*, vel *composita*, quæ ex nonnullis constat, ac Systema civitatum etiam dici solet. Hoc præsupposito Autor rectè, quoad Civitatem simplicem, requirit *unionem*, rectè etiam *nexum simplicis obligationis*, velut insufficientem, removet §. 3. b. add. l. 7. c. 2. §. 3. 4.

§. 4. Cæterum in humano ingenio duo

po-

potissimum occurrunt *vitia*, quæ impediunt, quo minus multi, sui juris & abs se invicem non dependentes, diu in communem aliquem finem possint conspirare. Unum est *diversitas inclinationum* & *judicii* circa discernendum, quod ad finem est utilissimum: cui in multis est conjuncta *betetudo* ad dispiciendum, quæ sententia ex pluribus sit magis proficua, & *pervicacia* mordicus defendendi, quod semel utcunque arriserit. Alterum est *torpor* & *aversatio* ultro faciendi, quod utile est, ubi desit aliqua necessitas, quæ tergiversantes, velint, nolint, ad officium faciendum subigat. Priori vitio occurritur, unitis in perpetuum voluntatibus omnium. Posteriori autem, si constituatur aliqua potestas, quæ præsens & in sensus incurrens malum infligere possit communi utilitati reluctanti-
bus.

§. 5. *Uniri multorum hominum volun-
tes* nulla alia ratione possunt, quam si unus-
quisque suam voluntatem voluntati unius
hominis, aut unius consilii subjiciat, ita ut de-
inceps pro voluntate omnium & singulorum
sit habendum, quicquid de rebus ad securita-
tem communem necessariis ille voluerit.

§. 6. *Potestas* autem talis, quæ omnibus
sit *metuenda*, itidem inter multos homines
nulla

nulla alia ratione constitui potest, quam si omnes & singuli sese obligaverint, quod eo modo vires suas sint adplicaturi, sicut ille voluerit, in quem omnes virium suarum directionem resignarunt. Ubi autem & voluntatum & virium unio facta fuerit, tunc demum multitudo hominum in validissimum corpus, civitatem nimirum animatur.

Observ. 553.

Ceterum in humano ingenio) Recte etiam Autor, commemoratis vitiis, quæ coetus humanos facile solvere soleant, arctiorem nexum, quem *imperii* diximus, requirit §. 4. b. ejusque indolem in *submissione voluntatum & virium*, uni vel paucis facta, consistere docet §. 5. 6. add. d. l. 7. c. 2. §. 5. 6.

§. 7. Porro ut civitas *regulari modo* coalescat, requiruntur *duo pacta*, & *unum decretum*. *Primo* enim omnium illi multi, qui in libertate naturali constituti intelliguntur, ubi ad civitatem faciendam congregantur, inter se *singuli cum singulis pactum* ineunt, quod in unum & perpetuum coetum coire velint, suæque salutis ac securitatis rationes communi consilio ac ductu administrare; uno verbo, quod velint concives mutuo fieri. In quod pactum omnes & singuli ut consentiant, necessum est; & qui non consenserit, is extra futuram civitatem manet.

Observ.

Observ. 554.

ut civitas) Non novus nexus innuitur, pro-
quidem videri poterat, sed quomodo ne-
s imperii, antea delineatus, producat, ex-
nitur. Nimirum, ex sententia Autoris, ut
bditi, Imperanti, nexu imperii arctiori ob-
ingantur, primo quidem inter ipsos pactum,
io simplex obligatio producat, intercede-
debet §.7.b.

. 8. *Post isthoc pactum oportet, ut decre-*
fiat, qualis forma regiminis sit introdu-
ta. De hac enim antequam constitutum
ihil constanter poterit expediri, quod ad
munem salutem faciat.

. 9. Post decretum circa formam regi-
is *altero pacto* opus est, quando constitu-
ur ille vel illi, in quem vel quos regimen
entis civitatis confertur; quo quidem
to hi ad curam communis securitatis &
tis reliqui ad obsequium his præstandum
obstringunt; quo ipso etiam omnes su-
voluntatem subjiciunt voluntati istius vel
rum, simulque suarum virium usum & ad-
ationem ad communem defensionem ei-
n vel iisdem deferunt. Atque hoc pactum
rite fuerit executioni datum, tunc de-
m perfecta & regularis civitas inde pro-
nit,

Post isthoc pactum) Postquam multitudo simplici illo pacto, in aliquem coetum, utcunque digesta est, facile deprehendit, unionem illam, ad procurandam salutem publicam, non sufficere, nec diu durare posse, hinc de arctiori conjunctione, deliberat & decernit §. 8. b. post quod decretum, sequitur secundum pactum, quo subditi voluntates & vires, designato Imperanti submitunt, atque ita nexum imperii producunt §. 9. b. add. d. l. 7. e. 2. §. 7. 8. 9. 10. 11. 12.

2. Cæterum ista Pufendorfi philosophia, recentioribus licet nonnullis *vid. Kulpis Monzamb. p. 2. c. 6. §. 7. pag. 226. n. 2.* probata, partim ex falsis hypothesebus (quasi ingens hominum multitudo, civitatis condendæ causa convenit, aut omnes, vel primæ saltem civitates, libero consensu constructæ sint, quarum neutra tamen veritati est consentanea] resultat, partim, iis licet admissis, in se falsa est.
3. Nimirum primum pactum, illudque insecutum decretum, quod Autor loquebatur, vel ad fabulas pertinet, vel ita simpliciter non est admittendum, nam si quis imperium, per vim in alios sibi sumat (quæ civitatum origo valde probabilis est) tum manifestum est, quod primum illud pactum & decretum cessent, & licet illi coetui deinceps alii accedant, quia tamen Imperans jam adest, cum eo saltem, non etiam concivibus, pactum initur.

4. Si verò hominum multitudo ultrò civitatem constituere velit (qui casus, post prima civitatum initia, dabilis omnino est) tum quia nondum adest Imperans, cum quo pactum inire queat, hætenus utique primum illud pactum, idque secutum decretum, erit admittendum, quo per ea, multitudo, ad pactum cum Imperante celebrandum, habilis reddatur, interim primum illud pactum, magis re ipsa seu facto, quam expresso consensu fiet, & post pactum, cum Imperante deinceps initum, exspirabit, nam, constituta civitate, nullus ejus effectus amplius apparet.
5. Breviter : Si imperans sibi facit subditos, tum unicum pactum adest, si subditi Imperantem quærunt, tum duplex quidem occurrit, sed primum saltem temporarium est, & efficiendo secundo interim confectum, non secus ac pulpita vel contignationes, ædium extruendarum causa, confici solent, quæ his exstructis, iterum tolluntur.
6. Absolvitur igitur omnis Civitatum structura, unico pacto, quod inter Imperantem & futuros subditos initur. Hoc reciprocum est, ac subditos nexu imperii, Imperantem verò simplici obligatione obstringit, ac non simul sed successive celebratur, vel saltem pacto primævo, successu temporis, alii accedunt.

§. 10. Civitas ita constituta ad modum unius personæ concipitur, unoque nomine ab

omnibus particularibus hominibus distinguitur, atque dignoscitur; habetque peculiaria *jura*, ac *res* proprias, quæ neque singuli, neque multi, neque adeo omnes simul citra eum, qui summum habet imperium, seu cui regimen civitatis commissum, sibi asserere possunt. Unde civitas *definitur*, quod sit persona moralis composita, cujus voluntas ex plurimum pactis implicita & unita, pro voluntate omnium habetur, ut singulorum viribus & facultatibus ad pacem & securitatem communem uti possit.

Observ. 556.

Civitas ita constituta) Poterit Civitas considerari vel in ordine ad *Imperantem* & *subditos*, vel *alios*, illo respectu per modum *status* concipitur, in quo Imperantes & subditi existunt, hoc vero, ad modum *personæ moralis compositæ* §. 10. *h. add. l. 7. c. 2. §. 13.*

Observ. 557.

Unde civitas definitur) Desumpta est hæc definitio ex Hobbesio *de civ. c. 5. §. 9.* nec valde laudari debet, cum Civitatem & Imperantem confundat, ac licet de illâ auspicetur, in hujus tamen definitionem revera desinat; Facienda quidem, in definitione Civitatis, mentio Imperantis est, sed non ideo hic, in ejus locum substituendus, quod tamen aperte heic fit. Aliam & forte meliorem, definitionem dedi in Specim. Jur. publ. Romano-germ. *l. 6. c. 7. §. 16.*

§. 16. ubi etiam in sequentibus ostendi, in quo civitatis *perfectio* & *unitas* consistat, quæ huc transcribere non attinet.

§. 11. Exserit autem sese *voluntas civitatis*, tanquam principium actionum publicarum vel per unum hominum, vel per unum concilium, prout in illum aut hoc summa rerum fuit collata. Ubi penes unum hominem est regimen civitatis, civitas velle intelligitur, quodcunque isti homini, [cui sanam rationem constare præsupponitur,] placuerit, & quidem circa negotia, quæ ad finem civitatum spectant.

Observ. 558.

Exserit autem sese voluntas) Constituta civitate, existunt *Imperantes* & *subditi*. Illi sunt per quorum voluntatem physicam, voluntas totius civitatis se exserit, seu qui ea omnia, quæ utilitas civitatis requirit, ac quæ arbitrio humano effici possunt, facere, subditorumque actiones & vires, independenti imperio, eò dirigere possunt & debent.

Observ. 559.

[Ubi penes unum hominem] Si penes unum hominem imperium sit, tum Civitas quidem per ejus voluntatem celerrimè operari potest, sed non quævis hujus voluntas, pro illius voluntate haberi debet, sed tum demum, si homini illi (1) sana ratio constet (2) sciens & prudens ille agat, [3] circa negotia ad finem ci-

vitatis spectantia & quidem (4) juxta præscriptum legum fundamentalium, aliquid velit *add. l. 7. c. 2. §. 14.* sed ubi illa in tantâ libertate observantur? ut facile liqueat, quanto periculo, vita & fortunæ subditorum, imò & vicinorum imbellium, hoc rerum statu, sint expositæ.

§. 12. Verum ubi regimen civitatis collatum est concilium, ex pluribus hominibus constans, quorum quisque suam retinet voluntatem naturalem; regulariter illud habetur pro voluntate civitatis, in quod consenserit *major pars* hominum, ex quibus concilium componitur; nisi expresse statutum sit, quota pars concilii consentiens requiratur ad repræsentandam voluntatem universitatis. Ubi autem duæ sententiæ discrepantes, pares sint, nihil agetur, sed res in priori statu manebit. Inter plures sententias discrepantes illa prævalebit, quæ singulis dissidentibus major est; modo in ea tot conspirent, quot alias voluntatem universitatis per sanctiones publicas repræsentare possunt.

Observ. 56a.

Verum ubi regimen) Si imperium pluribus sit collatum, tum quia multiplex est voluntas, per quam actiones publicæ suscipi debent, adeoque dissensus oriri potest, hinc utile est, ut plures illi *nexu imperii* ita uniantur per leges funda-

damentales, quo majora valeant, ac plures conspirantes pro imperio decernere, ac pauciores dissentientes, ad servandum placitum, adigere queant, per quas leges ipsa etiam majoritas, ejusque effectus amplius determinatur, quod Autor §. 12. b. indicat, ac amplius l. 7. c. 2. §. 15. 16. 17. 18. 19. illustrat. An verò in hac aut illi Republicâ polyarchicâ, majora valeant, tum quæ majoritatis ratio esse debeat, illud ex pactis fundamentalibus cujusvis civitatis repetendum est; Interim si aliud expresse non sit constitutum, in rebus publicis simplicibus (secus in compositis) pro auctoritate majorum votorum præsumendum est, de quo pluribus egi in *Vindic. Vitriar. castigat. annot. 299. seqq.*

§. 13. Civitate ista constituta, ille, in quem imperium est collatum, prout est vel unus homo, vel unum concilium paucorum aut unum forum, *monarcha, senatus*, aut *populus liber* dicitur; reliqui subditi audiunt, aut *cives*, vocabulo hoc *latius* accepto. Etsi præstius illi quibusdam duntaxat cives soleant dici, quorum coitione & consensu primo civitas coaluit, aut qui in horum locum successerunt; nempe patresfamilias. Sunt porro *cives* vel *originarii* vel *adscititii*. Illi sunt, qui vel initio civitati nascenti interfuerunt, vel qui ex hisce sunt geniti; quos etiam *indigenas* ad-

pellari mos est. Hi autem sunt, qui civitati jam constitutæ extrinsecus accedunt eo fine, ut fortunarum ibi sedem figant. Nam qui tantum ad tempus commorandi causa in civitate versantur, etsi tantisper ipsius imperio subjiciantur; civis tamen non habentur sed peregrini aut inquilini vocantur.

Observ. 561.

Civitate ita constituta) Circa nomina Imperantium, quæ hic referuntur, illud observandum, quod Respublica sui juris, uti formam, ita etiam titulum mutare, ac v. gr. Ducem liberum, Regem dicere possit, eo effectû, ut ab subditis pro tali haberi debeat, exteris tamen liberum quoque erit, an eundem titulum eidem tribuere velint nec ne, licet dissentire videatur Autor l. 7. c. 3. §. 9. nam cum ab ejusmodi titulo, major existimatio aliæque prærogativæ dependere soleant, non poterit sane quis, regii nominis usurpatione, ad eas sibi tribuendas, invitas Gentes adigere, aut denegationem earum, injuriam interpretari.

Observ. 562.

Reliqui subditi audiunt) Hos alteram personarum classem constituere, jam Observ. 558. admonui. Est autem subditus, qui Civitati & Imperanti, quoad vitam & fortunas subest, in iis, quæ ad utilitatem Reipublicæ pertinent, ac imperio humano obtineri possunt.

Observ.

Observ. 563.

Aut cives, vocabula hoc latius accepta) Civium nomen ambiguum est, poterit enim civis accipi [1] pro subdito (2) pro eo, cujus consensu civitas coaluit (3) pro eo, qui de imperio civili participat [4] qui juri alicujus Reipublicæ [5] alicujus municipii capax & particeps est *add. l. 7. c. 2. §. 20.* Primus & ultimus significatus, usitatissimi sunt, secundi exiguus videtur usus, tertius ad democracias pertinet, quartus olim in Republica Romana obtinuit.

Observ. 564.

Sunt porro cives) Cives sive subditi [1] sunt vel perpetui vel temporarii, illi vel originarii vel adscititii §. 13. h. 2) à vario statu & existimatione, varie quoque distingui possunt *vid. d. c. 2. §. 21. 22. 23. 24.* quæ discrimina, ex habitu cujusvis Reipublicæ, specialius cognoscenda sunt.

Observ. 565.

Illi sunt, qui vel initio) Sed quis hoc ostendet post aliquot seculorum, per quæ Respublica stetit, decursum? Non opus est, ut in definendis civibus originariis & adscititiis, tam altè ascendamus, ac primas sollicitemus origines, videtur cum hoc discrimine comparatum esse, sicut cum antiquitate & novitate, quicquid ante centum annos v. gr. novum fuit, id hodie jure optimo rebus antiquis annumerabitur, ita qui, per tempus satis longum, indige-

natum in aliqua civitate obtinuit, ille civibus originariis adscribi poterit, sed qui nuper eum consecutus est, is ad classem adscititiorum remittendus erit. Forte etiam totius illius discriminis non magnus est usus.

§. 14. Ista tamen, quæ super origine civitatum tradita sunt, non obstant, quo minus *imperium civile à Deo* esse recte dicatur. Cum enim idem legem naturalem ab omnibus hominibus exerceri velit; & vero post multiplicatum genus humanum tam horrida vita inter homines proventura fuerit, ut legi naturali vix ullus relinqueretur locus; cujus tamen exercitium per institutas civitates egregie promovetur; ergo, cum qui jubet finem, jubere etiam censeatur media ad finem necessaria,) Deus quoque mediante dictamine rationis antecedenter præcepisse humano generi multiplicato intelligitur, ut civitates, quæ summo imperio velut animantur, constituerentur. Quarum ordinem quoque in divinis literis expresse adprobat, ejusque sanctionem peculiaribus legibus sancit, sibi quoque illud peculiariter curæ esse testatur.

Observ. §66.

Ista tamen, quæ super origine) Inter Imperantem & subditos est nexus moralis reciprocus, illi inhæret jus & obligatio publicam promovendi utilitatem, quibus in *his* obligatio ac jus respon-

spondet. Jus Imperantis, notissimo termino, *Majestas* dicitur, de cujus origine varie disputatur.

Observ. 567.

Cum enim idem legem) Autor censet, eo sensu imperium civile esse à Deo, quod *ejus constitutionem antecederet Deus praeceperit*, sed uti hoc non adeo liquidum, certe non generale est, nec ad omnes civitatum formas, multo minus ad imperii civilis abusum, pravis Imperantibus usitatum, pertinet, ita, licet suo modo admittatur, ad rem tamen nihil facile videtur, cum Deus ita saltem sit causa *moralis* imperii civilis, non autem *efficiens*, de qua tamen unice quaestio est.

Observ. 568.

Quarum ordinem quoque) Deinde, quod *constitutum approbet* add. l. 7. c. 3. §. 2. sed ita non est *originis*, sed *approbationis* saltem divinae. Alii censent Majestatem eo sensu esse immediate à Deo, quod Idem eam, velut ens aliquod physicum, creet, ac Regi, voluntate populi designato, infundat, quas naenias solide & eleganter refellit Autor l. 7. c. 3. §. 3. 4. *seqq. add. Thomas. 7. 7. D. l. 3. c. 6. §. 66. seqq. Vitriar. 7. 7. P. l. 3. tit. 13. §. 9. in fin.*

2. Non difficile erit, veram Majestatis originem ostendere, modo pueriles conceptus ac parasitorum principia seponas. Nimirum sicut alia jura, occasione pacti per legem naturalem constituuntur, ita quoque Majestas, juxta
men.

mensuram pacti inter Imperantem & subditos initi, de quo *Observ. 555. n. 6.* voluntate divina, illi tribuitur ac simul subditis obligatio, imperio respondens, imponitur. Est igitur Majestas, ad modum aliorum jurium seu entium moralium, immediate à Deo, ut non intercurrat intermedia causa *efficiens*, pactum verò præcedens, est *causa sine qua non* vel *occasionalis*, quâ remotâ, Deus illud jus non largitur, in quem sensum philosophia Autoris *d. l. 7. c. 3. §. 1.* etiam accipi potest, utut terminis aliter paulo se habentibus, eam proponat.

CAPUT VII.

DE

PAR TIBUS SUMMI IMPERII.

§. I.

Quæ partes sint summi imperii, & quibus modis ejusdem sese vis in civitatibus exferat, ex natura & fine earundem liquido potest colligi.

Observ. 569.

Quæ partes sint summi imperii) Majestas est summa & independens potestas, ob mutuum futuri Imperii

Imperantis & Subditorum consensum, lege naturali Imperanti tributa, qua, ad obtinendam beatitudinem civilem, quosvis actus cum Exteris suscipere, subditorumque actiones & vires dirigere potest, quam definitionem pluribus exposui in Specim. Jur. publ. l. 6. c. 8. §. 14. seqq.

2. Mensura igitur Majestetatis, est *utilitas civitatis*, ex hoc adeo fine, singulas etiam partes posse & debere judicari, Autor recte dicit §. 1. *h.* De cætero planissime Majestas pro *complexu variorum jurium* habetur, quorum singula, partes ejus constituunt. Alii censent, Majestatem esse rem indivisibilem, quæ circa quodvis objectum tota occurrat, & pro ratione peculiaris objecti, peculiare saltem sortiatur nomen *vid. Vitriar. f. f. P. l. 1. tit. 7. §. 5.* sed manifestum est, quod illa doctrina ex ignorantia rerum moralium oriatur, seu sit falsæ hypotheseos, qua Majestas, Ens aliquod physicum esse existimatur, consecrarium, ut mirer, ab illa philosophia sibi non temperasse Autorem l. 7. c. 4. §. 1.
3. Dicuntur etiam partes Majestatis, *Regalia*, quæ in *Majora & Minora*, ut & in ea, quæ *pacis* aut *belli* tempore obtineant, aut *utrique* sint communia, à nonnullis discernuntur *vid. Thomas. f. f. D. l. 3. c. 6. §. 144.* Sed incertæ & parum constantes sunt illæ divisiones, hinc optime Majestas distinguitur in *immanentem*, quæ Rempublicam ipsam, & *Transeuntem*, quæ

quæ Exteros respicit *vid. Jacob. Thomaf. Philof. Praët. tab. 49. ibique annot.*

4. Immanens Majestas summatim *libertate* & *imperio* constat, ac vel circa *sacra* vel *profana* occupatur, ab objectis vero magis specialibus, specialius distinguitur, quod in hypothesis ostendi in *Specim. Jur. public. l. 3. c. 1. 2.* Transiens vero, *libertas* saltem est, ac in *pacificam* & *bellicam* discernitur, illa, si mediate exerceatur, *jus legationum* dicitur, quod circa *negotia concilianda, foedera pangenda ac civilitatem explicandam* summatim occupari videtur, qua de re, iterum in hypothesis nonnihil explicatius egi *d. tr. l. 3. c. 4.*
5. Circa singulas autem imperii civilis partes, obligatio occurrit, qua Imperans earum exercitium, ad utilitatem Civitatis, referreteneatur, hoc igitur quo recte exequatur, probitate & prudentia politica opus est, quæ ex accurata tum propriæ, tum vicinarum civitatum cognitione, advenit.

§. 2. In civitate omnes suam voluntatem submiserunt voluntati imperantium circa negotia ad salutem civitatis facientia, quod velint facere, quidquid illi voluerint. Hoc ut fieri possit, necessum est, ut *imperantes civibus significant, quæ ipsorum circa talia sit voluntas.* Istud igitur faciunt non solum *per mandata ad singulos directâ* circa negotia particularia; sed etiam *per generales regulas,*
unde

unde omnibus in perpetuum de agendis o-
mittendisve constet. Per quas etiam defi-
niri solet, quid cuique suum, quid alienum
censeri debeat; quid in civitate pro licito,
quid pro illicito; quid pro honesto aut inho-
nesto habendum; quid cuique ex libertate
naturali supersit, aut quomodo quisque u-
sum suorum jurium ad tranquillitatem civi-
tatis temperare debeat; quid denique &
quo modo quisque suo jure ab altero exige-
re queat. Hæc omnia enim liquido defi-
nita esse, ad decus & tranquillitatem civitatis
plurimum facit.

Observ. §70.

In civitate omnes) Autor promiscuè nonnullas
Imperii partes recenset, quæ tamen neque to-
tam Majestatem exhauriunt, neque accurate
fatis ubique sibi opponuntur. Primo occur-
rit *Potestas Legislatoria*, quæ recte pro parte
habetur, quatenus normam agendi, subditis
præscribit.

Observ. §71.

Per quas etiam definiri solet) Sed illa facultas de-
finiendi, intelligenda est *salvis legibus divinis*,
nam utut Autor, crassioris philosophiæ Hob-
besianæ, omne honestum & turpe, à legis hu-
manæ definitione suspendentis, *de civ. c. 6. §. 9.*
16. verba usurpet, hoc tamen eum sano sensu
fecisse, existimandum est, cum ex aliis locis hoc
fatis

fatis appareat *add. l. 7. c. 4. §. 2. l. 8. c. 1. §. 2. seqq.*

§. 3. Is porro potissimus civitatum finis est, ut homines mutua conspiratione & opertuti sint adversus damna & injurias, quæ ab hominibus invicem inferri possunt & solent. Id ut obtineatur ab hominibus, quibus cum in eandem societatem conjungimur, non sufficit, ut mutuo inter se paciscantur de injuriis non inferendis; neque etiam ut nuda superioris voluntas civibus innotescat: sed opus est *metu pœnae, & facultate eandem representandi.* Quæ pœna, ut huic fini sufficiat, ita est temperanda; ut aperte majus malum sit leges violasse, quam observasse; utque adeo pœnæ acerbitas voluptati aut lucro, quod ex injuria capitur aut speratur, præponderet. Nam non possunt homines non ex duobus malis minus eligere. Licet autem multi per imminentem pœnam ab injuriis non reprimantur, id tamen inter minus frequentia habendum est; quæ plane evitare conditio humana non patitur.

Observ. 172.

Is porro potissimus) Deinde *poteestas puniendi* adducitur, quam ita exercendam esse, ut scopum propositum, in quantum indoles vitæ humanæ hoc admittit, illa assequatur, Autor hic præcipit *add. l. 7. c. 4. §. 3.* qua de re *c. 13.* amplius dispiciendum erit. *Observ.*

Observ. 573.

Ut aperte majus malum sit, leges violasse, quam observasse). Sed estne malum leges observare? Est, non juxta rei veritatem, sed delinquentis opinionem, quæ hic respicitur, cum per poenam sit corrigenda.

§. 4. Quia etiam sæpe controversiæ super recta legum adplicatione ad facta singularia oriri solent, ac multa accurate expendenda occurrant, si quid contra leges factum esse dicatur: inde, ut inter cives tranquillitas constet, summi imperii est *lites civium cognoscere & decidere*, singulorumque facta, quæ legibus contraria arguuntur, examinare ac poenam legibus convenientem dictitare & exsequi.

§. 5. Ut autem, qui in civitatem coiverunt, adversus extraneos tuti sint, summi imperii est *congregare, unire & armare*, aut ejus loco conducere, quot pro incerto numero, & viribus hostium ad communem defensionem opus visum fuerit; rursusque ubi expedierit pacem facere. Cumque & belli & pacis temporibus inserviant *foedera*, ut & commoda diversarum civitatum melius communicari possint, & validior hostis junctis viribus repelli, aut in ordinem redigi queat; penes summum quoque imperium erit, utrique

tempori inservientia fœdera inire, universosque subditos ad ea servanda obstringere, simulque exinde redundantia commoda incivitatem derivare.

§. 6. Cum etiam civitatis amplæ negotia, tam belli quam pacis tempore occurrentia ab uno homine sine *ministris & magistratibus* executioni dari nequeant; opus erit ab summo imperio constitui homines, qui ipsius vice controversias civium examinent, vicinorum consilia explorent, milites gubernent, opes civitatis colligant, & dispensent, ac denique utilitati civitatis undique prospiciant. Quos ipsos summus imperans ad officium faciendum compellere, gestorumque rationes poscere potest ac debet.

§. 7. Quia porro nec belli nec pacis tempore civitatis negotia sine *sumtibus* geri possunt, summi imperii est adigere cives, ut eosdem suppeditent. Id quod variis modis contingit; puta, si vel cives aliquam bonorum aut proventuum regionis abs se in seßæ partem ad hos usus seponant, vel singuli cives de suis bonis conferant, simulque ubi opus sit operas suas præbeant; vel si vectigalia imponantur mercibus, quæ importantur, & exportantur, (quorum illud tamen magis cives, hoc

hoc externos onerat,) aut si de pretio rerum, quæ consumuntur, modica pars decidatur.

Observ. 574.

Quia etiam saepe) Ulterius sub imperio civili continetur *potestas judiciaria* §. 4. *jus belli & pacis nec non fœderum* §. 5. (sub quo *jus Guarantiae, neutralitatis*, similiaque jura comprehenduntur) *mediationis & civilitatis publicæ exhibendæ* (quæ tria jura, mediate exercita, nomine *juris legationum* venire *Observ. 569. n. 4.* jam dixi] Denique *jus constituendi ministros & Magistratus* §. 6. ac *jus exigendi sumtos publicos* §. 7. *add. d. l. 7. c. 4. seqq.*

§. 8. Denique cum singulorum actiones à sua cujusque opinione regantur; plerique autem de rebus ita soleant judicare, prout assueverunt, & prout communiter judicari vident; paucissimi proprio ingenio vera & honesta dispicere queant; inde civitati expedit, ut publice ejusmodi *doctrinis* personet, quæ cum recto fine & usu civitatum congruunt, simulque animi civium à puero istis imbuantur. Ejusmodi igitur doctrinas, qui publice doceant, summi imperii est constituere.

Observ. 575.

Denique cum singulorum) Ad imperium etiam pertinet *Jus Scholarum & cura religionis.* Sub illo continetur (1) *Jus instituendi scholas*

(2) *promovendi veram sanamque doctrinam, noxiamque excludendi* §. 8. h. (3) *impediendi, ne diversa sententiæ, in odia & rixas erumpant, ac pacem civilem turbent* add. l. 7. c. 4. §. 8.

2. Cura religionis involvit (1) *jus prospiciendi, ne, pretextu religionis, socialitas turbetur, ac vel Respublica, vel singuli, in juribus suis, immerito lædantur*, quod Imperantes magna sollicitudine exercere debebant, sed eo fere res rediit, ut, in ejus neglectu vel usu contrario, salutem suam contineri existiment. Quoad ipsam religionem (2) *non habet Imperans jus religionem comminiscendi, imperandi, aut, ob non admissam, vel rejectam, puniendi*. Posita vero religione, vel consensus vel dissensus adest, illo casu (3) *habet jus ea omnia agendi, quo religio debite instituat & conservetur*, ex quo varia jura specialia fluunt.

3. In casu dissensus habet (4) *jus dissentientibus emigrationem injungendi, citra ullam tamen læsionem, aut eos non recipiendi*, quod facilius procedit, non minus tamen ipsi competit (5) *jus eos recipiendi vel tolerandi*. Posita autem tolerantia amplius habet (6) *jus à suæ Ecclesiæ cætu dissentientes excludendi*, fidei formulis eo fine compositis, ad quas tamen non temere ruendum (7) *conciliationem tentandi*, per amicas collationes sine ulla vi, vel directa vel indirecta (8) *cultum publicum circumscribendi, vel plane prohibendi*, denique (9) *cultum publicum*

admissum dirigendi, in quantum id indoles religionis, conscientia Imperantis, & eorum, qui religionem istam sectantur, admittit. De cætero, pro diversitate dissensûs, hoc jus aliquando sibi asserunt imperantes, aliquando negligunt, ac curam religionis ordinandæ, dissentientibus ipsis relinquunt.

4. Quæ autem de receptione vel tolerantia dissentientium dicta sunt, illi procedunt, si ipsorum religio non sit insociabilis, nec statui civili repugnet, alioquin non consultum fuerit, hostes in Rempublicam recipere, vel in eâdem tolerare. Sed illa delibasse sufficiat, nam ex generalibus illis principiis ritè probatis, speciales conclusiones deducere, ac quomodo hypocritæ, conscientiarumque tortores, contra eas peccare soleant, ostendere, id instituti angustia prohibet.

§. 9. Sunt autem istæ partes summi imperii naturaliter ita *connexæ*, ut siquidem regularis forma civitati constare debeat, omnes & singulæ penes unum radicaliter esse debeant. Nam si una vel altera plane abfuerit, mancum erit imperium, nec ad finem civitatis procurandum idoneum. Sin autem istæ dividantur, ita ut quædam radicaliter sint penes unum, reliquæ penes alium, irregularem remp. & male cohærentem emergere necessum est.

Observ. 576.

Sunt autem istæ partes summæ imperiū naturaliter ita connexæ) Nempe ex hypothese finis intenti, si enim illi, qui civitatem constituunt, felicitatem civilem intendunt, naturale utique est, ut imperium civile ita efforment, quo habeat omnes partes, ad producendum illum finem necessarias, easque ita dispositas, ut operatio publica commode possit suscipi.

Observ. 577.

Omnes & singulæ penes unum radicaliter esse debeant) Tum radicaliter & independenter, penes unum omnes imperiū civilis partes sunt, si in subjecto, vel *physice unq.*, vel *nexu imperiū unito*, existant, si autem plurib; ita concedantur, vel divisim vel indivisim, aut illi *simplici saltem obligatione* sint conjuncti, tum penes plures independenter & radicaliter reperiuntur.

Observ. 578.

Nam si una vel altera) In se igitur partium Majestatis separatio vel divisio, non est impossibilis, sed, si fiat, operatur saltem vel imperium mancum vel Rempublicam male cohærentem, quod Autor *b.* rectè agnoscit, quamvis *l. 7. c. 4. §. 9. seqq.* divisionis possibilitatem penitus negare videatur, nisi forte ita accipendus est; *unius partis distractionem non esse possibilem*, vel *divisionem saepe jactari*, ubi tamen *revera omne imperium sit penes unum*, ejus verò exercitium aliis delegetur, vel *divisionem in univsum esse inutilem*, de quo alii curatius dispi-
 ciant.

CAPUT

CAPUT IIX.

DE

FORMIS RERUMPUBL.

§. I.

Summum imperium, prout vel in uno ho-
mine, vel in uno concilio ex paucis, aut u-
niversis constante reperitur, diversas for-
mas rerumpublicarum producere solet.

Observ. §79.

Summum imperium) Postea expenditur Majestas,
quatenus civitatem format, nimirum pro di-
versitate *Subjecti proprii*, cui illa inhæret, di-
versam, in Republica simplici, producit *for-
mam essentialem* §. i. h. antequam igitur subje-
ctum illud proprium adsit, civitas perfecta
non adest, quod contra Kulpisium pluribus o-
stendi in *Specim. jur. publ. l. 6. c. 7. §. 20. seqq.*
Quod si Majestas bene vel male in actum de-
ducatur, exinde oritur diversa *forma acciden-
talis*. Idem contingit, si imperii civilis ex-
ercitium, vel arbitrio & conscientia Imperan-
tis relinquatur, vel legibus fundamentalibus
circumscribatur, *vid. l. 7. c. 5. §. 1.*

§. 2. Sunt autem *formæ civitatis* vel *re-
gulares* vel *irregulares*. Illæ sunt ubi impe-
rium summum in uno subjecto ita est unitum,
ut illud indivisum & inconvulsus ab una
voluntate per omnes civitatis partes atque
negotia sese dispenset. Ubi hoc non depre-
henditur, irregularis forma civitatis erit.

Observ. §80.

Sunt autem formæ) Hæc doctrina hætenus est restringenda ad Respublicas *simplices*, de his enim hucusque actum est, de cætero tamen discrimen Reipublicæ regularis & irregularis, etiam ad *compositas* pertinet, ut mox videbimus.

Observ. §81.

Ille sunt, ubi imperium) Hæc Reipublicæ regularis definitio *add. d. l. 7. c. 5. §. 2.* nimis generalis est, nam quando imperium *ita unitum* censi debet, ut *indivisum & inconvulsam* ab una voluntate exerceatur, id ostendendum erat. Mihi sic videtur: Civitas *perfecta, una & regularis* [ut hæc conjungam] est, *ubi à subiecto, vel physicè uno vel nexu imperii unito, tota Majestas, per veram potestatum subordinationem, in eundem cætum, aut nomine ejus, erga externos exercetur; vid. Specim. Jur. publ. l. 6. c. 7. §. 26. 31.*

§. 3. Civitatis *regularis tres sunt formæ*; prima quando summum imperium est penes unum hominem; & dicitur *monarchia*. Altera quando summum imperium est penes concilium ex selectis duntaxat civibus constans; & vocatur *aristocratia*. Tertia, quando summum imperium est penes concilium ex universis patribus familias constans; & appellatur *democratia*. Imprimis, qui rerum potitur, dicitur *monarcha* in secunda *optimates*, in tertia *populus*. *Observ.*

Observ. 582.

Civitatis regularis tres sunt formæ) Monarchia, si reverà talis sit, semper est regularis, subiectum enim Majestatis, physice unum est, adeoque arctius uniri nequit, sed Aristocratia & Democratia, pro diverso unionis modo, regularis & irregularis est, *add. Op. Maj. l. 7. c. 5. §. 3.*

§. 4. In omnibus hisce formis potestas quidem est eadem. Sed in eo insignem habet *commoditatem* monarchia præ reliquis formis, quod in ea ut deliberetur & decernatur, id est, ut imperium actu exerceatur, non opus sit temporibus & locis condictis, sed quovis loco & tempore deliberari & decerni possit; sic ut monarcha semper in proxima sit potentia ad actus imperii exercendos. Sed ut optimates & populus, qui non sunt una persona naturalis, decernant, necessum est, ut certo loco & tempore conveniant, ibique super negotiis publicis deliberent & decernant: cum alio modo voluntas senatus ac populi, quæ ex conspirantibus majoris partis sententiis resultat, cognosci nequeat.

Observ. 583.

In omnibus hisce formis potestas quidem est eadem) Ex tribus illis speciebus, Democratia habetur pro antiquissima *d. c. 5. §. 4.* sed ex hypothese dubia, quod liberà voluntate civitates sint con-

stituta, hinc si sequaris id, quod *Observ. 547. n. 6.* adstruxi, pro Monarchia potius pronuncian-
dum erit, est tamen hujus disquisitionis, nul-
la vel exigua utilitas. Dæ cætero non minus
in Aristocratiâ ac Democratiâ, quam Monar-
chiâ, verum imperium civile occurrere, recte
dici videtur, ac amplius asseritur *d. c. 5. §. 5.*

Observ. 584.

Sed in eo insignem.) De habitu singularum specie-
rum, ex generalibus principiis, *Observ. 555. n. 2. seqq.* inculcatis, judicandum est *add. d. l. 7. c. 5. §. 6. 7. 8. 9.* Quæ autem de prærogativa
Monarchiæ, quoad celeritatem operandi, heic
dicit Autor, illa pertinent ad Monarchiam *ab-*
solutam, non *limitatam*, præterea non evin-
cunt, quod ideo monarchia, cæteris civita-
tum formis præferri debeat.

§. 5. Cæterum uti circa alia jura, ita & cir-
ca summum imperium contingit, ut id alicubi
bene, alicubi prave & imprudenter admini-
stretur. Unde fit, ut aliæ civitates *sane*, aliæ
morbide & corrupte dicantur: etsi propter i-
stiusmodi morbos peculiares formas aut spe-
cies rerum publicarum comminisci necessum
non sit. Eorum autem morborum, quibus
civitates infestantur, alii *in hominibus*, alii
in ipso statu hærent. Inde alia *vitia hominum*,
alia *vitia status* audiunt.

§. 6. *Vitia hominum in monarchia* sunt, si, qui solium obtinet, regnandi artibus destituitur, nullaque aut non sufficiente reipubl. cura tangitur, eamq; pravorum ministrorum ambitioni aut avaritiæ lacerandam prostituit; si sævitia & iracundia idem est terribilis; si etiam citra necessitatem remp. in casum dare gaudet; si quæ ad tolerandos sumtus reip. conferuntur luxu, aut per inconsultas largitiones dissipat; si pecunias civibus extortas præter rationem accumulât; si contumeliosus, si injustus est; & si quæ sunt alia, per quæ mali nomen principis comparatur.

§. 7. *Vitia hominum in aristocratia* sunt, si per ambitum, pravasque artes via in senatum patet viris improbis aut ineptis, exclusis melioribus, si optimates factionibus distrahuntur; si plebe tanquam mancipiis abuti, & bona civitatis, augendo privato patrimonio, intervertere student.

§. 8. *Vitia hominum in democratia* sunt, si inepti & turbulenti homines turbulenter & importune sententias suas tueri solent; si egregiæ & reip. non prægraves virtutes opprimuntur; si per levitatem leges temere figuntur, atq; refiguntur & quæ modo placuerunt; mox citra rationem displicent: si fordidi & inepti homines rebus gerendis præficiuntur.

§. 9.

§. 9. *Vitia hominum*, quæ in *quavis civitatis speciem* cadunt, sunt; si quibus imperii administratio incumbit, officio suo negliger aut prave funguntur, & si cives, quibus sola obsequii gloria relicta est, frænum mordeant.

§. 10. *At vitia status* sunt, ubi leges aut instituta civitatis non sunt attemperata ad genium populi, aut regionis; aut ubi eadem cives disponunt ad turbas internas, aut ad justa vicinorum odia incurrenda; aut si eosdem ineptos reddunt ad obeundas functiones, quæ reip. servandæ sunt necessariæ; puta, si per leges civitatis non possint non in imbellem segnitiam resolvi, aut inidonei ad pacem ferendam reddi: aut si leges fundamentales ita sint dispositæ, ut per eas negotia publica non possint non tarde aut difficulter expediri.

§. 11. *Morbidis ejusmodi rebus publ. multi peculiaribus quoque vocabula adplicant; ita ut vitiosa monarchia vocetur tyrannis; vitiosus status paucorum, oligarchia; vitiosus status popularis, ochlocratia.* Etsi frequenter contingat, ut multi per isthæc vocabula non tam morbum reip. quam suum affectum aut displicentiam in præsentem statum, imperantes vè exprimant. Sæpe enim, cui vel rex vel status monarchicus displicet, tyrannum aut dominum

num solet vocare etiam legitimum & bonum principem, præsertim ubi is leges severe exsequitur. Sic & cui dolet senatu se excludi, cum tamen aliis senatoribus inferiorem sese haut quidquam arbitretur, per contentum & invidiam ὀλῆγος illos vocat, q. d. paucos quosdam, qui cum nulla re cæteros emineant, in pares tamen aut meliores non sine fastu imperium exerceant. Denique superbo homines ingenio, & quibus æqualitas popularis invisa est, ubi in democratia pari omnes jure de republ. suffragia ferre vident, cum tamen in quavis civitate plebis maximus sit numerus, ochlocratiam id vocant, q. d. statum, ubi vilis turba rerum potitur, nec egregiis viris, quales ipsi se ducunt, aliqua prærogativa relinquitur.

Observ. 585.

Ceterum uti circa alia jura) Omnes illas species, modo esse sanas, modos morbidas, heic satis deducitur *add. d. c. 5. §. 10. 11.* nos duo saltem adjicimus (1) morbos illos magis ab Imperantibus, quam subditis dependere, nam illi, ob summam libertatem, limites officii sæpe & enormiter transiliunt (2) vitia status, quæ in ipsa civitatis structura occurrunt, de quibus §. 10. *in fin.* cum irregularitate coincidere.

§. 12. *Respublica irregularis* est, in qua non
ita

ita perfecte unio illa, in qua essentia civitatis consistit, deprehenditur: idque non per modum morbi, aut vitii in administratione reip. hærentis; sed ut publica lege aut consuetudine ea velut legitima sit recepta. Cum autem aberrationum à rectitudine infiniti esse modi queant, non possunt etiā irregularium rerump. certæ & definitæ species constitui. Indoles tamen ejus ex uno aut altero exemplo plane potest intelligi, v. g. Si in aliqua republica senatus & populus summo utrinque jure negotia publica tractent, ita ut neuter alteri obnoxius sit. Aut si in regno aliquo procerum potentia ita invaluerit, ut regi deinceps non alio modo, quam inæquales foederati subsint.

Observ. § 86.

Respublica irregularis est, in qua) Cum Autor non satis ostenderit naturam Reipublicæ regularis, de quo *Observ. § 81.* actum, ideo, per ejus remotionem, irregularitas quoque non satis explicatur, nec solidius quid proponitur *d. c. §. §. 14. 15.* Paucis sic dicendum: Respublica simplex, tum est *irregularis, si Majestas pluribus, simplici saltem obligatione connexis. divisim vel indivisim competat. vid. Specim. Jur. publ. l. 6. c. 7. §. 31. 32. 33.*

Observ. § 87.

Cum autem aberrationum) Non penitus vaga irregulari-

gularium rerum publicarum natura est, nam in univcrsum irregularitas vel occurrit in civitatibus *simplicibus*, vel *compositis*, de qua mox dicemus, in illis verò semper consistit in *defectu nexus imperii*, diversa tamen hujus defectus possunt esse exempla.

Observ. § 88.

Aut si in regno aliquo) Hoc exemplum, quod, specialiori Reipublicæ Germanicæ exemplo, amplius illustrare voluit Monzambano, huc non quadrat, sed pertinet ad Rempublicam compositam irregularem.

§. 13. *Systemata civitatum* vocamus, ubi plures perfectæ civitates aliquo peculiari vinculo ita connectuntur, ut ipsarum vires fere pro unius civitatis viribus haberi queant. Exsurgunt autem systemata *duplici* potissimum modo: uno per communem regem, altero per foedus.

Observ. § 89.

Systemata civitatum vocamus) Hactenus de rebus publicis simplicibus *vid. Observ.* § 52. Circa compositas, vel civitatum systemata, id initio statim observandum, quod sint etiam vel *regularia* vel *irregularia*. Illa hic definire voluit Autor *add. l. 7. c. 5. §. 16.* sed iterum definitio nimis generalis est, nec formam conjunctionis systematicæ satis exprimit. Mihi in *Specim. Jur. public. l. 6. c. 7. §. 34.* sic visum est: Systema civitatum est *Corpus civile, ex pluribus civi-*

civitatibus ita compositum, ut unaquaque civitas summum ac plerumque etiam plenum imperium habeat, sed ita limitatum, ut quedam ejus partes conjunctim ab omnibus sint exercenda. Exinde facile differentia civitatis simplicis & compositæ apparet.

§. 14. *Mediante communi rege systema emergit, quando plura separata regna vel ex conventionem, vel ex occasione matrimonii, hæreditatis, aut victoriæ unum & eundem habent regem; ita tamen, ut ideo id unum regnum non coalescant, sed singula juxta suas leges fundamentales à communi rege administrantur.*

Observ. 590.

Mediante communi Rege) Mediente eodem Capite, plures civitates, variâ occasione, in systema posse coalescere cetrum est add. l. 7. c. 5. §. 17. sed non statim id factum censeretur debet, hinc tres casus videntur esse distinguendi, vel (1) una Respublica alteri subjicitur, aut simpliciter duæ pluresve civitates conjunguntur, unoque regimine summo administrantur, hoc casu non fit systema, sed civitas una, vel (2) plures Respublicæ unum saltem habent caput, ut tamen rationes earum prorsus maneat separata, tum nulla conjunctio, ne quidem systematica, adest, vel (3) ita sub uno capite coalescunt, unaquæque juxta leges suas fundamentales administratur, omnes tamen, in exerci-

exercitio nonnullarum imperii partium, concurrant, hoc casu demum systema adest.

§. 15. *Altera species systematum* provenit, quando plures civitates vicinæ *perpetuo fœdere* ita connectuntur, ut aliquas partes summi imperii, quæ præcipue defensionem contra extraneos spectant, non nisi ex consensu omnium exercere velint, salva manente de cætero singulorum civitatum libertate, & independentia.

Observ. 391.

Altera species) Expresse fœdere in systema coire solent Respublicæ vicinæ & minus validæ, *vid. l. 7. c. 5. §. 18.* Est ejusmodi pactum regulariter *expressum, perpetuum ac simplici saltem obligatione membra systematica, ad communis imperii exercitium, connectit vid. d. c. 5. §. 19. 20. 21.* sed illa omnia, salva systematum essentia, à pacto systematico, abesse possunt.

2. Systemata irregularia sunt, quando *majoris alicujus Reipublicæ, imprimis Monarchiæ, vinculum sensim ita laxatur, ut provinciæ sui juris fiant, sub antiquis tamen schematibus, ut civitates sociæ, tam cum suo Capite, quam inter se, utcunque connectantur, de quo plura adduxi in Specim. Jur. Public. l. 6. c. 7. §. 38. seqq.* Irregularitas vero consistit, tum in *pravo Provinciarum habitu*, quo sæpe nec sibi ipsis sufficiunt, nec ad sufficiens validum Systema aptæ sunt, tum in *vinculi communis incertitudine & laxitate, quæ*

ex modo conjungendi & ex habitu corporum conjunctorum resultat, de quo itidem plenius paululum egi in *d. Specim. l. 6. c. 7. §. 46. seq. c. 9. §. 26. seq.*

3. Sunt, qui distinctionem civitatum *regularium & irregularium* plane rejiciunt, quibus respondi in *d. Specim. l. 6. c. 7. §. 62. 63.* circa terminos tamen majori jure quid moneri potest, ceu ostendi *d. c. 7. §. 53. 54.* sed quoties res ipsa admitti debet, in terminis faciles nos esse oportet. Multi etiam asserunt Respublicas *mixtas*, de quibus Autor in *Op. Maj. l. 7. c. 4. §. 13. c. 5. §. 12. 13.* sed eo nomine nullam novam Reipublicæ formam, hætenus expositis addendam, significari, in *d. Specim. l. 6. c. 7. §. 55. seqq.* fortè probavi. Quomodo autem generalia illa, de formis Reipublicarum, principia, ad hypothesein transferri, seu, ad hoc vel illud Civitatis individuum, applicari debeant, illud in *d. Specim. c. 7. §. 64. seqq.* pluribus deduxi.
4. Ultra autem Reipublicæ forma, alteri præferenda sit, disputari etiam solet? Plerosque pro Monarchia calculum ponere, ait Autor *l. 7. c. 5. §. 22.* Ex comparatione commodorum & incommodorum, quæ singulas formas comitantur, heic esse formandum judicium, facile liquet, ex hoc vero principio, pro Rebus publicis polyarchicis, contra imperia absoluta, pronunciandum esse, plane arbitror.

CAPUT IX.

DE

AFFECTIONIBUS IM-
PERII CIVILIS.

§. I.

Habet hoc omne imperium, quo uni-
versa aliqua civitas regitur, in qualibet
reip. forma, ut sit *summum*, i. e. in sui
exercitio à nullo homine tanquam superiore
dependens, sed ex proprio judicio & arbitrio
sefe exferens, sic ut ejusdem actus à nemine
tanquam superiore queant irriti reddi.

Observ. 592.

Habet hoc omne imperium) Majestas, quatenus no-
tat jus subditis imperandi, vel cum Exteris ci-
vitatibus nomine, agendi, per modum *substantiæ*
concipitur, hæc vero *attributa* sua, vel *affectio-*
nes quoque habet.

Observ. 593.

Ut sit summum) Summitas seu Independentia,
non hoc notat, quasi imperium civile à volun-
tate humana non habeat originem, sed, quod
semel constitutum, à nemine, velut superiore,
dependeat ejusque nomine exerceatur, *add. l.*

7. c. 6. §. 1. Aliquando per summitatem intelligitur summa existimatio, quæ imperium civile comitatur adeoque recte etiam pro ejus attributo habetur.

§. 2. Inde etiam est, quod idem imperium sit ἀνυπεύδυνον, seu *nemini mortalium obstrictum ad reddendas rationes* eo cum effectu, ut si eas alteri non adprobaverit, poenis humanis aut coërcitioni, velut à superiore profectis, eo nomine sit obnoxium.

Observ. 594.

Inde etiam est, quod idem imperium sit ἀνυπεύδυνον

Hæc affectio ex prima resultat, si enim superior non adest, nemini etiam, velut superiori, ratio reddi potest. Simplex tamen ad rationes reddendas obligatio, cum imperio civili consistere potest *vid. l. 7. c. 6. §. 2.* quanquam, cum illa obligatio, ad excludendum imperii abusum pertineat, pravis Imperantibus, dubio procul, futura sit molestissima.

2. Cæterum, cum dubio procul imperium civile, sit nomen legitimum, nec adeo notet jus, quævis patrandi flagitia, sed saltem ea faciendi, quæ utilitas civitatis requirit, hinc quæri potest, *an salva imperii summitate, in casu delicti, Imperans judicem habere queat?* Videtur hoc dicendum, nam delinquens extra metas imperii constitutus est, adeoque, non ut Imperans, sed ut delinquens, judicatur,

3. Sed mihi tamen distinguendum videtur, inter

ter delicta leviora ac dubia, & atrociora ac evidētia, (quæ ostendere non sane est impossibile) Illorum respectu, Imperium civile Judicem non admittit, nam hoc admissio, de quibusvis actionibus dubiis ratio reddenda foret, atque ita necessariò summitas destrueretur, licet igitur Imperium civile non involvat jus etiam modicè saltem delinquendi, attamen, cum inter homines nihil sit perfectum, ac lubrica actionum humanarum æstimatione, hinc indoles rerum humanarum exigit, ut sub Ejus velut clypeo, licentia modice delinquendi, tuta sit.

4. Ast in delictis gravioribus habere judicem, ipsi imperio civili non repugnat, fatendum tamen est, quod, utut natura imperii eum admittat, attamen in rebus publicis *simplicibus* iudex constitui nequeat, neque enim id munus vel populo vel Extraneo deferri, moraliter rerum æstimatione, potest. At in *compositis*, quoad singula membra systematica, iudex occurrere potest & solet, quo respicit philosophia, quam in Specim. Jur. public, l. 6. c. 8. §. 34. seqq. proposui.

5. Interim cum ejusmodi Iudex regulariter desit, ac pravi Imperantes graviter & impune delinquant, hinc, præcinente Parasitorum choro, eò fere deventum est, ut verum imperium civile libidine peccandi, tantum non vulgò metiantur.

§. 3. Cui conjunctum est, ut idem summum imperium *legibus humanis & civilibus*, ut talibus, *sit superius*, iisdemq; adeo directe non obstringatur. Istæ enim leges à summo imperio tam in origine, quam in duratione dependent. Inde fieri non potest, ut per istas idem obligetur; cum alias idem seipso superius foret. Etsi ubi summus imperans quædam civibus lege injunxerit, quorum materia in ipsum quoque cadit, decorum sit, & ad auctoritatem legi addendam proficuum, ut ad eadem iste ultro sese componat.

Observ. 595.

Cui conjunctum est) Imperium civile legibus civilibus quoque solutum esse, facile patet *add. l. 7. c. 6. §. 3.* nihil autem aliud hoc involvit, quam imperantem, in actionibus suis decreta legis civilis non debere observare, minimè vero, eum legum vim, quoad actus subditorum jam susceptos, pro lubitu elidere posse. De cætero Imperans legibus positivis uti *potest*, aliquando etiam, vel ex præscripto juris naturalis, vel prudentiæ, *tenetur*.

2. Quæ de summitate imperii civilis dicta sunt, illa dubio procul ad Monarchias quoque pertinent, nam si Rex in exercitio juris sui, à Populo, velut superiore, dependeret, tum revera non Rex, sed, sub splendido nomine regio, Magistratus esset, quamobrem si veram Monarchiam

narchiam. constitui placeat, verum utique & summum imperium Regi tribuendum est, cum alias constituentes sibi ipsis contradicant, ut hactenus distinctio Majestatis personalis & realis, locum haut inveniat *vid. l. 7. c. 6. §. 4. 5. 6.* cum summo tamen imperio, etiam hinc posse consistere ea, quæ *Observ. præc.* diximus, arbitramur.

§. 4. Habet denique & peculiarem *sanctimoniam* summum imperium, ut non solum ejus jussis legitimis resistere nefas sit; sed & ejusdem asperitas, non secus atque à probis liberis parentum morositas, à civibus sit patienter ferenda. Quin & ubi atrocissimas injurias intentaverit, singuli potius fuga sibi consulent, aut quantamcunque calamitatem sustinebunt, quam ferrum in durum quidem, sed tamen parentem patriæ stringent.

Observ. 596.

Habet denique & peculiarem sanctimoniam) Sanctitas & inviolabilitas hoc efficit, ut Imperans à subditis non sit lædendus, non tantum si suo recte fungatur officio *vid. l. 7. c. 8. §. 1.* sed etiam, sit in subditos, vel ut homo, vel ut Imperans, si injurius *d. c. 8. §. 2. 3. 4.* nam sub clypeo imperii, ejusmodi peccandi licentiam, tutam esse debere, *Observ. 594. n. 3.* diximus *conf. d. c. 8. §. 5.*

Observ. 597.

Quin & ubi atrocissimas) Quod si verò Imperans

hostilem penitus animum vel erga singulos, vel totam rempublicam induat, tum ei, velut hosti, posse resisti, ex indole factæ delationis, facile liquet *vid. d. c. 8. §. 5. 6. 7. 8.* sed in regnis absolutis, miseros subditos, spes & facultas exequendi destituit, at in limitatis citius, improbum Imperantem, amoliri illi possunt. Illud dubium non habet, quin Principi, Officii metas transilienti, preces & rationes opponere liceat, & debebant sæpe Reipublicæ Proceres, officii sui, isto rerum statu, esse observantiores, quam quidem fieri solet, nec dubitandum, quin his mediis, cordatè & unanimiter adhibitis, ad saniora consilia Imperans revocari queat, cum crebrò non propriâ, sed alienâ libidine, in Reipublicæ perniciem, animeretur.

§. 5. Præterea summum imperium, in monarchiis potissimum & aristocratiis, alicubi *absolutum*, alicubi *limitatum* deprehenditur. *Absolutum imperium* monarcha habere dicitur, qui illud administrare potest proprio ex iudicio, non ad normam certorum ac perpetuorum statutorum, sed prout præsens rerum conditio videtur exigere, quique adeo proprium ad arbitrium salutem republ, prout ejusdem tempora postulaverint procurat.

Observ. 598.

Præterea summum imperium) Exerit se aliquando
im-

imperium civile sub habitu eodem, quo penes Imperantem existit, tum *forma & modus administrandi* conspirant, aliquando sub diverso tum *forma & modus laudatus*, differunt. Ista omnibus simplicis Reipublicæ formis accidere possunt, sed si imperium ad unum vel paucos, administratio verò, aliquando ad ipsos, aliquando ad plures pertineat, evitando imperii civilis abufui, cum hæc specialior diversitas, discrimen regni *absoluti & limitati* producit, quod ad Monarchias & Aristocratias tantum quadrat.

Observ. 599.

Absolutum imperium) Hoc satis Autor explicat, eleganterque amplius illustrat l. 7. c. 6. §. 8. 9. ex quo patet, absolutum imperium non dici, quasi *nullos habeat limites*, sed quod *peculiaris administrandi ratio*, expresse non sit præscripta.

§. 6. Verum quia unius hominis iudicium ab erroribus non est immune, & voluntas in prava flexilis, in tanta cum primis libertate; quibusdam populis consultum visum, ejus *imperii exercitium certis limitibus circumscribere*. Id quod factum, dum ad certas leges circa administrationem partium imperii in delatione regni regem adstrinxerunt; & si quando negotia summam rerum spectantia, quæque in antecessum definiri nequeunt, inciderent, voluerunt ea suscipi non nisi præ-

sciente & consentiente populo, aut ejusdem deputatis in comitia convocatis, ut eo minor occasio regi præbeatur à salute regni aberrandi.

Observ. 600.

Verum quia unius hominis] Evitando imperii civilis abusu, exercitium certis limitibus circumscribi solet, unde oritur *regnum limitatum*, quod licet fieri posse, contra insulas nonnullorum rationes, satis ostenditur *d. l. 7. c. 6. §. 9.*

Observ. 601.

Id quod factum) De cætero non quævis Regum promissa, limitationem ejusmodi involvunt, sed ea demum, quibus expresse & adæquatè illa constituitur *vid. d. c. 6. §. 10.* pro diversitate autem negotiorum, vel pactis perpetuis, vel adjuncto concilio exercitium imperii civilis circumscribitur *d. c. 6. §. 11. 12.* sed nisi mascula prudentiâ excessibus tempestivè occurratur, illa omnia callidis hominibus eludere haut fuerit difficile.

2. De cætero, uti falsus est Hobbesius, quando discrimen regni absoluti & limitati, in dubium vocat, aut non plus cautionis ab imperii abusu esse, sive hoc, sive illud concedatur, contendit *vid. d. c. 6. §. 13.* ita ex hætenus dictis constat, regna absoluta & limitata, non differre *poteestate legitima*, quæ utrobique eadem est, sed *modo eam exercendi.*

3. De cætero præstat quidem regnum absolutum
limi-

limitato, quoad *celeritatem operandi*, sed cum hæc in abusus nimis pateat, ideo inde ejus prærogativa non est asserenda, sed dicendum potius, quod limitatum, rebus humanis melius conveniat, ut forte asserendum sit, nunquam regnum aliquod absolutum libera voluntate, nisi forte ab aliquo arcadici ingenii populo esse constitutum, sed ejus generis imperia violentis, & callidis machinationibus esse introducta.

§. 7. Solet denique in regnis occurrere aliquod discrimen circa *modum habendi* regnum, qui non in omnibus æqualis deprehenditur. Quidam enim reges dicuntur regnum suum habere *in patrimonio*, ita ut illud pro lubitu dividere, alienare, transferre possint, in quemcunque voluerint. Quod potissimum contingit illis, qui armis regnum sibi quæsiere, ac suum sibi populum ipsi fecerunt. Reliqui autem reges, qui ultro à populo sunt adsciti, etsi summo jure imperium exerceant; regnum tamen pro lubitu dividere, alienare, aut transferre nequeunt; sed in eo ad successores demittendo legem fundamentalem, aut consuetudinem in populo receptam sequi tenentur; eoque à quibusdam certo respectu cum *usufructuariis* comparantur.

Observ.

Observ. 602.

Solet denique) Quoad modum habendi regna, sic breviter dicendum : Quidam habent regnum in patrimonio i.e. cum libera alienandi potestate, ut qui bello eadem sibi acquisiverunt [nisi pace secuta aliud actum sit] vel in quos eâ lege illa sunt collata, quod tamen non facile præsumendum, quidam sine alienandi jure, idque iterum vel ad tempus, vel quamdiu vivunt, & hoc vel simpliciter intuitu personæ suæ, vel cum jure transmittendi ad posteros vid. l. 7. c. 6. §. 14. 15. 16. 17. Omnibus illis casibus verum quidem adest imperium, sed diversum habendi modum, illius auctoritatem ac splendorem intendere vel elevare, certum quoque est.

Observ. 603.

Certa respectu cum usufructuariis comparantur) Tertium comparationis in eo consistit, quod sicut usufructuarius jus suum alienare nequit, ita nec talis Rex imperium, Eousque autem comparatio non est extendenda, ut Populum proprietatis velut jure frui, adeoque Rege esse superiorem, contendamus.



CAUT X.

DE

MODIS ADQUIRENDI IMPE-
RIUM, INPRIMIS MONAR-
CHICUM.

§. I.

Quanquam ad quodvis imperium legitimum constituendum *consensus* subjectorum requiratur; is tamen non ubique pari modo elicitur. Interdum enim *per violentiam bellicam* aliqui adiguntur in victoris imperium consentire; interdum *ultra* ad aliquem principem constituendum cives accedunt.

Observ. 604.

Quanquam ad quodvis Acquisitionis fundamentum est *Consensus*, qui tamen non eodem semper modo se habet, hinc diversi acquirendi modi distingui solent. Est autem modus ille non tantum *ultroneus & violentus*, quod §. 1. b. inculcatur, sed & *mixtus*, quando Imperanti sceptrum vi quidem excutitur, novus vero Imperans libera voluntate à Populo assumitur.

2. Cæterum non quævis Majestas, in Republica consti-

constituta, istis modis acquiritur, quod, velut per modum prolegomenorum, paucis hic tractare liceat. Quod igitur attinet Majestatem *Democraticam*, illa istis modis, præsupposita Democratiâ, non obtinetur, quia ejus Subjectum est perpetuum & invariabile, isto rerum statu, sed præsupposita Aristocratiâ, non Monarchiâ, acquiri eadem potest *modo ultroneo*, si optimates aut Monarcha, Populo imperium resignent, nec non *mixto*, si optimatibus vel Rege vi expulsis, Democratia introducatur, quæ libertas democratica, legitima est, si vis fuerit justa, vel prior Imperans in amissionem sui juris consenserit *vid. l. 7. c. 7. §. 5.* non etiam *violento* neque enim populus in se ipsum, vi imperium acquisivisse, dici potest *d. c. 7. §. 1.* licet aliter sentire videatur *Dn. Thomas. 7. 7. D. l. 3. c. 6. §. 92.*

3. Majestas *Aristocratica*, præsuppositâ Aristocratiâ, regulariter etiam perpetua est, nec de successionem quæritur. Poterit tamen locum aliquando habere *modus ultroneus*, si Optimatibus omnibus extinctis, alii eligantur, *violentus*, si prioribus pulsis, alii per vim in populum sibi imperium arrogent, & *mixtus*, si, prioribus per vim ejectis, victores ultrò à populo assumantur. Præsupposita autem Democratiâ, locum aliquando invenit *modus ultroneus*, populo optimatibus imperium deferente, *violentus*, si aliqui per vim sibi imperium afferant, non etiam *mixtus*, nam idem populus, non potest simul cogi & libere agere. Præsuppo-

fit^â denique Monarchiâ, locus est nonnunquam modo *ultroneo*, si Monarcha, populi consensu, Optimatibus imperium deferat, *violento*, si, Monarchâ per vim ejecto, in populum, eodem modo, aliqui sibi imperium acquirant, & *mixto*, si, Imperante pulso, ultro ^â populo victores assumantur *add. d. c. 7. §. 2.* sed cum successio in democratiis plane locum non habeat, in Aristocratiis rara sit, præterea rarissimè aliæ civitates, in Democráticas aut Aristocráticas mutantur, ideo quæ de acquisitione & translatione imperii civilis docentur, potissimum ad Majestatem *Monarchicam* pertinent.

§. 2. *Modus* acquirendi imperii *violentus* solet vocari *occupatio*, quando scilicet aliquis, iusta bellandi causa subnixus, favente vi armorum ac fortuna populum aliquem eo redigit, ut ipsius deinceps imperio sese subijcere cogatur. Cujus imperii legitimus titulus non inde solum deducitur, quod victor, si rigore belli voluisset uti, vitam plane victis adimere potuisset, atque sic, dum minore istos incommodo defungi patitur, clementiæ insuper laudem nanciscatur: sed & quod cum altero in bellum descendens, quem ipse antea læserat, & cui æquam satisfactionem præbere tenuit, omnes suas fortunas alex martis exponat, sic ut jam in antecessum tacite consenserit in quamcunque conditionem, quam eventus belli ipsi est assignaturus. *Observ.*

Modus acquirendi imperium violentus) Acquiritur ergo Imperium monarchicum (1) modo *violento*, seu *occupatione*, quæ quidem ex hypothesis belli justî, titulus legitimus est §. 2. *b.* de cætero differt ab occupatione, quæ res nullius acquiruntur *d. c. 7. §. 3.* nihil autem refert, siue civitas Democratica, Aristocratica, an Monarchica occupetur. Quod si autem injustus invasor Democratiam opprimat, imperium Ejus, non nisi habili populi consensu, fit legitimum *vid. l. 7. c. 7. §. 4.* si vero Aristocratiam aut Monarchiam, invasionis iniquitas demum purgatur, si pristini Imperantes extincti sint, vel eo nomine transegerint, interim populus injusto invasori, etiam contra antiquos dominos, parere posse videtur *vid. d. c. 7. §. 4. l. 7. c. 8. §. 9. 10.* (2) modo *mixto*, qui juxta priorem doctrinam, titulus legitimus est, & quadrat ad Aristocratiam & Monarchiam, de injusto autem invasore eadem hic dicenda, quæ proxime diximus.

§. 3. *Ultronæo* autem *consensu* populi paratur regnum interveniente *electione*, quæ populus constituendus, ut jam constituitur, ultro certum hominem, suo judicio imperii capaxem, designat; cui quando decretum populi fuerit significatum, idque ille acceptaverit, promisso populi obsequio, imperium confer-
tur.

Observ. 606.

Ultroneo autem consensu) Denique imperium monarchicum acquiritur (3) modo *spontaneo* seu *electione latius supposita*, hæc autem est vel *specialis*, quâ una saltem persona, vel *generalis*, qua persona cum sua posteritate, imo aliquando etiam exteris, successivè admittendis, eligitur.

Observ. 607.

Interveniente electione) Ex electione speciali oriuntur *Regna Electitia*, cum toties repetenda sit, quoties subiectum proprium mutatur. In genere autem respicit illa vel civitatem *constituendam* vel quod frequentius est, *constitutam*, §. 3. b. ubi quidem Democratia, Aristocratia [in Monarchiam scilicet per electionem convertendæ] & Monarchia (electione continuanda) præsupponi possunt, sed ultimus casus præcipue huc pertinet, præcedentes enim rarissimi sunt *add. l. 7. c. 7. §. 6.*

§. 4. Electionem in civitate jam constituta, siquidem illa suscipiatur rege priore defuncto, antecedere solet *interregnum*. In quo licet ad imperfectam formam recadat civitas, dum cives primo tantum pacto inter se connectuntur: multum tamen firmitatis ei adhuc addit nomen & affectus communis patriæ, civiumque plerorumque fortunæ isti loco fere affixæ; quæ bonos cives subigunt, ut ultro tantisper pacem inter se colant, &

M m

quanto-

quantocyus ad plenum imperium instaurandum incumbant. Et si magnopere ad incommoda ex interregnis oriri apta, evitanda faciat, si in antecessum constituentur, penes quos solio vacante interim reip. administratio esse debeat.

Observ. 608.

Electionem in civitate jam constituta) In Monarchia constituta, si in eventum Regis deficientis, successor non jam sit electus, Rege deficiente, existit *Interregnum*, i. e. status civitatis extraordinarius, in subsidium saltem ad certum tempus duraturus.

Observ. 609.

In quolibet ad imperfectam) De forma civitatis, in interregni tempore, quæritur. Non repræsentat interregnum, *statum dissolutæ multitudinis*, cum vel sola cohabitatio continuata aliquam conjunctionem innuat. *vid. l. 7. c. 7. §. 9.* sed, si de subiecto Majestatis vicario, nihil in antecessum constitutum sit, *civitatem imperfectam*, in qua simplici saltem obligatione cives connectuntur, ac per corpora minora, in quæ antea distributi fuerunt, utcunque agunt, dantur tamen causæ, quæ vinculo isti, eo rerum statu, firmitatem addant §. 4. *h. add. l. 7. c. 7. §. 7.* Cæterum uti casus ille rarissimus erit, cum tanta socordia, qua nihil, in eventum Regis deficientis, quoad formam administrationis, caveatur, in aliqua Gente non temere occurrat,

currat, ita eo posito, non approbamus *primum pactum*, quod Autor loquitur, nam hoc frustra asseri *Observ. 555.* ostendimus. Dicendum igitur, quod tempore interregni, tale pactum demum, expresse vel tacite, & ipso facto, inest, non autem ex veteri formula superfit.

Observ. 610.

Et si magnopere] Ut plurimum tempore interregni est *Aristocratia* aut *Democratia*, eaque vel simplex vel Monarchicè aut Aristocraticè gubernata, aliquando etiam, si Respublica plures complectatur provincias, *Systema plurium corporum, hætenus liberorum vid. d. c. 7. §. 7. 8.*

§. 5. Cæterum alicubi quidem singulis monarchis defunctis nova instituitur electio. Alicubi autem regnum ea lege in alterum confertur, ut citra novam intervenientem electionem in alios per successionem transeat. Illud jus successionis constituitur vel *arbitrio ipsius regis*, vel *arbitrio populi*.

Observ. 611.

Cæterum alicubi quidem) Quibusdam Gentibus placet electio *specialis*, de qua hætenus, aliis vero probatur, vel probari debet *Generalis*, quam successivè designati acceptant, quæ acceptandi ratio, *successio* dicitur, ac regna inde *successiva* audiunt. Quod si adeo acquisitionem imperii voluntariam, propus consideremus, ea differentia occurrit. In regnis electitiis electio *specialis*, *delationem* & *acce-*

ptationem simultaneam involvit, sed in successi-
vis electio generalis, *delationem pluribus factam*
& *acceptationem successivam*, continet, ibi de-
nominantur regna à *delatione*, hinc ab *accepta-*
tione, quia in illis, *illa*, in his, *hec* plus difficulta-
tis habet, ac magis conspicua est. Utrum ve-
ro consultus sit, specialiter & singulis vicibus,
an generaliter & per quandam velut occupa-
tionem Reges eligere, seu, ut vulgo dicitur,
an electio præstet successionem vel *vice versa*, ea pru-
dentia quæstio est, quam aliis expediendam
relinquimus.

Observ. §12.

Illud jus successionis constituitur) Electio genera-
lis, cum successivè sit acceptanda, hinc opus, ut
ordo successorum designetur, quod fieri posse,
vel arbitrio ultimi Regis, vel ipsius populi, ma-
nifestum est, & hic rectè asseritur, sæpe tamen
ille ordo, ob defectum necessariæ definitionis,
est perincertus, nonnunquam etiam inter ar-
ma leges & jura silent.

§. 6. *Reges*, qui regnum suum habent in
patrimonio, pro lubitu *super successionem* pos-
sunt *disponere*; quorum dispositio æque ac
privatorum testamentum observabitur, præ-
sertim ubi abs aliquo regnum fuerit condi-
tum, ac partum. Ubi licebit ipsis, si placue-
rit, regnum inter plures liberos dividere, et-
iam filiabus non exclusis; imo & hæredem
in-

instituere filium adoptivum, naturalem, aut qui nulla plane cognatione ipsi est junctus.

§. 7. Verum ubi ejusmodi rex super sua successione nihil peculiariter disposuit, *presumitur* primo, eum nequaquam regnum suum secum expirare velle, sed ut omnino in liberos suos, propter communem mortalium affectum, id devolvatur. Dein ut post ipsum monarchica forma conservetur, quippe quam ipse suo exemplo comprobavit. Tum ut regnum maneat indivisum, quippe cum divisio cum regni juxta & familiæ regiæ convulsione sit conjuncta. Præterea ut inter pares gradu mas præferatur foeminæ, primogenitus deinceps genitis. Denique ut liberis deficientibus ad proximum quemque sanguine regnum devolvatur.

Observ. 613.

Reges qui regnum) Si penes Regem sit jus designandi successorem, vel bello partum, vel libera concessione acquisitum, tum ille tam inter vivos, quam in eventum mortis, idque vel voluntate expressa §. 6. h. vel præsumta, §. 7. successorem designare potest *add. l. 7. c. 7. §. II.* sed voluntas præsumta, si verum fateri velimus, hic est fere inane nomen, & raro ex conjecturis certum aliquod jus, quis sibi asserere potest, sed ut plurimum beati erunt possiden-

tes, aut qui potentiâ cæteris præstant *add.*
 Thomas. 7. 7. D. l. 3. c. 6. §. 110.

§. 8. In illis autem regnis, quæ ab initio
 ultronea populi voluntate sunt constituta,
ordo successionis originarie ab ejusdem populi
voluntate dependet. Qui ubi in regem una
 cum imperio jus quoque successoris consti-
 tuendi contulerit, succedet, quem hic volue-
 rit. Ubi hoc non fuit factum, id jus populus
 sibi reservasse intelligitur. Cui si placuit in-
 electum regem hæreditario jure regnum
 conferre, *ordinem succedendi vel simplicibus*
hæreditatibus consimilem, quantum salus regni
 admittit, effecit, vel *peculiari* ipsum *ratione*
 temperavit.

§. 9. Ubi *simpliciter* populus regem jusse-
 rit *hæreditario jure regnum obtinere*, nec quid
 peculiariter addiderit; voluit quidem, ut re-
 gnum eo ordine devolvatur, quo privatæ hæ-
 reditates, sed non sine aliquo temperamento.
 Nam in hisce fere ut à privatis hæreditatibus
 discedat successio in regnis, salus civitatum
 requirit. 1. ut regnum sit individuum. 2. ut
 successio stet intra eos, qui à primo rege de-
 scendunt. 3. ne succedant, nisi qui nati sunt
 secundum leges patriæ, non nothi tantum,
 sed & adoptivi. 4. ut in pari gradu mares
 præferantur foeminis etiam majoribus natu.

5. ut

5. ut successor regnum agnoscat tanquam beneficium populi, non tanquam beneficium antecessoris.

§. 10. Verum quia facile inextricabiles controversiæ oriri poterant, uter ex familia regnatrice nuper defunctum proxima cognitione contingeret, ubi ab autore stirpis longius discessum fuerat: inde multos apud populos *successio linealis* introducta est. Quæ in hoc consistit, ut prout quisque ab autore stirpis regnatricis descendit, ita lineam velut perpendicularem constituat; & inde quilibet ad regnum vocetur, prout ipsorum linea alias præcedit, nec de una linea in alteram fiat transitus, quoad ex priore aliquis adhuc supersit; licet forte existat, qui propiore gradu proxime defunctum regem attingat.

§. 11. Successionis linealis usitatissimæ sunt species *cognatica* & *agnatica*. In illa fœminæ non excluduntur, sed postponuntur maribus in eadem linea, ita ut etiam ad ipsas fiat regessus, si mares potiori aut pari gradu defecerint. Hæc autem fœminas, & ex hisce natos etiam mares in perpetuum excludit.

Observ. 614.

In illis autem regnis) Si penes populum est jus successores designandi, tum vel illud *Regi concedit*, quo casu obtinent, quæ modo dicta sunt,

vel *immediate exercet*. Qua ratione autem ordo succedendi constitui queat, Autor hic innuit & amplius declarat *d. c. 7. §. 12. 13. 14.* Cæterum si illa, lege expressa vel consuetudine, in aliqua Republicâ probata sint, tum res bene se habet, alias privatæ speculationes nullius erunt efficaciam, imo, uti circa leges expressas, nonnunquam etiam dubia incidunt, ita jura certissima vis bellica sæpe turbat.

§. 12. Ubi super successione in regno patrimoniali controversia oriatur, optimum fuerit ad arbitros ex familia regia ire. Si successio fuerit voluntate populi constituta, declaratio populi dubium tollet.

Observ. 615.

Ubi super successione] Quis Judex sit, ortâ circa successionem controversiâ, illud ex indole liberæ Gentis facile apparet *add. l. 7. c. 7. §. 15.* sed ut plurimum vis bellica ejusmodi iudices aspernatur, ut sententias latas eludit. Quodsi, orta lite, neuter sit in possessione, tum etiam in regnis successivis est interregnum *add. d. c. 7. §. 10.* Quodsi stirps regia deficiat, tum populum plane fieri sui juris, adeoque vel sine Rege deinceps agere, vel generali aut speciali electione aliud Caput sibi imponere posse, manifestum, sed popularis illius libertatis circulos, ut plurimum etiam arma turbare solent.

CAPUT XI.

DE

OFFICIO SUMMORUM
IMPERANTIUM.

§. I.

Quibus præceptis officium summorum imperantium constet, ex indole ac fine civitatum, nec non expensis summi imperii partibus perspicue colligitur.

Observ. 616.

Quibus præceptis) De officio Imperantium minime implicata est tractatio, nam Eos ex fide data obligari, quo universum imperium, & singulas ejus partes, ac utilitatem civitatis, referant, manifestum est, de cætero tamen Officiorum illorum expositio, solertissime licet instituta, excessibus, qui hic frequentissimi sunt, mederi nequit, nisi quatenus illi ex ignorantia dependent *add. l. 7. c. 9. §. 1.*

§. 2. Ubi ante omnia requiritur, ut imperantes ipsi diligenter *discant*, quæ ad plenam ejus officii cognitionem pertinent; cum nemo laudabiliter exercere possit, quod non probe

M m 5

didicit.

didicit. Unde principi sequestranda illa studia, quæ ad huncce finem nihil faciunt. Circumcidendæ quoque voluptates, oblectationes, vanæque occupationes, quatenus istum finem intercipiunt. Ideo & in familiaritatem admittendi viri cordati, rerumque humanarum periti: adulatores, nugatores, & qui præter inania nihil didicerunt, procul arcendi. Enimvero ut generalia prudentiæ rectricis præcepta rite adplicare norit, quam penitissime ipsi conditio sui status, subjectique indoles populi est cognoscenda. Illisque præterea virtutibus cum primis studendum, quarum usus in tanta molis administratione maxime conspicitur; moresque ad tanti fastigii dignitatem componendi.

Observ. 617.

Ubi ante omnia requiritur) Primo igitur Imperans nosse debet, *qua ratione utilitatem Reipublicæ promoveri queat*, quæ notitia, ex accuratâ Reipublicæ propriæ & vicinarum cognitione, resultat, quæ autem, ad illam acquirendam, Principi facienda vel omittenda sint, Autor cordate ostendit *b. add. d. c. 9. §. 2.*

§. 3. Generalis lex summorum imperantium est hæc: *salus populi suprema lex est.* Ea enim intentione in istos imperium est collatum, ut per id procuraretur finis, ob quem civitates sunt institutæ. Inde credere iidem debent,

debent, nihil sibi privatim expedire, quod non idem expedit civitati.

Observ. 618.

Generalis lex summorum) Deinde *mediis habilibus utilitatem Reipublicæ promovere debet add. d. c. 9.*
§. 3. sed praxis aliter servat, dum, ad utilitatem Imperantis & ministrorum, omnia referuntur, eaque verus civitatum scopus esse existimatur.

§. 4. Ad internam civitatum tranquillitatem requiritur, ut voluntates civium ita temperentur, & dirigantur, prout saluti civitatis expedit. Inde summorum imperantium est non solum idoneas ei fini *leges* præscribere: sed & *publicam disciplinam* ita sancire, ut non tam metu suppliciorum, quam assuetudine cives ad legem præscripta sese componant. Ad quem finem quoque facit curare, ut doctrina Christiana, pura illa & sincera, in civitate vigeat; ac in scholis publicis talia dogmata tradantur, quæ cum fine civitatum conveniunt.

Observ. 619.

Ad internam civitatum) Ex illo interim principio generaliori, plura specialia fluunt. Debet scilicet Imperans efficere, quo subditi, *animalia politica & socialia*, imo etiam, quantum fieri potest, *religiosi Dei cultores evadant*. Ad hunc finem facit, si *solidam doctrinam* iis proponi, ac,
juxta

juxta eam, bonis moribus, per viros probos & cordatos, ab incunte atate, eos imbui curet, imprimis vero, si virtutes alat, aut saltem non contemnat, atque vicia præferat, ne rectè in juventute egisse, olim quem poeniteat add. d. c. 9. §. 4.

§. 5. Ad eundem finem expedit, perscriptas habere *leges perspicuas & planas* circa negotia; quæ frequentissime inter cives versari solent. Non tamen plura legibus civilibus fancienda sunt, quam ad bonum civitatis & civium conducunt. Nam cum de eo, quod facere vel non facere debent, sæpius per rationem naturalem, quam per scientiam legum homines deliberare soleant; ubi plures leges sunt, quam ut facile memoria comprehendi queant, & per eas prohibeantur ea, quæ ratio per se non prohibet: necesse est, ut per ignorantiam sine ulla prava intentione incidant in leges, tanquam in laqueos. Quo ipsa civibus per imperantes supervacuum incommodum conciliatur; quod est contra finem civitatum.

Observ. 620.

Ad eundem finem expedit) Cives adulti *legibus regendi sunt*, ubi quidem hoc agendum Imperanti, quo leges naturales fundamenti loco supponantur, iisque leges positivæ, planæ præter necessitatem haut accumulatae ad conservandam pacem idoneæ genioque populi con-

convenientes addantur *add. d. c. 9. §. 5.* contra hoc officium per imperitiam sæpe peccatur, & fatendum est, quod, ob lubricam harum rerum æstimationem, exacta ejus observantia sperari nequeat,

§. 6. Quia autem frustra feruntur leges, si impune eas violari tolerant summi imperantes; igitur horum est *executionem* earundem procurare, utque quivis suo jure potiatur citra lentas moras, elusiones atque vexationes efficere: *pœnas* quoque sumere pro cujusque facti conditione, transgressorisque intentione & malitia: nec sine sufficiente causa veniam indulgere; cum iniquum sit & ad irritandos civium animos efficacissimum, æqualiter meritos cæteris paribus non æqualiter tractare.

§ 7. Ulti autem nihil pœnis est sanciendum, quod non ad usum civitatis facit: ita *pœna* quoque sunt temperandæ, ut ad finem istum proportionem habeant, utque adeo cives non plus afflictionis, quam resp. utilitatis inde ferat. De cætero si scopum suum debent obtinere pœnæ, adparet eas eousque esse intendendas, ut acerbitas earundem præponderet lucro & delectationi, quæ ex facto legibus vitato redundare potest.

Observ. 621.

Quia autem frustra) Leges autem latæ executioni danda sunt, quod fit, si mediis habilibus scopoque suo sufficientibus refractarii ad faciendum officium adigantur, si poenis à violatione legum deterreantur, aut etiam nonnunquam exemplo ad eas servandas alligantur *add. d. c. 9. §. 6. 7.*

§. 8. Quia porro hoc fine in civitatem coiverunt homines, ut securitatem adversus injurias aliorum obtinerent: summorum imperantium est, eo severius *civium inter se injurias prohibere*, quo faciliorem perpetua cohabitatio occasionem ad lædendum præbet. Nec discrimina ordinum ac dignitatum eo valere debent, ut potentiores tenuioribus pro libidine insultare possint. Sed & scopo summi imperii adversatur, ut cives, quas sibi factas arbitrantur injurias, privata violentia exsequantur.

§. 9. Præterea quanquam ad omnia civitatis amplioris negotia immediate obeunda unus princeps non sufficiat, sic ut necessario *ministri* in partem curarum sint vocandi: tamen uti hi omnem à summo imperante potestatem mutuantur; ita & bene & male ab ipsis gestorum imputatio ultimo demum in istum redundat. Quam ob rationem, & quia prout ministri sunt ita recte aut prave

ne-

negotia expediuntur, summi imperantes tenentur ad munia civitatis adhibere viros probos, & idoneos, & in eorum acta subinde inquirere, eos denique prout rem gesfisse deprehenduntur, præmiis vel pœnis mactare, quo cœteri intelligant, non minore fide ac diligentia publicam, quam propriam rem tractandam. Sic & cum pravi mortalium ad scelera perpetranda spe impunitatis alliciantur, quæ ipsis præberetur facillima, ubi *judices* corruptionibus patent: summorum imperantium est, in ejus modi judices, tanquam fautores scelerum, queis securitas civium abrumpitur, severe animadvertere. Præterea licet ordinaria negotiorum expeditio ministris credenda sit; summi tamen imperantes querelis ac desideriis civium patienter aurem præbere nunquam detrectabunt.

§. 10. Cum ad *tributa* & alia onera ferenda cives nullo alio nomine teneantur, quam quatenus ista necessaria sunt ad sumtus civitatis belli pacisque tempore tolerandos: igitur summorum heic imperantium officium erit, non plus extorquere, quam necessitates, aut insignes reip. utilitates requirant: & quantum fieri potest, ita onera temperare, ut quam minime cives iisdem affligantur. Deinde ut justa in proportionem describantur; nec aliquibus

quibus civibus immunitates concedantur in fraudem & oppressionem reliquorum. Tum quæ collecta fuerunt, iu usus reip. impendantur: non per luxuriam, largitiones, superfluam ostentationem, aut inania dissipentur. Denique providendum, ut erogationes redditibus respondeant, & qua hi non pertingunt, à parsimonia & circumcisis sumtibus non necessariis subsidium petendum.

§. II. Quanquam autem summi imperantes subditos alere non teneantur, (nisi quod eorum, qui per immeritam aliquam calamitatem seipsum sustentare non possunt, peculia-rem curam agere caritas jubeat;) tamen quia non solum ex bonis civium colligendi sunt sumtus, civitati conservandæ necessarii, sed etiam robur civitatis in virtute & opibus civium consistit: igitur illis, quantum in se, providendum erit, ut *res familiaris civium* gliscat. Ad hunc finem facit cives disponere, ut quantum fieri potest, uberem proventum ex terra & aquis capiant; ut, quæ apud ipsos proveniunt, materiis industriam adhibeant, aut quem ipsi commode laborem obire possunt, ab aliis non redimant: quod fit, siquidem artes mechanicæ foveantur. Maximi quoque est momenti mercaturam, & in regionibus maritimis navigationem excolere. Nec ignavia

via solum proscribenda, sed & ad parsimoni-
am revocandi cives per leges sumtuarias,
queis superflui sumtus prohibeantur, impri-
mis illi, per quos opes civiū ad externos trans-
feruntur. Et si maiorem heic, quam quævis
leges, efficaciam obtinent summorum impe-
rantium exempla.

§. 12. Quia etiam sanitas ac firmitas in-
terna civitatum ex *unione civium* provenit,
quæ quo accuratior fuerit, eo maiore cum
efficacia vis imperii per universum sese civi-
tatis corpus dispensat: igitur summis impe-
rantibus incumbit providere, ne in civitate
factiones oriantur; nevé quidam cives inter
se peculiaribus pactis connectantur; nevé o-
mnes aut aliqui ab ullo alio, sive intra sive
extra civitatem constituto, sub quocunque
obtentu, sacro aut profano, magis depende-
ant, quam à legitimo suo principe, & in nemi-
ne plus sibi præsidii, quam in eodem reposi-
tum arbitrentur.

§. 13. Denique cum status civitatum inter
se sit pax satis infida; summorum imperan-
tium est curare, ut *virtus civium, peritiæque
armorum* alatur, & omnia, quæ ad vim repel-
lendam requiruntur, mature parentur, munita
loca, arma, milites, & rerum gerendarum ner-
vus, pecunia. Ultro autem etiam posita iusta
Na belli

belli causa nemo læcessendus, nisi tutissima ar-
riferit occasio, & conditio civitatis commode
id ferat. Eundem quoque ob finem consilia
& molitiones vicinorum accurate exploran-
da, & observanda sunt; nec non amicitia &
foedera prudenter contrahenda.

Observ. 622.

Quia porro hoc fine } Amplius ad officium Impe-
rantis pertinet, quo injurias civium prohibe-
at earumque occasionem tollat §. 8. *b.* probis
ministris utatur, illorumque actiones diligen-
ter observet §. 9. tributa modice & æqualiter
exigat eademque bene collocet §. 10. faculta-
tes civium augeat §. 11. factiones aliasque ma-
chinationes, civitati noxias, impediat §. 12.
contra vim externam vires comparet §. 13. *add.*
d. c. 9. §. 8. seqq. & si quæ alia hujus generis
sunt, de quibus multa dicere non attinet, cum
in se satis quidem certa sint, ut plurimum
autem pessime servari soleant.

2. Illud liquet, imperium civile esse rem mole-
stissimam, siquidem juxta obligationis con-
currentis præscriptum, idem exercendum sit,
sed quia hoc vulgo negligitur, imperiumque
otio, luxu ac voluptate ferè æstimatur, hinc
tanta contentione ab hominibus, in hos affe-
ctus nimium quantum proclivibus, ambiri so-
let.
3. Impediendis excessibus varia inter Gentes re-
cepta sunt remedia, prolixa scilicet multisque
arti-

articulis distinctæ promissiones, juramenta, clausula commissoria, reservata resistendi facultas, præscriptus administrandi modus & si quæ ejus generis alia adhuc occurrunt, sed nisi cordatis rationibus ac animo imperterritito, iniquioribus machinationibus tempestivè obviam eatur, illa omnia, coërcendæ tantæ libertati sunt media inefficacia, & tantum non leves aranearum telæ, quas graviores muscæ facile perrumpant.

CAPUT XII.

DE LEGIBUS CIVILIBUS
IN SPECIE.

§ I.

Dispiciendum quoque jam restat de partibus summi imperii in specie, & quæ circa eas peculiariter observanda occurrunt. Ubi primum locum occupant *leges civiles*, quæ sunt decreta summi imperantis civilis, per quæ civibus injungitur, quid in vita civili facere, quid vè omittere debeant.

§. 2. Dicuntur autem *leges civiles* duplici potissimum respectu; vel *respectu autoritatis*, vel *originis*. Priori sensu *leges civiles* vocari possunt omnes *leges*, juxta quas in foro

civili jus redditur, undecunque demum illæ originem suam trahant. Posteriori sensu leges civiles dicuntur, quæ primo à voluntate summi imperii civilis profectæ sunt, atque circa ea versantur, quæ jure naturali ac divino definita non sunt, sed ad peculiarem utilitatem singularum civitatum faciunt.

Observ. 623.

Dispiciendum quoque jam restat) Indolem & varietatem legum civilium, quam Autor §. 1.2.b. attingit *add. l. 8. c. 1. §. 1.* supra *Observ. 91. n. 17. seqq.* explicavimus. Hoc loco exponendum, quali cum moderamine Potestas Legislatoria in actum sit deducenda, ubi illud liquidum, nihil posse Imperantem jubere vel prohibere, quod à voluntate Subditorum non dependeat, hinc potestas Legislatoria tantum versatur, circa actiones *voluntarias & possibiles*, hæ autem à legibus divinis vel præcipiuntur aut prohibentur, vel permittuntur, ideò Imperans simul occupatur vel circa leges divinas *obligantes, vel permittentes.*

§. 3. Cæterum uti legibus civilibus nihil est sancendum, quod non *ad commodum reip.* referatur: ita cum vitæ civilis decori & tranquillitati maxime expediat, legem naturalem à civibus probe observari: hinc summis imperantibus incumbit, isti vim atque efficaciam legis civilis impertiri. Nam apud plurimos

mor.

rtalium tanta deprehenditur malitia, ut
ue manifesta legis naturalis utilitas, neque
us divini Numinis ei reprimendæ sufficiat.
o igitur utcunque vitæ civilis honestas
ari queat, summum imperium efficere
est, legibus naturalibus vim legum civili-
tribuendo.

§. 4. Consistit autem *vis legum civilium*
loc, ut præceptis de faciendo vel omitten-
addatur *sanctio pœnalis*; live ut definiatur,
e pœna in foro civitatis sit mansura eum,
facienda omiserit, aut fecerit omittenda.
a sanctione pœnali quæ destituuntur leges
urales, in foro humano impune violantur,
ta tamen vindicta tribunalis divini.

§. 5. Præterea quia vitæ civilis indoles
n fert, ut quod quisque sibi deberi arbitra-
, propriam per violentiam exigat: inde &
eo legi naturali subveniunt leges civiles,
ad ad ea, quæ ex illa debentur, hæ *actio-*
n accommodant, cujus vi, ista in foro civili
subsidium magistratus exigere possunt.
iam vim quæ per leges civiles non accepe-
it, ab invitis extorqueri non possunt, sed
o debentium pudore & conscientia stant.
lent autem leges civiles illis potissimum
ligationibus actionem accommodare, quæ
r expressa pacta inter homines contractæ
N 3 sunt.

sunt. Cæteris, quæ ex indefinito aliquo officio legis naturalis debentur, fere actionem denegarunt, ut esset materia, qua virtutem suam exercerent probiores mortalium; insignemque pararent laudem, si citra coactionem recte fecisse viderentur. Sæpe etiam tanti non fuit visum negotium, ut ideo prætor fatigaretur.

Observ. 624.

Cæterum uti legibus) Quoad leges divinas *obligantes*, efficere debet Legislatores, quo in vita civili observentur §. 3. *b. add. d. c. t.* §. 1. quod fit si sanctione poenali eas muniat §. 4. *b.* media coactiva, quibus refractarii ad faciendum officium adigi queant, introducat §. 5. *b.* ac prava consuetudine forte oblitteratas in usum revocet.

2. Mutare autem illum istas leges non posse, ex indole imperii divini, facile liquet, hinc leges civiles, juri naturali contrariæ, irritæ sunt, quo loco tamen cavendum, ne apparens mutatio vel contrarietas, dum Imperans statum, quem lex naturalis præsupponebat justis ex causis quandoque mutat, adeoque efficit, ne juri naturali locus sit, nobis imponat. Hobbesius inepte contendit (1) legem civilem naturali non posse repugnare (2) Imperantem posse definire, quid sit furtum, homici-

homicidium, adulterium aut injuria (3) præcepta decalogi esse præcepta civilia (4) ante leges civiles nihil justum fuisse, quos errores Auctor refellit *l. 8. c. 1. §. 2. 3. 4. 5.*

§. 6. Cum etiam multa lege naturali infinite præcipiantur, adplicatione in cuius arbitrio relictæ: inde lex civilis ad decus tranquillitatem civitatis ejusmodi *actionis tempus, modum, locum, & personas* assignare, aliasque circumstantias determinare, quantumque & præmiis homines ad eas suscipiendis allicere solet. Si quid etiam in lege naturali obscuri sit, legis civilis est *explicare*. Quam explicationem in agendo sequi cives debentur; ut ut fortasse privata ipsorum opinio non diversum abeat.

Observ. 625.

Quam etiam multa Quo rectè intelligatur, quid circa leges divinas *permittentes*, Imperantiliceat, observandum, ex iis varia jura hominibus competere, puta libertatem inviolabilitatem, dominium, & similia. Quæri igitur potest, an Legislatores humani, legem divinam permittentem ac inde orta jura tollere queat? quod quidem eatenus asserendum, quatenus subditi in id revera consenserunt. Libertatem itaque quod attinet, quemadmodum ejus ex parte facimus jacturam, quando in civitatem concedimus, ita superstitem, juxta utilitatem publicam restringendam, potestatem Im-

peranti quoque damus, hinc Idem sæpiſſime libertatem in obligationem ſua lege mutare ſolet, in ſpecie hoc accidit libertati, quæ circa executionem præceptorum naturalium occurrit §. 6. b.

Obſerv. 626.

Siquid etiam in lege naturali) Hoc monitum ad legem naturalem in genere pertinet, de cætero facultas illa explicandi, debet referri ad dictamina obſcura & dubia v. gr. quid in caſu neceſſitatis licitum vel illicitum cenſeri debeat, in qua materia quæſtiones dubiæ non plane ceſſare ſolent.

§. 7. Cum etiam plurimæ actiones per legem naturalem cujuſque judicio & arbitrio ſint relictæ, quas tamen in civitate uniformi modo temperari tranquillitatis & decoris publici intereſt: inde leges civiles ejuſmodi actionibus & negotiis *certam formam* ſolent assignare; uti contingit in ultimis voluntatibus, in contractibus, & multis aliis. Ob eandem cauſam etiam leges civiles exercitium eorum jurium, quæ naturaliter competunt, circumſcribere ſueverunt.

Obſerv. 627.

Cum etiam plurimæ actiones) Porro oſtendit Auctor, quomodo in mere licitis, libertas lege civili circumſcribi ſoleat, quod ex principio antea poſito facile intelligitur. Quod autem
reli-

reliqua jura, vitam, corpus vel opes respicientia, quæ antea innuimus, attinet, eorum adimendorum potestatem, regulariter Imperanti haut dedimus, hinc eadem etiam pro lubitu auferre nequit, sed tum demum hoc ei licet, si vel delictum admissum sit, vel utilitas evidens hoc postulet.

§. 8. Debent autem cives legibus civilibus, quatenus aperte juri divino non repugnant, *obtemperare* non velut ex nudo pœnæ metu, sed ex intrinseca obligatione, per ipsum jus naturale confirmata; quippe inter cujus præcepta quoque est, legitimis imperantibus esse parendum.

Observ. 628.

Debent autem cives) Effectus legum civilium permittentium, est *ius*, obligantium, *obligatio* proprie dicta, de quorum indole, ex doctrina generali judicandum *vid. Observ. 53.* Non tamen obligant leges civiles ad puritatem internam, cum enim actiones internas Imperans ignoret, ex ejus sane consideratione, nulla, quoad illas, oriri potest obligatio, lex tamen naturalis legem civilem, internis quoque actionibus, observari jubet, & hinc vulgo leges civiles per indirectum in conscientia obligare dicuntur.

§. 9. Denique non minus *peculiaribus jussis* summorum imperantium, quam legibus communibus cives obtemperare debent. Ubi

Nn 5

tamen

tamen observandum est, utrum summus imperans civem quid jubeat facere tanquam *actionem civi propriam*; an vero mandet suscipere nudam *executionem actionis*, quæ propria imperantis esse debeat. Nam posteriori casu necessitate ab imperante adhibita, citra proprium peccatum, potest aliquid agere civis, quo patrato ipse imperans peccat. Sed ut civis velut proprio nomine peccatum legi naturali & divinæ repugnans perpetret, fieri recte non potest. Inde est, quod si in bello etiam injusto civis jussu summi imperantis arma gerat, non peccet. Sed si ejusdem jussu aliquis innocentem damnet, falsum testimonium dicat, calumniam alicui intentet, utique peccat. Nam civis militat nomine publico; sed proprio nomine judicat, testatur, accusat.

Observ. 629.

Denique non minus peculiaribus) Jussus speciales perinde obligare ac leges generales, certum est, modo sint justæ, si autem vel leges, vel mandata specialia, injusta sint ac legibus divinis repugnent, tum eorum nulla est obligatio, an verò *subditus sine peccato eadem possit exequi*? alia quæstio est, ad quam Autor hic respicit, licet mentem non satis expresserit. Mihi distinguendum videtur inter injustitiam *dubiam*, hoc casu nulla labe contaminari vide.

videtur subditus, ex quo capite milites, in bello injusto operam præstantes, plerumque excusari possunt *vid. l. 8. c. 1. §. 6. 8. & evidentem*, v. gr. si quis innocentem occidere, vel cum matre aut bestia conbumbere jubeatur: Hoc casu si quis promte mandatum exsequatur, dubio procul crimine se polluit, sed quid dicendum, si Imperans, in casum negati obsequii, mortem vel aliud grave malum minetur?

Observ. 630.

Ubi tamen observandum est) Autor distinguit, utrum à cive requiratur *actio propria*, an *nuda actionis alienæ executio*, hanc licite suscipi, non illam, censens. Verum illa distinctio, *d. l. 8. c. 1. §. 6. 7.* etiam inculcata, vel ambigua, vel inanis & falsa est, nam si per *actionem propriam* intelligas *actionem promte susceptam*, per *executionem actionis alienæ* verò, *actionem nimis extortam* (quorsum nonnulla in *d. §. 7.* collineat) tum distinctio quidem in se vera, sed ambigua est, nec decidendæ quæstioni sufficiens. Si autem distinctionem ad eundem casum, quo scilicet vis subdito intentatur, de quo unice quæritur, referas, tum est inanis, nam quântandem formula, actio subdito iungatur, ejus tamen voluntas qualis qualis concurret, hinc aut omni casu actio erit ei imputanda, aut nullo.

Observ. 631.

Inde est, quod si) Uti distinctio est nullius momenti, ita ejus applicatio quoque male se habet,

bet, quis enim credat, militem nomine publico, sed judicem, testem & accusatorem proprio agere, quando quoad omnes jussus superioris adest? non nego militem, citius cæteris, esse à peccato absolvendum, sed ratio diversitatis dependet à diversitate mandati, dubiè vel evidenter injusti.

- 2' Hæc cum ita sint, existimabit forte quis, subditum à peccato simpliciter esse immunem pronunciandum, vel quod actio mixta non imputetur, quo inclinatur Autor *l. 1. c. 1. §. 24. b.* vel quod, ob necessitatem, cesset prohibitio, adeoque actio patranda, licitè suscipiatur. Verum neutram rationem rectè se habere *Observ. 48. 141. n. 7. seqq. Observ. 146.* ostendimus.
3. Nihil igitur superest, quam ut dicamus subditum, vi licet intentatâ, actiones ejusmodi, salvâ, conscientia suscipere non posse, licet in foro civili eum excusandum, ac à graviore poena absolvendū esse, facile quis concesserit. Quod si is, quem actio illicita respicit, in eam consentiat, quando penes eum consentiendi est arbitrium, tum licite illa poterit suscipi, quemadmodum etiam nihil vetat, quo minus subditus, occasione delicti, ab ipso Imperante patrati, actum indifferentem peragat v. gr. orationem, defendendo crimini ab aliis confectam, simpliciter recitet *vid. l. 8. c. 1. §. 7. conf. Thomas. J. J. D. l. 2. c. 1. §. 174.*

CAPUT XIII.

DE JURE VITÆ AC NECIS.

§. I.

Summo imperio civili in *vitam civium duplici modo* jus competit; *indirecte* vel *directe*; illud quidem *ad defensionem civitatis*, hoc autem *ad compescenda delicta*.

Observ. 632.

Summo imperio civili) Ad partes imperii civilis quoque pertinet Jus vitæ & necis, licet enim hic præcipuus Civitatum sit scopus, ut omnium & singulorum civium vita cæteraque bona, in tuto sint collocata, attamen sæpe ea incidunt vel tempora, vel casus, ut ejus, quod singulis gratum & utile est, non possit haberi ratio, sed ex duobus malis minus sit eligendum, ut adeo indoles vitæ humanæ & societatum civilium, utique jus aliquod durius singulisque parum gratum, etiam involvat.

§. 2. Cum enim sæpe vis exterorum per vim sit repellenda, aut jus nostrum violenter ab ipsis vindicandum; licet utique summo imperio cives ad hoc negotii compellere; ubi de industria non id agitur, ut cives vitam amittant, sed duntaxat periculo mortis eorum vita exponitur. Qualibus in periculis ut strenue

nue & dextre sese cives gerere possint, summum imperium exercere eos & præparare debet. Nulli autem civi ejus periculi metu ad munia militaria sese inutilem reddere licet. Et qui militiæ est adscriptus, hautquaquam assignatam stationem ex formidine deseret, sed ad extremum potius spiritum pugnabit; nisi intelligat imperantis voluntatem esse, ut potius vitam, quam locum conservet; aut locus iste tanti non sit civitati, quam vita istorum civium.

Observ. 633.

Cum enim saepe vis exterorum) Competit igitur Imperanti Jus in vitam subditorum propter defensionem civitatis, nam in hoc quivis subditorum consentire potuit & consensit, cum socialitati heic cedere debeat Philautia. De cætero tamen illud Jus non promiscue, aut saltem non eodem modo, omnes subditos afficit *vid. l. 8. c. 2. §. 1. 2.*

Observ. 634.

Qualibus in periculis) Ob illum finem subditi debent admittere exercitia militaria, juxta gradus tamen obligationis, qua quisque tenetur, per hæc autem exercitia, in vitæ periculum cives adducere, inhumanum est *vid. d. c. 2. §. 1.* Porro civibus haut fas est, ad operas militares sese ineptos reddere *vid. d. c. 2. §. 3.*

Observ. 635.

Et qui militiæ est adscriptus) Porro ex illo jure
con-

consequitur, quod Civibus pro Patriæ salute strenue sit pugnandum *h. add. d. c. 2. §. 3.* Hæc omnia recte se habent, si utilitas Civitatis ista exposcat, sed sæpe improbi Imperantes, ex mera ambitione ac avaritia, bella movent, miserosque subditos, utilitatis publicæ prætextu, ad insana decreta, vel exsequenda vel defendenda adigunt, eosque hosti trucidandos imprudenti consilio objiciunt, vel fame aliisque calamitatibus consumunt, quæ nemo bonus probaverit.

2. Si civis, ob delictum proprium, deditio postuletur, illa à civitate licite suscipi posse videtur. Sed civem innocentem stolido & crudeli hosti dedere, nefas est *vid. d. c. 2. §. 5.* Obsidum munus, inviti etiam cives suscipere tenentur, quos tamen hostis neque occidere aliove malo afficere potest, neque civitas dedens, perfidiâ sua efficere debet, quo ille inhumanus ab hoste tractentur.

§. 3. Directe autem vitam civibus adimere potest summum imperium ob atrocita delicta, & per modum *pœnæ*; quæ tamen & in alia hominis bona cadit. Quo loco de natura pœnæ quædam in universum erunt exponenda.

Observ. 636.

Directe autem vitam) Deinde etiam Jus in vitam subditorum Imperanti competit ob delicta, qua occasione Autor de pœnis in genere, loco

ta-

tamen forte non satis congruo, agere voluit. Summatim duo spectanda [1] *Delictum* & (2) *Pœna*. De actionibus malis seu delictis diximus *Observ.* 65. 75. in quam varias autem formas delicta se componere soleant, illud ex integra Jurisprudentiâ colligendum. Hic ejus facienda mentio ob *effectum*, quem in vita civili habet; Nimirum, delicto admisso, oritur *obligatio ad damnum*, si quod datum est, *restituendum*, de qua passim in præcedentibus actum est, deinde ad *malum aliquod excipiendum*, quod *Pœna* nomine venit.

§. 4. Est igitur *pœna* malum passionis, quod infligitur ob malum actionis; seu malum aliquod molestum, quod per modum coactionis & pro imperio intuitu antegressi delicti alicui imponitur. Licet enim sæpe alicui pœnæ loco imperentur quædam actiones; in iis tamen spectatur id, quod laboriosæ & facienti molestæ sint, quodque agenti passio quædam per eas inferatur. Invis autem pœna est infligenda, quia alias illa non obtineret finem suum, qui est, acerbitate sua homines à peccatis deterrere. Quem effectum non habent, quæ quis lubens admittit. Denique pœnæ rationem non habent mala, quæ in bello pugnâve inter repugnandum inferuntur; quia non pro imperio: neque quæ per injuriâ quis patitur; quia non intuitu antegressi delicti inferuntur. *Observ.*

Observ. 637.

Est igitur pœna) Hæc Grotii definitio, l. 8. c. 3. §. 4. etiam adducta, nimis generalis est, nam non exprimit (1) personam punientem, nec (2) delinquentis obligationem, nec (3) pœnarum finem, nec [4] puniendi modum, præterea (5) pœnam à damni reparatione non distinguit.

Observ. 638.

Seu malum aliquod molestum) Nec hæc Autoris definitio mensuram bonæ definitionis implet, nam itidem (1) omittit finem pœnarum (2) male negat obligationem delinquentis [3] modum puniendi non docet, nec (4) à reparatione damni, pœnam distinguit. Mihi igitur sic videtur. *Pœna*, intuitu fori humani, est *malum, quod ob delictum, præter damni reparationem, delinquenti obligato, ad securitatem & utilitatem societatis humanæ, ab Imperante legitime imponitur*, quam occasione eorum, quæ Autor amplius tradit, illustrabimus.

Observ. 939.

Licet enim sæpe alicui) Dicimus pœnam (1) *malum*, ubi nihil refert, si ve illud vitam, corpus, existimationem vel bona afficiat, licet utique per regulas justitiæ non minus, quam prudentiæ, tale malum sit eligendum, quod cum fine pœnarum congruit. Porro nihil interest, si ve agendo, si ve patiendo quis malum sentiat. Autor, dum pœnam, dixit *malum passionis*, ad aliquam objectionem respondere debuit, quo

labore supersedere possumus. Dico (2) *quod ob delictum*, ergo mala, quæ sine prævio delicto quis sentit, poene rationem non habent, de quo mox iterum (3) *præter damni reparationem*, hoc ideo, non quasi nunquam poena imponatur, nisi damni reparatio præcesserit, hanc enim sæpe vel natura delicti, vel delinquentis egentia excludit, sed ut constet, poenam à damni reparatione esse revera distinctam, interim certum est, quod ipsa etiam damni reparatio, perinde ut poena, delinquentibus molesta sit ipsisque dolorem afferat.

Observ. 640.

Invitis autem poena est infligenda) Amplius dicimus (4) *delinquenti obligato*; Quod *delinquentibus* tantum poena sit imponenda, postea dicetur, jam de *obligatione* saltem quaeritur? Ubi arbitramur, delinquentem propriè ad poenam sustinendam obligari hætenus, ut ei deprehenso, ob delictum punibile & legitime probatum, illa in debitâ quantitate, citra injuriam queat imponi, cum enim permessa impunitas aliis animum sit datura atque ita publicè nocitura, hinc merito, coërcendis delictis, poena infligitur, quamobrem sanctio poenalis ex justis causis oritur, adeoque delinquentem, ad poenam sustinendam omnino obstringit, ut ille queri non possit, secum iniquè esse actum.

2. Autor heic fluctuat, nam aliquando eo inclinare videtur, quod delinquens, proprio velut ju-

lumento, poenæ malum sibi attrahere non debeat *vid. d. l. 8. c. 3. §. 4. verb. sed illa nimis imperita foret*, quo sensu sententia se non male habet, verum aliquando omnem delinquentis obligationem negat ut *b. & d. §. 4. verb. proprio dici non posse, ad pœnam aliquem teneri*, quo sensu utique falsa est ac infirmo argumento nititur.

3. Nimirum, *invitis est pœna imponenda, cum alias finem suum non obtineat*, nam in hoc argumento *Minor* falsa & neutiquam probata est, cum perinde pœna suum obtineat finem, sive *invitus*, sive *volens*, quis eam excipiat, id quod inductio facile ostendit, imo emendatio delinquentis citius sperari queat, si *lubens* ille se poenæ submittat; Præterea in *Majore* nulla est connexio, à reluctantia enim ad negationem obligationis, non valere consequentiam, tam ex hujus indole, quam debitorum morosorum exemplo patet, plane si reluctantiam lex requirat, *vid. Thomas. 7. 7. D. l. 3. c. 7. §. 98. tum ab ea, ad obligationis negationem inferri posse videtur*, sed qua ratione quis antecedens probaverit? Ex dictis etiam concludendum, quod obligatio delinquentis, quoad ultimum actum, qui dolorem proxime infert, adsit, nam nisi hoc asseras, punire, est injuriam inferre, ut non sit ferenda distinctio Scholasticorum, qui actus remotos & proximos, quoad delinquentis obligationem, separare voluerunt *add. Thomas. d. c. 7. §. 69. seqq.*

Observ. 641.

Denique poena rationem non habent) Pergimus in definitione (5) *ad securitatem & utilitatem societatis humanae*, nam legitimus poenarum finis est bonum aliquod futurum, ut scilicet delicta cessent, atque ita homines securi sint, cæterum sicut iste finis aliquando obtinetur, citra poenæ impositionem, ita nec hæc, nec consuetus ejus imponendæ modus, semper est necessarius, de qua postea iterum [6] *ab Imperante*, huic enim puniendi jus tantum competit, hinc mala bellica, poenæ rationem non habere, recte dicit Autor *b.* & omnino errant Grotius & Seldenus, quando poenam ab æquali etiam infligi posse censent *vid. d. c. 3. §. 4.* Neque vero nomen saltem poenæ, sed etiam ipsa res negatur, privato enim aut pari, non competit iudicium de fine poenarum, adeoque nec jus puniendi. Inter pares igitur, tantum obtinet bellum, & mala bellica, ob alterius resistantiam, regulis poenalibus haut sunt adstricta. Denique [7] *legitime imponitur*, nempe poena, sine pravis respectibus, ad legitimos fines dirigenda, ac delicto ritè attemperanda est.

Observ. 642.

Neque quæ per injuriam) De hoc jam diximus *Observ. 639. n. 2.* Poena præsupponit delictum, hinc mala per injuriam illata, morbi divinitus immissi *add. d. c. 3. §. 2. 4.* mala fortuita aut poenæ conventionales, quas vocant, rationem veræ poenæ non habent.

§. 5. Sicuti autem libertas naturalis hoc habet, ut qui in ea constitutus præter Deum neminem habet superiorem, divinis tantum poënis sit obnoxius: ita cum, introducto inter homines imperio, hoc quoque imperantibus salus societatum attribuit, ut ipsi malo repræsentato malitiam subjectorum coërcere queant, quo plures homines secure invicem possint vivere.

Observ. 643.

Sicuti autem libertas) Postea nonnulla capita, quæ hætenus tetigimus, distinctius sunt consideranda. Possunt itaque, ceu modo diximus, poenæ tantum imponi in civitate, vi imperii civilis. Accepit autem Imperans potestatem puniendi ex pacto ipsius delinquentis, in eventum delicti, in hoc consentientis, hinc quod quis puniri possit, id est *à delicto*, quod ab hoc Homine vel Concilio, id dependet *à pacto*, quæ duo probe distingui debent. Autor potestatem, illam recte quidem Imperanti asserit §. 5. b. sed ejus originem d. l. 8. c. 3. §. 1. male explicat, dum non *à consensu delinquentis*, sed *reliquorum civium*, non *delinquentium* eam derivat, nam horum consensus, vires quidem Imperanti tribuit, sed non imperium in alium, ad quod proprius consensus utique requiritur. Non tantum autem Imperans *potest*, sed & *debet* punire, obligatur enim Deo & Republicæ, non tamen simpliciter, sed obligatio

ex utilitate Civitatis æstimanda est, nisi Deus lege universali poenam præcise imponi juss-
rit, tum enim arctior obligatio aderit *add. l. 8. c. 3. §. 6. 7. 13.*

§. 6. Etsi autem in eo nihil videatur iniqui, ut malum patiatur, qui male egit: in poenis tamen humanis non simpliciter respiciendum est, quodnam malum sit perpetratum; sed & quæ *utilitas ex poena* possit provenire. Sicuti & nequaquam eo fine poenæ exercendæ, ut læsus animum pascat, & voluptatem capiat ex dolore & supplicio lædentis; quippe cum hæc voluptas plane sit inhumana, & socialitati repugnans.

Observ. 644.

Etsi autem in eo] De fine poenarum recte pronunciat Autor, quod ob solum delictum præteritum, poena non sit imponenda §. 6. *b.* hoc enim nihil aliud est, quam malitiam delinquentis imitari, quare sicut hic delinquendo simpliciter peccat, ita qui ob solam præteritam delinquentis malitiam puniunt, in eo contra leges socialitatis agunt, quod sine spe utilitatis, malum inferant, quo sensu erga delinquentem etiam injurii sunt *add. d. l. 8. c. 3. §. 8. Grot. de. J. B. P. l. 2. c. 20. §. 4. 5.*

§. 7. *Genuinus poenarum humanarum finis* est præcautio læsionum & injuriarum; quæ provenit, si vel in melius emendetur, qui peccavit, aut alii ejus exemplo, ne deinceps
velint

velint peccare, vel si ita coërceatur, qui peccavit, ut non possit deinceps nocere. Id quod etiam ita potest exprimi; quod in pœnis respiciatur vel utilitas ejus, qui peccavit; vel ejus, cujus intererat non fuisse peccatum, quique adeo per peccatum læsus fuit; vel indistinctim quorumlibet.

§. 8. Primum igitur in sumenda pœna respicitur *utilitas ejus, qui peccavit*, dum dolore pœnæ ipsius animus emendatur, & peccandi libido per eundem extinguitur. Quale genus pœnæ etiam in plerisque civitatibus in suos domesticos exercere patribusfamilias relictum. Eo solo tamen fine ad mortem procedere posse non videtur; cum, qui mortuus est, emendari nequeat.

§. 9. Deinde in pœna versatur *utilitas ejus, qui læsus fuit*, ne tale quid in posterum ab eodem aut aliis patiatur. Quorum prius obtinetur, si vel tollatur, qui peccavit, vel vires nocendi, salva vita ipsi adimantur; vel si malo suo dedoceatur delinquere. Posterius autem obtineatur pœna aperta & conspicua, cujusq; adparatus ad terrorem aliis incutiendum aptus sit.

§. 10. Denique in pœna *utilitas* quoque *omnium* quæritur, dum nempe id agitur, ut ne, qui uni nocuit, aliis deinceps noceat, vel ut

exemplo territi cæteri à similibus patrandis abstineant. Quod pari modo atque prius obtinetur.

Observ. 645.

Genuinus poenarum humanarum finis) Postea legitimum poenarum finem Autor recenset §. 7. *seqq. add. l. 8. c. 3. §. 9. 10. 11. 12.* Videtur res commodissime sic proponi posse: Finis poenarum principalis est *Securitas*, subordinati fines *Emendatio*, *Extinctio* aut *Enervatio delinquentis*, pro ratione delicti admissi, ac *aliorum territio*.

§. II. Quod si porro tum fines poenarum, tum conditionem generis humani consideremus, adparet, *non omnia peccata esse ejusmodi indolis, ut in foro humano ea puniri omnino conveniat.* Inde poenis humanis eximuntur *actus mere interni*, i.e. cogitatio delectabilis de peccato aliquo, cupiditas, desiderium, destinatio citra effectum; etsi postea per subsequentem confessionem ad notitiam aliorum perveniant. Nam cum ejusmodi motu interno nemini noxa inferatur, nullius quoque hominis interest, ut ob eundem quispiam puniatur.

§. 12. Durum quoque nimis foret poenis humanis subicere *minutissimos lapsus*, quos in isthac naturæ conditione non datur effugere

gere quantamcunque attentionem quis adhibere instituat.

§. 13. Præterea multos actus dissimulant leges humanæ *ob tranquillitatem civitatis, aut alias ob rationes*; puta, si splendidior futurus sit actus, ubi ex intuitu pœnæ non videatur susceptus, aut ubi operæ pretium non sit iudices inquietari, aut si obscurissimæ res sit disceptationis, aut si inolitum plane malum citra convulsionem civitatis tolli nequeat.

§. 14. Denique & à pœna humana eximi necesse est illa *vitia animi, ex corruptione mortalium communi resultantia*, quæ ita frequentia reperiuntur, ut defuturi essent, quib9 imperaretur, si severis ista pœnis plectere velis, quousque in enormes actus non eruperunt: uti est ambitio, avaritia, inhumanitas, ingratus animus, hypocrisis, invidia, superbia, iracundia, simultas, & similia.

Observ. 646.

Quod si porro) Omnia delicta ab hominibus puniri non possunt aut solent, qualis §. ii. seqq. recensentur, *add. d. c. 3. §. 14.* In primis ius puniendi cessat, quoad *falsam religionem & irreligiousitatem*, nam uti hæ sæpe tales revera non sunt, sed saltem à nonnullis existimantur, ita pro delictis inter homines in universum haberi nequeunt, cum societatem humanam

non turbent, præterea religio, utpote in animo consistens, ab hominibus nequeat imperari. Quod si tamen impietas in externum Dei contemptum, aut alia facinora, societatem civilem turbantia, erumpat, vel sub prætextu religionis, socialitas lædatur, tum poenæ recte adhibentur.

§. 15. Neque tamen si quæ peccata sint patrata poenis humanis idonea, semper necessum est poenam exigere. Quin aliquando contingit, ut delinquentibus recte peccati *venia* fieri possit. Id quod tamen citra graves causas fieri non debet. Inter quas sunt, si fines poenarum in certo casu non videantur necessarii, aut si *venia* maiorem quam poena producere utilitatem sit idonea; aut si fines poenarum alia via commodius obtineri possint. Item si qui deliquit alleget sua aut sibi conjunctorum eximia in rempubl. merita, peculiari præmio digna, aut si ab alia quapiam insigni re commendetur, puta, a raro aliquo artificio; aut si spes sit fore, ut peccatum illud egregiis factis eluatur: præsertim ubi aliqua ignorantia, licet non plane inculpabilis, intervenerit, aut si particularis ratio legis in aliquo facto cessaverit. Sæpe quoque ob multitudinem peccantium *venia* est danda, ne suppliciis civitas exhauriatur.

Observ. 647.

Neque tamen si qua) Quando autem delictum punibile ac puniri solitum adest, tum Imperans delinquenti deprehenso poenam condignam imponere tenetur. Aliquando tamen veniam concedere potest, quod frustra Stoici negarunt *vid. l. 8. c. 3. §. 15. 16. 17.* Requiritur tamen (1) ut lex sit dispensabilis (2) ut justæ adfint causæ §. 15. *h.* inter quas justissima est, si lex sit nimis dura, & delinquens, vi velut majori adactus, deliquerit, quod exemplo militum delinquentium intelligi potest.

§. 16. *Gravitas* autem *delictorum* aestimatur ex objecto, in quod peccatum fuit, prout illud nobile & pretiosum habetur: item ex effectu, prout multum aut parum damni in remp. inde redundat; & denique ex pravitate intentionis, quæ ex variis indiciis colligitur; puta, si facile potuit resistere causis, quibus quis ad peccandum fuit impulsus; aut si præter communem rationem peculiaris quædam accessit, quæ à peccando debebat abstertere; aut ubi circumstantiæ singulares factum aggravant; aut si animum quis habuerit idoneum ad resistendum peccatorum illecebris. Sed & considerari solet, primus quis, an aliorum exemplo seductus semel, an sæpius, & post consumtas frustra admonitiones quis peccaverit.

Observ.

Gravitas autem delictorum] Poenæ nomine imponitur malum, quod (1) ad finem poenarum producendum aptum, ac (2) delicto conveniens esse debet, quæ posterior æstimatio satis lubrica, ac in vitâ civili valde corrupta est. Interim ad proportionem illam inveniendam, observanda est delictorum *indoles* *vid. d. c. 3. §. 18.* & *quantitas*, quæ ex *circumstantiis* oriri dicitur §. 16. *b. add. d. c. 3. §. 19. 20. 21. 22.* sed, accurate loquendo, illa existit à *diversa voluntatis influxu* ac à *legum*, quæ violantur, *diversitate*, quæ duo fundamenta circumstantiæ vulgò laudatæ innuunt *vid. Observ. 75. n. 4.*

§. 17. Quod tamen *pœnæ genus*, & *quantum* præcise singulis peccatis sit infligendum, penes summum imperium civile est definire: quod heic unice utilitatem reipubl. præ oculis habere debet. Unde fieri potest & solet, ut eadem poena imponatur duobus delictis inæqualibus. Nam quæ æqualitas iudicibus circa reos observanda præcipitur, illa intelligenda est de reis, qui idem specie delictum commiserunt, hætenus, ut quod in uno vindicatur delictum, alteri citra gravissimam causam condonari non debeat. Et si autem quantum fieri potest, homo in hominem lenior esse debeat: interdum tamen poenas exasperari salus civitatis, & securitas civium jubet; puta, si

si contra gliscentia vitia asperiore medicina opus est; aut ubi delictum aliquod reip. sit perniciosissimum. Id autem omnino observandum circa magnitudinem poenarum, ut illæ tantæ sint, quantæ sufficiant ad reprimendam libidinem mortalium, qua feruntur in peccatum, in quod poenæ constituntur. Tum etiam, ne exigantur graviore poenæ, quam legibus definitæ sunt; nisi atrociores circumstantiæ factum aggravent.

Observ. 649.

Quod tamen poenæ genus) Postea etiam poenæ seu mali imponendi *quantitas* recte est definienda, quam definitionem, juxta utilitatem publicam, fieri debere, Autor innuit *b. add. d. c. 3. §. 23. 24.* sed hæc, ultima norma est proxime igitur, in poena determinanda, debet considerari (1) delictorum quantitas (2) delinquendi consuetudo ac facilitas, ac (3) delinquentis persona. Juxta legem Mosaicam particularem, vel Talionem, definitio poenæ præcisè non est facienda *d. c. 3. §. 26. 27.*

Observ. 650.

Unde fieri potest & solet) Specialis quæstio est, an eadem poena duobus delictis inæqualibus queat imponi? Autor ita censet, ejus tamen ratio non adeò concludit, sed potius id, de quo quæritur, supponit, hinc regulariter quæstio neganda videtur, aliquando tamen affirmari poterit (1) ob defectum majoris poenæ, sic multa de-

delicta inæqualia, morte coërcentur (2) ob
lubricam delictorum & poenarum æstimationem.
 Plane aliquando delicta non tantum in se, sed
 etiam regulariter, quoad quantitatem, sunt
 quidem diversa, quæ tamen, pro ratione tem-
 poris aliarumque circumstantiarum, æqualia
 nonnunquam censi possunt, hæc igitur, si
 eadem poena coërcantur, id ad quæstionem
 non pertinet.

Observ. 651.

Et si autem quantum) Juxta fundamenta antea al-
 lata, & poena recte definienda, & nonnun-
 quam exasperanda vel lenienda est, qua in re,
 uti propter lubricam horum æstimationem,
 facile impingi potest, ut nimia accuratio heic
 exigi nequeat, ita negari tamen non posse vi-
 detur, quin crudelitas & vitiosa *προσωπολη-
 ψία*, sæpius genuinæ normæ limites consulto
 transiliat.

Observ. 652.

Tum etiam ne exigantur) Hæc minus appositè di-
 cta sunt, pertinent enim ad Magistratus infe-
 riores, qui poenas legibus constitutas simpli-
 citer ad delicta evenientia applicari debent,
 hic verò est quæstio de poenis, a Summo Impe-
 rante, in usum Reipublicæ, legitime consti-
 tuendis.

§. 18. Quia tamen eadem poena non o-
 mnes æque afficit, adeoque apud omnes non
 parem effectum producit circa reprimendam
 peccandi libidinem; inde tam in generali pœ-
 na.

iarum designatione, quam earundem ad singulos adplicatione, respicienda est *persona ipsius delinquentis*, & in eadem illæ qualitates, quæ sensum pœnæ augere vel minuere possunt; puta, ætas, sexus, status, opes, vires & similia.

Observ. 653.

Qui tamen eadem pœna) In determinanda pœna ad personam delinquentis etiam esse respiciendum, jam *Observ. 649. n. 3.* diximus, & hic recte inculcatur. Est tamen ut alibi, ita hic etiam, caute incedendum, quædam personarum discrimina sat evidenter diversum doloris sensum operantur, adeoque merito diversam pœnam exigunt, modica multa inopi sat gravis est, quæ tamen in divite ne minimum quidem dolorem excitaret. Homo robustus gravem corporis coërcitionem, sine salutis dispendio sustinet, sed ætatis teneræ vel dubiæ valetudinis homuncionem illa consumeret. Ad observandam igitur æqualitatem, opus est inæquali pœnæ determinatione, nam hæc demum, quoad dolorem excitandum, æqualis est. Sed an v. gr. ejectio ex civitate, magis urat honoratum, quam plebejum, id non adeo liquet, hinc, ad introducendam pœnæ inæqualitatem, personæ hæctenus non recte habetur ratio, quando autem sola dignitas minuendæ pœnæ sufficere existimatur, in humiles verò impune sævitur, eam non justam

itam esse poenæ ætimationem, sed corruptissimam προσωπολήψιαν, ad prava instituta, ever- tendæ humanæ amicitiae introducta, susti- nenda pertinentem, cordati facile intelligunt. *add. d. c. 3. §. 25.*

§. 19. Porro uti ob alienum delictum in foro humano poena proprie dicta nemo pot- est affici: ita si *ab universitate aliqua delictum sit admissum*, eo non tenebitur, qui in id non consentit. Atque inde isti dissentienti nihil poterit eripi, quod nōmine & beneficio uni- versitatis non obtinebat. Etsi ex occasione punitæ universitatis & innocentes incommo- dum sentire soleant. Expirant quoque de- lecta universitatum, quando nemo amplius superest eorum, queis consentientibus & coo- perantibus illud delictum fuit patratum.

§. 20. Id tamen frequenter contingit, ut *alienum delictum occasionem præbeat*, ex qua in alios incommodum proveniat, aut bonum antea speratum intercipiatur. Sicuti bonis parentum ob delictum confiscatis, ad pau- pertatem rediguntur etiam innocentes liberi. Et reo aufugiente fidejussor exsolvere mul- tam cogitur, non ex delicto, sed quia in talem eventum ultro sese obligavit.

Observ. 654.

Porro uti ob alienum delictum) Delinquentem tan-
tum

tum esse puniendum, non alios, licet iis cum delinquente arcta intercedat conjunctio ex regulis socialitatis facile liquet. Poena tamen pecuniaria, in alios nonnunquam, ob consensum transmittitur, quemadmodum etiam non est infrequens, ut quis occasione alieni delicti, damnum sentiat, sed est vel damnum fortuitum, vel voluntarium, adeoque non iniquè accidit, quod exemplo innocentium Universitatis delinquentis membrorum §. 19. liberorum & fidejussoris §. 20. declaratur *add. d. c. 3. §. 28. seqq.*

2. Modus imponendi poenam, in his summatim consistit (1) hoc agat Imperans eique subordinatus Judex, quo delinquentem, in suam redigat potestatem, quod carcere, custodibus ac aliquando, salvo conducto, obtineri potest (2) postea de eruenda delicti veritate sollicitus esse, debet, hinc omnia legitima probandi media, adhibenda sunt, ad quæ etiam tortura recte instituta, referri potest. Quod si de delicti veritate constet, tum (3) poena conveniens dictanda, ac legitime, sepositis pravis respectibus, executioni danda est. Reo tamen, quoties æquitas postulat, defensio indulgeri debet.

3. Sic igitur delinquens ad poenam certo modo obligatur, hanc igitur obligationem si expleat, *justus* dici potest, sed est justitia non valde splendida, & justior est, qui illum exercendæ justitiæ casum evitat. Porro Imperans & Ju-

dex quoque, ad poenas legitime imponendas, obligantur, quam obligationem si impleant, sensu satis splendido, *justi* sunt. An vero, in imponenda poena, Commutativa, Distributiva, vel, nescio, quo elogio maclanda Justitia, observetur, ea inepta, ac Grotio & Pufendorfio *vid. d. c. 3. §. 5.* indigna quaestio est. Quod si autem illam obligationem negligant, tum sunt injusti, cujus injustitiae species solent esse *nimia lenitas*, hacque frequentiores *erudititas, avaritia & προσωποληψία.*

CAPUT XIV.

DE

EXISTIMATIO- NE.

§. I.

Existimatio in genere est valor personarum in vita communi, secundum quem aptae sunt aliis personis exequari aut comparari, eisque vel antehaberi, vel postponi.

Observ. 655.

Existimatio in genere) Inter partes Imperii Civilis est etiam Jus determinandi Subditorum Existi-

Estimationem, qua occasione Autor in genere, de hac materia, sibi differendum esse existimavit *vid. l. 8. c. 4. §. 1. 8.* sed locus illi rei non satis aptus est. Quoad rem ipsam, certum quidem est, quod homines, quoad physicam Corporis quantitatem sint sæpe dissimillimi, quemadmodum vice versa hætenus æquales censi possunt, quod omnes anima & corpore consent. Sed de his jam non est quæstio, solent insuper in hominibus *aptitudo agendi*, nec non *ipsæ actiones*, ut & *imperium*, *pacta* ac *legum dispositiones*, eo fine factæ, considerari ac inde diversus eorum Valor repeti, de quo hic agitur.

Observ. §56.

Est valor personarum) Existimatio sine dubio, *jus* est, sed quia homines certo modo *quantos* efficit, ideo ab effectu & objecto, *quantitas moralis* vel *valor* audit, perinde ac pretium, quod, hominum intuitu, utique etiam *jus* est *add. §. 1. 8. c. 4. §. 1.*

§. 2. Dividitur illa in *simplicem* & *intensivam*. Utraque consideratur vel inter eos, qui *in naturali libertate*, vel qui *in statu civili* invicem degunt.

Observ. §57.

Dividitur illa) Divisio hæc ex fundamentis *Observ. §55.* laudatis, resultat, nam uti hæc gradibus discernuntur, ita existimationem quoque per gradus esse distinguendam, inde consequitur. Quando autem Autor ait, quod existimatio

possit vel intuitu status naturalis, vel civilis expendi, tum hoc est intelligendum, vel de statu naturali, qui inter diversas Respublicas, aut diversarum Civitatum subditos occurrit, vel quatenus ille etiam in Civitatibus adhuc superesse censetur, dum homines, abstrahendo à conditione civili consideramus, nam alio sensu inter homines status naturalis non existit.

§. 3. *Existimatio simplex inter eos, qui in naturali libertate vivunt*, in hoc potissimum consistit, ut quis talem se ferat, & pro tali habeatur, quicum agi queat tanquam cum viro, bono, & qui cum aliis ad præscriptum legis naturalis vivere sit paratus.

Observ. 658.

Existimatio simplex) Hæc est *Valor ex probâ humanitate*, seu *legum observantia*, ad communem mortalium modum factâ, ortus. Eam consequitur *bona fama* add. d.c. 4. §. 2.

§. 4. Atque isthæc *integra* tamdiu habetur, quoad quis nondum per malitiosum aut enorme facinus sciens volensque dolo malo legem naturæ adversus alios violavit. Inde & naturaliter quilibet pro bono viro habetur, donec contrarium probetur.

Observ. 659.

Atque isthæc integra) Juxta hanc existimationem, homines, qui leges observant, sunt *æquales*, eadem.

demque tamdiu durat, quamdiu leges non enormiter violantur, cumque communis hominum probitas, fere in omissione delictorum consistat, hinc illa merito tamdiu præsumitur, donec horum susceptio, quæ facti est, probetur. *add. d. c. 4. §. 3.* Aliquando ex indicibus darum idoneis, delicta præsumuntur, aut etiam per mendacium, ab hominibus malefariatis, asseruntur, inde oritur *sinistra opinio*, cui solitamen homines cordati nihil tribuere solent. *Simplici* isti *existimationi* respondet in aliis *obligatio perfecta*, qua eam agnoscere ac per injuriam violare non debent.

§. 5. Eadem existimatio *diminuitur* per facinora enormia contra legem naturalem malitiose patrata; quæ efficiunt, ut majore circumspectione opus sit, si quis cum tali agere velit. Ea tamen macula elui potest præstita ultro damni dati reparatione, & edito seriæ poenitentiae documento.

§. 6. *Consumit* eandem penitus vitæ genus & institutum, directe spectans ad aliis promiscue nocendum, & rem ex manifestis aliorum injuriis faciendam. Cujus farinae homines quamdiu resipiscere nolunt, tanquam communes hostes possunt tractari ab omnibus, quos ipsorum malitia ullo modo potest tangere. Reparare tamen hi existimationem possunt, ubi præstita refusione damni, aut ob-

renta condonatione, honestum vitæ genus, vitioso ejurato, subierint.

Observ. 660.

Eadem existimatio) Quia proba humanitas existimationis simplicis causa est, hinc necessario consequitur, quod, illa cessante, hæc quoque deficiat, qui defectus, nomine *infamiae naturalis* vel *facti* rectè exprimitur, de cætero mera privatio est, ac, emendato vite generæ, evanescit, non secus ac, redeunte sole, tenebræ dissipantur *add. d. c. 4. §. 4. 5.*

§. 7. *Existimatio simplex intra civitates degentium* est, qua quis juxta leges & mores civitatis pro vitioso ejusdem membro non fuit declaratus, & aliquo numero esse intelligitur.

Observ. 661.

Existimatio simplex) Adhuc in civitate, existimatio simplex ex proba humanitate oriri dicenda est, nam conditio civilis ad eam non requiritur, sed illa ad intensivam quid conferre potest.

§. 8. Ist hæc in civitate *deficit* vel *ex mero statu*, vel *ex delicto*. Prius contingit *duplici* modo; vel ut status ille in se naturaliter nihil turpe habeat; vel ut cum vitio, aut saltem ejus opinione sit conjunctus. Illud contingit in quibusdam civitatibus, ubi servi nullo numero sunt. Hoc circa lenones, meretrices, &

& similes obtinet; qui quamdiu publice tolerantur in civitate, communi quidem defensione fruuntur, honestorum tamen hominum consortio excludendi. Quod idem contingit quibusdam circa foeda aut vilia, licet naturaliter non vitiosa occupatis.

Observ. 662.

Ist hac in Civitate) Amissio existimationis simplicis in civitate, evidentius sic repræsentari posse videtur: Amittitur illa vel ita, ut aliquis *ne quidem pro homine habeatur*, id quod accidit mancipiis, quæ loco existimationis, pretium habent, ac brutis comparantur certo tamen modo, de cætero illa privatio nullam involvit turpitudinem, sed commiserationem potius ejusmodi homines merentur, imo ablationem illam regulis socialitatis non convenire, *Observ.* 538. n. 3. 4. existimavimus, vel ut *honestorum hominum numero quis non censeatur*, id verò accidit vel *ob sordidum vitæ genus aut infelicem nativitatem*, ut in spuriiis, excoriatoribus similibusque personis, qui defectus non male *levis notæ macula* dicitur, vel *ob delictum*, quod vel *toleratur*, ut delinquentes peculiarem quasi statum efficiant, ceu in quibusdam Civitatibus, circa lenones & meretrices contingit, vel *non toleratur*, ubi in specie, ob delictum, existimatio amitti dicitur.

§. 9. Ex delicto autem eadem plane deficit, quando quis juxta leges civiles ob certum

delictum *infamia* notatur; idque ut vel morte simul plectatur, & sic memoria ejus notetur, vel ut civitate expellatur, vel ut in civitate retineatur tanquam infame & putridum membrum.

Observ. 663.

Ex delicto autem) Amissio existimationis, quæ vel ob delictum, vel statum ex delicto ortum, accidit, *infamia* dicitur §. 9, b. De cætero vel notat *meram existimationis privationem*, quæ emendato vitæ genere cesset, vel *maculam positivam*, quæ vitæ emendatione elui nequeat. Illa vulgo dicitur *Infamia facti*, hæc *juris*, quæ usitatum quidem sed absurdum puniendi genus est, quatenus vivos afficit, cum delinquentes non emendet, sed ad bene agendum ineptos efficiat *add. d. c. 4. §. 6. 7.*

§. 10. Id autem manifestum est, existimationem simplicem, seu *naturalem bonestatem non posse alicui eripi ex mero arbitrio* summorum imperantium. Cum id nullo modo ad utilitatem civitatis facere, adeoque in ipsos nullo modo collatum intelligi possit. Sicuti nec vera infamia videtur contrahi posse, dum quis iussa civitatis per modum nudi ministri exsequitur.

Observ. 664.

Id autem manifestum est) Ad veram igitur infamiam requiritur delictum, hinc sequitur (1)

in-

infamem non fieri, qui injuriam inultam relinquit *d.c. 4. §. 8.* [2] Imperantem pro lubitu, existimationem simplicem subdito auferre non posse, non tantum quod illa potestas ei non sit concessa, ceu Autor *b.* præcipit *add. d. c. 4. §. 9.* sed &, quod ei concedi non possit, nam sine scelere scelestum esse, contradictionem involvit, per tyrannidem tamen insons emolumentis externis existimationis simplicis privari potest.

Observ. 665.

Sicuti nec vera infamia) Sic etiam docetur *d. c. 4. §. 10.* sed verius est, quod minister turpe Imperantis mandatum exequens, omnino apud cordatas gentes infamiæ notam incurrat. Autoris sententia videtur ex falsa hypothese, quasi executio plane ad executorem non pertineat, dependere, quam rejeci *Observ. 630. 631.*

§. II. *Existimatio intensiva* est, secundum quam personæ, alias quoad existimationem simplicem æquales, sibi invicem præferuntur, prout uni præ altero insunt, queis aliorum animi ad exhibendum honorem permoveri solent. Est autem *honor* proprie significatio judicii nostri de alterius præstantia.

Observ. 666.

Existimatio intensiva est) Hæc definitio *d. c. 4. §. II.* etiam relata, definitum non satis explicat, nam existimatio intensiva non semper facit homi-

nes inæquales, nec ejusmodi fundamenta præsupponit, quæ ad exhibendum honorem alios permovere, propriâ virtute, possint aut debeant. Ego arbitror duplicem existimationem intensivam esse asserendam, *absolutam*, quæ inter homines, sine societatis civilis consideratione, obtinet, & *hypotheticam*, quæ societates civiles consequitur, adeoque ex hypothese illarum introductarum, locum invenit. De utraque distincte agendum erit; Illa est *Valor ex præstantiâ, legibus attemperatâ, seu sublimiori virtutis exercitio, ortus.*

Observ. 667.

Est autem honor) Honor vel accipitur pro ipsa existimatione, quo sensu est in honorato vel pro existimationis agnitione, tum existit in honorante. De cætero in eodem explicando non consentiunt *vid. supr. l. i. c. 4. §. 6. Hobbes. de civ. c. 15. §. 9.* breviter dici potest, honorem esse *utriusque existimationis intensivæ, absolutæ & hypotheticæ, agnitionem.* Definitio Autoris, ad existimationem absolutam referenda est, nam in genere honor, alterius præstantiam, non præsupponit *add. l. 8. c. 4. §. II. 13.* Quod si honor late spargatur, nomen *Gloriæ* assumit.

§. 12. Hæc existimatio intensiva considerari potest vel *inter eos, qui in naturali vivunt libertate, vel inter cives ejusdem reipublicæ.* Deinde expendenda sunt ejusdem fundamenta, & quidem prout producunt vel *aptitu-*

ptitudinem duntaxat ad honorem ab aliis expectandum, vel *jus strictè dictum*, quo idem ab aliis tanquam debitus postulari queat.

Observ. 668.

Hæc existimatio) Tota sequens doctrina, juxta distinctionem Existimationis modo datam, nobis interpolanda videtur. Quæ igitur hic Autor docet, ea sic mutanda esse censeo: Primo considerata est existimatio *absoluta*, quæ à statu naturali & civili abstrahitur, in utroque tamen occurrere potest, deinde *hypothetica*, idque vel ratione status *naturalis* vel *civilis*.

Observ. 669.

Deinde expendenda sunt) Non recte fundamenta, ratione unius existimationis, conjunguntur, cum experientia doceat, sine illis conjunctim sumtis, sæpe hanc adesse, hinc potius dicendum, quod alia sint fundamenta Existimationis *absolutæ*, alia *hypotheticæ*, quæ adeò distincte considerari mereantur.

§. 13. *Fundamenta intensivæ existimationis* in genere censentur omnia illa, quæ insignem perfectionem & præstantiam habent, aut eandem judicantur arguere, & quidem talem, cujus effectus cum fine legis naturalis aut civitatum congruit. Uti sunt perspicacia mentis, & capacitas varias scientias & artes addiscendi, acre judicium in rebus gerendis, animus firmus, & per externa inconcussus, illece-

illecebrisque ac terroribus superior, eloquentia, forma & dexteritas corporis, bona fortunæ, & in primis res egregie gestæ.

Observ. 670.

Fundamenta intensiva] Hæc doctrina tantum ad Existimationem absolutam pertinet, Hujus scilicet fundamentum in genere, est *animi vel corporis præstantia, legibus vel attemperata vel attemperanda*. Sola præstantia, in se spectata, indifferens est, si malo fine adhibeatur, non laudem, sed vituperium meretur *add. d. c. 4. §.*

12.

§. 14. Hæc tamen omnia non producant nisi *jus imperfectum* seu aptitudinem ad habendum ab aliis honorem & venerationem. Unde si quis eundem aliis etiam bene meritis denegaverit, non injuriam facit, sed duntaxat ob inhumanitatem & velut incivilitatem male audit. Sed *jus perfectum* ad habendum ab altero honorem, aut ejus insignia, provenit vel ex imperio, quod quis in istum obtinet, vel ex pacto cum eodem ea super re inito, vel ex lege per communem dominum lata aut approbata.

Observ. 671.

Hæc tamen omnia) Ex fundamentis antea laudatis, oritur quidem existimatio intensiva, sed nulla præ aliis prærogativa aut præcedentia, quod tamen *h.* doceri videtur. Nam (1) alii similia fundamenta opponere, atque ita æqualitatem

tem urgere possunt *vid. d. c. 4. §. 14.* (2) ea, quibus aliis præstamus, sæpe à nostra voluntate non dependent, aut si inde dependeant, alii quoque ea efficere possunt (3) vera virtus, quæ hujus existimationis unicum est fundamentum, infirmitatis humanæ semper est memor, humilitati studet, nec, ob lubricam ejusmodi præstantiam extolli cupit.

2. Nihil amplius igitur hæc Existimatio tribuit, quam jus ad *simplicem ejus agnitionem*, quæ honoris & gloriæ nomine, recte etiam venit, ceu *Observ. 667.* innui. Sive autem illud jus perfectum, sive imperfectum dicere velis, hætenus nihil refert, nam natura objecti coactionem aliquam excludit, ac omnis illa existimationis nostræ agnitio, debet esse voluntaria, ac ex sincero affectu proficisci, nam existimatio ex vera oritur virtute, quod hic supponimus, ergo non alium quoque quam verum honorem desiderat, hujus autem fundamentum cum sit affectus internus, quem dirigere non est penes alios, hinc liquet, coactionem aliaque ejus generis media eliciendo honori, non recte adhiberi.

3. Ex quibus etiam patet, homines vere virtuosos, de honore vel gloria consequenda, seorsim & specialiter non debere esse sollicitos. Recte agendum est, si gloria sequatur, bene est, si non, defectum illum æquo animo ferre oportet. Quod igitur *ingenia maxime vivida & erecta amore gloria duci*, à nonnullis existimen-

mentur *vid.* Op. Maj. l. 2. c. 4. §. 9. id eatenus admittendum videtur, quatenus iis multum stultitiæ & superbiæ humanæ adhærere solet. Qui igitur laude propriâ emendicatisque vel cœmētis suffragiis, ut captata aura populari, ad gloriam contendunt, illi vel solido gloriandi fundamento destituuntur, vel in modo ambiendi, aliquid humani patiuntur.

Observ. 672.

Sed jus perfectum) Hæc cum præcedentibus non recte conjunguntur, nova potius nunc incipit tractatio, Hactenus scilicet de Existimatione *absoluta*, quam etiam *Virtutis* vel *Ethicæ*, non male dixeris, actum est, nunc de *Hypothetica*, quæ etiam *Civilis* vel *Politica* dici potest, videndum. Nimirum ex hypothesi societatum civilium introductarum, necessario aliqua inæqualitas inter homines fuit introducenda, hinc exorta est memorata existimatio, quæ nihil aliud est, quam *valor ex imperio*, *conventionem speciali aut legis dispositione ortus*, *juxta quem homines in conversatione civili, quoad actus externos, equales aut inæquales habentur*.

2. Debebat quidem existimatio illa, per media indicata, juxta existimationem virtutis, quantum fieri potest, i. e. probis & bene meritis vel mereri aptis (non optimis & maxime meritis, hoc enim factum est impossibile) tribui, sed id adeò non observatur, ut sæpe pessimi, ac cordatorum judicio, infames homines summâ gaudeant

ant dignitate, hinc nimis simplex fuerit, si quis fundamenta, §. 13. laudata, quoad Existimationem Politicam, ad quam tamen Autor vel unice, vel principaliter respexit, semper adesse, existimare velit.

§. 15. *Inter principes* autem & integros populos pro eminentia & *præcedentia* solet allegari potissimum antiquitas regni & familiæ, amplitudo & opulencia ditionum, & potentia; qualitas potestatis, qua quis imperium in suo regno obtinet; & splendor tituli. Quæ tamen omnia per se non pariunt jus perfectum ad præcedentiam adversus alios reges populosvé, nisi pacto aut concessione horum istud quæsitum fuerit.

Observ. 673.

Inter Principes autem) Inter Principes liberasque gentes Existimatio Politica, a conventionem vel expressa vel tacita dependet. Ab hac si abieris, cætera omnia inania sunt, magnamque Gentium, a quibus illa allegantur, non retorquentur, superbiam & corruptionem arguunt §. 15. b. add. d. c. 4. §. 15. 16. 17. 18. 19. 20. 21. 22.

§. 16. *Inter cives* autem *gradus dignitatis* designare summi imperantis est; qui tamen heic recte cujusque præstantiam, & ad conferenda in rempublicam merita aptitudinem respicit. Quem autem iste civi dignitatis gradum

gradum assignaverit, eum recte hic contra concives suos tuetur: nec minus eodem ipse adquiescere debet.

Observ. 674.

Inter cives autem) In civitatibus existimatio oritur ab imperio vel pactitio vel naturali *vid. d. c. 4. §. 15. 23.* ut & quoad subditos *lege civili*, dum Imperans, vel dato munere, vel seorsim, dignitatem vel personalem vel transmissibilem, subditis tribuit, quod late Autor persequitur *d. c. 4. §. 23. seqq.* denique enim à pacto, nam subditos inter se de existimatione, quatenus est privati arbitrii, pacisci posse, indubium est.

Observ. 675.


Quem autem iste) Acquisitæ dignitati respondet honor, quem alii signis inter gentes receptis *vid. d. c. 4. §. 13.* exhibere tenentur, hinc dignitas ab aliorum contemptu recte vindicatur, ac exhibitio honoris, modo factus absit, urgetur. Id inprimis observandum, existimationi politicæ, non respondere honorem sincerum, ex serio amoris & venerationis affectu profectum (qualem circa ethicam exegimus *Observ. 671.*) cum enim ipsa existimatio, virtute & meritis præcisè non nitatur, hinc satis est, si illa honore externo, coacto, frigido & tantum non mortuo excipiatur, quamobrem etiam de hujus generis honore litigari potest, id quod inprimis certamina Gentium, quibus sæpe

sepe, de inani titulo vel ceremonia, & cujus præstatio, irrisionis magis quam honoris rationem habet, acriter contenditur ostendunt.

2. Quod si de existimatione politica judicium ferendum sit, tum ex dictis quidem satis constat, quod à societatibus humanis illa penitus abesse non possit, circa eam tamen majores partes habere stultitiam & malitiam, quam probitatem & prudentiam, non minus certum videtur. Debebat illa hominibus *probis & cordatis*, per *legitima media* tribui, ac obtenta ad *utilitatem proximi* adhiberi. Sed quid notius est, quam quod illa, sine ulla meritorum aut probitatis consideratione, hominibus ineptis & improbis imo scelerum manifestis tribuatur? Dispensatio dignitatis, provido consilio haut peragitur, sed per largitiones ac imposturas, honores obtinentur. Denique, quod gravissimum est, acquisita dignitas non ad utilitatem proximi adhibetur, sed tota fere in vanitatem & injustitiam effunditur, jam enim superbia in immensum se inflat, ac in titulis, ceremoniis aliisque ejus generis inanibus commentis introducendis, nullum servat modum adeò ut ineptiarum illarum dudum aliqua exstiterit disciplina; Jam dignitas non alio fine introducta censetur, quam ut otio, luxui, gulæ & libidine servire, quicquid moderatum probumque est, velut indecens, averfari, ferociæ indulgere, alios proterve ac impune insultare propriæque libidini obnoxios

os habere, ac horum omnium vanitatem & improbitatem, compendiaro acquisitæ dignitatis titulo, deinde tegere queas, ut concludendum videatur, existimationem politicam esse maximam partem, injustæ tyrannidis fœtum, ac graviter vulneratæ imo oppressæ socialitatis argumentum.

3. Quid ergo homini probo & prudenti in ista corruptione faciendum? Videtur ipsum necessitas excusare, si aliquando dignitatem, sine non adeò bono introductam, etiam mediis regulariter non probandis, ambiat, quatenus scilicet stationem suam alias vix tueri, ac animi dotes explicare ei licet. Dignitate verò obtentâ prudenter & juste utetur, procul omni vanitate fastu & malitia, imo, ex persona aliorum etiam ea, quæ levitatem vanitatemque redolent, tueri poterit & debebit, cum ei ista mutare integrum non sit. Sed quis heic accurate servabit modum, ac, malitiâ & stultitiâ triumphantis, ab istâ labe sibi penitus cavebit.



CAPUT XV.

DE

POTESTATE SUMMI IMPERII
IN BONA CIVITATE CON-
TENTA.

§. I.

Quemadmodum ubi bona abs sum-
mis imperantibus in cives profecta
sunt, in istorum arbitrio est, quid hi
in ea juris obtineant : ita in ea bo-
na, quæ cives propria sibi industria, aut alio
modo plene quæsiwerunt, *triplex* potissimum
jus, ex indole civitatum resultans, & ad ha-
rum finem necessarium, summis imperanti-
bus competit.

Observ. 878.

Quemadmodum ubi bona) Potestas Imperantis vel
respicit *bona subditorum* vel *ipsius civitatis*. Pri-
or vel ex *dominio* vel *imperio* resultat. Nimi-
rum si civitas omnium & singularum rerum
dominium originariè habeat, eoque jure se
non penitus abdicet, utut bona inter subditos
distribuat, aut si subditi res suas, in quibus ple-
nam habent proprietatem, Civitati & Impe-
ranti ultro offerant, ab iisque certo modo e-

as iterum recipiant, tum manifestum est, quod jus civitati & Imperanti, in bonis subditorum, competens, ex dominio fluat. Quicquid igitur juris vel illis, vel his adscribendum sit, id omne ex concessionis modo judicandum, nam poterit Civitas dominium illibatum sibi retinere, ac in subditos nihil nisi precariam possessionem, cum jure percipiendi alimenta, transferre, vel etiam dominium partiri, ac subditis utile concedere *vid. l. 8. c. 5. §. 1.*

2. De cætero tale civitatis dominium regulariter negandum est, finis enim Rerum publicarum id non exigit, imo parum utilitatis, illud habet *vid. d. c. 5. §. 1. in fin.* hinc temere constitutum censi non potest. Specialius hoc ita probari potest, cum incerta sint civitatum initia, hoc tamen probabile videtur, dominia privata imperio civili esse antiquiora, quod si adeo eos, qui civitatem constituerunt, dominio rerum suarum jam instructos supponas, nulla apparet ratio, quare illud in civitatem & Imperantem eos transtulisse, existimare debeamus, si vero ponamus casum rariorem, quo multitudo certum terræ tractum occupaverit, adeoque dominium prius penes civitatem, quam singulos fuerit, verisimile tamen est, bona in hos ita esse descripta, ut à Civitate amplius dependere, quoad dominium rerum possessorum, illi non debeant. Ex quo illud etiam consequitur, proprietatem penes privatos esse illibatam, libet quis per vim imperium

perium acquirat, nam ad hoc acquisitio merito restringitur. Juxta hæc igitur non opus est, ut de casibus, quibus dominium penes subditos sit, valde simus solliciti *vid. d. c. s. §. 2.* cum hoc potius tamdiu præsumendum sit, donec probetur contrarium, id quod non nisi in ignavæ indolis nationibus, & quæ dominatum facile pati queant, accidere arbitrer.

Observ. 677.

Ita in ea bona) Regulariter igitur Imperantis jus in bona privatorum, tantum ex *imperio civili* debet repeti, cujus tres partes, à diverso fine, non male asseruntur. De cætero ejus vis meritò, quoad omnes, qui in Republica reperiuntur, tamdiu asseritur, donec restrictio, ac nonnullorum exemptio, doceatur.

§. 2. Primum jus in eo consistit, ut civib9 isti possint *leges præscribere* circa usum eorundem ad utilitatem civitatis attemperandum, aut circa modum, qualitatemque possessionum, uti & rationem transferendorum in alios bonorum, & quæ sunt ejus generis alia.

Observ. 678.

Primum jus] Primo imperium civile *usum bonorum privatorum moderatur*, ex quo varia fluunt (1) aliquando *legibus sumtuariis subditos ad parsimoniam, frugalitatem & laborem revocat*, sed ut plurimum illarum legum est exigua vis, dum exempla contraria luxum sustinent, ac ex hoc lucrum capitur (2) *res corrumpi vetat*,

interest enim Reipublicæ, ne quis re sua male utatur (3) *subditis occasionem lucrandi suppeditat*, institutis commerciis vel artibus mechanicis (4) *modum administrandi res suas iis præscribit*, dum rationem acquirendi, conservandi & alienandi bona determinat (5) *bona Reipublicæ subtrahi prohibet*, ex quo capite noxia commercia, divitias civitatis ad externos transferentia, ut & superstitionas donationes impedit (6) *abusus inveteratos tollit*, unde fluit Secularisatio bonorum, à Clero callidè Civitati subtractorum, & si quæ alia ejus generis adhuc sunt *add. l. 8. c. 5. §. 3.*

§. 3. Alterum jus in hoc consistit, ut possit particulam aliquam de ipsorum bonis *tributi* aut *vectigalis* nomine decerpere. Cum enim civium vita & fortunæ per civitatem sint defendendæ, oportet, ut hi conferant, unde sumtus ad eum finem necessarii tolerantur. Sic ut valde impudens sit, qui defensione quidem & commoditate civitatis frui vult, & tamen nihil operæ aut rei ad eandem servandam conferre. Etsi heic merito prudentes sese rectores ad querulum vulgi ingenium attemperent, & ut quam minimo cum sensu ista corrogari queant, laborent; inprimis æqualitatem observando, & modica potius, ac varia, quam grandia ac uniformia exigendo.

Observ. 679.

Alterum jus) Postea imperium Civile ex bonis subditorum perpetuorum vel temporariorum, patrimonium publicum colligere potest, quod non tantum fit per tributa & vectigalia, ut Autor *b.* docet, sed alia media, nempe si in poenam bona confiscantur, ut caduca patrimonio publico subjiciantur, vel de emigrantium bonis aliqua portio detrahatur, quamvis illa omnia, tributi generalius accepti, nomine comprehendi queant, De cætero Imperans in exigendis oneribus publicis, prudenter & juste versari, ac exacta ad Civitatis utilitatem adhiberi debet, si secus faciat illosque limites transfiliat, tum non legitimum imperium exercet, sed animi libidini indulget ac subditos bonis spoliatur. *add. d. c. 5. §. 4. 5. 6.*

§. 4. Tertium jus est *dominium eminens*, quod in eo consistit, ut urgente reip. necessitate bona subditi cujuscunque, quibus præsens tempus maxime opus habet, ad usus publicos arripi & adplicari queant; licet ista longe superent ratam partem, quam is ad sumtus reip. conferre tenebatur. Ob quam tamen rationem isti civi, quod excedit, de publico aut ex collatione cæterorum civium, quantum ejus fieri potest, refundi debet.

Observ. 680.

Tertium jus est] Tandem imperio civili jus est, ob utilitatem Reipublicæ, omnia bona vel eximiam eo-

rum partem, subditis auferendi add. d. c. 5. §. 7. de
 cujus justitiâ uti positis requisitis dubitandum
 non est, ita ea scrupulosè observari, in tanto
 imperii civilis abusu, quis credat?

§. 5. Præter hæc tria jura in multis civita-
 tibus dantur *peculiaria bona publica*, quæ pa-
 trimonium reip. aut regni solent appellari.
 Quod alicubi iterum distinguitur in *patri-*
monium principatus, & reipublica, seu in fiscum,
 & ærarium. Quorum prius destinatum est
 ad sustentationem regis, ejusque familiæ: po-
 sterius ad publicas utilitates regni. Circa
 prius rex habet usum fructum, & de fructibus
 inde provenientibus pro suo arbitrio dispo-
 nere potest. Circa posterius autem admini-
 stratoris munus obit, idemque usibus, quibus
 destinatum est, adplicare debet. Neutrum
 nisi consensu populi alienare potest.

Observ. 681.

Præter hæc tria jura) Circa bona publica, Civitati
 non tantum competit *imperium*, cujus vi varia
 circa illa disponit, sed & *dominium proprie sic di-*
ctum. De cætero omnes res, quæ in civitatis
 districtu reperiuntur, & dominum privatum
 non habent, nec constanti consuetudine, pro
 rebus nullius habentur, originariè ad civita-
 tem pertinere censendæ sunt, de quo in hypo-
 thesi, non nihil explicatius egi in Specim. Jur.
 Publ. l. 3. c. 3. quæ ad thesin facile referri pos-
 sunt.

Observ.

Observ. 682.

Quod alicubi iterum) Bonorum publicorum dominium, in privatos aliquando devenire patitur Civitas, idque vel simpliciter, vel reservato aliquo emolumento. Quædam verò in suo statu perdurant, quorum usus uti in genere ad Civitatis utilitatem, eo modo, quem rei cuiusvis indoles admittit, referri debet, ita eum nonnunquam leges fundamentales specialius determinant, quod Autor *h.* indicat, ac Imperantis circa bona illa potestatem rectè declarat *add. d. c. 5. §. 8. 11.* Ab illis autem bonis differunt *res Principis patrimoniales*, in quibus, ad exemplum privatorum, dominium vel alia jura Idem habet.

§. 6. Multo minus autem, qui regnum non habet in patrimonio, totum regnum, aut ejus partem *alienare* potest, nisi accedat consensus populi, & posteriore casu etiam peculiariter consensus partis alienandæ. Sicuti nec vice versa membrum aliquod à civitate invita sese abrumpere potest, nisi per vim externorum hostium in eam sit redactum conditionem, ut aliter nullo modo salvum esse queat.

Observ. 683.

Multo minus) Hæc rectè quidem dicuntur *add. d. c. 5. §. 9. 10.* sed præter scopum, nam hætenus de *rebus publicis* earumque *dominio* quaestio fuit, hic autem sermo instituitur de *jure imperandi personis*, eique respondente *subjectione*, de cæ-

tero verum est, quod sicut subditi imperio se subtrahere non debent, ita vice versa Imperans proprio tantum consensu, illud in alios regulariter transferre nequeat *vid. Observ.*
602.

CAPUT XVI.

DE BELLO ET PACE.

§ I.

Quanquam id legi naturali maxime sit conveniens, ut homines pacem invicem agitent, ultro ea præstando, quæ debebant; imo pax ipsa sit status homini, quatenus à brutis distinguitur, peculiaris: aliquando tamen ipsi quoque homini bellum fit licitum, & quandoque necessarium, quando nempe per alterius malitiam nostra servare, aut jure nostro potiri citra vim adhibitam nequimus. In quo ipso tamen prudentia, & humanitas suadet, ut ne ad arma eamus, ubi ex injuriarum nostrarum persecutione plus mali in nos nostrosque quam boni sit redundaturum.

Observ. 684.

Quoniam id legi) Occasionem juris belli & pacis, quod ad partes Imperii civilis etiam pertinet, generalis iterum de bello & Pace instituitur

tur tractatio, quanquam alio loco concinnius de hac re agi poterat. Pax est *status hominum, inter se neque litigantium, neque litigandi propositum habentium*, seu breviter est *status mutue socialitatis*. Bellum autem latiori sensu, est *status eorum, qui iurium causa, actu vel proposito litigant*, excluditur igitur certamen brutorum, & pugna, exercitii vel quæstus causæ instituta. Frequentius tamen in bello concipiendo, ad litigantium numerum, litigandi modum respicimus, ut strictiori magisque usitato sensu, sit *status insignis hominum multitudinis, per vim vel apertam vel obliquam, propter jus controversum, certantis, aut, omissa, etiam ex pacto, ad tempus hostilitate, propositum certandi retinentis*. Excluduntur itaque tum litigia verbalia, tum duella *add. Grot. de J. B. P. l. 1. c. 1. §. 2.* Esse de cætero Pacem, statum hominis naturalem, bellum vero, præternaturalem & extraordinarium, quicquid contra ineptiat Hobbesius, ex genuinis principiis facile liquet.

Observ. 685.

Imo pax ipsa) Sic etiam docetur *l. 8. c. 6. §. 2.* sed doctrina non satis liquida est, nam potius pax & bellum hominibus sunt propria, cum ratione dirigantur, inter bruta autem, quicquid ejus generis occurrit, à solo instinctu dependeat.

Observ. 686.

Aliquando tamen) Ex intentione Dei absoluta bellum semper inter homines cessare debet, sed
ex

ex hypothesi malitiæ humanæ, socialitatem ultrò abrumpentis, illud licitum imò aliquando necessarium est, nimiam tamen festinationem; & socialitas & sæpe prudentia dissuadent *add. d. c. 6. §. 2. Grot. de J. B. P. l. 2. c. 24.* Illud autem rectè computantibus facile apparebit, à Monarchiis pleraque bella oriri.

§. 2. *Iusta causa*, ob quas bellum suscipi possit, huc redeunt, ut nos & nostra servemus ac tueamur contra injustam aliorum invasionem, aut ut, quæ nobis debita ab aliis exhiberi renuuntur, asseramus, aut injuriæ jam illatæ reparationem & cautionem in posterum obtineamus. Ob priorem causam quod geritur *bellum defensivum*: quod ob posteriores *offensivum* dicitur.

Observ. 687.

Iusta causa ob quas (Bellum justum præsupponit injustam offensionē, adeoq; semper *defensivum* est, quia tamen offensio illa aliquando *violenta* est, aliquando *simplex*, hinc bellum, quod illi opponitur, inspecie *defensivum*, quod huic, *offensivum*, cum Autore dicere licebit *add. d. c. 6. §. 3.*

§. 3. Neque tamen confestim, ubi quis sese læsum arbitratur, ad arma est decurrendum, inprimis ubi adhuc dubii aliquid circa jus aut factum occurrit: sed tentandum num *amica via* res possit componi; puta, colloquio inter partes instituto, provocatione ad arbi-

arbitros facta, aut re forti commissa. Præcipue autem hæc via tentanda illi, qui petit; quippe cum possessionem cum aliquo titulo favor utique comitetur.

Observ. 688.

Neque tamen confestim) Socialitatem prohibere, ne statim in bellum ruamus, satis certum est *add. d. c. 6. §. 4.* Ut tamen exinde solennium indictionum necessitas non sequitur, ita, si adversarii ambitio improbitasque satis manifesta sit, non consultum fuerit, mollioribus remediis, alteri ludibrium saltem debituris, tempus frustra terere.

§. 4. *Injustæ* porro bellorum *causæ* vel *aperte* tales sunt vel *colorem* aliquem licet dilutum admittunt. Illæ ad duo potissimum capita referuntur, avaritiam & ambitionem, seu habendi, & dominandi libidinem. Hæ variæ sunt; puta, metus ex opibus & potentia vicini utilitas jure destituta, amor fedes meliores parandi, denegatio eorum, quæ ex simplici aliqua virtute debebantur, stoliditas possessoris, cupido extinguendi jus alterius legitime quæsitum, quod nobis paulo molestius videtur: & similia.

Observ. 689.

Injustæ porro bellorum causæ) Injustas bellorum causas, earumque colores recte satis Autor explicat, nisi quod *denegatio eorum, quæ ex simplici*

plici aliqua virtute debentur, aliquando iusta belli causa esse queat *add. d. c. 6. §. 5.* præterea Gentibus bellicosis non desunt prætextus plausibiliores, quibus iniustitia belli involvi possit. Ex his ergo liquet, quod bellum ratione *causæ*, sit vel *justum*, quod injustam offensionem præsupponit, nec favore belli defensivi excidit, licet vim inferat, vel *injustum*, quod sine causa alios lædit, nec defensivi jure utitur, licet vim illatam repeilat. Præterea bellum ratione *modi gerendi*, justum vel injustum esse potest, quo sensu raro, omni ex parte bellum justum reperiēs.

§. 5. Et si autem *modus agendi in bello* maxime proprius sit vis & terror: non minus tamen adversus hostem fraude ac dolo uti licet, modo fides data non lædatur. Inde hostem licet decipere sermone assertivo, seu per fictas narrationes: nequaquam autem per promissa aut pacta.

Observ. 690.

Et si autem modus agendi) Posita iusta belli causa, dubitandum non est, quin quavis ratione hosti nocere liceat, in specie adeo id fieri potest per sermonem, modo stat⁹ belli revera adhuc dureret, quod si vero hostilitas expresso vel tacito pacto sublata sit, tum sicut aliis actionibus, ita etiam sermone, hosti damnum inferre, nefas erit *add. d. c. 6. §. 5. l. 8. c. 11. §. 5. Grot. l. 3. c. 1. §. 18.* quemadmodum etiam de hoste quā tali, falsa

sa crimina spargere, illicitum putatur *vid. l. 4. c. 1. §. 19.* quod tamen non simpliciter admit-
tendum.

§. 6. Circa vim, quæ in bello adhibetur
adversus hostem ejusque res, distinguendum
est inter id, *quod hostis sine injuria pati pot-
est, & quod ipsi salva humanitate nos inferre
possumus.* Qui enim hostem sese mihi de-
claravit, cum in hoc ipso sit professio extre-
ma mala mihi intentandi, eo ipso quoque
quantum in se mihi indulget facultatem ad-
versus se in infinitum. Humanitas tamen
juber, ut quantum armorum impetus pati-
tur, non plus mali hosti inferamus, quam de-
fensio aut juris nostri vindicatio, & in poste-
rum securitas requirit.

Observ. 691.

Circa vim quæ) Recte ait Autor *b. & d. l. 8. c. 6. §. 7.*
quod læsio bellica in infinitum extendi queat,
habet enim hostis illimitatum nocendi propo-
situm, ac propter ejus resistantiam, bellator
justus, mala inferenda non perinde dirigere
potest ac judex mala poenalia temperare pot-
est & debet *vid. Observ. 641. n. 6.*

Observ. 692.

Humanitas tamen jubet) Quando autem vires in-
justi adversarii ita sunt fractæ, ut bellator ju-
stus mala imponenda dirigere fere possit, tum
leges socialitatis, processum erga delinquentes
observandum, hic quoque præcipiunt, hinc
eatenus

eatenus lædi potest, quatenus damnum reparandum, impensæ repetendæ, cautio exigenda, aut etiam delinquentis malitia coercenda & expellenda *add. Observ. 124. 125. 126.*

§. 7. Solet bellum dividi in *solenne & minus solenne*. Ad illud requiritur, tum ut geratur autore utrinque eo, qui summum habet imperium, tum ut præcesserit indictio. Minus solenne est, quod denunciatum non est, aut quod in privatos geritur. Quo etiam pertinent bella civilia.

Observ. 693.

Solet bellum dividi) Divisio hæc est ex jure Gentium i. e. ex nuda Gentium consuetudine, quæ bello justitiam neque conciliat, neque aufert, hinc exigui momenti censeri debet *add. d. c. 6. §. 9. Grot. l. 3. c. 3.* sed ita agunt homines: quo magis actiones eorum corruptæ & improbæ esse solent, eo magis de externo colore & splendore sunt solliciti!

§. 8. *Jus bellum movendi* in civitate uti est penes eum, qui summum habet imperium: ita istud usurpare citra delegatam ab illo facultatem supra mensuram magistratus est, etiam ubi hic conjicit, summæ potestati, si consuleretur, placitum heic & nunc bellum geri. Etsi omnibus, qui alicui provinciæ aut loco munito, cum copiis militaribus præficiuntur, ex fine muneris sui id quoque injunctum intelli-

telligatur, ingruentem hostem quovis modo à locis sibi commissis repellere : ut tamē non temere bellum in ditionem hostilem transferant.

Observ. 694.

Jus bellum movendi) In statu naturali quivis se defendere potest, & eo sensu unicuique jus belli gerendi competit *vid. Grot. l. 1. c. 3. §. 1. 2. 3.* Constitutis vero civitatibus, ad has earumque Capita, illud jus translatum est, hinc Magistratui qua tali potestas illa non competit, nisi in quantum ei fuerit delegata. Multo minus privatis eadem tribui potest, nisi in casu necessitatis, aut ubi per intestinas calamitates in illum statum deducta est Civitas, ut auxilium impertiri nequeat *vid. d. c. 6. §. 8. 10. 11.* Id autem facile liquet, Imperantibus jus belli non aliter competere, quam quatenus leges socialitatis, ac statuta Civitatibus propria permittunt, quas restrictiones si Imperantes ambitiosi & turbulenti observarent, dubio procul pauciora inter homines forent bella.

§. 9. Cœterum uti qui in naturali libertate vivit, ob injurias tantum abs se patratas bello potest peti: ita in civitate sæpe bello *invaditur rector civitatis*, aut *tota civitas*, etsi iste autor injuriæ non fuerit. Sed ut recte hoc fiat, necessum est, ut injuria ista aliquo modo in illum transierit. Ac rectores quidem civitatum ex injuriis per antiquos cives,

aut qui recens ad eos confugiunt, patratis participant, si *passi* fuerint eas patrari, aut si *receptum* præstent. Ut patientia sit culpabilis, requiritur, ut quis & sciat delinqui, & possit prohibere. Sciri autem à rectore civitatis præsumuntur, quæ à civibus aperte & frequenter fiunt. Facultas prohibendi semper præsumitur, nisi ejus defectus manifeste probetur. Ut tamen, qui noxium ad se confugientem poenæ duntaxat declinandæ causa recipit & protegit, bello peti possit, id magis ex peculiari pacto inter vicinos & socios, quam communi aliqua obligatione provenit; nisi iste profugus apud nos hostilia in eam civitatem, quam deseruit, machinetur.

Observ. 895.

Cæterum uti qui) Bellum geritur contra eos, qui nos lædunt, vel qui lædentibus antecedenter vel consequenter accedunt, quod qua ratione fiat, hic satis exponitur *add. d. c. 6. §. 12. Grot. l. 2. c. 21. §. 2.* Cæterum, ut ob injurias privatas, Civitas aliqua bello sit invadenda, id rarius contigerit, Civitas enim imbellis bellum non expectabit, sed satisfactionem offeret, contra potentem vero infelici successu id suscipietur, adeoque ejus omissionem prudentiæ dictamina facile persuadebunt.

Observ. 896.

Ut tamen qui noxium) Verius est quod Civitas, etiam

iam sine pacto prævio, ad receptum dedendum obligetur, modo is verum delictum commiserit, & videtur Autorex falsa hypothefi, quasi delinquens ad pœnam non obligetur, in oppositam sententiam devenisse, sed licet absolutè ad pœnam delinquens non teneatur, hætenus tamen omnino tenetur, ut quicquid Imperans, juxta leges socialitatis in ipsum decreverit, sine injuriâ ei queat imponi, ex quo jus persequendi, eique respondens dedendi necessitas etiam resultat *vid. Grot. l. 2. c. 21.*

§. 4. *add. Observ. 640.*

§. 10. Sed & illud inter gentes receptum, ut pro debito civitatis proprio, aut quod justitiam requisitam non administrando in se derivavit, singulorum civium bona teneantur hætenus, ut extranei, quibus debetur, istis apud se deprehensis manus injicere queant: ita tamen ut civibus, quibus hoc modo sua eripiuntur, refusio sit procuranda ab illis, qui debitum contraxerunt. Quales executiones solent vocari *repressalia*, quæ frequenter sunt bellorum præludia.

Observ. 697.

Sed & illud inter gentes; Licitum quoque est contra lædentes *repressaliis* uti, quarum indolem satis exprimit Autor *h. add. d. c. 6. §. 13.* & differunt illæ ab *arrestis*, quæ ipsum debitorem ejusque bona afficiunt, ut & *talione*, qua incom-

modum, quo quis alterum affecit vel afficere parat, in autorem retunditur. De cætero non est, cur repressalias ex jure Gentium voluntario, cum Grotio l. 3. c. 2. §. 2. repetamus, tum ob consensum subditorum, ex ipsa Civitatis constitutione colligendum, naturaliter facultas exercendi eas competat, modo justa causa, à parte iis utentium, subsit, id quod cum cæteris capitibus, jam tetigi in Specim. Jur. public. l. 3. c. 4. §. 5. seqq.

§. II. Bellum gerere potest non solum *quilibet pro se*, sed & unus *pro altero*. Quod tamen ut recte fiat, requiritur in eo, pro quo bellum geritur, justa causa; in auxiliatore autem probabilis ratio, cujus intuitu pro isto in alium hostilia exercere queat. Inter eos autem, pro quibus non solum possumus, sed & debemus arma sumere, primo loco sunt subditi nostri non universi solum, sed & singuli; modo ex hocce civitas non evidenter majoribus malis sit involvenda. Sequuntur socii, in quorum fœdere id comprehensum est. Qui tamen non modo civibus nostris cedunt, ubi ipsi eodem tempore auxilio opus habent, sed & apud eosdem justa belli causa, & aliqua prudentia in bello suscipiendo præsupponitur. Hos excipiunt amici, etsi peculiariter id ipsis non sit promissum. Deniq; ubi nulla alia ratio est, vel sola communis cognatio sufficere

re

re potest, ut injuste oppressum, nostra auxilia implorantem, quantum commode facere possumus, defensum eamus.

Observ. 698.

Bellum gerere potest) Bellum gerere possumus pro nobis & aliis nempe subditis, sociis, amicis aliisque innocentibus, quibus scilicet vel ex pacto, vel simplici aut arctiori quadam humanitate sumus obstricti, ceu Auctor *b.* deducit *add. d. c. 6. §. 14.* Recte etiam bellum pro subditis alienis, à proprio Imperante, iniquâ tyrannide oppressis, suscipitur, quamvis Ei, qui tale bellum est suscepturus, probe antea circumspiciendum sit, quid domi agatur, ne gentibus ludibrium debeat, dum in aliis vindicare vult, cujus ipse reus est.

§. 12. Licentia in bello eousque se extendit, ut quamvis quis cædes patrando aut res vastando atque eripiendo, ultra quam humanitas admiserit, sit grassatus: gentium tamen opinione pro infami, & quem honesti viri averfari debeant, non habeatur. Nisi quod cultiores gentes modos quosdam nocendi hostibus viles habent; puta, veneno uti, aut alterius cives militesque in dominorum cædem corrumpere.

Observ. 699.

Licentia in bello) Hanc in infinitum, etiam jure naturali, recte extendi, contra hostem resistentem ac illimitatum nocendi propositum ha-

bentem, jam diximus *Observ. 691.* quod si autem vires injusti hostis fractæ sint, tum ei parci jubet humanitas, quemadmodum in fontibus vim fieri semper vetat, sed jus Gentium, i.e. consuetudo gentium bellicosarum ac ferocium, nullos lædendi limites, etiam hoc respectu, agnoscit *add. d. c. 6. §. 16. Grot. l. 3. c. 4. seqq.*

Observ. 700.

Nisi quod cultiores gentes) Omissio certorum nocendi modorum non tam à cultura Gentium, quam rationibus utilitatis, aut quod modi illi adhiberi omnino nequeant, dependere videtur, nam ut ut dentur arma venenata, attamen etiam fontes, pascua & similia venenari posse, id forte plus rumoris vulgaris, quam veritatis habet.

Observ. 701.

Aut alterius cives) Specialis quæstio est, *an liceat hostem injustum immissis percussoribus conficere?* Grotius distinguit, *utrum percussores v. gr. milites nostri, hosti peculiariter obstricti non sint, an vero peculiari fide ei teneantur, ut sunt ipsius domestici, illorum operâ nos simpliciter uti posse hos vero sollicitare aut impellere illicitum l. 3. c. 4. §. 18.* ministerium autem sponte oblatum admittere, non injustum esse existimans. Autor domesticis etiam percussoribus uti, vile quidem *h.* sed non injustum esse putat *d. c. 6. §. 18.* rationes tamen sententiæ contrariæ non satis elidit. Forte dicendum, per-

percussorem domesticum, domino suo, intuitu hostis justis, quis jus occidendi habet, quod hic supponitur, non obstringi, adeoque eum hactenus nec perfidum esse, nec perfidiam in hostem derivari.

§. 13. *Res mobiles in bello tunc demum capte* intelliguntur, quando persecutionem hostilem effugerunt: immobiles autem, quando ita à nobis detinentur, ut hostem inde arcendi sit facultas. Etsi ut priores domini jus ad eas res recuperandas plane extinguatur, necessum sit, ut per subsequens pactum omni prætensionis renunciaverit. Alias enim vi partum vi licebit iterum eripere. Cæterum uti milites autoritate civitatis belligerant: ita quæ ipsi hostibus eripiunt, proprie civitati, non sibi adquirunt. Etsi passim receptum, ut mobilia, præsertim, quæ non sunt magni pretii, militibus, qui ceperunt, relinquuntur per conniventiam, aut præmii, vel quandoque stipendii loco; aut ut alliciantur, qui citra necessitatem sanguinem suum locare velint. Quando autem res capte iterum hosti eripiuntur, immobiles quidem ad antiquos dominos redeunt; nec minus mobiles debebant; etsi apud plerosque populos & hæ militibus in prædam concedantur.

Res mobiles in bello) Circa acquisitionem bellicam hæc fere consideranda (1) *quid acquiratur?* juxta jus naturale, debitum, quod tamen non tantum ex jure principali, sed & accessorio æstimandum esse, facile liquet, hinc contra hostem resistentem, in infinitum occupatio bellica, etiam naturaliter, extendi potest, sed viribus ejus fractis, tantum saltem recte aufertur, quantum reparando damno & cautioni futuræ requiritur. Sed jure Gentium nec justitia belli attenditur, nec occupationis ulli sunt limites *vid. d. c. 6. §. 20.* de quo etiam dixi in *Observat: ad Lauterbach. Observ. 1433. 1436.* (2) *quæ res acquirantur?* mobiles & immobiles, ut & incorporales seu jura, ut vulgo censent, quod tamen varie temperat Autor *d. c. 6. §. 22.* sed sollicitudo illa videtur esse supervacanea, cum hoc unice spectandum sit, an hostis etiam objectum juris v. gr. rem debitam, in sua habeat potestate, nec ne, nam uti illo casu, nullà juris ratione, rem detentam sibi auferri patietur, ita hoc, ex prætenso quadam juris occupatione, illam ei ultro concedere, nimis simplex fuerit, juxta quæ adeò occupatio rerum incorporalium plane non occurrit *add. Observ. ad Lauterb. Observ. 1438.* (3) *quo modo fiat acquisitio?* per actualem occupationem, nam omnis acquisitio bellica, in primis quæ ex bello injusto oritur, merà vinititur, adeoque nihil acquisitum cen-

censeri debet, nisi quod hostis in sua habet potestate; Neque quoad ipsos hostes, inter se spectatos, ad acquisitionem requirendum est, ut res occupata per aliquod tempus apud hostem sit, aut ut bellum gerentes, iuxta Gentis classe censeantur, quanquam illa attendi solent, quando de jure postliminii, intuitu dominorum privatorum, quaeritur, de quo non nihil explicatius egi in Obs. ad Laut. *Observ.* 1431. 1435 1439. 1440. 1441.

Observ. 703.

Etsi ut prioris domini) Amplius (4) *Quousque dureret acquisitio?* Quamdiu vis urget, nisi conventio accesserit. *b.* Ex eo autem consequitur, quod, si Victor victi debitores liberaverit per acceptilationem, Victus, libertati suae restitutus, debita nihilominus exigere queat, nisi conventionem jus suum remiserit, nam quo jure victor debitoribus debita remittit, eodem Victus remissionem non servat, quo pertinet controversia inter Thebanos & Thessalos quondam agitata, circa quam Autor quidem *d. l. 8. c. 6. §. 23.* pro his pronunciandum esse censet, sed illorum partes defendi in Obs. ad Lauterb. *Observ.* 1438. n. 2.

Observ. 704.

Ceterum uti milites) Ulterius (5) *quis jus occupandi habeat?* Summi Imperantes eorumque milites, *vid. Observ. ad Lauterb. Observ.* 1432. 1434. (6) *cui res acquirantur?* Ei, cujus auspiciis bellum geritur, qui tamen militibus res mobiles con-

cedere solet, imo sæpe debet *h. add. d. c. 6. §. 21. add. Observ. ad Lauterbach. Observ. 1445.*

Observ. 705.

Quando autem res captae Porro (7) *quis occupatio-*
nis sit effectus? Personæ captae fiunt servi hosti-
um, si hi rigore belli uti velint, ac res, eorum
dominio subjiciuntur *vid. Observ. ad Lauterb.*
Observ. 1442. 1443. 1444. Denique (8) *quando*
acquisitio desinat? si personæ vel moriantur, quo
casu apud Romanos obtinebat fictio Legis
Corneliae, cujus inconcinnitatem in *d. Observ.*
ad Lauterb. Observ. 1445. ostendi; vel ipsæ,
aut res, hostis custodiam evadant, nam tum
postliminio redire dicuntur. Consideratur
autem postliminium vel inter *ipsas gentes bel-*
ligerantes, quo sensu omnes res, simulac hosti
auferendi iterum ereptæ sunt, postliminium
habent, vel quoad *dominos privatos antiquos*,
horum intuitu non omnes res postliminio re-
deunt, seu ipsis non indistincte restituuntur, de
quo fusius egi in *d. Observat. ad Lauterb. Obs.*
1446. seqq. conf. Autor d. l. 8. c. 6. §. 25. 26.

§. 14. Solet denique *bello adquiri* etiam
imperium tam in singulos, quam in integros
populos victos. Quod tamen ut fiat legi-
timum, & conscientias subditorum stringat,
necessum est, ut victi victoribus fidem dede-
rint, & hi hostilem statum, animumque adver-
sus illos exuerint.

Observ.

Observ. 706.

Solet denique bello) Imperium quoque bello acquiritur, de quo Grotius l. 3 c. 8. pluribus agit. An autem violenta illa acquisitio sit titulus legitimus, tum, quando injusti invaloris imperium reddatur legitimum, denique quid subditis, in valore rerum potente legitimoque imperante exulante, sit faciendum, de eo supra *Observ.* 605. actum est.

§. 15. Suspenduntur actus bellici per *inducias*, quæ sunt conventio, per quam ad tempus, manente belli statu ac lite, ex qua bellum fuit ortum, bellicis actibus offensivis est abstinendum; quibus elapsis, ni interea pax coiverit, citra novam indictionem ad hostilitatem reditur.

Observ. 707.

Suspenduntur actus bellici per inducias) Hæ accipiuntur vel pro *statu pacifico*, quod denominatio germanica evidenter innuit, vel pro *conventionione*, qua ille status producitur, quo sensu Auctor eas definit *h.* earumque valorem amplius ostendit l. 8. c. 7. §. 1. 2. 3. *add.* Grot. l. 3. c. 21. §. 1. 2.

Observ. 708.

Quibus elapsis) Hoc ex natura conventionis temporariæ ultro sequitur, eo facilius autem quis concesserit, nova indictione hic opus non esse, quo minus illa in genere est necessaria, cum probabile sit, omnem illum indictionum apparatus,

ratum, à Gentibus bellicosus, palliandæ ambitioni & avaritiæ, esse adinventum, licet aliud videatur Grotio *d. l. §. 3.* & Autori *d. c. 7. §. 6.*

§. 16. Possunt autem *induciae dividi* in eas, quæ ineuntur subsistentibus in expeditione exercitibus, retentoque utrinque bellico adparatu; quæ ad modicum fere tempus sumuntur: & inter eas, quibus adparatus bellicus utrinque dissolvitur. Hæ in satis longum tempus iniri possunt & solent, & plenæ pacis faciem gerunt, ac aliquando etiam pacis vocabulo insigniuntur cum adjectione certi temporis. Nam alias regulariter omnis pax æterna est, seu in perpétuum exstinguit controversias, ob quas bellum conflatum erat. Quæ autem solent vocari *induciæ tacitæ*, nullam continent obligationem, sed partes ibi pro lubitu utrinque quiescunt, & ad actus bellicos, quando cunque placitum fuerit, procurrere iterum possunt.

Observ. 709.

Possunt autem induciæ) In genere sic dicendum: *induciæ* sunt vel *veræ*, quæ conventionem præsupponunt, exque vel breviores vel longiores, vel *apparentes* seu *improprie*, quas fessi hostes sine conventionem nonnunquam sibi mutuo indulgent. *add.* Autor *d. c. 7. §. 7.* Pertinent igitur hæ divisiones magis ad *inducias* pro statu, quam conventionem, acceptas.

Observ.

Nam alias regulariter) Licet sane terminos ita accipere, ut induciarum nomen ad solam hostilitatis omissionem, pacis vero, ad controversiam, ex qua hostilitas enata, etiam tollendam, referamus, si tamen quis verbis aliter utatur, non apparet, cur valde cum eo litigandum sit, etsi Auctori aliter quodammodo videatur *d. c. 7. §. 4. 5.*

2. Si induciæ v. gr. à Calendis Martiis, usque ad Idus Julias, contractæ sint, uterque terminus à quo, & ad quem, iis probabiliter continetur *vid. d. c. 7. §. 8. Grot. d. l. §. 4.* De extero subditos induciæ obligant à tempore scientiæ, *Grot. d. l. §. 5.* Durantibus induciis à læsione positivâ, dubio procul abstinendum est *Id. d. l. §. 6. seqq.* ea verò, quæ ad defensionem & securitatem nostram faciunt, suscipere licet, si induciæ generaliter & ad longum satis tempus sint initæ, si vero illæ ad breve spatium, ac certæ rei contemplatione, sint contractæ, tum ea, quæ extra pactum sunt, non recte fieri censet Grotius *d. l. §. 10.* dissentiente tamen Pufendorfio *d. c. 7. §. 10.* Dicendum videtur, non posse illa suscipi vi pacti, bene tamen defensionis naturalis, quæ induciis neque confirmata neque adempta sit, hinc ei hostis, si, quid agatur, resciscat, resistere potest. Si induciæ ab altera parte violentur, tum alteram quoque ad hostilitatem redire

dire posse, manifestum est, si tamen poena in illum eventum promissa sit, hæc regulariter erit exigenda Grot. *d. l. §. 11. 12. 13. Aut. d. c. 7. §. 11. 12.* De aliis pactis bellicis, commeatum vel captivorum redemptionem spectantibus, tum iis, quæ à Ducibus, vel privatis ineuntur, prolixius agit Grot. *d. l. & cap. seqq. add. Aut. d. c. 7. §. 13. seqq.*

§. 17. Penitus autem tollitur bellum, sancita per summos utrinq; imperantes *pax*; cujus leges & conditiones definire uti est penes paciscentes; ita illæ fideliter & convento tempore executioni dandæ & servandæ sunt. In cujus rei firmitatem non modo iusjurandum solet interponi, & obsides dari; sed & sæpe alii in primis qui paci conciliandæ interveniunt, ejus observationem præstandam recipiunt, auxilio promisso ei, qui contra leges pacis ab altero, læsus fuerit.

Observ. 7II.

Penitus autem tollitur bellum) Pax etiam accipitur vel pro *statu*, vel *conventionem*, qua ille produci-
tur, hoc sensu est Pactum, quo *omnis hostilitas aboletur, belli gesti commoda & incommoda determinantur ac controversia, ex qua hostilitas enata, penitus tollitur.* Valida est illa conventio, si libera voluntate suscipiatur, idem dicendum, si vis iusta, hostem injustum, ad eam ineundam, cogat, si vero vi injusta quis adigatur, tum ex generalibus principiis invalida est, jus Gen-
ti-

tium voluntarium, quod in contrarium allegat Grotius *l. 3. c. 19. §. II.* inane nomen est, ipsomet non valde repugnante *conf.* Aut. *l. 8. c. 8. §. I.*

Observ. 712.

Cujus leges & conditiones) Ineunt pacem regulariter liberæ gentes earumque Imperantes, quorum diversam conditionem amplius explicat Grot. *l. 3. c. 20. §. 2. 3. 4.* Potest etiam nonnunquam cum subditis rebellibus aut prædonibus pax iniri, quæ conventio valida est hætenus, ut ex conditione personarum, cum quibus contrahitur, eadem non improbari *vid.* Grot. *l. 3. c. 19. §. 1. seqq.* Autor *d. l. 8. c. 8. §. 2.* de hæreticis aut infidelibus vix id admoneri debet, religio, qualiscunque illa sit, jurium humanorum neminem facit incapacem. Quæ autem in pacem deducta censerī debeant, tam ex potestate quam voluntate Imperantium, juxta consuetas interpretandi regulas, judicandum est, quæ fusè satis persequitur Grotius *l. 3. c. 20. §. 5. seqq. conf.* Autor *d. c. 8. §. 3.* de cætero pax vel purè vel sub aliqua conditione initur, de quo Grot. *d. c. 20. §. 42. seqq. add.* Autor *d. c. 8. §. 5.*

Observ. 713.

Ita ille fideliter & convento tempore executioni danda) Pace initâ, obligantur paciscentes, ex lege naturali, ad fidem servandam, quæ summam in duobus consistit (1) *ut ea, quæ ob bellum gestum præstanda sint, bona fide præstentur, qua*

qua in re brevis mora periculosa, nec adeo toleranda est *vid. d. l. 8. c. 8. §. 4. (2)* ut omnibus ex fide prestitis, integra servetur amicitia, quod si quis sine causa iusta alterum lædat, aut erga illum inhumanus sit, is tam communem socialitatem violasse, quam pacem, ei surrogatam, rupisse censendus est, nec putem argutiarum, quibus indulget Grotius *d. l. 3. c. 20. §. 27. seqq.* ac juxta quas, nomen bello causam præbere, & pacem rumpere, disparari præcipit, magnum inter gentes esse usum.

Observ. 714.

In cuius rei firmitatem) Obligatio pacis *obsidibus, pignoribus, iurejurando & aliarum Civitatum velut fidejussione* (cujus faciendæ potestas *jus Guarantia* hodie dici solet) firmatur, duo priora ad pacis conclusæ executionem, posteriora verò tam ad illam, quam ejus perpetuam observantiam pertinent *vid. Grot. d. l. 3. c. 20. §. 52. seqq. Aut. d. l. 8. c. 8. §. 6. 7.*



CAPUT XVII.

DE

FOEDERIBUS.

§. I.

Belli juxta ac pacis temporibus inserviunt *foedera*, seu pacta inter summos utrinque imperantes inita. Isthaec *intuitu materia possunt dividi* in ea, quæ constitunt de aliquo officio invicem præstando, quod jam antea lege naturali præcipiebatur; & quæ officii legis naturalis aliquid superaddunt, aut saltem eadem, ubi indefinita videntur, ad certi quid determinant.

Observ. 715.

Belli juxta ac pacis temporibus inserviunt foedera]
 Horum indolem non exhaurit definitio subiecta, cum discrimen foederum, & pactorum, non tantum à *Subiecto*, sed & *Objecto* dependere videatur, hinc *Fœdera sunt conventiones à liberis Gentibus earumque Rectoribus, intuitu utilitatis perpetuae, vel per longius tempus præstandae, initæ*, fatendum tamen est, quod, pacta & foedera distinxisse, non multum referat.

Observ. 716.

Isthaec intuitu materia) Prima foederum divisio, ab

objecto generaliter spectato, desumitur, de cætero opus est, ut nonnunquam fœdera, de communi socialitate confirmanda, incantur, quando scilicet pravis moribus legis naturalis dictamina sunt oblitterata, & extranei fere pro hostibus habentur, possunt autem sine turpitudine iniri ab eo, qui alias juxta legem naturæ, vivere paratus erat.

§. 2. Ad priorem classem referuntur fœdera, quibus de simplici duntaxat humanitate exercenda, aut noxa non inferenda convenitur. Quo pertinent & ea, quib9 simplex duntaxat amicitia citra peculiarem præstationem sancitur. Aut quibus jus hospitii, aut commerciorum quatenus id naturali lege debetur, stabilitur.

§. 3. Posterioris classis fœdera sunt vel *æqualia*, vel *inæqualia*. Illa sunt, quæ utrinq; eodem se modo habent; seu quando non solum æqualia utrinque promittuntur, simpliciter aut observata proportionem virium; sed & æquali modo, ita ut neutra pars præ altera sit deterius conditionis, aut alteri obnoxia.

§. 4. Inæqualia sunt, quando vel inæquales præstationes invicem exhibentur, vel altera pars est deterius conditionis. Promittuntur autem inæqualia vel à fœderato digniore, vel à minus digno. Prius fit, si potentior auxilia promittat alteri, nec restipuletur, aut si majori

ri proportionem quam alter promittat. Posterior contingit, si foederatus inferior plura teneatur præstare, quam ab altero recipit.

§. 5. Eorum, quæ à foederato inferiore præstantur, quædam sunt *conjuncta cum imminutione summi imperii*; puta; si conventum sit, ne inferior focius partem aliquam summi imperii exerceat, nisi cum consensu superioris. Quædam autem *summum imperium non diminuunt*; licet adjunctum habeant aliquod onus transitorium, seu quo simul & semel licet defungi; puta, si ex foedere pacis alter teneatur stipendium solvere alterius militibus, belli sumtus restituere, certam summam pecuniæ solvere, mœnia diruere, obsides dare, naves, arma tradere. &c. Immo nec quævis perpetua onera summum imperium diminuunt. Qualia sunt; eosdem cum altero amicos & hostes habere, sed non reciproce; ne liceat certis locis munitiones extruere, ne ad certa loca navigare. &c. Item si unus sociorum alterius socii majestatem comiter teneatur colere, seu reverentiam quandam ipsi exhibere, & sese ad ejusdem placitum modestè attemperare.

Observ. 717.

Ad priorem classem) Utriusque generis foedera amplius declarat Autor *h. add. l. 8. c. 9. §. 1. 2. 3. 4.* Sed vix attinet, discrimina illa anxie sectari, cum effectum foederum non mutant, sed omnia potius, quæ serio promissa sunt, bona fide servari debeant, hinc in specie non valde litigandum hæctenus videtur, utrum aliquod foedus, imperium civile imminuat, nec ne, de quo §. 5. *h.* quanquam, si de libertate civili aliqujus Gentis pronunciandum sit, illa sollicitis inquiri debent.

§. 6. Cæterum foedera tam æqualia quam inæqualia varias ob causas solent contrahi: inter quas arctissimam foederum speciem producunt, quæ ad conjunctionem aliquam perpetuam plurium civitatum spectant. Frequentissima autem sunt, quæ ad auxilia in bello defensivo aut offensivo præstanda, aut ad commercia regenda pertinent.

Observ. 718.

Cæterum foedera) Altera foederum divisio à *sine* aut *objecto speciali* desumitur, ac non tantum foedera æqualia & inæqualia, ceu Autor præcipit, sed & ea, quæ communem humanitatem saltem confirmant, comprehendit. Explicatius paulo sic fortassis dici potest: Foedera vel *pacem*, vel *bellum* respiciunt; Illa pertinent vel ad *societatem civilem perpetuam*, qualia sunt foedera systematica, vel ad *utilitatem*

tem aliquam per longius tempus, imo aliquando semper, duraturam, aliqua ratione commerciorum, peregrinationum, aut communis amicitiae continuandæ, iniri solent. *Hec verò vel cum amicis ineuntur*, qualia sunt, quæ auxilia in bello offensivo & defensivo præstanda, aut neutralitatem concernunt, vel cum *hoste panguntur*, quorum retuleris omnis generis pacta bellica, si his quoque nomen fœderis applicari posse putes, quanquam hæcenus ferè aliam suppositionem sequimur *add. d. c. 2 §. 3.* Possent hac occasione nonnulla de *Neutralitate* proponi etsi rectius eadem in materia belli, adducuntur. Tetigi summa capita in Specim. Jur. public. l. 3. c. 4. §. 82. *seqq.*

§. 7. Celebris quoque est divisio fœderum in *realia & personalia*. Quorum hæc sunt, quæ cum rege intuitu personæ ipsius ineuntur, eoque defuncto simul expirant. Illa vero sunt, quæ non tam ipsius regis, populivè rectorum ut talium, quam reipubl. & regni intuitu contrahuntur, ac perdurant, istis licet mortuis, qui eorundem autores fuerant.

Observ. 719.

Celebris quoque est divisio fœderum) Tertia divisio à *Subjecto* dependet, circa quam illud præcipuè quæritur, quando fœdus reale vel personale dicendum sit, quæ res neque ex *persona contrahente*, nec semper ex *disertis verbis* diju-

dicari debet, cum potestas successores obligandi deficere queat. Dicendum igitur erit, foedera, quæ à libero populo, velut subiecto regulariter immutabili, ineuntur, realia esse ac durare, licet in aliam formam Respublica mutetur, nisi forte primævum statum unice respiciant, si vero à Rege, velut subiecto mutabili, contrahantur, realia illa censerì, si juxta præscriptum legum fundamentalium, personalia vero, si præter illam normam, inita sint *add. d. l. 8. c. 9. §. 6. 7.*

2. Personæ & materia foederum ex dictis jam intelliguntur. Officium autem paciscentium est, ut fidem datam servant, occurrunt tamen subinde quæstiones dubiæ circa id, quod actum sit *vid. d. c. 9. §. 5. 9. 10. 11.* quæ adeo efficiunt, ne quis semper violati officii argui queat, quamvis nec insolitum sit, ut cavillatione obligatio eludatur.

§. 8. Conjunctæ foederibus sunt *sponsiones*, quæ proprie vocantur ista pacta, quæ à ministro summæ potestatis circa negotia ad eandem spectantia sine ipsius mandato ineuntur. Quibus uti summus imperans non tenetur, nisi postquam eadem rata habuerit: ita si minister easdem absolute contraxerit, & rati habitio secuta non fuerit, ipse viderit, quomodo satisfaciat illis, qui ejus fidem secuti inanibus pactis decepti sunt.

Observ.

Observ. 720.

Conjunctæ fœderibus sunt Sponsiones) Harum indolem uti satis exprimit allata definitio, ita nomen Sponsionis alias generale, huc applicatum videtur, vel quod promittentes, pro Republica velut spondeant aut fidejubeant, vel quod promissio in hoc negotio valde notabilis sit, adeoque ab illa, hoc non immerito denominetur.

Observ. 721.

Quibus uti summus Imperans) Ante ratihabitionem expressam vel tacitam, ex sponsione, Respublica & Imperans non obligatur, nec etiam ad eam faciendam tenetur, nisi utilitas publica hoc exigat, quanquam hic amplius videndum, an non, ex culpâ Ministri, causa illa dependeat, tum enim nullius erit efficaciam.

Observ. 722.

Ita si minister) Ipse sponsor primariò obligatur ad eliciendam Imperantis ratihabitionem, hanc si impetrare nequeat, ad interesse tenebitur, cui quidem efficiendo, vix ipsius bonorumque omnium deditio sufficiet *vid. l. 8. c. 9. §. 12. 13.* In historia Romanâ Sponsio Caudina & Numantina imprimis celebres sunt, quas *Dn. Thomafius* peculiaribus disputationibus exposuit. Hodie forte rariora ejusmodi Sponsionum erunt exempla, cum major sit bellandi peritia, nec subditi casus tale quid exigant.

2. Alias circa pacto summorum Imperantium, hæc promiscuè quæri solent, (1) *an in iis locum habeat restitutio in integrum?* quod dicendum, si hoc nomine nihil aliud intelligatur, quam genuina interpretatio, quâ, ob necessariorum requisitorum defectum, pactum invalidum esse ostenditur, si verò, ob rationes utilitatis privatæ, eo prætextu, quævis obligatio paulo molesta elidatur, tum imposturæ colorem quæri, facile liquet (2) *an in pactis Regum solennia juris positivi observanda?* quod negandum, nisi aliud sit actum (3) *an contractus cum subditis initi subjaceant dominio eminenti?* quod asserendum, si vera utilitas subsit (4) *quousque obligatio Regis in successores transeat?* quatenus vel ejus contrahendæ arbitrium penes eum unice fuit, vel illa, ex voluntate Civitatis, contracta est *vid. l. 8. c. 10.*



CAPUT XVIII.

De

OFFICIIS CIVIUM.

§ I.

O*fficio civium* est vel *generale*, vel *speciale*. Illud oritur ex communi obligatione, qua isti imperio civili sunt subjecti. Hoc vero ex peculiari munere & functione, quæ per summum imperium singulis est injecta.

Observ. 723.

Officium Civium) Alteram personarum classem in Republica constituunt *Cives* seu *Subditi*, quorum indolem & varietatem *Observ.* 562. *seqq.* exposui, hic de officio Eorum differitur, sequitur vero hoc ipsorum conditionem seu statum, cum igitur omnes in eo conveniant, quod sint subditi, hinc exoritur *officium generale*, cum porro diversis muneribus varioque vitæ genere, distinguantur, peculiaribus quoque nexibus, generali subjectionis vinculo subordinatis, inter se nonnulli connectantur, ac peculiariora corpora, ut municipia,

nicipia, vicos, pagos aliaque collegia vel societates, efficiant, hinc existit *Officium speciale*.

Observ. 724.

Illud oritur) *Officium civium generale* includit etiam humanum, nam, hoc salvo, in civitatem homines coeunt, adeoque illi, civile adjiciunt, ex quo liquet, generale illud officium non unice ex subjectione oriri, sed ejus partem eximiam præsupponi ac per hanc firmari atque augeri.

Observ. 725.

Hoc vero ex peculiari munere) Munus & officium possunt quidem promiscue accipi, sed hic per *illud* intelligitur statio quædam, peculiare jus agendi eique innexam ut plurimum existimationem, nec non facultatem fruendi quibusdam commodis, complectens, per *hoc* verò, actio molesta & necessaria, quæ illa commoda comitatur. De cætero officium speciale non tantum ex munere aliquo publice collato, sed & ex quavis professione ac vitæ genere privato, potest repeti, nam v.gr. opificum & mercatorum est etiam officium speciale, dum utilitatis publicæ præcipuam habere rationem, de cætero verò utilitati propriæ innoxie operam dare debent. Interim frequentius ex munere publico, officium speciale deducitur, quo etiam Autor respicit.

§. 2. Officium generale civium respicit vel *rectores civitatis*, vel *totam civitatem*, vel *concives*.

Observ. 726.

Officium generale Civium] Sub hoc humanum comprehenditur, hoc enim juxta tres respectus memoratos occurrit: Addi potest quartum, DEUM ejusque cultum respiciens, quod itidem vel humanum, vel civile est, quatenus scilicet religio imperio civili subest.

§. 3. *Reſtoribus civitatis civis debet* reverentiam, fidelitatem, & obsequium. Cui conjunctum est, ut idem præſenti ſtatu adquiſcat, neque ad res novandas animum adjiciat, neque alteri cuivis adhæreat magis, eundem-
vè admiretur & veneretur; utque bene ac honorifice de iisdem, & eorum actionibus ſentiat, atque loquatur.

Observ. 727.

Reſtoribus civitatis) His civis obligatur vel ut homo, ad communia ſocialitatis officia, vel ut ſubditus, juxta doctrinam Autoris. De cætero hoc officium manet, licet Imperans metas officii ſui tranſiliat, niſi hoſtilem plane animum induat, quanquam de pravis Imperantis moribus libere loqui, periculofum magis quam injuſtum videtur.

§. 4. *Erga totam civitatem officium boni civis* eſt, ut ejus ſalute & incolumitate nihil
ha-

habeat carius; ut vitam, opes, fortunasque suas ad eandem servandam libenter offerat: ut ad eandem illustrandam, ejusque commoda promovenda omnes ingenii & industriæ nervos intendar.

Observ. 728.

Erga totam Civitatem) Utilitas publica cum privata non semper colliditur, hinc hætenus secure huic indulgetur, si vero collisio fiat, illa utique præferenda, quo loco tamen observandum, officia civium sese heic mutuo velut respicere, ac unius præstationem, ab alterius impletione, quodammodo suspendi, publico enim non consulitur, nisi unitis viribus, quod si igitur perversa illa invaluerit consuetudo, ut à plerisque privata utilitas publicæ præferatur, etiam bono alioquin civi vitio verti nequit, si se suaque, inefficaci ac Publico aut profutura probitate, in casum dare nolit. Si verò utilitas publica prætextui saltem sumatur ac molestæ præstationes à subditis, explendæ tantum aliorum avaritiæ, exigantur, tum nullam ad eas faciendas subesse obligationem, manifestum est.

§. 5. *Erga concives civis officium* est amice & pacifice cum illis vivere, commodum sese ac facilem præbere, nec morositate aut pervicacia suâ turbas dare; cæterorum commodis non invidere, aut eadem intervertere.

Observ.

Observ. 729.

Erga Concives) Inter cives specialis conventio non intercessit *vid. Observ.* 555. hinc horum erga se invicem officia, tantum humana videntur, commune tamen subjectionis vinculum efficit, ut ceteris paribus, eadem potius civi, quam extraneo exhibere debeamus.

§. 6. *Specialia officia* vel per universam sese remp. velut diffundunt, vel circa certam duntaxat partem occupantur. Circa quæ omnia hoc generale præceptum habetur; ne quis ullum officium in rep. affectet aut suscipiat, ad quod sese ineptum deprehendit.

Observ. 730.

Specialia Officia) Hæc omnia quidem ad Civitatis utilitatem collimare debent, adeoque quoad *finem ultimum & generalem* illa conveniunt, sed *objecto & fine speciali* discernuntur; quædam enim munera, quæ proximè imperium civile dispensant, per universam rempublicam se diffundunt, quædam vero illis subordinata, circa partes occupantur, quæ omnia variis gradibus distinguuntur, variaque gaudent existimatione, de cætero munera specialia, vel ut *obtinenda*, vel ut *obtenta* spectari possunt.

Observ. 731.

Circa quæ omnia) Juxta primum respect, um hæc præcepta observanda sunt (1) *ne ineptus munus ambiat* §. 6. h. Sed ignavum fuerit, talem se existit-

existimare, innata ambitio facile potius discernit, ut quis, se aliis non tantum parem, sed & sæpe, sine pari, existimet ! (2) *ne plura munera, quam quibus obeundis quis possit, affectet ac suscipiat*, imo (3) *si jam suppetat, unde commodè vivere possit, ne alios à munere expungat*. Denique [4] *ne, in obtinendis muneribus, pravis artibus utatur*.

2. Veritas harum regularum manifesta est, quemadmodum earum neglectus non minus usitatus & notus, nam ut plurimum, in ambiendis & dispensandis muneribus, pudor & conscientia exulant, cum nunquam securius delinquatur, quam in ejusmodi objectis generalibus, ubi quis manifesti sceleris non statim potest convinci. Impediendo abusui, delatio munerum, certis legibus & statutis solet esse circumscripta, sed ut omnia humana facile corrumpuntur, ita etiam via illa ordinaria sæpe solet esse corruptissima, ut nonnunquam alicui vitio verti non possit, si manu Regia verteratores, sub specie recti, pravis affectibus indulgentes, deludat.

§. 7. Qui *consilio* suo rectoribus civitatum adstant, in omnes reip. partes aciem mentis convertant; quæ ex usu reip. videbuntur esse dextre & fideliter citra affectus ac pravis respectus exponant; salutem reip. in omnibus consiliis pro scopo habeant, non proprias opes, aut potentiam; pravis affectibus principum adulando non velificentur; factionibus

& coitionibus illicitis abstineant: nihil quod dici oportet dissimulent, nihil quod taceri oportet, eliminent: exterorum corruptionibus impenetrabiles sese præbeant; privatis suis negotiis aut voluptatibus publica negotia non posthabeant.

§. 8. Qui publice constituti sunt ad *sacra obeunda*, in iisdem gravitatem & attentionem adhibeant, vera de cultu Numinis dogmata proponant, eorum quæ ipsi docent populo sese conspicuum exemplar exhibeant, nec pravitatem morum muneri suo dignationem, doctrinæ pondus detrahant.

§. 9. Queis publice injunctum variarum *scientia* rerum animos civium imbuere, nihil falsi aut perniciosi doceant: vera autem ita tradant, ut auditores iis assentiantur non tam adsuetudine audiendi, quam quia solidas eorundem rationes perspexerunt: omnia dogmata ad societatem civilem turbandam directa fugiant; omnem scientiam humanam inanem habeant, ex qua nulla in vitam humanam & civilem utilitas redundat.

§. 10. Qui *juridicundo* præficiuntur, quibusvis facilem accessum præbeant, plebem ab oppressionibus potentiorum protegant; jus æque pauperi & humili, quam potenti & gratioſo dicant; lites ultra necessitatem non

extrahant ; à corruptelis abstineant ; in cognoscendis causis diligentiam adhibeant, omnesque affectus sinceritatem judicii corrumpentes seponant ; recte faciendo neminem timeant.

§. II. Quibus *armorum* cura commissa, militem diligenter & tempestive exerceant, & ad dolerandos militiæ labores firment ; disciplinam militarem sartam rectamque habeant ; milites hosti jugulandos temere non objiciant ; annonam & stipendium quantum in se promte procurent, nec de eo quidquam intervertant ; milites semper ut reip. faveant, curent nec unquam eos sibi adversus rempubl. concilient.

§. 12. *Milites* contra stipendiis suis contenti sint ; ab expilandis & vexandis paganis abstineant ; labores pro tuenda Rep. libenter & struere obeant ; pericula per temeritatē non arcessant ; per ignaviam nō defugiant ; fortitudinem in hostem, non in commilitones, ostendent, stationem assignatam masculæ defendant ; honestam mortem turpi fugæ & vitæ præferant.

§. 13. *Quorum opera civitas apud externos utitur*, cauti sint & circumspecti, inania à solidis, vera à fabulosis discernere callidi, secretorum tenacissimi, pro utilitate suæ civitatis adversus quaslibet corruptiones obstinati. §. 14.

§. 14. Qui opibus civitatis colligendis, aut dispendiis præfunt; caveant ab omni non necessaria acerbitate, nec ob proprium quæstum, aut per petulantiam vel malignitatem animi oneris quid adjiciant; publici nihil intervertant; quibus de publico quid solvendum, illis citra moras non necessarias satisfaciant.

Observ. 732.

Qui consilio suo) Postquam munus obtentum est, lex naturalis exigit, ut quis eodem rite fungatur, ex quo specialia præcepta, affirmativa & negativa, deducuntur, id quod Autor quoad consiliarios §. 7. circa sacra occupatos §. 8. Doctores §. 9. Magistratus §. 10. militum duces §. 11. milites §. 12. legatos §. 13. & rei pecuniariæ præfectos §. 14. declarat, quæ monita in se egregia sunt, sed sæpe in vita civili negliguntur. Fallendi artes infinitæ sunt, nec ego illos intelligo, nec adeo referre possum aut volo, in genere tamen illæ duorum generum sunt, vel enim quis muneri suo non vacat, & salaria in otio & luxu consumit, aut etiam suæ litat avaritiæ, vel eodem ad alios expilandos & opprimendos abutitur. Causa ultima illius abusus non ita obscura est, ut eadem recte attendentibus non facile appareat, illud interim certum videtur, socialitatem nulla re magis, quam isto munerum abusu, affligi & opprimi.

§. 15. *Durat* autem civium speciale officium, quamdiu in ea functione, ex qua illud profuit

fluit, sunt constituti: qua ubi abeunt, & illud expirat. Generale itidem durat, quamdiu cives sunt. *Cives autem esse desinunt*, vel si consensu expresse aut tacito civitatis discedant, & alibi sedem fortunarum figant; vel si ob delictum in exilium ejiciantur, & jure civitatis priventur; vel si hostica vi oppressi in victoris ditionem concedere adigantur.

Observ. 733.

Durat autem Civium) Civium officia, quatenus ex facto dependent, nec per naturam immediate constituuntur, hypothetica sunt, adeoque statu vel conditione quam præsupponunt, sublata, cessant. Desinit itaque speciale officium, munere extincto, quin tamen de ante gestis quis rationem reddere teneatur, dubitandum non est, hæc enim obligatio ex facto præterito orta subsistit, licet obligatio, quoad actiones futuras, cesset.

Observ. 734.

Generale itidem durat, quamdiu cives sunt) Quod tamen intelligendum de officio, quatenus civile est, seu à facto dependet, nam humanum officium, quod sub generali alias comprehendimus *Observ.* 726. semper durat.

Observ. 735.

Cives autem esse desinunt) Duplici modo hoc contingit, vel *salva civitate*, ad quem casum Autor unice hic respicit, vel *illa mutata aut pereunte*, qui casus rarius est, accidere tamen non nunquam solet.

Ob.

Observ. 736.

Vel si consensu expresso) Salva civitate, quis civis esse desinit, si alio migret, quod quidem, sine consensu civitatis, fieri non potest, attamen hæc regulariter illum denegare nequit, cum migratio illa sit innoxia, ob justas tamen causas consensus ille uti denegari potest, ita migraturis aliquod onus regulariter imponere, non est iniquum, modo humanitatis regulæ observentur *conf. l. 8. c. II. §. 1. 2. 3.* Ex iis autem consequitur, quod civitas, gregatim discessuros dimittere non teneatur, licet dissentiat Autor *d. c. II. §. 4.*

Observ. 737.

Sed alibi sedem fortunarum figant) Hoc utique requiritur, ut is, qui civis amplius esse non vult, territorio antiquo excedat, nam ut quis in eodem maneat, & tamen imperio civili subesse nolit, id quidem indoli civitatis repugnat, hinc qui tale quid, sub quocunque prætextu, moliuntur, pro hostibus Reipublicæ haberi, ac nisi à proposito, admoniti desistant, vel expellendi, vel vi in ordinem redigendi sunt *vid. d. c. II. §. 3.* Id tamen non præcise opus est, ut quis actu à Patria discedat, nam si civis, velut legatus aliûs civitatis, in antiquo Territorio toleretur, eo ipso civitatem mutasse censendus est, nec opus est aliqua fictione, cui Autor *d. §. 3.* indulget. Vinculo autem semel legitime soluto, pristina civitati nihil amplius juris in civem dimissum competit, hinc

nec mandatis avocatoriis eum retrahere, nec in illum, si velut minister novæ suæ civitatis admittatur, jurisdictionem exercere potest *d. c. 11. §. 3.* Imo, si justa causa subfit, dimissus, etiam contra patriam seu veterem civitatem, operas suas recte præstabit.

Observ. 738.

Vel si ob delictum in exilium ejiciantur) Aut etiam ob delictum alibi commissum, civitati læsæ dantur *vid. d. c. 11. §. 7. 9.* Invitum autem civem, nullo antegresso delicto, civitas non recte expellit *d. c. 11. §. 6.* si tamen civis, à religionis formula, publicè probata, dissentiat, tum ei emigratio, sed innoxia, imponi potest, nam licet suo jure utatur, dum religionem, quam veram putat, sequitur, non ininus tamen civitas suo jure utitur, si civem, per omnia rationibus publicis se non attemperantem, in territorio suo tolerare nolit, de cætero raro heic intra terminos, æquitatis consisti, experientia quovis tempore docuit & docet.

Observ. 739.

Et jure Civitatis priventur) Solum gitor exilium, subjectionis vinculum non tollit, videtur igitur distinguendum, utrum *cum exilio bonorum ademptio sit conjuncta*, id quod olim in deportatione Romana contingebat, tum subjectio tollitur, an *illud solitarium sit*, hoc casu relegatus,

tus, minimum quoad res in civitate remanentes, subditus manet, quodsi autem talis, qui omnia sua secum portare solet, ejiciatur, illum pro extraneo habere nil vetat.

Observ. 740.


Vel si hostica vi oppressi) Denique, salva civitate, per vim hostilem non tantum singuli, sed & quandoque eximia subditorum pars, imperio pristino eximuntur, nam ob necessitatem, subditis sese hosti dedere fas est *add. d. c. II. §. 8.* Sola tamen violenta illa occupatione, subjectionis vinculum non penitus tollitur, sed per pacem ista res demum plene definitur, hinc quamdiu hæc nondum est secuta, subditi avulsi contra veterem Rempublicam sponte nihil moliri debent.

Observ. 741.


Denique adjiciendum, quomodo civis esse quis definat, civitate mutata aut pereunte. Mutatur civitas (1) si manente unitate ejus, forma alia introducatur *vid l. 8. c. 12. §. 1. 2. 3. 4.* (2) si plures civitates in unam coalescant, vel una in plures discernatur *d. c. 12. §. 5. 6.* (3) si diversæ civitates foedere systematico jungantur. Interit autem (1) si omnes cives interneccione deleantur (2) multitudo dissolvatur ac dissipetur (3) civitas alteri vel-

ut provincia subjiciatur *add. d. c. 12. §. 7. 8. 9.*
 Omnibus illis casibus, civis pristinae civita-
 tis, quis esse desinit, in casu mutationis,
 secundum quid, interitûs,
 absolute.

F I N I S.



IN-



INDEX

Rerum præcipuarum.

Numerus, literâ P. stipatus, *paragraphum in Prolegomenis*, nude verò positus, *Observationem* notat, ac præmissum Auctoris textum simul indicat.

A.

ACCESSIO.

Quatenus per eam acquiratur dominium 297. *seqq.*

ACTIO HUMANA.

Quid & quotuplex 12. *quodnamejus principium* 13. *actio ex habitu procedens, maximè libera censerì debet* 35. *actionis humanæ, pro diverso principii statu, diversitas* 39. *ejus imputativitas* 41. *actionis omissio quatenus imputetur* 46. *actio injusta coacta imputari potest* 48. *actionum moralitas* 63. *seqq.*

ÆTAS.

Tenera ad pacta non sufficit, ac aliorum indiget auxilio 209. *seqq.*

INDEX.

AFFECTUS.

Quid & quotuplices, quæque eorum, in impedienda vel temperanda imputatione, efficacia 36.

ALIENATIO.

Facultas alienandi malè vulgò ex dominio repetitur, cum sit ex libertate naturali, ac circa quævis jura, perinde sicut circa dominium, regulariter occurrat 312. n. 2.

ATHEISMUS.

Religioni præferri nequit 94. an puniri queat 95. ejus indoles, varietas, existentia 104. n. 2. & moralitas d. l. n. 3. habitudo in ordine ad societates humanas 108.

B.

BELLUM. PAX.

Invitis dominis res bellum aufert 310. bello acquiritur imperium civile 605. subditi pericula bellica subire debent 633. seqq. Quid pax & bellum 684. utrumque est homini proprium 685. bellum quando licitum 686. quotuplex bellum 687. non statim in idruendum 688. bellum injustum 689. vi & fraude in hostem agere licet 690. & læsio in infinitum extendi potest 691. 692. divisio belli ex jure Gentium, nullius usus 693. quis bellum possit gerere 694. contra quos 695. 696. repressalia licite 697. pro quibus bellum geratur 698. modus ledendi 699. 700. etiam immissio percussore hostem conficere licet 701. acquisitio bellica 702. seqq. suspenditur bellum per inducias 707. seqq. tollitur per pacem 711. seqq.

INDEX.

BO NA ET MA LA.

Eorum indoles & varietas exponitur 33. an malum, leges observare? 573.

C.

CALAMITAS.

Quid liceat tempore calamitatis communis, ut naufragii vel incendii imminantis 149. 150.

CASUS FORTUITUS.

Quotuplex & quando damnum fortuitum resarciendum 166. seqq. non praestatur in mandato 362. nec in commodato 364. seqq. in emtione spectat casus fortuitus ad emtorem 372. in mutuo de casu fortuito non queritur 381. n. 2.

CERTITUDO.

Quatenus in Jurisprudencia accurrat, ostenditur P. 28. p. 60. in Prudentia presse dicti, certitudo regulariter exulat P. 78. seqq.

CIVIS.

An cum subdito conveniat 562. 563. civium varietas 564. 565. an Civis innocens hosti dedi queat 635. n. 2. Civium officia 734. seqq.

CIVITAS.

Ante ejus explicationem, non est agendum de familia, pago, vico vel oppido 539. ad civitatem non impulit natura solitariè spectata 540. seqq. sed metus malorum 542. seqq. quod refellitur, ac origo vel à generali boni appetitu, vel specialius, ab hominum ambitione, deducitur 547. homines ad civitates constituendas sunt apti 548. 549. quantus eorum numerus esse debeat 551.

INDEX.

diversa unieñdi ratio 550. qualis nexus ad civitatem simplicem requiratur 552. 553. producitur ille duobus pactis 554. quod rejicitur 555. Civitas quid 556. 557. civitatum simplicium forma 579. ejus varietas 580. seqq. civitas composita 589. ejus constitutio & varietas 590. seqq. an distinctio civitatis, regularis & irregularis, rejicienda, & quid civitas mixta 591. n. 3. variarum formarum comparatio ibid. n. 3. Regna electitia 606. 607. in iis occurrit interregnum 608. seqq. regna successiva 611. jus succedendi à quo constituatur 612. seqq. quis iudex in controversiis successoris 615. Civitatum mutatio & interitus 740.

COACTIO.

Voluntatem inclinat 37. in quantum imputationem impediat 40. actio injusta coacta imputari potest 48.

COMMERCIUM.

Consecutum est introducta rerum dominia, quot modis id accipiat, & quid sit 327.

CONDITIO.

Quid & quoruplex, adjicitur pactis, sicut & tempus ac modus 235. seqq.

CONSCIENCIA.

Quo loco de eadem agendum & quid sit 16. quæ ejus species 17. 18. quæque regula circa eam notanda, tum quid conscientia cauteriata 19. leges civiles an in conscientia obligent 628.

CONSENSUS.

Est expressus, tacitus vel presumptus 205. seqq. ex quo ejus veritas aestimanda 208.

CON-

INDEX.

CONTRACTUS.

Ejus & pacti convenientia & inconvenientia 354. contractuum varietas 355. contractus benefici 356. in onerosis equalitas observanda 357. seqq. quid in singulis contractibus spectandum 361. contractus mandati 362. commodati 363. seq. depositi 367. sq. permutationis 370. emtionis 371. seq. locationis 377. seq. mutui 379. seqq. societatis 382. 383. aleam continentes 384. seqq. contractus accessorii 392. sivejussionis 393. seqq. pignoris 397. seqq. contrahentium officia 403. modi quibus obligationes ex contractibus oriunda, colluntur 404. seqq.

CULPA.

Quid & quot ejus gradus 164. à bona fidei possessore, in re aliena non committitur 316.

D.

DAMNUM.

Quando ejus restitutio facienda 163. seqq. damnum à mancipio vel bruto, proprio motu datum, quomodo dominum obliget 168. 169.

DEFENSIO VIOLENTA.

Licita & necessaria est 121. 122. ejus requisita 123. circa eam status naturalis & civilis distingui debet 124. & quousque in hoc vel illo defensionem violentam extendere liceat 125. seqq. usque ad 140.

DELICTUM.

Ejus effectus est obligatio ad damnum resarciendum

INDEX.

dum & pœnam 636. omnia delicta non sunt punibilia, aut puniri solita 646. seqq.

DIVORTIUM.

Ejus prohibitio juri divino positivo universali adscribitur 91. n. 10. sed non immeritò ad jus naturale illa refertur 489. ob certas tamen causas divortium admittitur 490. seqq.

DOCENDI FACULTAS ET MODUS.

Ad quos Theologiæ P. 7. jurisprudentiæ universalis P. 16. P. 37. & particularis excolendæ & docendæ curæ ac jus pertineat P. 64. Varia ratione jurisprudentia divina à Scriptoribus tradi solet P. 35. seqq. an compendia conficere, in glarium I. notitia Scriptorum quo loco habenda 10.

DOCTRINA CIVILIS.

Ad vitam hominum præsentem pertinet, ac jurisprudentiâ & Prudentiâ summam absoluitur P. 8.

DOCTRINA MORALIS.

Revera datur ac generalius supposita, comprehendit Theologiam & Doctrinam civilem, quarum Hac Jurisprudentiam & Prudentiam presse dictam, sub se continet P. 1. seqq. Singularum Ejus specierum explicatio prolixior P. 5. seqq. earum comparatio & differentia P. 86. seqq. Doctrina moralis varietas ex sententia Pufendorffii 2. seqq.

DOLUS.

Est directâ nocendi voluntas ac necessitatem restituendi

INDEX.

tuendi damnum, operatur 164. vitiat pacta 217. seqq.

DOMINIUM.

An ob res proprias conservandas, liceat alienas perdere 148. seqq. pactum requirit res proprias 233. seqq. dominium u. i. universale dependet a concessione divina 276. ab initio fuerunt omnes res, nullius 277. per factum autem humanum, dominia singularia introducta 278. nec fuit ab initio communio vel positiva, vel negativa 279. hinc etiam divisio pactumque ei additum corrumpit 280. 281. sed nec Deus immediate dominia singularia constituit 281. n. 2. dominium quid & quotuplex 282. seqq. quibus competat 284. n. 2. non omnes res dominio singulari subiectæ 285. seqq. modi acquirendi dominium originarii 289. seqq. jus aliorum in res nostras 299. modi acquirendi derivativi 300. seqq. dominii effectus 312. n. 2. qui ex conventionem aliqua generali frustra repetitur 314. dominii introductio presupponit hominum corruptionem 327. Aliquando etiam in res privatas, Imperanti competit dominium 676. res civitatis, dominio Imperantis seu publico subsunt, & quam illæ 681. seqq.

DOMINUS.

Ejus obligatio quoad damnum, à mancipiis & brutis proprio motu datum 168. 169. quoad res proprias in genere 313. rem suam vindicans, possessori pretium solvere non tenetur 324.

INDEX.

E.

EBRIETAS.

*In quantum imputationem actionum impediat 37.
38. quousque pactis obfit 208.*

ERROR.

Quid & in quantum ad disciplinas morales pertineat 20. ejus species 21. seqq. usque ad 27. in quantum imputationem impediat 45. contra errantem defensio violenta recte suscipitur 129. error quatenus pactis obfit 112. seqq. impedit juramentum 267.

EXISTIMATIO.

An Imperans existimationem & titulum mutare possit 561 existimatio quid & quotuplex 655. seqq. fundamentum existimationis simplicis 659. ejus amissio 660. seqq. dicitur infamia 663. quæ sine delicto non contrahitur 664. 665. Existimatio intensiva duplex est 666. utrique respondet honor 667. juxta duplicem illam speciem, de existimatione agendum 668. fundamenta separanda ibid. 669. effectus & consuetudines judicanda 670. seqq. existimatio politica 672. unde illa oriatur 673. 674. ejus effectus 675. & abusus ibid. n. 2. 3.

F.

FAVORABILE.

An aliqua materia sit favorabilis vel odiosa, & an, in interpretanda voluntate dubiâ, isto fundamento viti liceat 428. 429.

INDEX.

FOEDUS.

Quid 715. *quotuplex* 716. *seqq. reale & personale* 719.

FUROR.

Principium actionum humanarum destruit 37. *etiam contra furiosum, defensio violenta suscipi potest* 129. *in quantum furor pactis obsit* 208.

FURTUM.

Ablatio rei alienae, in casu necessitatis, non est furtum 147.

G.

GENEROSITAS.

A superbia debet discerni, & in quo consistat 181. *eam semper comitatur humilitas* 182.

GLORIA.

Homines verè virtuosì, de honore & gloria consequenda seorsim & specialiter non debent esse solliciti 671. n. 3.

H.

HERILIS SOCIETAS.

Non est immediatè à natura 526. *ejus causa* 527. *indoles servitutis pactitiæ* 528. *seqq. legalis* 534. *seqq. repugnat illa socialitati* 538. n. 3. 4. *servis existimatio humana malè aufertur* 662.

HOMICIDIUM.

An in casu necessitatis licitum 143. 144. *damnum quomodo in homicidio resarciendum* 170.

HOMO

INDEX.

HOMO.

Naturaliter homines sibi sunt aequales 172. & quomodo aequalitas illa probetur 173. seqq. quaeque aequalitatis illius consectaria & opposita 177. seqq.

HUMANITAS.

Notat sublimiorem socialitatis gradum, ejus praecepta 185. seqq. qui ea negligit, inhumanus dicitur 188. humanitas requirit quoque beneficiorum collationem 189. 190. ex qua obligatio ad gratitudinem oritur 191. 192. quam qui negligit, dicitur ingratus 193. contra quem etiam actio in foro civili concedi potest. 194. 195.

HUMILITAS.

Est virtus, quae ad Deum & homines potest referri, & in quo ejus indoles, juxta utrumque respectum, consistat 182.

I.

IMPERANS.

Duo requiruntur, ut quis imperare possit 55. 56. in civitatibus pretium nummorum Imperans definit 350. seqq. Imperans quis 558. & quae ejus voluntas, pro voluntate civitatis habenda 559. 560. an Imperans titulum mutare queat 561. quo sensu summus dicatur 593. an salva Majestate, judicem, in casu delicti, habere queat 594. legibus civilibus idem est solutus 595. ut & inviolabilis 596. non tamen quando officium graviter excedit 597. Officia summorum Imperantium late recensentur 616. seqq. quibus mediis, Imperantium excessibus occurri soleat 622. n. 2. Impe-

rans

INDEX.

trans tantum habet jus puniendi 641. specialia circa Imperantium pacta 722. n. 2.

IMPOSSIBILE.

Non imputatur, & an promissio Regum, ut sol justo tempore oriatur & occidat, sit impossibilis 47. in quantum impossibile in pactum deducatur 229. seqq.

IMPUTATIVITAS.

Actionum humanarum ex voluntate dependet 41. seqq. usque ad 44.

INGRATITUDO.

Quid & quotuplex, & num contra ingratum actio in foro civili dari possit 193. seqq.

INTERPRETATIO.

A dispensatione differt, nec recte satis equitatis nomine exprimitur 62. debebat interpretatio, cum legum applicatione, sub initium Jurisprudentiae exponi 91. n. 22. 23. voluntas expressa, saepe tacite restringitur 207. interpretatio pro effectu jurisjurandi male habetur 272. seqq. Interpretationis utilitas, & ad quam disciplinam illa pertineat 416. interpretatio juridica ubi tractanda ibid. n. 2. quid sit, ibid. n. 3. quotuplex ibid. n. 4. aptitudo interpretandi unde adveniat ibid. n. 5. fundamenta interpretandi sunt obligatio dicentis, significatus maxime usitatus 417. seqq.

llu

INDEX.

seqq. substrata materia similiaque 422. seqq. interpretatio extensiva 430. seqq. restrictiva; malè & rectè tradita 433. seqq. restrictionis usus in voluntatis collisione 439. seqq. legum applicatio quibus regulis nitatur 446. n. 2. Interpretatio legum naturalium quousque Imperanti competat 626.

JURISPRUDENTIA.

Ambitu suo omnes disciplinas morales; ad hanc vitam pertinentes, adeoque in specie Ethicam & Politicam complectitur P. 9. est vel universalis, quæ prolixè expenditur P. 10 seqq. vel Particularis, pluribus, explicata P. 51. seqq.

JUS JURANDUM.

Quo loco tractandum 256. quid sit 257. quæ jurantium officia 258. plenius 275. n. 3. seqq. iusjurandi finis 259. forma 260. seqq. causa efficiens, subiectum & materia 263. effectus 264. seqq. varietas 275. contraria ibid. n. 2.

L.

LÆSIO.

Proximi jure naturali prohibetur 153. quo effecta 154. & sub quibus requisitis 155. seqq. Officia ledentis & lesi summatim exhibita ac exemplis illustrata 170. 171. neminem in rebus suis ledere debemus. 313. in contractibus onerosis cessare debet læsio 357. seqq.

LEX

INDEX.

LEX.

*Ejus necessitas 49. in obligantem & Permittentem
necessario est distinguenda 50. utriusque definitio 51.
& cetera capita tractanda 52. effectus 53. subjectum
54. Autor 55. 56. finis 57. partes essentielles 58. mate-
ria 59. contraria 60. 61. cognata 62. divisio 76. Ex-
plicatio legis naturalis, difficilis 77. datur illa lex i-
bid. & est vel constitutiva vel permissiva, illius definitio
ibid. Ejus fundamentum est natura 78. 79. Autor,
Deus 80. seqq. promulgatur illa per rationem 84. seqq.
data est hominibus, non brutis 86. n. 2. versatur circa
actiones, cum natura humana necessario convenientes
vel pugnantes 86. n. 3. 4. 5. effectus ejus est obligatio
86. n. 6. lex naturalis permissiva 86. n. 7. utriusque
legis argumentum 87. seqq. Lex positiva quid 91. n. 2.
est vel divina vel humana ibid. Lex divina positiva
datur ibid. n. 3. ejus varietas d. l. n. 4. 5. Politica
lex in universalem & particularem discernitur d. l. n.
6. utriusque explicatio prolixior d. l. n. 7. seqq. cum
monito, quoad universalis veritatem vel existentiam
d. l. n. 13. Lex humana vulgò in universalem seu Genti-
um, & particularem seu Civilem distinguitur, sed pri-
or non datur d. l. n. 14. 15. 16. hinc tantum lex humana,
civilis est, cujus indoles in genere exponitur d. l. n. 17.
seqq. quousque lex civilis honestum & inhonestum defi-
niat 571 legum civilium effectus 628. an leges injustas
sine peccato exequi possit subditus 629. seqq.*

LOTARIA.

Est contractus ex emtione & sorte decisoria mixtus

INDEX.

LUDUS.

Quid & quæ ejus moralitas 387. seqq.

M.

MAJESTAS.

Quo sensu originis divina dicatur § 66. seqq. quid sit § 69. quæque ejus partes ibid. n. 2. seqq. specialior nonnullarum partium recensio § 70. seqq. quo sensu partes imperii civilis sint connexæ § 76. seqq. Majestas format Respublicas simplices § 79. ejus affectiones § 92. seqq. diversus exercendi modus § 98. quid Majestas absoluta § 99. limitata 600. 601. diversus habendi imperium modus 602. 603. modi acquirendi varii 604. seqq. imperium civile est res molesta, si recte exercendum sit 622. n. 2. potestas Legislatoria quousque se extendat 623. sq. jus vitæ & necis 632. seqq. jus definiendi existimationem 655. ius in bona subditorum 676. quod triplex 677. seqq. imperandi ius non potest alienari 683. jus belli & pacis 684. fœderum 715.

MAJORA VOTA.

In rebus publicis polyarchicis obtinere solent, idque in Simplicibus, in dubio est præsumendum, secus in compositis § 60.

MARITUS.

Habere censetur imperium in uxorem, ex jure divino positivo universali 91. n. 10. societas conjugalitatis tale imperium non requirit 483. & quo sensu jure divino positivo id asseratur 484.

MA-

INDEX.

MATRIMONIUM.

Jure divino positivo universali propter consanguinitatem & affinitatem arctiorem, impediri censetur 91. n. 10. Circa matrimonium duplicis generis decreta naturalia occurrunt 473. quænam pacti matrimonialis capita secundum jus naturæ 479. seqq. aptitudo in personis, matrimonium inituris, requiritur 493. seqq. arctior consanguinitas & affinitas matrimonium impedit, etiam jure naturali 495. seqq. ex quo definitio matrimonii, juxta jus naturale exhibetur, ejusque à sponsalibus differentia ostenditur 497. lex civilis quid circa matrimonium disponere soleat 498. seqq. ad matrimonium liberorum, quatenus consensus parentum jure naturali requiratur 523.

MENS.

In intellectum & voluntatem necessario non est distinguenda, & quo sensu tamen distinctio illa tolerari queat 13. Intellectus quid 14. quæ ejus in rebus moralibus efficacia vel vis 15. Voluntas quid 28. quæ eius affectiones 29. ac operationes 30. an in ea detur judicium d. l. In primis libertas voluntati asserenda 31. 33. quæ tamen non semper in æquilibrio consistit 34. seqq.

MORALIA.

Ex natura &, apud Christianos, S. Scripturâ hauriuntur, quæ duo principia non rectè miscentur, aut prius negligitur P. 19. 20. In quo gradu moralia inculcanda P. 22. 23.

INDEX.

MORALITAS.

Ex lege resultat 63. ejus varietas 64. inde actiones sunt bonae, malae & indifferentes, quales etiam, quoad individua, dantur 65. 66. homines vero, virtuosus & vitiosus inde sunt 67. Datur etiam quantitas moralis 75. n. 4. ante legem nulla est actionum moralitas 86. n. 3. seqq. circa res turpes pactio non valet 231. seqq.

MORTUI.

Erga mortuos quoque datur officium naturale 79. n. 4.

N.

NECESSITAS.

Quid, & in quantum lex naturalis exceptionem necessitatis admittat, distinctè exponitur 141. 142. seqq. an necessitas excuset, si quis mandatum Imperantis injustum exsequatur 631. n. 2.

O.

OBLIGATIO.

Voluntatem inclinatur, actionem tamen non reddit involuntariam 37. obligationis indoles & varietas 53. obligatio correalis, quatenus ex delictis oriatur 159. 160. seqq. ex testamento imperfecto, ne naturalis quidem oritur obligatio 308. obligatio tollitur variis modis 404. solutione 415. compensatione 406. seqq. condonatione 408 mutuo dissensu 409. perfidia acceptatione 410. status mutatione 411. lapsu temporis 412. morte 413. seqq. cessione, delegatione, confusione, novatione & rei interitu 415. ad poenam datur obligatio 640.

OC.

INDEX.

OCCUPATIO.

Est modus acquirendi dominii originarius 278. eam olim habuit antecessit divisio 291. quid occupatio & an modus acquirendi naturalis 292. objectum ejus sunt res nullius 293. seqq. nec tamen illa semper ad acquirendum dominium est necessaria 295. occupatio imperii Civilis 605.

OCEANUS.

Quatenus dominio subsit vel non 288.

OFFICIUM.

Quid, & quomodo differat à munere II. officium possessoris rei alienae, accuratè in vita civili observari non solet 317 seqq. Officium an & quo sensu à munere discerni possit 725. quæ circa munus ambiendum observanda 730. muneris obtenti abusus 730. n. 2. 731.

OLLA FORTUNAE.

Est emptio spei, nonnunquam per eam, ad contributionem homines, in primis voluptati & otio dediti, revocantur 390.

P.

PACTUM.

Ejus cum ceteris socialitatis officiis connexio 196. 197. necessitas 198. officium paciscentium 199. 200. pacti divisio 201. seqq. Essentia consistit in consensu 204. qui debet esse declaratus 205. 206. verus 208. seqq. & mutuus 227. pactorum materia 228. seqq. diversus ineundi modus 235. seqq. persone intermedia 240. pactis dominium naturaliter transfertur 309.

INDEX.

ex pactis nonnunquam oritur officium domini & aliorum quoad res proprias 313. is, qui alteri turpiter accipienti, dedit, datum naturaliter repetere potest 326.

PATRIA POTESTAS.

Quid hoc nomine comprehendatur 501. ejus origo 502. seqq. cui naturaliter competat 507. seqq. jure naturali in alios transire potest 509. in quo indoles patrie potestatis consistat 510. seqq. ei in liberis respondet obligatio 517. quomodo tollatur 518. obligatio Parentum 519. seqq. ejus duratio 521. seqq. officia Parentum & liberorum 524. seqq.

PHILAUTIA.

Est fundamentum juris naturalis ex parte 78. n. 3. 4. 5. Philautia adventitia 79. n. 6. an homo erga seipsum obligari possit & an illa obligatione opus 109. 110. ex quo fonte philautias studium derivandum d. l. n. 2. quid homo sibi debeat ratione animi 111. 112. corporis 113. vite 114. seqq. aliorumque bonorum d. l. n. 2. 3. 4. in quantum philautia Socialitati preferenda 119. 120.

PHILOSOPHIA PRACTICA.

Vulgaris, ad scopum Jurisprudentiae divinae collineat, sed eum non assequitur, nam variis laborat defectibus, ac ipsa Ethices & Politices distinctio, illis annumerari debet P. 43. seqq.

POENA.

An jus naturale pœnis sanciat 79. n. 10. pœna homicidii juri divino positivo universali tribui solet 91. n. 10. in pœnis non est obligatio correalis 160. pœna auferit

INDEX.

fert quandoque dominium 310. pœna scopo attemperanda est 572. pœna quid 637. seqq. an delinquens ad pœnam obligetur 640. Imperans. tantum punit 641. jus puniendi Imperantis, ex pacto delinquentis dependet 643. pœnarum finis 644. 645. omnia delicta ab hominibus puniri non possunt aut solent 646. seqq. pœnarum habitus 648. juxta quam normam pœnæ definienda 649. seqq. solus delinquens puniendus 654. modus imponendi pœnam ibid. n. 2. qualis justitia, circa pœnarum impositionem observetur, inepta quæstio est ibid. n. 3.

POLYGAMIA.

Ejus prohibitio ferè ad jus divinum positivum universale refertur 91. n. 10. sed ex ipso jure naturali deduci posse videtur 485. seqq.

POSSESSOR.

Rei alienæ, eam domino restituere tenetur, ac variat ejus officium, prout sciverit vel ignoraverit, rem esse alienam, quod pluribus explicatur 313. seqq. in specie præfertur dominus aliis, qui cum possessore pacti sunt, quod tamen ex conventionem aliqua generali frustrare petitur 314.

PRÆSCRIPTIO.

Quid, est ex jure humano, sed omnibus Gentibus ferè usitato 311. est licita, nec tamen mero jure naturali ex certo temporis lapsu obtinet 312.

PRETIUM.

Dominia introducta consequitur, quid sit 328. quotuplex 329. 330. fundamenta pretii imponendi, duo sunt

INDEX.

331. pretii objectum 332. eadem sunt fundamenta pretii intendendi & remittendi, quæ imponendi 333. seq. ipsa pretii impositio 339. fit pacto & lege positiva 340. seqq. pretium eminens 346. seqq. impostura circa pretium occurrens 51 352. officium 353. ob pretii incertitudinem quævis læsio emendari non solet 360.

PROPAGATIO.

An & quomodo juxta jus naturale facienda 79. n. 5. libido jure naturali prohibetur 473. 474. necessitas propagandi quoad omnes & singulos spectari potest 475. seqq. propagatio per matrimonium fieri debet 478. seqq. officia circa propagationem, ex quibus fontibus summatim fluant 500.

PRUDENTIA.

Quid sit, circa quam rem occupetur, quomodo acquiratur, quam late pateat, quæque sint ejus species, an in eâ detur certitudo, illaque in formam artis redigi queat, tum quæ sint ejus opposita, ostenditur P. 71. seqq.

R.

RATIO.

Commune omnis notitiæ humanæ subjectum & principium, quando illa Recta dicenda P. 19. à Ratione unice dependet aptitudo admittendi legem 54. per eam promulgatur lex naturalis 84. 85. 86.

RATIO STATUS.

Est species prudentiæ, vera vel falsæ seu apparentis P. 85.

RE-

INDEX.

RELIGIO.

In quantum illa considerationis politicae & juridicae
P. 7. hominis natura est religiosa, ex quo fundamento,
aliqua juris naturalis pars fluit 78. n. 1. 2. religiosi-
tas adventitia 79. n. 6. religio naturalis male sociali-
zati subordinatur 89. 90. religio naturalis prolixius
exposita 92. seqq. in quantum actus externi sub illa
contineantur 105. ejus usus 106. sub quibus conditioni-
bus, religio sit vinculum societatum humanarum 107.
108. Cura religionis ad Imperium civile pertinet, &
quousque se hoc jus extendat 575. religio non subjacet
pœnis humanis 646. an ob religionis diversitatem, emi-
gratio alicui injungi queat 737.

S.

SERMO.

Quid, quæque ejus utilitas 242. officium sermoci-
nantium 243. plenius 248. seqq. sermonis vis significa-
tiva 244. seqq. affectiones 247. n. 4. 5. veritas, falsi-
loquium & silentium, in quantum pro virtutibus vel vi-
tiis habenda.

SOCIALITAS.

*Ab iis, qui eam juri naturali substernunt, neque sa-
tis explicari, neque probari solet* 78. n. 5. seqq. socia-
litis præcepta, quam late pateant 79. socialitas ad-
ventitia 79. n. 6 non est adequatum juris naturalis
fundamentum 79. n. 11. officia Deum & hominem i-
psam respicientia, exinde contorte repetuntur 88. 89.
90. 91. Præcepta socialitatis quotuplicia 151. 152. seqq.
quæque eorum præsupposita & connexio 241. falsæ con-
nexionis incommoda 447. socialitas nulla re gravius
affligitur, quam munerum abusu 730. 731.

INDEX.

SOLITUDO.

An hominis statum primævum, solitarium fingere liceat, & an illius fictionis, in probando juris naturalis fundamento, aliquis sit usus 4. an status ille solitarius recte naturalis dicatur 452.

SORS.

An in casu necessitatis adhiberi queat 143. 144. Sors decisoria quid, sub ea comprehenditur consultatoria, ac utraque opponitur divinatoria, quam nonnulli cum precedentibus confundunt 384.

SPONSIO.

Quid 385. quousque de rebus certis ineatur 386. Sponsio notat etiam pactum, à ministro summæ potestatis, sine hujus consensu, de publico negotio initum 720. seqq.

STATUS.

Est vel naturalis vel adventitius 79. n. 8. status naturalis & civilis, quoad violentam defensionem, distinguere debet 124. status quid 448. est naturalis vel adventitius 449. varia naturalis consideratio 450. in ordine ad Deum 451. ad hominem ipsum 452. ad alios 453. status naturalis existentia 454. libertas 455. ejus & status civilis comparatio, male & recte instituta 456. seqq. modus litigandi in statu naturali 462. seqq. status naturalis est socialis, sed parum tutus 471. seqq.

STATUS INTEGRITATIS.

Non est fundamentum juris naturalis, an ejus, in tradendo jure naturali, sit habenda ratio, ac præcepta natu-

INDEX.

naturalia specialia, inde repeti possint & debeant, & num ejus disquisitionis aliqua utilitas 7. 8. 9. idem est juris naturalis fundamentum in statu integro & corrupto 79. n. II. ad cognoscendum juris naturalis Autorem, status integer nihil confert 82. 83.

SUBJECTIO.

Capacitatem recipiendi legem, non efficit 54. subjectio civilis quid 562. subditus & civis aliquando conveniunt, aliquando differunt 563. civium varietas 564. 565. subditorum mores recte formandi 619. an subditus sine peccato injustam legem exequi possit 629. in subditorum bona, dominium Civitati nonnunquam competit 676. subditorum officia 723. seqq.

SUCCESSIO.

Ab intestato 302. seqq. testamentaria 305. facultas testandi naturaliter hominibus competit 306. testandi modus 307. circa quem leges humane observande 308. per aditionem heredis, exitum sortitur voluntas defuncti tacita vel expressa 308.

SUMMUM BONUM.

Virtutem consequitur, nec recte disciplinarum moralium centrum constituitur 74. n. 3. Ei opponitur summum malum, quod perinde, ut bonum, commemorari debet 75. n. 3.

SUPERBIA.

Quid & quotuplex 179. seqq. ab ea debet discerni generositas 181.

INDEX.

T.

THEOLOGIA.

*Quid & quotuplex præcipuè quoad Christianos P. 5.
seqq.*

V.

VIRTUS.

*Ejus indoles 67. varietas 68. seqq. usque ad 74. ma-
teria & consecrarium 74. n. 3.*

VIS.

*In quantum pactis obsit 222. seqq. impedit juramen-
ta 268.*

VITIUM.

*Ejus natura, varietas, materia, consecraria & con-
traria 75.*

S. N. G.

